



Yus Papí: Shuarjai Yus Yamaram Chicham Najanamu

New Testament in Shuar

Contents

MATEU	1
MÁRKUS	44
RÚKAS	71
JUAN	117
TÚRAMU	149
RÚMANAM	192
1 KURINTIUNAM	209
2 KURINTIUNAM	226
KARASEANAM	238
IPISIUNAM	245
JIRIPIUSNUM	251
KURUSENAM	255
1 TISARÚNIKIANAM	259
2 TISARÚNIKIANAM	263
1 TIMIUTÉUN	266
2 TIMIUTÉUN	271
TITIUN	275
JIRIMIÚNKAN	278
ISRAERNUM	279
SÁNTIAK	292
1 PÍTIUR	297
2 PÍTIUR	303
1 JUAN	306
2 JUAÑ	311
3 JUAÑ	312
JÚTAS	313
APUKARÍPSIS	315

Yus Papí: Shuarjaj Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

© 2012, Wycliffe Bible Translators, Inc. All rights reserved.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0312-9

PDF generated on 21 Sep 2016 from source files dated 21 Sep 2016

fb10d1f0-e2d5-5d8e-8a74-10846708c857

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

Yúsan Shiir Chichamēn MATEU aarmia nu

*Jesukrístu weatrí
(Rúkas 3.23-38)*

¹Jesukrístu weatrí ju áiniawai. Tura ashí nankaamas ti uunt weat Tawitcha Apraámsha áiniawai. ²Apraáma uchirí Isak. Tura Isaka uchirí Jakup. Jakupa uchirísha Jutá ni yachijíjái. ³Tura Jutá uchirín Páresan tura Sarancha Tamar jurermiayi. Páresa uchirísha Esum, nuna uchirísha Aram. ⁴Nuna uchirísha Aminiatáp. Nuna uchirísha Nasun. Nuna uchirísha Sarmun. ⁵Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. ⁶Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷Sarumúnka uchirí Rupuam. Nuna uchirísha Apías. Nuna uchirísha Asa. ⁸Asa uchirísha Jusapát. Nuna uchirísha Juram. Nuna uchirí Usías. ⁹Usíasa uchirí Jutam. Nuna uchirí Akas. Nuna uchirí Esekías. ¹⁰Esekíasa uchirí Manasés. Nuna uchirí Amun. Nuna uchirí Jusías. ¹¹Jusíasa uchirí Jekunías ni yachí armia nujái. Nuí Papirúnianmayá shuar Israer shuaran mesetjái nupetkar Papirúnia nunkanam achirar júkiarmiayi.

¹²Nu ukunmanka Jekuníasa uchirí Saratiár akiiniamiayi. Tura nuna uchirí Surupapír. ¹³Surupapíra uchirí Awiut. Nuna uchirí Iriakím. Nuna uchirí Asur. ¹⁴Asura uchirí Satuk. Nuna uchirí Akim. Nuna uchirí Eriut. ¹⁵Eriuta uchirí Ereasár. Nuna uchirí Matañ. Nuna uchirí Jakup. ¹⁶Jakupa uchirí Jusé Marí áishriya nu. Marisha Jesusan jurermiayi. Nu Jesuska shuaran uwentikiartin asa Kristu tu anaikiamuiti.

¹⁷Tuma asamtai Apraámnumiá Tawitnium Jesusa weatrí katurse (14) áiniawai. Tawitniumiasha Papirúnianam jukimiumma nuísha katurse weat áiniawai. Papirúnianam jukimiummayasha Kristunam ataksha katurse áiniawai.

*Jesukrístu akiiniamu
(Rúkas 2.1-7)*

¹⁸Jesukrístu akiiniamu júnis ámiayi. Ni nukurí Marí Jusejái anajmanairuyayi. Tura tsaníatsajín Yusa Wakaní ajaprumtikiamiayi. ¹⁹Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniatsatniun wakerimiayi aents nekainiatsajín. ²⁰Nuna tu enentáimia pujái, mesekranam Yusa suntari tarí chicharuk tímiayi “Juséá, ame weatrum Tawitchakait. Tuma asam Marijjái nuatnaikiatin ashamkaip. Uchin jurertatna nuka Yusa Wakaníniuiti. ²¹Uchin áishmankan takustatui tura nuna naari JESUS anaikiattame. Ashí ni shuarín ni tunaariya uwentikiartin asa Jesus anaikiatniuiti” tímiayi.

²²Yus ni etserniurijjái yaunchu timia nu uminkiatu tusa nu túrunamiayi. Júná áamtikramiayi:

²³“Nuwa natsa ajapruktatui tura uchin takustatui. Nuna náari sha Emanuér anainiaktatui.”
Tu áarmaiti.

Emanuérsha nu chichamnum “Yus ijjái pujuwiti” tawai.

²⁴Jusha mesekranmayá shintiar Yusa suntari timia núnisan Marin nuatkamiayi.

²⁵Tura uchin júreatsajín tsanínchamiayi. Tura jurermatai uchin Jesus anaikiamiayi.

2

Ti neka apach Jesusan eqakarmiania nu

¹Jutía nunkanam Pirín pépru ana nuí Jesus akiiniamiayi. Nuísha nú nunka akupniuri Irutisauyayi. Akiiniamtai ti neka apach nantu tátainmaaniya Jerusarén péprunam táarmiayi. ²Taar inintruiniak “¿Israer shuara úunt akupniuri tuj akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusarénnumia shuarsha antukar nusháa enentáimpramiayi. ⁴ Irutis nuikia ashí Israer-patri uuntrincha tura yaunchu akupkamun jintinniuncha utsukarmiayi. Tura Kristu akiiniatiurin inintrusmiayi. ⁵ Tutai chichainiak “Jutía nunkanam Pirin pepru ana nuí akiiniatiuuti, tiarmiayi. Yaunchu Yúsnan etserin tu áaruuti:

⁶ “Jutía nunkanam, Pirin pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar áarmatai, péñker wáinkiatwai,” tawai Yus.” Tu tiarmiayi.

⁷ Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiayi. ⁸ Nuyá Pirinnum akupeak “Nuí werum uchi péñker inintrusum wáinkiatarum. Tura wáinkiarum ujatkararum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi.

¹¹ Jeá wayawar uchincha ni nukurí Maríjiaí wáinkiarmaniayi. Tura uchin tikishmatrarmiayi. Nuyá ni kajuntrían kurincha, mirá kunkuinniaasha, chíkich kunkuinniaasha súsarmiayi.

¹² Nuyá mesekranam Yus “Irutisajini weerap” tutai chíkich jintianam wakеткиarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjiaí Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukuríjiaí Ejiptunam jukimiayi. ¹⁵ Irutis jáatsain nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun utsukmajai.”
Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananika yajá waketrant nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti úutainiak uur ajainiwai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi. ²⁰ “Uchin máataj tiarmia nuka jákarai. Yamaikia ataksha uchi ni nukuríjiaí jukim Israer nunkanam wakеткиtia” tímiayi. ²¹ Tutai Jusé nantaki uchincha nukuríjiaí jukin Ejiptunmaya Israer nunkanam wakеткиmiayi. ²² Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian aránkámiayi. Mesekranmasha ujakma asa nuí pujutsuk Kariréa nunkanam wémiayi. ²³ Nuí jeá Nasarét péprunam pujusmiayi. “Nasarénumia átatui” Yusnan etserin yaunchu tu etserkamu nujaí uminkiamiayi.

3

Imiakratin Juan atsamunam etserkamiania nu

(Márkus 1.1-8; Rúkas 3.1-9, 15-17; Juan 1.19-28)

¹ Nuyá imiakratin Juan Jutía nunkanam aents atsamunam etserki támiayi. ² “Enentáim yapajáatarum. Tsawant ishichik ajasai Yus juí akupin ajastin.” Tu etserkamiayi.

³ Nú Juanan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentái Uunta jinti iwiarturatum tura naka awajsatarum” tawai.” Tu áarmiayi.

⁴ Nu Juansha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chiníjiaí yúuyayi. ⁵ Tura Jerusarén péprunmaya shuarsha tura ashí Jutía nunkanmaya shuarsha Jurtañ entsanam matsamiarmia nú shuarsha mash Juánkan

tariarmiayi ni chichamen anturkatali tusar. ⁶Tura ni tunaarjin paant etserkarmatai Juan Jurtañ entsanam imiainiarmiayi.

⁷Juañsha Pariséuncha Satuséuncha imiatti tusa wininian wáiniak tímiayi “Napia áa-niutirmincha, ¿ya atumnisha ti asutniátniunmaya uwempratniuncha ujatmakmarum? tímiayi. Asutiátin tsawant ishichik ajasai. ⁸Tuma asamta enentáim yapajíamuitkiuinikia péñker wekaamurmijíai paant iniakmatarum. ⁹Atumsha “Iikia Apraám weeaitji” tu enentáimtumasaairap. Nujai uwemprashtatrum. Yus wakerakka ju kayan Apraáman tiranki najankainti, tímiayi. ¹⁰Numi ajaktinia áintsañ kampuwarin jacha atuttsamuiti. Tura numi péñker nereatsna nuka tsupikia jinium apeamu ártatui. ¹¹Wikia aya entsajain imiajruma atumi enentái yapajíawakrumin. Antsu winia ukuruj winiana nuka péñker awajtamzataj tusa imiantinia áanis tura jía áanis Yusa Wakanin enketramprattame. Wijíai nankaamantu asamta wikia tsuntsumpruan ni sapatriniksha atitrachminiaitjai. ¹²Aruusa nerejai túruinia áintsañ átatui. Awajtiutairin achikiuiti tura nujai saepen awajtittiwai. Tura neren péñker ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juan.

*Juan Jesusan imiaimiu amia nu
(Márkus 1.9-11; Rúkas 3.21-22)*

¹³Nuyá Jesus Kariréa nunkanmaya winis Jurtañ entsanam támiayi Juan imiatti tusa.

¹⁴Juañsha emka nakitiak Jesusan tímiayi “Ame winia imiatminiaitme. Túrutamniaitimesha ¿urukamta winia tarutniunm?” tímiayi.

¹⁵Tura Jesus tímiayi “Ántsañ asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. ¹⁶Tura Jesus imiani entsaya jíinkimtai nayaimpí uranmiayi. Tura Yusa Wakaní yámpitsa áintsañ Jesusan tarimiayi. Niisha wáinkiamiai. ¹⁷Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

4

*Uunt iwianch Jesusan anankataj tímiania nu
(Márkus 1.12-13; Rúkas 4.1-13)*

¹Nu túrunamtaí Yusa Wakaní Jesusan iwianchjai nekapmamtiktsattsas aents atsamunam jukimiayi. ²Nuñ kuarenta (40) tsawant, káshisha tsawajsha yurumtsuk pujak tsukarmiayi. ³Nuñ uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatak najanata.”

⁴Tutai Jesus tímiayi “Yus-Papinium áarmaiti:

“Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵Tutai uunt iwianch Jerusarén péprunam jukí Yusa Uunt Jee cháikjin iwiak ⁶tímiayi “Nekas Yusa Uchirínkiumka juyá akaikim iniaata. Kame Yus-Papinium áarmaiti:

“Yus ni suntarñ akatar akúptúrmaktatui. Nawemin kayanam ajiintsumniñ wenkurmaktatui” tawai” tímiayi.

⁷Tutai Jesus tímiayi “Núnisan Yus-Papinium áarmaiti:

“Ame Úntrum Yus “Nekapsataj” tiip” tawai” tímiayi.

⁸Ataksha uunt iwianch naint yakí wájakmanum iwiaakmiayi tura nuyá ashí nunkanmaya péprun shiira nuna iniaktusmiayi. ⁹Tura tímiayi “Winia tikishmatrurakminikia juna mash amatstajai.”

¹⁰Tutai Jesus tímiayi “Werumta, uunt iwianchi. Yus-Papinium aarma awai:

“Ame Úntrum Yúsak tikishmatrata tura Niñki shiir awajsata” tawai” tímiayi.

¹¹Tutai uunt iwianch Jesusan ikiuak wémiayi. Túramtaí Yusa suntarñ tariar atsumamurñ súsarmiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

¹²Juan sepunam enketui taman antuk Jesus Kariréa nunkanam wémiyai. ¹³Tura Nasarét péprunam pujutsuk Kapernáum péprunam we pujusmiyai. Kapernáumsha Kariréa antumianka kánmatkarin pujumiyai. Ti yaunchusha Jakupu uchiri Sapurúnsha tura Niptarísha nu nunkanak nuí pujustaitsar achikiaryuyai. ¹⁴Jesus nuna túramtai yaunchu Yúsnan etserin Isayas aarmia nu uminkiamiyai. Juna áarmiayi:

¹⁵“Sapurúnsha Niptarísha nayaantsanam tjiuch Jurtañ entsa amainini nunkan achikiarmiayi. Nuka Kariréaiti Israer-shuarcha matsatania nuí. ¹⁶Nu aents kiritniunam pujuiniayatan ti tsáapninian wáinkiarimiayi. Jákatniunam pujuiniái tsáapin tsáapnirmiayi.” Tu áarmaiti.

¹⁷Nuyá Jesus étseruk tímiayi “Tunaarum enentáimturum enentáim yapajíatarum. Ju nunkanam Yus akupkatin tsawant ishichik ajasai.”

Jesus kuatru aents namakan achinian ni unuinimurí ajasarat tusa achikmiania nu (Márkus 1.16-20; Rúkas 5.1-11)

¹⁸Jesus Kariréa antumianka kánmatkarin wesa jimiará áentsun nuámtak yáchinniun wáinkíamiyai. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajái nankiak yujaarmiayi. ¹⁹Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achífarmena núnisan shuaran-eau awajsatjarne.” ²⁰Tutai ni nekarin ikiukiar Nin nemariarmiayi.

²¹Nuyá ishichik wésan ataksha nuámtak yachinniun wáinkíamiyai. Jakupu Juanjai mai Sepetéu uchirí ármiai. Niisha kanunam enkemsar ni nekarin ni aparíjái iwiariniak pujuriarmiayi. Tura Jesus “Nemartusta” tutai ²²nu chichamaik kanuncha tura aparíncha ikiukiar Jesusan nemariarmiayi.

Jesus untsurí shuaran jintintiamiania nu (Rúkas 6.17-19)

²³Ashí Kariréa nunkanam Jesus Israer-shuar iruntainiam etserki wémiyai. Yus ju nunkanam akupkatin chichaman etserkamiayi. Tura untsurí sunkurjai jáinian ashí tsuármiai. ²⁴Ashí Siria nunkanam Jesus tsuákratman nekaawar ashí nánkamas sunkurjai wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakanrukuncha, wáuruncha, tampemaruncha Jesus tsuármiai. ²⁵Tura untsurí shuar Jesusan nemariarmiayi. Kariréa nunkanmayasha, Tekapurisnumiasha, Jerusaréñ péprunmayasha, Jutía nunkanmayasha, Jurtañ entsa amainiyasha Jesusan nemariarmiayi.

5

Náinnium Jesus etserkamu

¹Jesus untsurí shuar káunkarun wáiniak náinnium waka nuí pujusmiyai. Tura ni unuinimurísha taar pujusarmiayi. ²Nuyá Jesus júnis unuiniamiyai.

Warastin ainia nu (Rúkas 6.20-23)

³“Ame wakanim atsumamu nekamarum kakaram ajasrum warastarum. Tuma asarum Yus akupeemunam pachiinniuitrume. ⁴Kúntuts pujarum nu warastarum. Yus atsan-tamprattarme. ⁵Péechach enentáimtumarmena nu warastarum. Yus ashí nunkan amastatrume. ⁶Eseer wekasataj tusa aya kitiamarum nu warastarum. Yus imiktamprat-tarme. ⁷Waitnenkratniutiram warastarum. Yus waitnentramptrattarme. ⁸Pénker enentáimniutiram warastarum. Yus wáinkíattarme. ⁹Chicham iwiarin árum nu warastarum. Yusa uchirí turamartatui. ¹⁰Pénker túrakrumin yajauch awajtamainiakui warastarum. Yus akupeemunam pachiinniuitrume. ¹¹Wí shuar asakrumin katsekramainiakui, itit awajtamainiakui, tura ashí tsanumprutmainiakui warastarum. ¹²Núnisan yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme’ tímiayi.

Ju nunkanam átum tsáapninia áintsarum tura weeya áintsarum árum (Márkus 9.50; Rúkas 14.34-35)

¹³ ‘Átumka ju nuŋkanam wee ana áintsan̄ketrume. Tura wéeaitai jeakchaitkiun̄ka míchuiti. ¿Nusha itiuŋ yuámniak ati? Antsu ántraiŋ. Tuma asamtai āa najatai tepet tusar ajapash̄tinkiait’ t̄imiayi.

¹⁴ ‘Átumka ju nuŋkanam shiripkia áintsan̄ketrume. Náinniumka pepru úumkachmini-aiti. ¹⁵ Núnisan̄ shiripik ekeemakam kajun̄num en̄keatsme. Antsu yakí sukúatsmek ashí jeanam ana nu paant atí tusam. ¹⁶ Núnisan̄ atumsha Yusjaj̄ péŋker túramu paant atí. Tura ashí aents nuna iisar niisha Yus Apan shiir awajsartatui’ t̄imiayi.

Yaunchu akupkamun pachis Jesus unuiniamiania nu

¹⁷ ‘Muisais akupkamuncha tura yaunchu Yúsnan etserin etserkarmia nuna ántar awa-jattawai” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsaj̄n nu akupkamu ishichkisha yapajniáshtatui. Nayaimpisha tura nuŋkasha tuke amúatsaj̄n nu akupkamusha amuukash̄tatui. ¹⁹ Nu asamtai shuar chikichik akupkamun, yúpichuch ana nunaksha, umirchakka tura ch̄kich shuaran umirkashtinian unuinakka Yus nekas akupin paant ajastatna nūj nú shuar uunt áchattawai. Antsu ashí shuar akupkamun umíana nu tura ch̄kich shuaran umirkatniun unuiniana nusha Yus nekas akupin paant ajastatna nūj, nu shuarka uunt átatui. ²⁰ Tuma asamtai Yus akupeamunam pachiinkiat̄aj̄ tákumka Pariséuj̄aj̄ nan̄kaamas tura akupkamu jintinniuaj̄ nan̄kaamas eseira wekasatniuitrume’ t̄imiayi.

Kajeamun pachis Jesus unuiniamiania nu

(Rúkas 12.57-59)

²¹ ‘Yaunchu tiniu armia nu ántichukaitrum: “Man̄kartuawairap. Man̄kartana nuka asutniátniuiti” tiniu ármiai. ²² Tura Wis̄ha tájarme: Shuar ni yach̄in aya kajerakka nusha asutniátniuiti. Ni yach̄in kátseka nuka akupniunam junaktiniaiti. Tura ni yach̄in “netsé” tákun̄ka j̄in̄ium akupnakminiaiti.’

²³ ‘Tuma asamtai Yus susataj̄ tusam wakerakum tura ame yatsum ámin itit enentáim-turman enentáimpramka, ²⁴ suamu nūj ikiuakum emka ame yatsum werim nij̄jaj̄ iwiarata. Turam waketkim Yus suam nūj susata.’

²⁵ ‘Shuar úuntnum júramkuin̄kia jintian̄ wesam nij̄jaj̄ iwiarata úuntnum ejetamsaj̄n. Túrachakminkia úuntnum surutmaktatui tura niisha suntarnum surutmaktatui tura sepunam en̄ketmattawai. ²⁶ Tura nekas tajai, nūj en̄kemamka ashí rearchisha akik-machkumka j̄finkishtatme’ t̄imiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawai.” ²⁸ Tura Wis̄ha tájarme: Shuar nuw̄an tsanirmataj̄ tu iiska nūj̄kia ni enentáin̄ tsanirmayi.’

²⁹ ‘Tuma asamtai ame j̄jimi tunaanum yajauch awajtamkuin̄kia ukuin̄kiam yajá ajapata. Ashí ame ayashim j̄in̄ium esaatsaj̄n aya chikichik ayashmi muchitmar̄i emesratin péŋkeraiti. ³⁰ Ame ewejmesha untsuurmetiat tunaanum ajunmakuiŋkia tsupikiam yajá ajapata. Ashí ame ayashim j̄in̄ium esaatsaj̄n aya chikichik ayashmi muchitmar̄i emesratin péŋkeraiti.’

Nuw̄a ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ ‘Núnisan̄ yaunchu tiniu ármiai: “Shuar ni nuar̄in̄ ajapatniun wakera nuka papí najana susati.” ³² Tura Wis̄ha tájarme: Shuar ni nuar̄in̄ tsanirmachun ajapeakka nuw̄an tsanirmamtikiaiti. Tura ajapamuj̄aj̄ nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisan̄ yaunchu tiniu ármiai: “Yusa naarī pachisan turattajai” tákumka nekas takamtsuk umiktiniaitme.” ³⁴⁻³⁷ Tura Wis̄ha tájarme: Áyatik “Ee” tákumka tura “Atsá” tákumka wáitruŋtsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiaiti. Ti nekas tajai tusam nayaim pachischatniuitme. Nuka Uunt Yus pujutainti. Nuŋkasha pachischatniuiti Yusa tarimtaiŋ

asamtai. Jerusaren péprusha pachischatniuiti Uunt Akupin pujutai nuĵ asamtai. Múukmehsha pachischatniuitme. Chikichik intiashkeshha pújusha mukusasha awajsachminiaitme. Áyatik nekasa nu páchitsuk titiá.'

Iikkiatniun pachis Jesus unuiniamiania nu
(Rúkas 6.29-30)

³⁸ 'Yaunchu tiniu armia nu ántichukaitrum: "Shuar máanikiar ĵiĵ apujtukka niisha apujtuktiniaiti. Tura naĵ akarkasha ni najsha akarkatniuiti." ³⁹ Tura Wissha tájarme: Yajauch shuar taritirairap. Antsu ame yapimin iĵiutmamtai áatú yapimsha tsankatkata. ⁴⁰ Tura pushirmin jurutramkitiaĵ tákuisha sakurmesha susata. ⁴¹ Tura káarkancha chikichik kirumitruk jurutkitia túramkui ámeká jimiará kirumitru ejeeta. ⁴² Seatmana nu susata. Ikiatmakuisha páchitsuk ikiasta.'

Nemasrĵ aneetniun Jesus unuiniamiania nu
(Rúkas 6.27-28, 32-36)

⁴³ 'Núnisaĵ tiniu armia nu ántichukaitrum: "Ame shuarum aneeta tura nemasrumka kajerkata." ⁴⁴ Tura Wissha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekrainiania nu tura yajauch awajtamainiana nusha Yus áujtusarta. ⁴⁵ Atumsha nu túrakrum atumĵ Aparĵ nayaimpiniam pujana nu túrana áitkiasrumek túrarme. Iista, Yus yajauch shuarnumsha péŋker shuarnumsha tsáapin awajmatkiatsuk. Núnisaĵ yumincha yajauch shuar puĵiini-amunmasha péŋker shuar puĵiiniamunmasha yútumtiktsuk. ⁴⁶ Aya atumin anenmainia nuke aneakmesha ĵyaki akirmakat? Yajauch shuarsha nuna túrin ániawai. ⁴⁷ Aya ame yatumek shiir chichaakmeká ĵwarĵ péŋkerak túram? Yus-shuarchasha nuna túrin ániawai. ⁴⁸ Nu asamtai atumĵ Aparĵ Yus nayaimpiniam pujana nuĵai métek ti péŋker átiniaitrome.'

6

Péŋker túratniun Jesus unuiniamiania nu

¹ 'Ashĵ íimiainiaĵ aya shuar iirsarti tusarum Yusna nu takasairap. Tu takaakrumni-inkia Yus Apa nayaimpiniam pujana nu penké akirmakchattarme. ² Nu asamtai shuar atsuma nu yaiyakmeká ashĵ shuar uĵakairap. Anaŋkartin ainia nuka iruntainmasha tura pepru ĵintĵi wekasasha ashĵ íimiainiaĵ shiir túrajai tusar nuna túrin ániawai. Ĵunasha "péŋker túrawai" tu enentáimturarti tiniu ásar Yus akíatsaĵ aya tu enentáimturmajain akinkiaruiti, nekasa tajai. ³ Antsu átumka atsumainia nu yaiyakmeká penké úukam túrata. Chikichkisha nu yáinman nekaashti. ⁴ Úukam túrakminkia ame Apa Yus uukman wainia nu, nuna akirmaktatui.'

Yus áujsatniun Jesus unuiniamiania nu
(Rúkas 11.2-4)

⁵ 'Atumsha Yus áujeakrumsha ántar chichamtin ainia núnis áujsairap. Nu shuarka iruntainmasha tura pepru ĵintĵisha shuar iirsarti tusa wajakar Yusán áujin ániawai. Nekasan tájarme, Yus akíatsaĵ aya nu iismajaĵ akinkiaruiti. ⁶ Tura ame Yus áujeakmeká ame kuárturmin wayam waiti epenim nuĵ amek ame Apa Yus áujsata. Nuna ame Apa Yus úuka túramu waitma asa akirmaktatui.'

⁷ 'Yus áujeakmesha ántarum esaram áujsaip. Yusán nékainiatsna nuka "Esaram áujeakuinkia Yus anturtuktatui" tu enentáimainiawai. ⁸ Niiĵiaĵ métek ajasairap. Átumka seatsrumniĵ Yus Apa átum atsumamun nékawai. ⁹ Nu asamtai Yus áujkuram ĵúnis tĵtiniaitrome:

'Aparu Yus, nayaimpiniam pujamna nu, ii Aparĵnme. Ame náarmincha shuar ántar pachischarti. ¹⁰ Ashĵ áentsnum ame akupkatin tsawantrum wari jeati. Ame wakeramuram nayaimpiniam umikma ana núnisaĵ ĵu nunkanmasha uminkiatĵ. ¹¹ Aparu, ii yurumkarĵ ashĵ tsawant amasta. ¹² Tura winia nemasrun tsankurajna núnismek, Aparu, winia tunaaru tumashrĵsha tsankurturta. ¹³ Tunáa wakeruktin

tsaṅkatrukaip. Antsu ashí tunaanumiá uwentikurta. Tuke ashí aents akupkamniáitme. Núnisam Amesha tuke ti kakarmaitme. Tura ti shíiraitme. Tuma asakmin seajme. Nuke atí.'

¹⁴ 'Amesha chíkich shuar yajauch awajtamka nu tsaṅkureakminkia Yus Apa nayaimpiniam pujana nu amincha tsaṅkurtamprattawai. ¹⁵ Tura chíkich tsaṅkureachkumniṅkia Yus Apasha ame tunaarmincha tsaṅkurtamprashtatui.'

Jjiarmatniun pachis Jesus unuiniamiania nu

¹⁶ 'Jjiarmarum Yus áujkurmesha wake mesekrum susuntrairap. Anaṅkartin shuar chíkich shuar "jjiarmaiti" tu enentáimtursarti tusa tuma áiniawai. Nekasan tájame, Yúska akiatsaiṅ aya nujai akikma áiniawai. ¹⁷ Antsu ámeká ijiarmamsha péṅker temashmaram péṅker jaupmitia. ¹⁸ Shuar ijiarmaiti tu enentáimturmasaraiṅ. Aya Yus Apak nekaattawai. Tura asa akirmaktatui.'

Kuítan pachis Jesus unuiniamiania nu

(Rúkas 12.33-34)

¹⁹⁻²⁰ 'Ju nuṅkanmaya kuit ikiaunṅkatniujai naṅkaamas nayaimpiniam kuit ikiaunṅkata. Juṅkia kayaá yúchakait tura mash meseatsuk. Tura kasasha wayá kasamtsuk. Antsu nayaimpinmaṅka kayaasha yuatsui tura mash meseatsui tura kasasha wayá kasamtsuk. ²¹ Kuítrum ana nuṅ enentáimtustatme. Tuma asam nayaimpiniam ikiaunṅkata.'

Ayashi tsáapnintrí

(Rúkas 11.34-36)

²² 'Ame jímiṅjai tsáapin amiṅ wayamniaiti. Tuma asamtai ame jíimi péṅkeraitkiuṅkia amiṅ tsáapin wayá tuke tsáapniiti. ²³ Antsu ame jíimi yajauchitkiuṅkia tsáapin amiṅ wayachmin asamtai tuke kiritin átatui. Núnisaṅ yajauchia nu wakerakmeká péṅkera nu ame enentáimiṅ wayachmin asamtai tuke kirit ájastatui. Nu kiritcha imiá yajauchiti.'

Yussha kuitsa máimtek enentáimtuschamniaiti

(Rúkas 16.13)

²⁴ 'Shuar jimiará úuntrjṅ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisaṅ átumka Yussha kuitcha máimtek enentáimtustin tujinkiattarme.'

Yus ni uchirín péṅker wáinkiaiti

(Rúkas 12.22-31)

²⁵ 'Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait. ²⁶ Chíṅkisha enentáimpratarum. Yaki nanamainiak yurumkan arakmainiatsui. Tura juuk yurumkan ikiuiniatsui. Tuma aiṅ Yus Apa nayaimpiniam pujana nú Yusak áyureatsuk. Atumsha chíṅkia nú naṅkaamaschakaitrum. ²⁷ Nu arantcha ti enentáimkiumsha ḷnujai tsakartatmek?'

²⁸ 'Nuikia ḷurukamtaí entsartincha timiá enentáimprum? Iistá, kukuṅsha takachuitiat tura najanchaitiat ²⁹ ti shíirmach áiniawai. Yaunchu uunt akupin Sarumún ti shiir iwiamniuitiat kukuṅja tímianchauyayi. ³⁰ Iis, nupa yamá tsakaawai tura kashin aents tsupikiar jinium epeenawai. Tuma aiṅ Yus ti shiir áentseatsuk. Nuna tura asa atumniasha nú péṅker waitmakchattawak. ḷUrukamtaí Yus nekas enentáimtatsrum? ³¹⁻³² Ju nuṅkanam ana nu pachikairap. Chíkich shuar, Yúsan nékainiatsna nu, wariṅ yuattajⁱ wariṅ umartatajⁱ wariṅ entsartatajⁱ nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atumamurmin nékawai. ³³ Tuma asamtai Yusjai shiir wekasatin tura Yus akupkamu ana nu umiktin emka enentáimsatarum. Túrákrumniṅkia atumamurmin Yus suramsattawai. ³⁴ Kashin átatna nujai itiurchat enentáimsairap. Kashinkia nusháa itiurchatrijai tsawarchattawak. Yamái tsawanta jujai máakchakait.'

*Chíkich sumamtikiawairap**(Rúkas 6.37-38, 41-42)*

¹Chíkicha tunaari ti enentáimtusairap. Núnisañ Yus atumí tunaari iirtamsashtatui. ²Chíkich wárik sumamtikiatin enentáimkiumniñkia Yus núnisañ sumamtikramattawai. Tura ame chíkicha túramurí nekapmarmena nú nekapkajaiñ amincha nekapmarmattawai. ³Tuma asamtai žitiurtsuk atumi jiiñ numi enketna auk úitskesha atumi yachí jiiñ tsuat enketusha iyarum? ⁴Ame jiiñ numi tuke enketajsha žitiurtsuk ame yatsumi jiiñ tsuátan jurustajme tame? ⁵Ántar shuará, ame yáintaj tákumka emka ame jiiñ numi enketna nu jusata. Nuyá paant iistatme yatsumi jiiñ tsuat enketna nu jurustin.'

⁶'Ti shiira nuka yawá súsashtiniati. Nuna nakitrar amincha esatmichartimpiash. Kuítrumsha kuchi súsashtiniati. Aya najatrachartatuak.'

*Yus seakmin suramsattawai**(Rúkas 11.9-13; 6.31)*

⁷'Yus seakrumin suramsattawai. Eakrumka wainkiattarme. "Winiajai" tákurmin awántiamattarme. ⁸Seana núnaka suíniawai. Eana nuka wáiniui. "Winiajai" tuinia núnaka awáiniawai.'

⁹'Ame uchiram apatkun seatmakui žkayaash súsaintiam? ¹⁰Tura namakan seatmakui žnapíash súsaintiam? ¹¹Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.'

¹²'Júnaka Muisaissha Yúsnan etserniusha akupenawai: "Chíkich ámin túrutatí tusa wakerakmeke amesha núnismek túratá." Tu akupenawai.'

*Wañkaram jintiasha tura yupikiach jintiasha**(Rúkas 13.24)*

¹³⁻¹⁴'Wañkaram jintia awai. Wayatniusha yúpichuchiiti. Nujsa untsurí wáiniawai. Tura nusha meñkakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurjsha yupikchiiti. Nuñ ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeke yupipitin jintia achiktarum.'

*Nerejai numi nekaatainti**(Rúkas 6.43-44)*

¹⁵'Aneartarum. Wáitruiniak "Wi Yúsnan étserjai" tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawa áinis áiniawai. Pátatek shiir chíchainiawai tura ni enentáin yajauch piakuiti. ¹⁶Atumsha túramujai nin nekaatniutrome. Naranmayá shuiya júukchamniati. žTsachiksha kushinškiapen nerektatuak? ¹⁷Núnisañ péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸Péñker numi yajauchin nereatsui. Núnisañ yajauch numi péñkeran nereatsui. ¹⁹Yajauch numi ajakar tsupirar jinium apeashtinkiait. ²⁰Tuma asamtai wáittrin ainia nuka túramujai nekanattawai.'

*Ashikia Yus akupeana nuñ jeachartatui**(Rúkas 13.25-27)*

²¹'Aya winia Apar nayaimpiniam pujana nuna wakeramurjñ umirin ainia nuke Yus akupeamunam pachiinkartatui. Chíkichka "Uuntá, Uuntá" turutainiyat nayaimpiniam jeachartatui. ²²Amuukatin tsawant jeamtai untsurí turutiartatui "Uuntá, Uuntá, ame náaram pachisar ashí nuñkanam etserkachmakají. Ame náarmesha pachisar yajauch wakancha jiki akupkamji. Tura ame náaram pachisar aentsti tujintiamu túramji" turutiartatui. ²³Nuñ chichainiakui "Werumtarum. Penke nékachuitjarme. Aya yajauchitrome" títiatjai.'

*Péñker ukurma tura yajauch ukurma**(Rúkas 6.47-49; Márkus 1.22)*

²⁴ “Shuar winia chichamprun antuk umirkaṅka nu shuar ti péṅker enentáimniuiti. Niisha ju shuarjái méteketete. Jeá jeamuk kayanam ukurmai. ²⁵ Tura yumi ti yutuk entsa nujanṅkruamai tura nase ti kakaram umpuimiai. Túmainṅ pukukachmai ni ukurmariṅ kayanam ukuamu asantai. ²⁶ Tura shuar winia chichamprun antuk umirtukchaṅka ju shuara núnisanṅ enentáimchaiti. Jeá jeamuk náikminiam ukurmai. ²⁷ Tura yumi yutuk entsa nujanṅkruamai tura nase ti kakaram umpuimiai. Túmakui jeá mash saanaki iniaamai” tímiayi Jesus.

²⁸ Jesus nuna tinia amukmatai ashí shuar ti enentáimprarmiayi. ²⁹ “Yusa kakarmaríjiai unuitiamtsujik. Israer-shuara jintinniurṅkia núnis unuiniainiatsui” tiarmiayi.

8

Jesus tunamarun tsuarmiania nu
(Márkus 1.40-45; Rúkas 5.12-16)

¹ Jesus muraya támtai untsurí shuar Nin nemariarmiayi. ² Nuṅ shuar tunamaru Jesusan jearin tikishmatramiayi. Tura tímiayi “Uuntá, wakerakmekka tsuáramniaitme.”

³ Tutai Jesus uwejéjái antinṅ “Wakerajai. Péṅker ajasta” tímiayi. Tutai tunamaru ni tunarmararí péṅker ajasmiayi. ⁴ Tura Jesus tímiayi “Pai, péṅké etserkaip. Áyatik Israer-patrí iniakmamsam Muisais timia nu susata ashí shuar nekaawarti tusam.”

Jesus suntara uchirṅin tsuarmiania nu
(Rúkas 7.1-10)

⁵ Jesus Kapernáum péprunam wayamtai apachi suntara kapitíántrí Nin tarimiayi. ⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jesussha “Ayu, winin tsuartajai” tímiayi.

⁸ Tutai kapitíán tímiayi “Uuntá, Ame ti nanṅkaamaku asam winia jearuí wayachmini-aitme. Áyatik “Péṅker ajásti” tákumin winia uchir péṅker ajatrustatui. ⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitá” tutai winiawai. Tura takartinian “Ju túratá” tutai umíawai.”

¹⁰ Kapitíán nuna tutai Jesus ti enentáimiuk Nin nemarkanian tímiayi “Nekasan tájarme, Israer-shuar Yúsan tímiatrus enentáimtin atsawai. ¹¹ Maa, yajayaṅ untsurí shuar Yus akupeana nuṅ jeawar Apraámjajisha Isakjajisha Jakupjajisha iruntrar yurumáwartatui. ¹² Tura Israer-shuar Yúsnum jeamnia áiniayat aa kiritniunam ajapnawartatui. Nuṅ ti úutin tura ti wáitsatin átatui.”

¹³ Nuyá Jesus kapitíánin chicharuk “Jeemiṅin waketitia. Nekas enentáimtusu asakmin uchiram péṅker ajatramsattawai” tímiayi. Túramtai ni uchirṅin nu chichamtaik péṅker ajatsamiayi.

Jesus Pitru tsatsarṅin tsuármiania nu
(Márkus 1.29-31; Rúkas 4.38-39)

¹⁴ Jesus Pitru jeṅ we Pitru tsatsarṅin tsuemujái jaa tepan wáinkiamiayi. ¹⁵ Tura ni uwején antṅimtai tsuemun michatramiayi. Tura nuwaṅ nantakin ashí ajamsarmiayi.

Jesus untsuríjainian tsuármiania nu
(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjái chicharas jiiiki akupiarmiayi. Ashí jáiniancha tsuáramiayi. ¹⁷ Yúsnan etserin Isayas “Ii pimpirmarṅincha ii sunṅkurṅincha jurutramkimiaji” yaunchu timia nu uminkiatu tusa nu túrunamiayi.

Jesus nemarsatin
(Rúkas 9.57-62)

¹⁸ Shuar untsurí Jesusan káutkarmatai “Entsa amain katintai” tímiayi.

¹⁹ Nuṅ Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

²⁰ Tutai Jesus tímiayi “Kujanchmasha ni wāarṅin takaktsuk. Chṅkisha pasunṅen takaktsuk. Tura Wi Yúsnumigitiatan tepestiniur atsawai.”

²¹ Nin nemarniusha tímiayi “Uunta, emka winia aparun iwiarsan ikiuuttajai.”

²² Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

*Nasesha entsasha Jesusan umirkarmiania nu
(Márkus 4.35-41; Rúkas 8.22-25)*

²³ Nuyá Jesus ni unuiniamurijiai uunt kanunam enkemámiayi. ²⁴ Nui nase ti kakaram umpuimtai antumian ti tamparintin ajasmiai. Tura entsa kanunam yaráná piákmiayi. Tuma ain Jesus kanunam kanar tepemiayi. ²⁵ Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumningkia jakattaji.”

²⁶ Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsanacha chicharkamiayi. Tutai mash miaaku ajasmiai. ²⁷ Nuna úsar ni unuiniamurí ti enentáimsarmiayi. Tura tiarmiayi “Júsha ¿warí áentsuit? Nasesha entsasha Nin umirainiatsuk” tiarmiayi.

*Jatara nunkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)*

²⁸ Nuyá Jesus entsá amaini katin Jatara nunkanam jeamiayi. Nui jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai. ²⁹ Niisha Jesusan wáinkiar kakantar tiarmiayi “¿Warí pujuram ijijai, Jesúsá, Yusa Uchiría. Tsawant jeatsain in amukratkataj tusamek taum?” tiarmiayi. ³⁰ Nui arant kuchi untsurí shushunmak yujaarmiayi. ³¹ Yajauch wakancha Jesusan seainiak “Jiiki akupkartakmekka kuchfniam wayatin tsankatkartukta” tiarmiayi.

³² Tutai Jesus “Pai, wetarum’ tímiayi. Yajauch wakancha shuara enentáiya jünkiar kuchiniam enkemáwarmiai. Túramtai kuchi wáurkiar arau utsanamiayi. Nuyá entsá iniankar jakerarmiayi.

³³ Kuchí wáinniusha nuna ashamkar péprunam tseke wéarmiayi. Nui jeawar ashí túrunamun etserkarmiayi. Yajauch wakantrukun pénker ajasmancha etserkarmiayi. ³⁴ Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya wakеткиti tusar seawarmiayi.

9

*Jesus emearun tsuármiania nu
(Márkus 2.1-12; Rúkas 5.17-26)*

¹ Nuyá Jesus kanunam enkemar antumian amaini katinmiayi. Tura nui ni péprurin Kapernáumnum jeamiayi. ² Nui jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarumtai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

³ Takui Israer-shuara jintinniurí yajauch enentáimprar “Juka Yúsan ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum.

⁵ Tua imiá yúpichuchit. Shuara tunaarin tsankuratin yúpichuchikiait. Tura emearun “Nantakim wekasata” títin yúpichuchikiait? ⁶ Wi Aents Ajasua núchakaitaj. Ju nunkanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemiin wetá” tímiayi. ⁷ Tutai emearu tsuámar nantaki ni jeen wémiayi. ⁸ Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

*Jesus nemartusat tusa Mateun achíawai
(Márkus 2.13-17; Rúkas 5.27-32)*

⁹ Nuyá Jesus wémiayi. Nui wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk pujai yajauch armia nu Israer-shuar untsurj káunkar Jesusa unuiniamurijjai irunar yurumiarmiayi. ¹¹ Pariséusha nuna ísar Jesusa unuiniamurj aniasarmiayi “¿Urukamtia atumf Uuntri kuitia achinjajsha tunaarinnuijajsha irunar yuruma?”

¹² Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum ju aarma unuimiutarum:

“Murik maam Winia surusum nujai “máakete” tátsujai. Antsu waitnenkartutain wakera-jai,” Yus-Papinium tu áarmaiti.

Wikia “pénkeraitjai” tuńnian untsuktaj tusan táchaitjai. Antsu tunáa shuar ni enentájn yapajáwarat tusan táwitjai” tímiayi.

*Jjiarmatniun Jesusan aniasarmiania nu
(Márkus 2.18-22; Rúkas 5.33-39)*

¹⁴ Nuyá imiakratin Juanka unuiniamurj Jesusan tariai aniasarmiayi. “¿Urukamtai iikia tura Pariséusha ijiarmaji tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin ániawai. Núnisan Wi pujakui ijiarmashtin ániawai. Tura tsawant jeattawai nuatua áintsan Wi junaktatjai. Antsu nuikia ijiarmawartatui’ tímiayi.

¹⁶ “Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jaaktatui. ¹⁷ Nijiamanch yamáí nawar nuap najanamu arutnum yaraachminiati. Túramka karíak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniati. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

*Jesus Jairu nawantríncha tura chíkich nuwancha tsuármiania nu
(Márkus 5.21-43; Rúkas 8.40-56)*

¹⁸ Jesus nuna tai Israer-shuara uuntri Jesusan tarí tikishmatar tímiayi “Winia nawantur jarutkayi, tura Ame winim ewejmijjai antinrukakminkia ataksha nantaktiatui.” ¹⁹ Tutai Jesus ni unuiniamurijjai wajakiar nijijai wearmiayi.

²⁰ Tura jintiá weenai nuwa tuse (12) uwitin numpá ájapeak wáitias pujú asa Jesusa ukuriní amainiń ni pushirín antinmiayi. ²¹ “Áyatik ni pushirín antińnaka pénker ajastatjai” tu enentaimpramiayi. ²² Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtusú asam pénker ajasume.” Nu chichamtaik ni jáamurj pénker ajasmiayi.

²³ Nuyá Jesus uunta jeen jeamiayi. Tura nuj charaatum ajainiancha tura jakan iwarsatai tular péeman umpuianiancha wáiniak ²⁴ tímiayi “Aa jíintratarum. Nuwáchikia jákachai antsu aya kanarai.” Penké jakan nékayat túratta nuna neka “aya kanarai” tímiayi. Takui aents Nin wishikrarmiayi. ²⁵ Tura nuna ashí jíir Jesus jeá wayá nuwáchin uwejnun achik iniantkimiayi. Túram nantakmiayi. ²⁶ Nu túramu ashí nu nunkanam etsernarmiayi.

Jesus kusurun jímiaran tsuármiania nu

²⁷ Nuyá Jesus wéakui jimiará shuar jii kusuru untsumki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi. ²⁸ Jesus jeá wayamtai jii kusuru tariarmiayi.

Tura Jesus aniasar “¿Juna túramniati túrutrumek?” tímiayi.

Niisha “Ee, Uunta” tiarmiayi.

²⁹ Tuńniakui Jesus ni jíin antinkiar tímiayi “Átum nekas enentáimtarmena núnisan túrunati.” ³⁰ Nujai jii pénker ajasarmiayi. Nuyá Jesus “Etserkairap. Shuar penké nekáwarain” tímiayi. ³¹ Támatiat jíinkiar Jesus túramun ashí nu nunkanam etserkarmiayi.

Jesus chichachun pénker awajsamiania nu

³² Nuyá wenai shuar yajauch wakantru chichachun Jesusan ititariarmiayi. ³³ Tura Jesus yajauch wakanin jíiki awemantai nu chichachu chichakmiayi. Ashí nuna ísar ti

enentáimprarmiyai. Tura tiarmiayi “Yáunchusha Israer nunkanam jujaj métek túramu penké atsuwiti.”³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarijajai yajauch wakanin jiiki akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nuj enkemátarum” tu etsermiayi. Tura ashí nánkamas sunkurjajai jáiniancha tsuármiyai. ³⁶ Shuaran fisar murik wáinchatia núnis pimpikiar tura kúntuts pujuinia asamtai waitnentrarmiyai. ³⁷⁻³⁸ Nuyá ni unuiniamurin tmiyai “Ju aents Yus-Chicham ujaktiniaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsatniun

(Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiyai yajauch wakanin shuara enentáiya jiiki akupkatniun. Núnisan ashí sunkurjajai jáinian tsuártartian susamiayi.

² Ju áiniawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchiri armia nu. ³ Nuyá Jiripi, Parturumi, Tumas, Mateu. Mateusha kuítian achiniuyayi. Arpeu uchiri Jakupusha. Ripú núnisan Tateu náartiniuyayi. ⁴ Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma armiyai.

Jesus ni unuiniamurin etserkarti tusa akupkarmiania nu

(Márkus 6.7-13; Rúkas 9.1-6)

⁵ Nu tuse (12) unuiniamurin Jesus júnis chicharak akupkarmiyai. “Israer-shuarcha matsatmanum weerap. Samaria nunkanam péprunam weerap. ⁶ Antsu Israer-shuar murikua áinis Yusaiya wáakaru ainia nu weritiarum. ⁷ “Tsawant ishichik ajasai Yus jú nunkanam akupin ajastin” tu etserki wetarum. ⁸ Tunamarusha chikich sunkurjajai jainia nusha tsuatarum. Jakasha iniantkitiarum. Yajauch wakancha shuara enentáiya jiiki awematarum. Nu túratin kuítchajajai kakaram susamuitrume, tuma asamtai atumsha ashí ántarmek túratarum.”

⁹ Kurisha ashí kuitcha jukiirap. ¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.’

¹¹ Péprunam jearmesha pénger shuar wáinkiarum nuj wayarum tuke nuin pujustarum. ¹² Nu jeanam wayamsha “Ju jea shiir ati” titiá. ¹³ Nekas pénger shuaraitkiunka shiir ajasarti. Antsu nu shuar pénger tiarmachkuunka shiir ajascharti. ¹⁴ Tura nánkamsan atumin awáintiamainiachkuinkia anturtamainiachkuinkia nuyá jíinkitiarum. Nu shuar yajauch áarmatai jíinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ tmiyai.

Yajauch awajsatniun ujakmiania nu

¹⁶ Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatrum aneartarum. ¹⁷ Yajauch shuarjajai aneartarum. Akupni-unam juramkiartatui. Israer-shuar iruntainiam asutiamawartatui. ¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchan winia chichamur ujaktatrume. ¹⁹ Tura akupniunam surutmakakrum-nisha wariniak titiáj tu enentáimprairap. Nuj uuntjajai chichaakrumin Yus titinian

jintinramattarme. ²⁰ Nuin̄kia átum enentáimmiajaj̄i chichaschattarme antsu atumí Apar̄i Yusa Wakan̄i atumin chichamtikramsattarme.’

²¹ ‘Shuar ni yach̄incha máawarti tusa suruktatui. Apasha ni uchir̄in surukartatui. Uchisha ni apar̄in máawarti tusa surukartatui. ²² Tura Wíi shuar asakrumin mash muj̄ramkartatui. Tura tuke katsuntea nu uwemprattawai. ²³ Chikichik péprunam yajauch awajtamainiakui ch̄k̄ich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiattajai.’

²⁴ ‘Unuiniamuka nin unuiniana nuna nan̄kaamaschaiti. Takarniusha ni uuntri nan̄kaamaschaiti. ²⁵ Unuiniamuka nin unuinia nujaj̄i métek ajaska maak. Takarniusha ni úntr̄ij̄ijaj̄i métek ajaska maak. Wátsek, Winia atumí úntr̄in “Iwianchi uuntri” túrutainiakui atumniasha nuna nan̄kaamas yajauch turamtatui.’

Yúsak ashamkatniuiti
(Rúkas 12.2-9)

²⁶ ‘Tuma asamtai aentska ashamkairap. Ashí uūkma nu paant nekanattawai. ²⁷ Ishishmasan kiritniunam ujaajrumna nu, tsawá̄i kakantrarum etserkatarum. ²⁸ Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.’

²⁹ ‘Jimiará ch̄n̄ki pen̄ké ishichik kuitjaj̄i surukmin áiniawai. Túmaitiat Yus tsan̄kateachkuñkia nun̄ká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjaj̄i átumka ti untsur̄i ch̄n̄kijaj̄i nan̄kaamas péñkerchakaitrum.’

Jesus natsantrashtiniaiti
(Rúkas 12.8-9)

³² ‘Ashí shuar ashí íimiainiain̄ Winia natsantruiniatsna núnaka Winia Apar̄i yakí nayaimpiniam pujana nuñ natsantrashtatjai. ³³ Antsu shuar íimiainiain̄ Winia natsantra núnaka Wisha yakí nayaimpiniam winia Apar̄i pujana nuñ natsantrattajai.’

Jesusa chichamejaj̄i shuar akannartatui
(Rúkas 12.51-53; 14.26-27)

³⁴ ‘Ashí shuar nawamnaikiar shiir pujusarat tusan ju nun̄kanam táchaitjai. Nuna túrat tusarum enentáimturairap. Antsu wi tamaajaj̄i shuar péñker ajasarmatai yajauch shuar nin nakitrattatui. ³⁵ Shuar ni apar̄in nakitrattawai. Nuwasha nukur̄in nakitrattawai. Najat̄isha tsatsar̄in nakitrattawai. ³⁶ Tuma asa shuar ni shuar̄ijaj̄i nemasrintin ártatui.’

³⁷ ‘Shuar ni apar̄incha nukur̄incha Wij̄ijaj̄i nan̄kaamas aneakka Wíi shuar áchamniaiti. Núnisan̄ ni uchir̄incha nawantr̄incha nan̄kaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krús̄r̄in yanaki jukí nemartachkuñka Wíi shuar áchamni-aiti. ³⁹ Aya jú nun̄kanam péñker pujustaj tana nu ni iwiaakmar̄in emesrattawai. Tura Winia auntu asa ju nun̄kanam péñker pujustinian páchiatsna nu tuke shiir pujustatui.’

Akinkiatin
(Márkus 9.41)

⁴⁰ ‘Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. ⁴¹ Yúsnan etserniuncha Yúsnumiá winiá asamtai itiaakka etserin akínkiáttana nujaj̄i métek akínkiáttawai. Péñker shuárnasha péñker asamtai itiaakka péñker shuar akínkiáttana nujaj̄i métek akínkiáttawai niisha. ⁴² Uchincha Wíi shuar asamtai entsá michan shikirak súsan̄ka imiá nekas nusha akínkiáttawai.’ Tu tímiayi Jesus.

11

Imiakratin Juan Jesusāj̄i shuaran akupkamiania nu
(Rúkas 7.18-35)

¹ Tura tuse (12) unuiniamur̄in Jesus tinia akupkar Niisha nú nun̄ka péprunam we Yus-Chichaman jintíak etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiaran Jesusai akupkamiayi. ³ Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataj?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan ujaktarum. ⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuñtrinchanmasha uwempratin chicham ujakmaiti. Nu ujaktarum. ⁶ Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun Jesus Juánkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juanikka nú shuarchaiti. ⁸ Nuikia ¿warí werimiarum. Shuar péñker iwiamampra fístai tusarmek wémarum? Warí, péñker iwiamampraka uunta jeen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juanikka yaunchu etserniu nankaamas enentáimtustiniati.

¹⁰ Yaunchu Yus-Papinium áarmaiti:

“Winia akatramurun amiñni emka akupeajai ame jintimin iwiarat tusa.”

Juan nu akatramuiti. ¹¹ Nekasan tájarme, shuar imiakratin Juanjai nankaamas uunt atsuwiti. Tuma aiñ Yus akupeamunam pachiinia nu shuarnaka, nekasmianchancha, Juanjai nankaamas shiir enentáimtustiniati. Tuma asantai nu pachiinkiatin enentáimpratarum.’

¹² “Kakaram shuarka imiakratin Juan támia nú tsawantnumiá Yus akupeamunam ti pachiinkiatniun wakeruiniak kakarmajai pachiinkiatniun enentáimiainiawai. ¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsnan etserin “Kristu táatsaiñ Erías tátiniati” tímiayi. Tura nekaatin wakerakrumka Juan nu Eríasaiti. ¹⁵ Antuktin jeakrumka nekaatarum.’

¹⁶ “Ju áentsnasha ¿waríjiai métek nakumkataj? Uchijiai métek ániawai. Ni aijiai iruntrar nakurustaj táyatán tuñiawai ¹⁷ “Námpera áinis nakurustaitsar peem umpuarji túrasha jantsemácharme. Nuyá iwíarsatniua áinis nakurustaitsar iwiareakur kantamtaí kantamáji túrasha átum úutcharme.” ¹⁸ Atumsha núnisaitume. Kame Juan núkap yurumsuk nijiamchinchá úmutsuk wekaimiayi. Túmakui átumka “Yajauch wakantrukuiti” tímiarme. ¹⁹ Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrumé. Wátsek, wi túramujai Yus nekas nékamu nekanattawai.”

Yajauch péprunmayá shuaran chicharkamiania nu

(Rúkas 10.13-15)

²⁰ Nuyá tujintiamun túramiania nú peprunmayá shuaran pachis Jesus chicharkamiayi. Tuma aiñ nuyá shuar ni enentáin yapajíácharu asantai juna chicharkamiayi.

²¹ “Wáinkiatá, Kurasin péprunmayatiram, Petsaitia péprunmayatirmesha. Nui aents tujintiamun ti túraitjai. Tiru péprunmasha Setuñ péprunmasha nu tujintiamu túramuitkiuñkia yaunchu ni enentáin yapajíáwaraayai. Túrawar kúntuts pujutai pushín entsarar yunñunim ajakiarayai. ²² Tura Wisha tájarme, nekapsatin tsawant jeamtaí Yus atumin tí asuttiamattarme. Tirunmayá shuaran nankaamas tura Setuñnumiá shuaran nankaamas asuttiamattarme.’

²³ “Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumijin aents tujintiamun ti túraitjai. Sutuma péprunam nu tujintiamu túramuitkiuñkia nu pepu yamaisha tuke aayi.

²⁴ Tura Wisha tájarme, nekapsatin tsawant jeamtaí Yus Sutumanmayá shuar nankaamas atumin asuttiamattarme.”

“Winin ayampratarum” tímiania nu

(Rúkas 10.21-22)

²⁵ Nuyá Jesus tímiayi “Shiir enentáimtajme, Aparu, ashí nayaimpisha nun̄kasha Úuntrinme. Tuma asam Ame túram nu ti unuimiaru enentáimtumainia nuyá úúkuítme antsu uchichia áinis nan̄kaamantu enentáimtumainiatsna nú shuar paant awajtusuitme. ²⁶ Ame, Aparu, núnis wakera asam túraitme.’

²⁷ ‘Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirme-sha itiuichat pujarmena nusha Winí winitiarum. Túrakrumniñka ayamtikrattajrume. ²⁹ Wi kajeche asan tura péejchach enentáimin asamtai Winí winirum unuimiarum. Winia chichamur ántakrum umiákrumniñka atumí wakaní ayamprattawai. ³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamurí ayampratin tsawantaj trikiu neren pakaarmiania nu
(Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman̄ ajapenin̄ nan̄kaamamiayi. Ni unuiniamurísha tsukarar trikiu neren majusar yukí wekasarmiyai. ² Pariséu shuarsha nuna wáinkiar Jesusan aniasarmiyai “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jéen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemanin̄ ana nunasha suritkiamuyayi. Túmain̄ yúawarmiyai. ⁵ Muisais akupkamunam aarma nu áujkachukaitrum. Israer-patrikia ayampratin tsawantaj takainiayatān nusha tunaachuiti. ⁶ Nekas tájarme, yamá Yusa Jéen enentáimtustinia nuna nan̄kaamas Wíniaka Aents Ajasuítjiana nu, nekas enentáimtursatniuitrume. ⁷ Yus-Papinium tawai: “Murik maam Winia surusum nujaj “maakete” tátsujai. Antsu waitneñkartutain wakera-jai.”

Nu chicham nekas nékaitkiurmeka yamá túrarmena núnisrum tunáa túrachu ánrarum súmamtikiachaintrume. ⁸ Wi Aents Ajasu asan ayampratin tsawantan Úuntrin̄tjai.”

Shuara uwejé jakan Jesus tsuármiania nu
(Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nui shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrj ayampratin tsawantaj waanam akaiki iniamtai jusatai tusarum wéchainrupash. ¹² Antsu shuarka murikraj nan̄kaamaschakait. Tuma asamtai ayampratin tsawantaisha péñker ana nu túramniati.” ¹³ Tinia iniais áishman̄kan uwejé jakan tímiayi “Uwejem takuitia.” Tutai uwejé takú chíkich uwejéjaj métek péñker ajasmiyai. ¹⁴ Nuna túramtai Pariséu shuarsha aa jíinkiar Jesus itiuurak máawaintiaj¹ tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jíinkimiayi tura wéakui untsurj shuar nemariarmiayi. Untsurj jáiniancha tsuámiayi. ¹⁶ Tsuar “etserkairap” tinia akupiarmiayi. ¹⁷ Yaunchu Yúsnan etserin Isayas tímia nu uminkiat tusa túrunamiayi. Niisha júna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Niijaj waraajai. Winia Wakantru kakarmarin̄ takamtsuk susattajai. Túramtai winia uwempratin chichamprun ashí Israercha nun̄kanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchar-tatui. ²⁰ Akupin ajatsuk shuar pintiu punua núnis pimpiru ainia nuna kúpitsuk

yáin̄tatui. Núnisan̄ shuar ji yama ikiapámu áinis kakarmachu ainia nuna ikiajn̄-atsuk ikiakártatui. Tura ashí nupetak ti péñker kakaram akupin ajastatui. ²¹Tura Israer-shuarchasha Nin nekas enentáimtusartatui.”

Jesuan “iwianchi uuntri kakarmarijiaí túrawai” tiarmiania nu (Márkus 3.19-30; Rúkas 11.14-23; 12.10)

²²Nuyá Jesuan shuar yajauch wakantrukun itiariarmiayi. Nu shuar jii kusurusha chichachusha ámiayi. Tura Jesus tsuarármatai paant ímsamiayi tura chichakmiayi. ²³Nuna wáinkiar shuar shiir enentáimprar tiarmiayi “¿Tawitia uchirí pampanku iniannamu uwentikkiartin tátinia nuáshit?”

²⁴Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántr̄in Pirsepún umirniuiti. Tuma asa nuna kakarmarijiaí yajauch wakanin jiiiki akupeawai.”

²⁵Jesus tu enentáimainian neka asa tímiayi “Nú nuñkanmayá shuar nuamtak kajernaiyakuñkia nú nuñka wari meserchattawak. Núnisan̄ nuamtak shuar ní shuar-jai mánainiakka amunaikchartatuak. ²⁶Núnisan̄ íwianch nuamtak jiiiki akupnainiakka máanaikiar wárik amuukashatuak. ²⁷Kame Wi Pirsepú iwianchi kakarmarijiaí iwianchin jiiiki akupeakuñkia atumí uchirísha ¿yana kakarmarijiaín jiiiki akupena? Ni túramurijiaí átum awajirma nekamatarum. ²⁸Wi Yusa Wakaní kakarmarijiaí yajauch wakanin jiiiki akupea asantai atumsha Yusa akupeamurí atumj̄in jeartamarmena nu nekaatniuitrume.”

²⁹‘Iista. Shuar kakaram shuara kuítr̄in kasarkatin wakerakka emka kakarman jin̄kiá aya túran̄ ni jeen wayá kasarkamniaiti. Wi iwianchin jiiikmiajiaí uunt iwianch nupetkamua nu nekaamniaiti.’

³⁰‘Wijiaí tsanin̄ pujatsna nuka winia nemasruiti. Núnisan̄ Winia yáintsuna nu aya itiurchat nájateawai.’

³¹‘Tuma asantai tájarme, Ashí shuar tunáa túruinia nusha yajauch chichainia nusha tsan̄kuratin awai. Antsu Yusa Wakanin̄ yajauch chicharin ainia nuka tsan̄kurashtiniaiti.

³²Winiasha Aents Ajasuitjiana nuna yajauch chichartuinia nú shuarsha tsan̄kuramniaiti. Tura Yusa Wakanin̄ yajauch áujmatainia nuka pen̄ké tsan̄kurachminiaiti. Ju nuñkan-masha tura ukunmasha tsan̄kunarchattawai’ tímiayi.

Ni nerejai numi nekaamniaiti (Rúkas 6.43-45)

³³‘Yutai numi péñkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai. ³⁴Tseas wenunniutirmesha, ¿atumsha itiurak imiá yajauchitirmesha péñker chichamsha chichastarum? Shuar ni enentáin̄ enentáimna nuna chichaawiti. ³⁵Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶Tura Wisha tájarme, nekapsatin tsawant jeamtaí ashí enentáimtsuk chichakma nuna Yúsan paant ujakartatui. ³⁷Iis, ame chichammijiaí nekanatarme. Péñker chichakuitkiumka sumamashtatme. Tura péñker chichakchaitkiumka sumamattame.”

Nu shuar yajauch ásar iniakmamun seawarmiania nu (Márkus 8.12; Rúkas 11.29-32)

³⁸Pariséu shuarsha Israer-shuara jintinniurísha Jesuan chicharuk “Uuntá, ame Yú-saiyáitjai tusam nayaimpinmayá kakarmajiaí iniakmamú túrata, iisha wáinkiatái” tiarmi-ayi.

³⁹Tutai Jesus tímiayi “Shuar yajauch tura Yúsan enentáimtachu ásar nayaimpinmayá iniakmamun seainiawai. Tuma asantai, áyatik yaunchu Junas túrunamu iniakmastini-aiti. ⁴⁰Junas menaintiu kashi menaintiu tsawantcha namaka ampujen en̄kemsamiayi. Núnisnak Wi, Aents Ajasu asan, menaintiu kashi menaintiu tsawantcha nuñká jakan tepestatjai. ⁴¹Junás Níniwi péprunmayá shuaran Yus-Chichaman etserkamtaí nu shuar ní tunaar̄in enentáimtusar ni enentáin̄ yapajáwarmiayi. Tura juí yamáí Junasa nan̄kaamas

etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmayá shuar juyá shuaran súmamtikiawartatui.’

⁴²‘Yaunchu nuwá yajaya shuaran únt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura juí yamáí Sarumúnjái nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

Yajauch wakan jiiiki akupkamuitiat wáketna nu
(Rúkas 11.24-26)

⁴³‘Shuara enentáiya yajauch wakan jíinkin yumi penké yútatsna nuí wéawai. Tura nuí penker pujustinian wáinkiach ataksha waketkitniun enentáimiui. ⁴⁴“Wi jíinkimij nuí waketkittijai” tawai. Tura waketki shuara enentáin penker iwiamu tura ankantán wáiniak ⁴⁵ ni ain siati (7) iwianchin níijjái nankaamas yajauchin itíá shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

Jesusa yachí, Jesusa nukurí
(Márkus 3.31-35; Rúkas 8.19-21)

⁴⁶Jesus nu shuarjái tuke chichaak pujaj ni nukurísha ni yachísha tariarmiayi. Tura aa wajasar Níijjái chichastaj tiarmiayi. ⁴⁷Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

⁴⁸Chichaman ujakmia nuna Jesus tímiayi “¿Ya ainia winia nukursha winia yatsursha?”

⁴⁹Nuyá ni unuiniamurín iniakmas tímiayi “Ju ániawai winia nukur tura winia yatsursha.

⁵⁰Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur ániawai” tímiayi.

13

Untsurí métek-taku chichamjái Jesus unuiniamiania nu

(1) *Atsaamin atsaampramiayi*
(Márkus 4.1-9; Rúkas 8.4-8)

¹ Nu tsawantaj Jesus ni jeeya jíinkin antumianka kánmatkarín pujusmiayi. ² Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi. ³ Túrunawarmatai untsurí métek-taku chichamjái unuiniamiai. “Atsaamin atsaamprataj tusa jíinkimiai, tímiayi. ⁴ Atsaamki wesa arakri jintia písunmasha iniaarmai. Tura chíiki tariar yuawarmai. ⁵ Chikichcha kaya írunmanum iniaarmai. Nuñka ishichik asamtai wárik tsapainiarmai. ⁶ Tura nantu etsantramtai penker kankáprúcharu asa sukuam káararmai. ⁷ Chikichcha janí nupanam iniaarmai. Tura janí wárik tsakar nupetak ajakramai. ⁸ Chikichcha penker nuñkanam iniaarmai. Nusha penker nerekar chíkich siañsha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. ⁹ Kuishim ákuñkia antuktarum” tímiayi.

“¿Urukamtai aya métek-taku chichamjái jintám?” aniasarmiania nu
(Márkus 4.10-12; Rúkas 8.9-10)

¹⁰ Nuyá ni unuiniamurín Jesusan taruntar aniiniak “¿Urukamtai aya métek-taku chichamjái ju shuar unuiniam?” tiarmiayi.

¹¹ Tutai Jesus tímiayi “Urukuk ju nuñkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin ániawai. ¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne. ¹³ Tuma asamtai aya métek-taku chichamjái unuiniajai. Nú shuarka íniayatan wáiniániatsui. Ántuiniayatan ántachua núnis nekainiatsui. Túmainiak Winia nekarainiatsui. ¹⁴ Nujái yaunchu Yúsnan etserin Isayas timia nu uminkiaiti. Juna tímiayi:

“Ti ántayatrūm anturkashtatrūme. Wáiniatrūmsha nekaashtatrūme. ¹⁵Ju shuara enentáí kátsuram ásar péñkera nuna nakitiainiawai. Nu asamtai péñker ántuiniatsui, jjiisha pusá áinis ániawai. Túrachkuñka paant nekaawarainti, tura nekas antukarainti, tura enentájjai enentáimias Winia tsuarat tusa tarutiarainti.”

¹⁶Tura átumka paant wainkia asarum péñker anta asarum shíraitrūme. ¹⁷Nekasan tájarme, untsuri Yúsnan etserniusha tura péñker shuarsha átum yamáí wáintrum nuna wáinkiatniun wakeruiniayatan wáinkiacharmiaiyi. Tura átum yamáí ántarme nuna antuktinian wakeruiniayatan antukcharmiaiyi tímiayi.

*Jesus atsaampramu chichaman paant jintintiamiania nu
(Márkus 4.13-20; Rúkas 8.11-15)*

¹⁸‘Ayu, antuktarum. Atsaampramu chichaman paant jintintiatjarme. ¹⁹Árak jintia pśunam iniaararma nuka shuar Yus-Chichaman ántayatan ni enentájn ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. ²⁰Árak kaya írunmanum iniaararma nuka shuar Yus-Chichaman antuk waras umirainia núiti. ²¹Tura nukap kankaprurcharu ásar katśuiniatsui. Antśu itirchatan ínkiuiniak tura Yus-Chichaman wakeruinia áśarmatai chíkich yajauch áujmatam wárik iniaisar ikiuiniawai. ²²Árak jančí nupanam iniaararma nuka shuar Yus-Chichaman antuk emka umirniua núiti. Tura ju nuñkanam írunna nuna tuke páchiniak ni kufrincha ti enentáimtuinia áśarmatai ashí Yus-Chichaman enentáimtamun núpetaewai. Tuma asamtai nu áentsnum Yus-Chicham atsaampramu nereatsui. Yus-Chicham ni enentájn takasma atsawai. ²³Tura árak péñker nuñkanam iniaararma nuka shuar Yus-Chichaman antuk péñker umirainia núiti. Tura péñker nerenawai. Chíkich śian (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai” tímiayi Jesus.

(2) Yajauch nupá trikiunam atsaamkamu

²⁴Jesus ataksha ju métek-taku chichaman áujmatsamiayi. “Shuar Yus akupeamunam pachiinkartintin júnisaiti. Shuar péñker arakan, trikiun ni nuñken araamai. ²⁵Tura ashí kanararmatai nemasri kashi taa trikiu arakmanum yajauch nupān aratak ikiukmiai. ²⁶Trikiu tsapakar nereakui nuyá yajauch nupasha nusháa nereku asa ti paant ajasmai. ²⁷Nuna ísar takainia nu ni úuntrin werí tiarmai “Uunta, ¿péñker arak araachmakam. Itiura jusha yajauch nupasha tsapakuit?”

²⁸“Tutai nérentin timiai “Winia nemasur arakuiti.”

“Taku ni takarniuri tiarmai “¿Yajauch nupān uwerat tusam wakeramek?”

²⁹“Tutai timiai “Atśá, uwerairap. Yajauch nupā uweaj tukamarum trikiu uweniirum.

³⁰Iniaísatarum. Antśu métek tsakakti. Júuktin tsawant jeamtai winia takartinian emka yajauch nupān uwer irumar jinkiawarat tusan akupkartatjai. Tura áesawartatui. Tura trikiu neren júukar péñker ikisarat tusan akupkartatjai” timiai” tímiayi Jesus.

(3) Mustasa jiníkiái

(Márkus 4.30-32; Rúkas 13.18-19)

³¹Jesus ataksha métek-taku chichaman áujmatsamiayi. “Shuar Yus akupeamunam pachiinkartintin mustasa jiníkiyai áintsankete. Shuar péñker nuñken araamai. ³²Mustasa jiníkiáikia imiá uchichiitiat tsapái tsakaakka ashí numichijjai nankaamas uunt ajawai. Ti uunt asamtai chiníki ni kanawen pasunmainiawai” tímiayi Jesus.

(4) Karin enketatin

(Rúkas 13.20-21)

³³Núnisan chíkich métek-taku chichaman áujmatsamiayi. “Shuar Yus akupeamunam pachiinkartintin karinia áintsankete. Nuwā nijiamchiniam karinia enkea mashi páchimiawai. Tura nu mash karimtikiawai” tímiayi.

Jesus aya métek-taku chichamjai jintintiamiania nu

(Márkus 4.33-34)

³⁴⁻³⁵Ashí nuna Jesus métek-taku chichamjai áujmatsamiayi. Yaunchu Yúsnan etserin timia nu uminkiatit tusa túramiaiyi. Etserin juna áarmiaiyi:

“Métek-taku chichamjaj*í* áujmattiatjaj*í*. Yámankamtaiknumiá nékashtain etserkattaj*í*” tu áarmiy*í*.

Nu asamtai aya métek-taku chichamjaj*í* áujmatmiayi Jesus.

Jesus yajauch nupá tríkiunam atsamkamun paant awajsamiania nu

³⁶Nuyá shuaran ikiukin Jesus jeá tamiayi. Túramtai ni unuiniamur*í* tariar “Yajauch nupá áujmatmena nu paant awajsata” tiarmiayi.

³⁷Tutai Jesus tímiayi “Wi Aents Ajasuitjaj*í*. Wi péñker arakan atsaamkajtaj*í*. ³⁸Ashí nunka aja áintsaiti. Péñker jínkiá*í* Yus-shuaran Yus akupea nuna nakumeawai. Yajauch nupá iwianchna ainia nuna nakumeawai. ³⁹Tura íwianch ii nemasr*í* asa yajauch nupan arakuiti. Tura nunka amúamunam Yusa suntari*í* arakan júuktinia áintsan shuaran yaruaktatui. ⁴⁰Yajauch nupá irur jinium áesatniua áanis nunka amúamunam túrunattawai. ⁴¹⁻⁴²Nu*í* Wi Aents Ajasu asan winia suntarun akupkattaj*í*. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nu*í*sha ti wáitsatniusha átatui. ⁴³Antsu péñker túruinia nuka ti shiir wincha ajasar ni Apar*í* akupeana nu*í* etsa núnis tsáapnin ajasartatui. Wats, kuishim átsuk. Antukta.’

(5) Kuit wáinkiamu

⁴⁴‘Shuar Yus akupeamunam pachiinkiatin kuit nunká uukma áintsan*ket*e. Shuar nu kuítian wáiniak nu*í*n ataksha uukmai. Tura ti waras wakетки nu kuit niiniu at*í* tusa ashí ni takakman suruk nu nunkan sumakmai.’

(6) Kaya shiirmach ti kuitia nu

⁴⁵‘Shuar Yus akupeamunam pachiinkiatin júnisaiti. Shuar kayachin ti shíрман eak wekaana áintsan*ket*e. ⁴⁶Tura kayan ashí nankaamas kuit jeean wáiniak wakетки ashí takakna nuna suruk nu kayan niiniu at*í* tusa súmawai.’

(7) Neka

⁴⁷‘Shuar Yus akupeamunam pachiinkiatin júnisaiti. Shuar nekajaj*í* namakan achía áintsan*ket*e. Nekan nayaantsanam ajuntak niisháa namakaim achíawai. ⁴⁸Tura nekanam nemarmatai kukar jii*ki*, nu*í* péñker namaknasha chan*kin*nium chumpiniawai. Tura yajauch namaknaka ajapenawai. ⁴⁹Núnisan*í* átatui nunka amúamunam. Yusa suntari*í* taar Yus-shuaran tura íwianch shuaran akantrattawai. ⁵⁰Tura íwianch shuarnaka uunt jinium apeattawai. Nu*í*sha ti útin ti wáitsatin átatui.” Nuna ashí ni unuiniamurijaj*í* áujmatsamiayi Jesus.

Yamá nekaamujajisha tura yaunchu nekaamujajisha Yus-shuaran yáintiniaiti

⁵¹Jesus nuna tinia amuk “¿Ju mash antukurmek?” tímiayi.

Tutai ni unuiniamur*í* “Ee, Uunta, ashí antukji” tiarmiayi.

⁵²Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsan*ket*e. Ni ikiutairiya yamarmancha yaunchu sumakmancha jusamniai*í*. Núnisan nu shuar yamá nekamujajisha tura yaunchu nekamujajisha Yus-shuaran yáintiniaiti.”

Jesus Nasarénum waketikimiania nu

(Márkus 6.1-6; Rúkas 4.16-30)

⁵³Jesus nu métek-taku chichaman áujmatas amuk nuyá wémiayi. ⁵⁴Tura ni péprurin Nasarénum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tu*í* imiá unuimiaruit, tiarmiayi. Itiurak aents tujintiamun túramniait? ⁵⁵Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas ániatsuk. ⁵⁶Tura ni umaísha iijaj*í* írutra pujuiniatsuk. ¿Nuikía itiura mash neka?” tiarmiayi. ⁵⁷Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyan*ka* ni shuarin*ka* nin anturainiatsui” tímiayi. ⁵⁸Tura nú shuar Jesusan enentáimtuiniachu asamtai aentsti tujintiamun aya ishichik túramiy*í*.

14

*Imiakratin Juan jakamu**(Márkus 6.14-29; Rúkas 9.7-9)*

¹ Kariréa nuṅkanam Erutis akupniuyayi. Tura Jesus túramuncha antukmiayi. ² Tura ni írutramurin tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirufasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jínkiá sepunam enkeatarum tusa akupkamiayi. ⁵ Niisha Juan kan máataj tukamá aentsun asharmiayi. Ashí aents “Juan Yúsna etserniuiti” enentáimtuiniakui asharmiayi. ⁶ Tura akupin Erutis akiiniamu tsawantri jeamtai nú námperin Jirufasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wakeram nu seattia, tímiayi. Nekasan amastatjai, Yussha iirui” tímiayi.

⁸ Tutai nu nuwách emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrishha antukaru asamtai umikmiayi. ¹⁰ Ni suntarin sepunmayan Juan ka muuken tsupik itiarti tusa akupkamiayi. ¹¹ Tura amamkunam itiar nuwáchin súarmiayi. Tura niisha ni nukurí susamiayi.

¹² Nuyá Juan ka írutramurí tariat ayashí jukiar iwiansarmiayi. Túrawar Jesusan ujauwearmiayi.

*Jesus senku mir (5000) áishman kan ayuramiania nu**(Márkus 6.30-44; Rúkas 9.10-17; Juan 6.1-14)*

¹³ Jesus nuna antuk Niñki ni unuiniamurijjain kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan. ¹⁴ Kanunmayá jíninai tukamá untsurí áentsun wáinkiamiayi. Tura wáiniak waitnentrarmiayi. Tura jáiniancha tsuáarmiayi. ¹⁵ Kíakui ni unuiniamurí Nin tariat tiarmiayi “Kíawai, Uunta. Tura shuar tjiich pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Íikia takaktsuji. Aya senku (5) tantachik jimiar chik namakchijjain takakji.”

¹⁸ Tuíniakui Jesus “Wats, nu itiertitarum” tímiayi. ¹⁹ Tinea aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsna yuminsamiayi. Tura puur ni unuiniamurin aents ayuratarum tusa súarmiayi. ²⁰ Ashí yurumáwar jémararmiayi. Tura nuyasha puunaruka tuse (12) chan kin tiarmiayi. ²¹ Nu yurumáwarmia nusha nuwasha uchisha nekapmatsuk senku mir (5000) aya áishman áirmiayi.

*Jesus entsá pátatek wekasamiania nu**(Márkus 6.45-52; Juan 6.16-21)*

²² Nuyá Jesus ni unuiniamurin kanunam enkemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsna áujumiayi. Káshisha nuñ Niñki tuke pujumiayi. ²⁴ Tura antumian tí wan karam asamtai kanu ajapén ajasmatai nase tukumma entsa tamparukmiayi. ²⁵ Tsawaana aj níi tuke wenaj Jesus entsá pátatek wekas pujuiniamunam jeamiayi. ²⁶ Tura ni unuiniamurí entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

²⁷ Tuíniakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítur chicharuk tímiayi “Uunta, Ámetkumka nuñ wekasa jeatin untsurkata.”

²⁹ Takui Jesus tímiayi “Wats, winitá.”

Tutai Pítiur kanunmaya akaikin Jesus wajana nu jeataj tusa entsá pátatek wekasamiayi. ³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu unsummiayi.

³¹ Nu chichamtaik Jesus uwejnium achik júak “Maa, Yus imiá ishichik enentáim-tuschamek” tímiayi. ³² Tura kanunam enkemáwarmatai nasesha menkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

*Jesus Jinisarítniumiá shuaran tsuármiania nu
(Márkus 6.53-56)*

³⁴ Tura amaini katinkiar Jinisarít nunkanam jearmiayi. ³⁵ Tura nuyá aents Jesusan nekaawar nu nunkanam ashí ujanairmiayi. Túrawar jaancha ni pujamunam itiararmiayi. ³⁶ Ni pushirínkisha antintai tusar seawarmiayi.

15

*Shuáran yajauch awajeana nuna Jesus jintintiamiania nu
(Márkus 7.1-23)*

¹ Nuyá Jerusaréni péprunmaya Pariséusha yaunchu akupkamu jintinniurisha Jesusan tariar aniasarmiayi ² “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum? ⁴ Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írunka nuna mash “Yúsnaiti” takui nuikia nujai ni aparíncha nukuríncha yáinchamniaiti, tárume. Nin yáintinian nakitiak ayatik “Ashí winia áiniana nu Yusna asamtai yáinchamniaitjame” tíiniyai” tárume. Núnisrum tákuram Yus akupkamu iniaisarum aya aents akupkamu umiirume, tímiayi. ⁷ Antra chichamtinaitrume. Yúsna etserin Isayas yaunchu nekas atumin áartampriamiayi júna:

⁸ “Ju aents ni wenejai shiir awajtuiniawai, tura ni enentáij jeachat pujuiniawai. ⁹ Tura tukeneasan shiir awajtuiniawai. Aentsu chichamen jintintiniyaiat “Yusa chichamente” shiiniawai.” Tu áarmiayi” tímiayi Jesus.

¹⁰ Tinia shuaran untzuk tiarmiayi “Ju antukrum péñker nekaatarum. ¹¹ Aents yúana nuka shuáran yajauch awajsashtatui. Antsu wenunmaya jinia nuka shuáran yajauch awajeawai” tímiayi.

¹² Nuyá ni unuiniamuri Jesusan tariar “Maa, Pariséu ame chichammin antukar ti itirchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiniawai. Mai kusuru ásar mai wáanam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwe ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek. ¹⁷ Enentáimprachurmek? Ashí wenunam wayana nu wakenam weatsuk. Tura nuyá iniankastiniyai. ¹⁸ Antsu wenunmaya jinia nu enentáimaya jiniu asa áentsun yajauch awajeawai. ¹⁹ Enentáimaya ashí yajauch enentáimsatin jiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha ²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwá Israer-shuarcha Jesusan enentáimtusmiania nu
(Márkus 7.24-30)*

²¹ Jesus nuyá jiinki Tiru péprunmasha Sitiun péprunmasha wémiayi. ²² Tura nu nunkanmaya nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

²³ Tura Jesus áikchamiayi. Tura ni unuiniamurí tariat “Awemata, tiarmiayi. Tuke untsunki apapétmaji” tiarmiayi.

²⁴ Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuiti.”

²⁵ Túrasha nuwá tikishmatar tímiayi “Uunta, waitnentrurta.”

²⁶ Tutai Jesus tímiayi “¿Uchí apatkurí jurukir yawá susamniakait?” tímiayi.

²⁷ Tutai nuwá tímiayi “Nekas, Uunta, tame. Tura yawasha ni aentsrí yurumainiakui nunká iniaarun yuániatsuk.”

²⁸ Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantrí péñker ajasmiayi.

Jesus untsurí jáinian tsuararmiania nu

²⁹ Jesus nuyá jiinki Kariréa antumianka káanmatkarin waketkimiyai. Tura naint waka nuí pujusmiayi. ³⁰ Nuí untsurí aents Nin tariat shutuapnasha kusuruncha chichachuncha tsupirkamuncha chikich jáiniancha itiararmiayi. Túravar nawenam aeprusarmiayi. Túrám tsuararmiayi. ³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáim-prarmiayi. Yus ni áentsrin Israeran yáinmatai shiir yuminjsarmiayi.

Jesus kuaru mir (4000) áishmankan ayuramiania nu
(Márkus 8.1-10)

³² Nuyá Jesus ni unuiniamurín untsukar tiarmiayi “Ju aentsun waitnentainiajai. Warí, menaintiu tsawant Wijíai yurumsuk yujainiatsuk. Ayurtsuk ni jeen akupkachminiaitjai. Jintiaá pimpiki wáitsartatui.”

³³ Ni unuiniamurí tiarmiayi “Túrasha, Uunta, ¿shuar atsaasha tuyan yurumak imiá sumaktaji ju aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siatí (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi. ³⁶ Tura siati tantan achik namaknasha achik nuyá Yúsan yuminjsamiayi. Tura puur aents ayuratarum tusa ni unuiniamurín susamiayi. ³⁷ Ashí yurumáwar jémaramiayi. Tura puunaru siati chankin tiarmiayi. ³⁸ Tura nuí yurumáwaruka nuwasha uchisha nekapmatsuk aya áishmankak kuaru mir (4000) áirmiayi. ³⁹ Nuyá Jesus áentsun akupak kanunam enkemar Maktara nunkanam wémiayi.

16

Pariséusha Satuséusha iniakmamurín Jesusan seawarmiania nu
(Márkus 8.11-13; Rúkas 12.54-56)

¹ Pariséusha tura Satuséusha Jesusan nekapsatai tusar tariarmiayi. Túravar “Ame Yú-saiyaitkiunka kakarmarmijíai nayaimpinnmaya iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kintiamkui kashin esatrurtatui” tñiuitrumé. ³ Túrasha “Te ajas kapaaku péetar tsawaaku yumi yajauch átatui” tñiuitrumé. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamáí jú nunkanam tura nuka nékatsrumé. Ántrairume. ⁴ Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiniaiti” tímiayi. Tinia ikiuak wémiayi.

Pariséusha Satuséusha jintintiania nu aneartiniaiti
(Márkus 8.14-21)

⁵ Tura entsá amaini katinkiar ni unuiniamurí tantan júkitniun kajinmatkiarmiayi. ⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújaisha aneartarum.”

⁷Tutai ni unuiniamurĭ tiarmiayi “Ii tanta itiachakrin tátsuk.”

⁸Jesus nuna antuk tímiayi “ĭUrukantai tanta itiachji tunaiyarum. Yusa kakarmari kajinmatkintrumek. ⁹Senĭku tantajĭ túramiay nu kajinmatkintrumek. Senĭku mir (5000) áishmaŋkan ayuramtai untsurĭ chaŋkin tiármia nu enentáimtsurmek. ¹⁰Tura siati tantajĭ kuaru mir (4000) áishmaŋkan ayuramtai nuna ishichik chaŋkin tiármia nu kajinmatkintrumek. ¹¹Itiurak imiá nékatsrum? Wi Pariséu wakaprutairĭsha Satuséu wakaprutairĭsha aneartarum tákun penĭké tantan tátsujai” tímiayi. ¹²Nuna Jesus takui ni unuiniamurĭsha nekaawarmiayi. Penĭké tanta wakaprutairĭn tíchamiayi antsu Pariséusha Satuséusha unuiniatairĭn tímiayi.

Pítur Jesusan Yus anaikiamun paant ujakmania nu

(Márkus 8.27-30; Rúkas 9.18-21)

¹³Tura Sesaria-jiripiunam jeawar Jesus ni unuiniamurĭn aniasarmiayi “Aents Ajasuit-jiana juŋa ĭyaiti turutainiawa Winia?”

¹⁴Niisha ayak tiarmiayi “Chĭkich, imiakratin Juáŋkaiti turamainiawai. Chĭkichka, Erĭasaiti turamainiawai. Chĭkichcha Jeremiasaiti, chĭkichcha chĭkich aents Yúsnan etserniuiti turamainiawai” tiarmiayi.

¹⁵Tutai nincha aniiniak “ĭAtumsha yaiti túrutrum?” tímiayi.

¹⁶Semuŋ Pítrusha “Ámetme Kristu, Yus Anaikiamu. Nekas iwiaaku Yusa Uchirĭnme” tímiayi.

¹⁷Tutai Jesus tímiayi “Shiiraitme Junasa uchirĭ Semuŋka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. ¹⁸Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrĭsha nu jeamman pukukchattawai. ¹⁹Yus akupeamu yawincha amastatjai. Ju nuŋkanam jinĭkiatniusha atátatniusha amasmaiti. Tuma asamtai ame ju nuŋkanam suritiam nu nayaimpinmasha suritniaktatui. Tura ju nuŋkanam tsankateam nu nayaimpinmasha tsankatnaktatui” tímiayi. ²⁰Nuna tinia Jesus ni unuiniamurĭn Kristuitiay nu etserkairap tinia akupkarmiayi.

Jesus Nin máatniun etsertumakmania nu

(Márkus 8.37-9.1; Rúkas 9.22-27)

²¹Nuyá Jesus juŋa unuiniatan ŋanĭkammiayi. “Wi Jerusarĕnnum wétiniatjai. Nuĭ Israer-shuara úuntrĭsha, Israer-patri úuntrĭsha, Israer-shuara jintinniurĭsha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

²²Takui Pítur arantach júĭ chicharuk tímiayi “Uunta, nuka penĭké áchatniuiti. Áminkia túrutmacharminiati.”

²³Jesus ayanmatar Pítrun tímiayi “Werumta, Satanása. Yajauch awajtame. Ámeĭka Yus wakeramu enentáimtsume. Antsu jú nuŋkanam enentáimainia áinis enentáimme.”

²⁴Nuyá Jesus ashĭ ni unuiniamurĭn tímiayi “Shuar Winia nemartustaj tusa wakerakka ni wakeramurĭn iniais ni krusĭ yanaki Winia nemartusti. ²⁵Shuar áyatik penĭker pujustaj tákuŋka nu shuar uwemtsuk jakattawai. Antsu jákatniuitkuisha penĭker pujustinian enentáimtsuna nú shuar nekas iwiaakman wainkiattawai. ²⁶Wats, shuar ashĭ jú nuŋkanam írunka nuna sumakka tura nujĭ ni wakanĭ émesek ĭitiurak penĭker pujustin? Shuara wakanĭ emesramu ĭashĭ jú nuŋkanam írunka nujĭ iwiaramniakait? ²⁷Wi Aents Ajasu asan, winia Aparu kakarmarijĭai tura ni suntarijĭai tana ashĭ shuáran ni takasmajĭ métek akiktatjai. ²⁸Paant tájarne, shuar juĭ wajinia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹Nuyá sais (6) tsawant maŋkaamasar Pítruncha, Jakupuncha, tura ni yachi Juannasha níniak júkiar Jesus náinnium yakĭ wakamiayi. ²Nuĭ Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirĭsha ti puju jiitsumir ajasmiai. ³Nuĭsha

Muisaisnasha Eríasnasha Jesusjaj̄ chichainian wáinkiarmaiya. ⁴Nuyá Pítur Jesusan tímiayi “Uunta, ti shiir pujaji juj̄. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.” ⁵Tura Pítur tu auju wájaj̄ yurankim ti puju amúamiayi. Tura nu yurañminmayá chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus. ⁶Nuna ni unuiniamurj̄ antukar ti ashamkar pákea ajakiarmiayi. ⁷Túrunawarmatai Jesus táriar antiñ “Ashamkairap, nantaktiarum” tiarmiayi. ⁸Tura pañkainiar íimij tukamá aya Jesusan wáinkiarmaiya.

⁹Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmayá nantaatsaj̄n etserkairap’ tímiayi.

¹⁰Nuyá ni unuiniamurj̄ Jesusan aniiniak “¿Urukamtai in jintintramin “Kristu táatsaj̄n Erías emka tátiniaiti” tuinia?” tiarmiayi.

¹¹Tuñiakui Jesus ájkmiayi “Nekas Erías tátiniaiti. Tura nii mash iwarattawai. ¹²Kame nekas Erías táwiti tura nin nekaacharmai. Antsu aents wakermia nuna túrawar yajauch awajsarmiayi. Núnisañ Winiasha, Aents Ajasu aijn, wáitkiarsartatui.” ¹³Nuna takui ni unuiniamurj̄ imiakratin Juánkan áujmatui, tu enentáimprarmiayi.

*Jesus iwianchin j̄iki akupkamina nu
(Márkus 9.14-29; Rúkas 9.37-43)*

¹⁴Ataksha aents matsatmanum jeawarmatai shuar Jesusan tarí tikishmatramiayi. ¹⁵Tura tímiayi “Uuntá, winia uchir waitnentrutata. Wainchi tukum ti wáitniuiti. Jíniumsha patamniuiti. Entsasha iniainaiti. ¹⁶Ame unuiniamurm̄incha itiarj̄iai túrasha tujinkiarai.”

¹⁷Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiertiarum’ tímiayi. ¹⁸Itiarim Jesus yajauch wakanin j̄iki akupkamiayi uchí ayashíniá. Túramtai nu chichamaik péñker ajasmiai.

¹⁹Nuyá urum ni unuiniamurj̄ Jesusjaj̄ niñki pujasar áujmatainiak “¿Urukamtai yajauch wakan j̄iktin iikia tujinkiamaj’?” tiarmiayi.

²⁰Tuñiakui Jesus tiarmiayi “Yus nekas enentáimtachu asarum tujinkiarume. Túmaitat nekasaiti mustasa j̄iníkiá timiá uchichitiat ti uunt tsakaatsuk. Núnisañ Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrum Yus nekas enentáimtakrumka. ²¹Kame nu yajauch wakan j̄iki akupkatniuka ijiarmam Yus áusatniuiti.”

*Ataksha Jesus ni játniun ujakmiania nu
(Márkus 9.30-32; Rúkas 9.43-45)*

²²Jesus ni unuiniamurj̄j̄iaj̄ Kariréa nuñkanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai. ²³Túrutawarmatai menaintiú tsawan-taj̄ nantaktiatjai.” Tura ni unuiniamurj̄ nuna antukar ti kúntuts enentáimprarmiayi.

Jesus añkantaitiat akiktinia nuna akikmakmiania nu

²⁴Jesus ni unuiniamurj̄j̄iaj̄ Kapernáum péprunam jeawarmiayi. Tura kuftian achin Pítrun tariar aniasarmiayi “¿Atumi uuntri Israer-patrin akiktinia nuna akínkaiat?”

²⁵Tutai Pítur “Ee” tímiayi.

Tura Pítur jeá wayá chichaatsaj̄n Jesus emka tímiayi “Chíkich nuñkanmayá akupin ¿yana kuftirj̄iaj̄n takainia. Ni shuar̄iniunkek atantainia. Antsu yajaya shuar̄nan atantainiatsuk. Nekaschak, Semuñká?”

²⁶Tutai Pítur “Nekas yajaya shuar̄man atantainiawai” tímiayi.

Jesus tímiayi “Nuikia ni shuar̄i añkant ániawai. Iisha núnisrik nu akiktin añkantaitji. ²⁷Túrasha itiurchat enentáimpraraj̄n tusar akiktai. Ame tsau jukim entsá wetá. Túram emka namak japikim iwiankam nuñ kuit wáinkiatame. Nu jukim Winiasha áminiusha akikmakta.”

18

*“¿Ya imiá nan̄kaamantuit?” tunaiyarmiania nu
(Márkus 9.33-37; Rúkas 9.46-48)*

¹ Nu tsawantaj ni unuiniamurij tariat Jesusan aniasarmiayi “Yus akupeamunam pachinia nu ¿ya imiá nan̄kaamantu áminiait?”

² Nuna tuíniakui Jesus uchin untsuk ajapen awajtsar ³ tímiayi “Tí nekasan tájarme, atumí enentáimtaij yapajjarum uchia áinis ajachkurmeka Yus akupeamunam pachinikiachminiaitrueme. ⁴ Nu asamtai ju uchia áinis péejchach enentáimtumana nuka Yus akupeana nuí nekas nan̄kaamantu ajasminiaiti. ⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

*Tsuumainti yajauch túrumtikiatin
(Márkus 9.42-48; Rúkas 17.1-2)*

⁶ “Shuar ju uchin Winia umirtana nuna tunaanum ajuarमतान्किया nuna túratsaj niisha kuntujén kayajaj jin̄kiar nayaantsanam ajapen kunanam ajunmaitkiun̄ka maak ainti, tímiayi. ⁷ Ju nun̄kanam tunáa iniaatai irunuk tuke itiuurchataiti. Antsu shuar chikichan tunaanum ajurka ti itiuurchatan in̄kiuntatui’ tímiayi.

⁸ “Nu asamtai ame uwejeme tura nawem tunaanum ajunmatniuitkiun̄kia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. ⁹ Núnisañ ame jimi tunaanum ajunmatniuitkiun̄kia ukuinkiam ajapata. Kame chikichik jijijaj pujusam nayaimpiniam wétin péñkeraiti. Antsu jinium mai jintiuk wétin imiá yajauchiiti’ tímiayi.

*Murik men̄kaaka áujmatsamu
(Rúkas 15.3-7)*

¹⁰ “Uchi ainia nu nakitirairap. Yusa suntarij nin wáinkiatniua nu winia Aparuj tjijuch pujuiniawai. ¹¹ Kame wi Aents Ajasu asan, men̄kaakarun eaktajtsan táwitjai.’

¹² “Enentáimpratarum. Shuar siañ (100) murikiun takakuitiat chikichik men̄kakamtai untsurij men̄kakacharun náinnium matsaak, men̄kakan eaushtatuak. ¹³ Wáinkiasha untsurij men̄kakacharua nujaj nan̄kaamas waraschattawak. ¹⁴ Núnisañ atumi Aparij nayaimpiniam pujana nu, nu uchi chikichikisha men̄kakacharti tawai’ tímiayi.

*Yus-shuarti tsankurnairatin
(Rúkas 17.3)*

¹⁵ “Chikich Yus-shuar ámin yajauch túrutmakuin̄kia nii werim áujtsata. Tura ámechik werim ame yatsumjaj chichasta. Anturtamkuin̄kia ame yátsum yáñkiume. ¹⁶ Tura anturtamchakuin̄kia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam. ¹⁷ Túrasa yatsum tuke ántachkuin̄kia Yus-shuarcha núnisañ enentáimtusta nu shuar.’

¹⁸ “Nekasan tájarme, ju nun̄kanam suritiam nu nayaimpinmasha suritniaktatui. Tura ju nun̄kanam tsankateam nu nayaimpinmasha tsankatnaktatui.’

¹⁹ “Núnisnak tájarme, ju nun̄kanam pujusrum jimiará Yus-shuarteram métek enentáimpratarum winia Apari nayaimpiniam pujana nu seakrumniñkia wakerarmena nuna suramsattarme. ²⁰ Jimiar menaintiusha Yus-shuar Winia enentáimturuk iruntrarmatai Wisha nuí nijijaj pujajai” tímiayi Jesus.

²¹ Takui Pítur werí Jesusan aniasmiayi “Uuntá, winia yatsur yajauch awajtakui ¿urutma tsankuratniuitiaj. Siátikik tsankuratniuitiaj?”

²² Jesus aiyak “Siátik tátsujme, antsu inian̄natsuk tsankuratniuitme” tímiayi.

Takakmau tsankurachun pachis áujmatsamiania nu

²³ Tuma asa Jesus Yus akupeamunam pachin̄kiaru tsankurnairartiniaiti tusa ju métek-taku chichaman áujmatuk tímiayi, “Uunt akupin takarjñ tumashin akirkarat tusa

untsukarmai. ²⁴ Yama nánkamuk tí nukap tumashmakua nuna untsukmai. Akikmakchamnia ti tumashmakuyi. ²⁵ Tura nu takakmau kuitri atsakuu uunt akupin “Yajasma áitkiasrum nuqartiuk uchirtiuk ashí waririntiuk suruktarum, timiai. Nu kuitjai akirkati” timiai.

²⁶ Tutai nu takakmau uunt akupniun tikishmatar seak timiai “Uunta, waitneasam nácarsatá. Auka, mash akiktatjame.” ²⁷ Uunt akupin waitnentar mash tsankur ankant akupkamai. ²⁸ Tura nú chichamaik nú takakmau jiinki ni ajn inkiunmai. Nú ajsha nin ishichik tumashiyyi. Tura tsékenki suwenam achik chicharuk timiai “Wari akirkata tumashitmena nu.”

²⁹ Tura ni aj nin tikishmatar timiai “Waitneasam nácarsatá. Auka, mash akiktatjame” timiai. ³⁰ Túrasha nakitramai. Antsu tsankurtsuk sepunam enkeamai ashí akirkati tusa. ³¹ Chikich takakmau nuna wáinkiar ti kúntuts enentáimtuiniak uunt akupniun ashí etsertukarmai. ³² Nuna antuk uunt akupin untsuk itia timiai “Yajachiihme. ¿Winia “waitnentrurta” túrutkumin tsankurachmakjam? ³³ Ameshá núnismek ame ajm tsankuratiuitme” timiai. ³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.” ³⁵ Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachi nekas enentáijjai tsankureachkurminkia.”

19

*Jesus nuwá ajapatniun áujmatsamiania nu
(Márkus 10.1-12; Rúkas 16.18)*

¹ Jesus nuna tinia ikiuak Kariréa nunkanmayá wémiayi. Tura Jurtañ entsa amain Jutía nunkanam jeamiayi. ² Untsurí aents nemariarmiayi tura jániancha péñker awajsamiayi.

³ Nui Pariséu Jesusan nekapsataj tusar aniasarmiayi “¿Shuar ni nuwen ititurchat akui ajapamniakait?”

⁴ Tutai Jesus tímiayi “¿Átumka Yus-Papí áujtsachukaitrum? Yámankamtaik Yuska shuáran áishman kan nuwancha najanamiayi tawai. ⁵ Tuma asamtai áishman ni aparín ni nukurín ikiuki ni nuwejai tsaniñ chikichik ayashtinia áinis ajasartatui, tu áarmaiti, tímiayi. ⁶ Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniati” tímiayi.

⁷ Takui tiarmiayi “Nuikia ¿urukamtai papí áarar nuwá ajapatniun Muisais tsankatkamia?”

⁸ Tutai Jesus tiarmiayi “Timiá ántichu asakrumin nuwá ajapatniun tsankatkamiayi. Túrasha émkaka núnischauyayi. ⁹ Wi tájarme, shuar ni nuwen chikichjai pujuschan ajapeakka tura chikichan nuatkanka tsanirmayi. Chikich áishman sha nuwá ajapamun nuátkanka nusha tsanirmayi” tímiayi.

¹⁰ Takui ni unuinamurí tiarmiayi “Nuikia áishman ni nuwé penké ikiukchamniatkiuin kua nuátkachminiati.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. ¹² Chikich chikich nuatkachmin áiniawai. Chikich nuátkachmin akiiniawaru áiniawai. Chikichcha aentsjai nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jáeka antukti.”

*Jesus uchin shiir awajsamiania nu
(Márkus 10.13-16; Rúkas 18.15-17)*

¹³ Nuyá Jesusan uchin itiararmiayi. Nin antiñ Yúsan áujtusarat tusar wakermiayi. Túruiniakui ni unuinamurí chicharkarmiayi. ¹⁴ Túruiniakui Jesus tímiayi “Uchi Winí winitin tsankatatarum. Suritkiarap. Kame ju uchia áintsan péejchach áinian nunak Yus akupkamniati.” ¹⁵ Tinia uchin miniakas nuyá wémiayi.

*Kuítrintin Jesusjai chichasmiania nu
(Márkus 10.17-31; Rúkas 18.18-30)*

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umírkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chíkich shuar tsanumpruraip, ¹⁹ ame apa nukusha umírkartá, ame shuárum ame ayashim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrincha ainia nu sústartá. Tura nayaimpiniam kuítrintin ajastatme. Nuyá Winia nemártústá” tímiayi Jesus. ²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurín tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti. ²⁴ Ataksha tájarme, kamiriuka kawái nañkaamas uunt asa auja jín wayachminiaiti. Núnisañ kuítrintin Yus akupeamunam pachiinkiatin ti itiurchataiti.”

²⁵ Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempramniat?”

²⁶ Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

²⁷ Nuyá Pítur tímiayi “Uuntá, iikia ashí ikiukchajik Ámin nemarsatai tusar. ¿Warín wáinkiattaj¹ iisha?”

²⁸ Jesus tímiayi “Nekasan tájame, ukunmañka ju nuñka yamaram ajastatui. Aents Ajasu asan, Wisha nuí, uunt akupin ajastatjai tura atumsha winia nemartusutirmeka Wijíají métek akupin ajastatrumé ashí Israer-shuar akupkatin. ²⁹ Tura shuar ni jeñcha, yachíncha, umajíncha, aparíncha, nukuríncha, nuaríncha, uchiríncha, tura nuñkencha Winia anentu asa ikiukin wekaakka, nu shuar nii ikiukmia núnisañ yamaisha ti unturí wáinkiattawai tura ukunmasha tuke shiir pujustatui Yusjái. ³⁰ Unturí yamáí penkerí áiniana nu ukunam ukunmaani pujusartatui, tura yapajíáwar yamáí ukunmaya áiniana nu ukunam emka pujusartatui” tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nuñka nérentin ni araamurín júuktaj tusa káshik iniartaj tusa jínkimiayi. ² Chikichík tenariu kuit jean tsawant takamtsuk akiktajrume tusa chichas ni araamun júuktiniam akupkarmiayi. ³ Nantu takuntaísha ataksha jiinki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aí nuyá áankúsha jiinki, núnisañ tinia akupkarmái. ⁶ Ataksha nantu patamsaj jínkimiayi. Tura shuaran yujan wáiniak “¿Urukamtai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nuñkaruj takautarum. Péñker akiktajrume.”

⁸ Kirit ajátekiájí takatrín wáinniun timiai “Takatan takasaru untukam akikiarta. Kíarají nañkamawaru emka akikiarta. Túram káshik nañkamawarují amuktá” timiai. ⁹ Takui nantu patamsa aí nañkamawaru wayawarmatai chikichík tenariu kuit jean ashí akikiarmai. ¹⁰ Mash uminramtai nuyá emka nañkamawaru wayawar “nuna nañkaamas achikchatjash” tu enentáimsarmai. Tura chikichík tenariu kuit jean achikiarmai.

¹¹ Achikiar nérenniun itiurchat enentáimturarmai. ¹² Tura tiarmai “Íikia ashí tsawant nantujají wáitsachjik. Ju shuarsha nantu patamsa aí nañkamawaruka penké ishichik takasaraí. Túrusha ijíají métek akikiarume” tiarmai.

¹³ Tutai nérentin chikichiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijíai iwiarachjik, timiai. ¹⁴ Pai, ame kuítrum achikiume. Nantu patamsáí takasuncha amíjiaí métek akiktinian wakerajai. ¹⁵ Warí, winia kuítrujai wi wakeramun túrachminkaitaj. Antsu wi tsan̄ka asamtai ¿yajauch enentáimturmek?” timiai.’

¹⁶ “Núnisaiti Yus-shuarnum. Émkaru áinia nu uku ártatui. Tura ukuyá áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

*Jesus ataksha ni jákatniurín etserkamiania nu
(Márkus 10.32-34; Rúkas 18.31-34)*

¹⁷ Jesus Jerusaréñnum jintiá wesa ni unuiniamurín akankin tiarmiayi ¹⁸ “Istarum, Jerusaréñnum wéaji. Nujs̄ha Israer-patri úuntrín tura ni jintinniuríncha Winia surutkartatui. Nujs̄ha, wi Aents Ajasu aín, “mantamnatí” túrutíartatui. ¹⁹ Tura apachnium surutkartatui. Nuí katsekruk̄ar, awattiar krúsnum máawarti tusar túrutawartatui. Túrash̄a jakayatan menaintiú tsawantáí nantaktiatjái” tímiayi.

*Jakupu tura Juán̄ka nukurí Jesusan seamiayi
(Márkus 10.35-45)*

²⁰ Nuyá Jakupusha Juán̄sha, mai Sepetéu uchirí, nukuríjiaí tariat Jesusan tikishma-trarmiayi. Tura nukurí Jesusan waitnentrurarat tusa seamiayi. ²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuí winia uchir chikichik untsuurnumaani chikichcha menaanmaani akupkarti tusam apujsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniatjái. Núnisan wáitsatniujai imiaitniua áintsan imiantiniatjái. ¿Nú piniñnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia piniñkruyá umartatrum. Wi imiantiatjana nujai imiantiatrum. Antsu Wijiaí tsan̄n̄kia pujustinniaka Wikia íschatniuitjai, antsu winia Apar iwiarturu áinia nuna nuí apujsattawai” tímiayi.

²⁴ Chíkich tias (10) unuiniamurí nuna antukar nu jímiar̄an kakerkarmiayi. ²⁵ Túmainiakui Jesus untsukar tiarmiayi “Ju nékarme, apachniumka kapitián ajasar ni shuarín nérenniua áinis ti akupenawai. Ni úuntrish̄a waantu enentáimsar “wítjai akupniun” tu enentáimtikianiawai. ²⁶ Antsu atumjain̄kia núnis áchatniuiti. Nan̄kaamaku ajastaj tákuñka chikicha yaintrí átiniaiti. ²⁷ Ame kapitiántrum ajastaj tákuñka ashí shuara yaintrí ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrín akikmatkajat tusan jákatniuitjai. Nuna tarimjai” tímiayi Jesus.

*Jímiar jii kusurun Jesus tsuármiania nu
(Márkus 10.46-52; Rúkas 18.35-43)*

²⁹ Jirikiú péprunmayá wénakui untsurí aents Nin nemariarmiayi. ³⁰ Nuí jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nan̄kaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

³³ “Uuntá, iimtiaí tusar wakeraji” tiarmiayi. ³⁴ Tuíniakui Jesus nin waitnentrar ni jiiin antñkarmiayi. Nu chichamaik ímiar̄ niisha Jesusan nemariarmiayi.

21

Jesus Jerusarénnum wayqamiania nu

(Márkus 11.1-11; Rúkas 19.28-40; Juan 12.12-19)

¹Jerusarénnum nuntumsar Petpajái péprunam jeawarmiayi. Nusha Uriwiu náinnium ayamchiyayi. Nuí jeawar Jesus ni unuiniamurín jímiaran akupeak tímiayi ²“Tíjjuch péprunam wérum umpuuru umpuuruchijjai jiníkiamu wáinkiatarme. Nu atiarum itar-titiarum. ³Tura aents “Urukantai áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

⁴Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi: ⁵“Ashí Israer-shuarnum ju etserkatarum:

“Iistarum, atumi Akupniurí, péejchach ajas umpuuruchiniam ekeemak winitramprume. Péejchach asa káarak áintstai umpuuru uchirín ekeemak winitrámtatrum,” titiarum.” Tu áarmaiti.

⁶Tutai nu jímiar unuiniamurí wear Jesus timia núnisan túrawarmiayi. ⁷Umpuuruchin nukurtiuk itiarumiayi. Tura ni pushirín áitkiaram Jesus entsamkamiayi. ⁸Shuar untsurí ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi. ⁹Shuar untsurí eem wearmia nusha tura uku winiarmia nusha kakantar untsumiarmiayi. “Juna weatrí uunt akupin Tawit asantai naníkaamakuiti. Yusa náarijn winiana ju ii Untrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰Jesus Jerusarénnum wayamtai ashí shuar ti enentáimainiak “¿Jusha yait?” tiarmiayi. ¹¹Chikichcha “Yúsnan etserin Jesusaiti, tiarmiayi. Nasarét pepru Kariréa nuníkanmayaiti” tiarmiayi.

Yusa Uunt Jeen suruktinian Jesus surimkiamiania nu

(Márkus 11.15-19; Rúkas 19.45-48; Juan 2.13-22)

¹²Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutaníkríncha núnisan ayanturmiayi. ¹³Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtaíya nútikiarme” tímiayi.

¹⁴Nuí Yusa Jeen jíi kusarusha shutuapsha Jesusan tariarmiayi. Túramtai tsuáarmiayi.

¹⁵Tura Israer-shuar pátrisha tura Israer-shuara jintinniurísha aents tujintiamun Jesus túrakui ísar kajerarmiayi. Nu arantcha uchi Yusa Jeen “Juna weatrí uunt akupin Tawit asantai naníkaamakuiti” untsumainiakui Jesusan ti kajerarmiayi. ¹⁶Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana júka áusachukaitrum. Júnis tawai, “Uchisha kuírchisha Yusa náarijn imiá shiir awajtusarat tusa Yus tsaníkatkaiti.” Tu áarmaiti.

¹⁷Nuna tinia ikiuniak Jerusarénnumia jíinki Petania péprunam we nuí kanarmiayi.

Jesus iikiu numin yumínkramiayi

(Márkus 11.12-14, 20-26)

¹⁸Kashin tsawaar Jerusarénnum waketas Jesus tsukaarmiayi. ¹⁹Iikiu numi jintiá yantam wajan wániak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

²⁰Nuna wániak ni unuiniamurí ti enentáimprar aniasarmiayi “¿Urukaku imiá wárik jaka?”

²¹Tuíniauí Jesus tiarmiayi “Nekasan tájarme, Yus nekas enentáimtakrumka, “nekas-pash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai. ²²Ashí Yus áujeakum seamna nu, Yus nekas enentáimtakum seakmeke, wáinkíattame” tímiayi.

Yusa kakarmaríjiai Jesus takasmiania nu

(Márkus 11.27-33; Rúkas 20.1-8)

²³Yusa Uunt Jeen Jesus wayá unuiniarmiayi. Turaj Israer-patri uuntri tura Israer-shuara úuntri sha Jesusan tariar aniasarmiayi “¿Yana chichamejají ju túram. Ya ju túratniuncha akuptamkai?” tiarmiayi.

²⁴Tutai Jesus tiarmiayi “Wisha aniastaj tusan wakerajrume. Ju áirkakrumniñkia Wisha yana chichamejají túraj nuna ujaktatjarne. ²⁵Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji. ²⁶Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuñiatsuk” tiarmiayi. ²⁷Nuyá Jesusan “Nékatjsi” tiarmiayi.

Tutai Jesussha añiñiak “Wátsek, Wisha núnisnak akuptukua nuna ujakchattajrume” tímiayi.

Jimiará uchi tiarmia nuna áujmatsamiania nu

²⁸Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹“Tutai uchi “Atsá, nakitiajai” timiai. Tayat urum enentáimiar takaumai.’

³⁰“Nuyá aparí chikichnasha werí núnisan timiai.’

“Tutai uchi “Apawa, páchitsuk wetajai” timiai, túrasha wéchamai.’

³¹“¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuñiakui Jesus tímiayi “Nekasan tájarne, yajauch shuar ainia nu tura tsanirma ainia nusha átumka pachintsrumniñ nii emka Yus akupeamunam pachinkartatui. ³²Iis, imiakratin Juan péñker wekasatniun etserkamiayi, túrasha antukchamarne. Antsu yajauch shuar ainia nu tura tsanirma ainia nu umirkarmiayi. Nusha wáinkiaitiatrum atumi tunaari enentáimturchemarne’ tímiayi.

Yajauch takaun áujmatsamiania nu

(Márkus 12.1-12; Rúkas 20.9-19)

³³Ju chíkich áujmatmasha antuktatum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwar shuar wáitrukarti tusa apujkimiai. Tura niñkia yajá nunkanam wemai. ³⁴Tura júuktin tsawant jeamtai juuk nakak akúptúrkarti tusa chíkich takarniuri akupkamai. ³⁵Tura nuí pujuinia nu, akupkamun achikiar chikichnaka katsumkar, chikichnasha máawar, chikichnasha kayajají tukurar máawarmai. ³⁶Túrawarmatai nérentin takarniun nuna nankaamas akupramai. Ataksha nuí pujuarmia nu núnisan túrawarmai. ³⁷Amúamunam ni uchirín akupeak “Winia uchir asamtai umirkachartimpiash” timiai. ³⁸Túrasha nu takau nérenniu uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹Tiar achikiar arant júkiar nuí máawarmai.” ⁴⁰Tinia Jesus aniasarmiayi “Nunká nérenniuri taa nu takaun ¿itiurkatín?” tímiayi.

⁴¹Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susannia nuna apujstatawai” tiarmiayi.

⁴²Tuñiakui Jesus tímiayi “Átumka Yus-Papikia ¿penkek áujchaitrum? Júnis áarmaiti: “Jea jeamin utsankarmia nú kaya ashí kayajají nankaamas apujsamuiti. Núnaka ii Uuntri Yus túraití. Iisha ísar ti enentáimtaji.” Tu áarmaiti.

⁴³Tuma asamtai tájarne, Yusna írrunna nu wáinkiatárum tusa suramsamuitiat atumíya junas chíkich aents súnastatui. Niisha awantukiartatui. ⁴⁴Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajstatawai auka” tímiayi Jesus.

⁴⁵Israer-patri uuntri sha Pariséusha Jesus áujmatman antukar “in túramji” tusar achiktaj tiarmiayi. ⁴⁶Tura ashí aents “Jesus Yúsnan étserui” tuinia ásarmatai nin ashankarmiayi.

¹Jesus ataksha áujmatuk júna tímiayi: ²“Yus akupeemunam pachiinkiertin júnis enentáimpramniati. Uunt akupin ni uchirí nuáteakui nampermamai. ³Túrak ni takarniurín ipiaamatarum tusa akupkarmai. Tura ipiaamusha nakitrarmai. ⁴Ataksha chíkích takarniuncha ipiaamakrum jú titiarum tusa akupkarmai. ““Mash yurumkam iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵Támaitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶Chikichcha ipiaakratniun achikiar yajauch awajsarmai, tura chikichnaka máawarmai. ⁷Túramtai uunt akupin ti kajek, ni suntarí mash máatarum túrarum ni jee mash ekeemáktárum tusa akupkarmai. ⁸Nuyá ataksha ni takarniurín akupkamai. “Nuatnaikiatin jísat mash iwiamuítii, timiai. Tura nu ipiaamu winichmín armái. ⁹Tuma asamtai pepru jintí werum ashí shuar nánkamas wáintrum nu ipiaatarum” timiai. ¹⁰Takui takarniurí júinkiar pepru jintín wajainian, yajauch shuarnasha péñker shuarnasha, ashí ipiaawarmai. Túramtai jee piákmai.”

¹¹“Nuyá uunt akupin ipiaamun ísartaj tusa wayamai. Nuí shuaran péñker iwiamamprachun wáinkiamai. ¹²Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. ¹³Nuyá uunt akupin yurumka ajaaman timiai “Achikrum nawenmasha uwejnusha júinkiarum aa júikrum kiritniunam ajapatarum. Nuísha ti úutin ti wáitsatin átatui” timiai. ¹⁴Kame untsurí ipiaamu ániawai antsu ishichik achikma ániawai.”

*Uunt akupin Sésar akiktinia nu
(Márkus 12.13-17; Rúkas 20.20-26)*

¹⁵Nuyá Paríséu chichaman najatawar uyumtikiatai tusar tiarmiayi. ¹⁶Túrawar ni shuaríncha tura akupin Erutisa nemarniurísha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkích shuar tuinia nu ántutsuk nekasam Yus-Chicham jintífame. Shuar shiir enentáimturarat tusam jintífatsme, tiarmiayi. ¹⁷Tuma asamtai jú nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸Jesus ni yajauch enentáijjai anfam nekáa tiarmiayi “Aya shiir chichamtiniaitume. ¿Urukamtai uyumatkiarkatin wakerutarum? tímiayi. ¹⁹Wats, Sésar akiktinia nú kuit itititiarum.” Takui chikichik kuítian ititariarmiayi. ²⁰Nuna iis Jesus aniasarmiayi “¿Jui yana yapimpiait tura yana naari áarmait?”

²¹Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. ²²Tura nuna antukar ti enentáimprarmiayi. Tura ikiuiniak wearmiayi.

*Jesusan jakamunmaya nantaktinian aniasarmiania nu
(Márkus 12.18-27; Rúkas 20.27-40)*

²³Nu tsawantaik Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar júna Jesusjai áujmatsarmiayi. ²⁴“Uuntá, Muisais júna áartampramijai, “áishman uchin yajutmatsuk jakamtainkia ni yachí nu nuwan nuatak ni yachin yajútmátrati,” tu áarmiayi, tiarmiayi. ²⁵Ayu, íi shuarum siati (7) yáchtintin ármiai. Iwiairi nuatak uchin yajutmatsuk jakamiayi. Tura wajen ni yachin ikiurkimiayi. ²⁶Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. ²⁷Nuyá nuwasha jakamiayi. ²⁸Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹Tuiniakui Jesus tímiayi “Yus-Chichamsha nékachkuram tura Yusa kakarmarísha nékachkuram nantaktin atsawai tákuram ti awajiarne. ³⁰Nekaatarum. Jakamunmaya nantakiaruka nuatkachartatui. Antsu Yusa suntarí nayaimpiniam pujuinia núnisar nuartichu pujusartatui. ³¹Túrasha jakamunmaya nantakiatatna nu nekaatajtsa wakerakrumka jú enentáimsatarum. Muisais aarma nu áujschuchakaitrum. Júnisán áarmiai:

³² “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchiiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruítai Yusjai iwiaaku pujuuniak nantakmin ániawai” tímiayi. ³³ Ashí aents nuna antukar nu jintintiam ti enentáimprarmiayi.

*Yus akupkamu imiá enentáimtustinia nu
(Márkus 12.28-34)*

³⁴ Satuséu Jesusan aiktinian tujinkirmatai Pariséu nuna antukar iruntrarmiayi. ³⁵ Tura chikichik Pariséu jintintin asa Jesusan uyumtikiataj tusa aniasmiayi ³⁶ “Uuntá, ¿túa Yus akupkamu imiá nankaamas enentáimtustiniat?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijajisha tura tuke enentáimtusam aneeta.” Tu áarmaiti, tímiayi. ³⁸ Núiti emka ashí akupkamu nankaamas enentáimtustinia nu. ³⁹ Chikichcha jujaj métek-taku awai. Nusha tawai: “Ame íruramuram ame ayashim aneamna nútiksamek aneeta.” ⁴⁰ Nu jímiar akupkamu umirkam ashí Muisais akupkamia nusha tura ashí Yúsnan etserin unuiniarmia nusha umirkattame” tímiayi.

*Kristu Tawit weeaitiat Yusa Uchirinti
(Márkus 12.35-37; Rúkas 20.41-44)*

⁴¹ Tura Pariséu tuke irunar pujuuniaku ⁴² Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniaku Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntrun juna tímiayi: “Akupin pujutainium, winia untsuuruini, pujusam nákarsata. Ashí ame nemasrumin nupetkan Ámin umirtamkarti tusan amastajai” tímiayi Yus.” Tu tímiayi Tawit.

⁴⁵ Watsek, Tawit Krístun “winia Úuntur” tajsha ¿itiurak ni pampanmari áti?” tímiayi Jesus. ⁴⁶ Nuna takui penkesha ákcharmiayi. Túrawar atakka uyumantikiatai tusan aniascharmiayi Jesusan.

23

*Jesus Pariséuncha Israer-shuara jintiniurincha “yajauchitrume” timiania nu
(Márkus 12.38-40; Rúkas 11.37-54; 20.45-47)*

¹ Jesus ni unuiniamurincha tura ashí shuárnasha tiarmiayi ² “Israer-shuara jintinniurisha tura Pariséusha Muisais akupkamun paant ujatmainiawai. ³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin ániawai. ⁴ Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjajisha ishichkisha takuitniun nakitiainiawai. ⁵ Aya shuar írsarti tusan ashí túruiniawai. Ashí shuar péñker enentáimturarti tusan Yus-Papin nijiajincha tura kunturjincha ti wanakaram awajsar anujak yujainiawai. Tura nu arantcha pushiri sasariarman ashí shuarjai nankaamas esaram awajas wekainiawai. ⁶ Nampernumsha péñker iwiaranunam pujustinian wakeruiniawai. Iruntainmasha nankaamantu ajasa pujustinian wakeruiniawai. ⁷ Jintia wekainiaksha ashí aents áujtuiniak “Jintinkiertiniá” turutiarti tusa wakeruiniawai’ tímiayi.

⁸ “Túrasha átumka ashí shuar “Jintinkiertiniá” turutiarti tusa enentáimsashintiaitrumé. Átumka nuámtak yáchintrume. Átumka chikichik jintinkiertin ni naari Kristu takakrume. Nu asamtai “Jintinkiertiniá” túramcharmin ániawai. ⁹ Ju nunkanmasha shuar “Aparú” tiirap. Chikichik nayaimpiniam pujana nu atumí Aparinti. ¹⁰ Atumi uuutri aya Krístuk asamtai “Uuntru” túramcharmin ániawai. ¹¹ Antsu átum írutkamunmaya uunta nuka peejchach átiniaiti. ¹² Shuar nankaamantu ajastaj tákuinkia Yus nin péejchach awajsattawai. Antsu péejchach ana nuna Yus nin nankaamaku awajsattawai’ tímiayi.

¹³‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Yus akupeamunam wayátin waiti epenniuitrume. Atumsha wayátsuk chikichcha wayátaj tuinia nusha suritniuitrume.’

¹⁴‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Wajé jee atankiirum aents enentáimturajin tusarum ti esaram Yus áujtini-aitrume. Túrin asarum átum ti asutniátniuitrume.’

¹⁵‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Nunkanmasha nayaantsanmasha yajá wekainiuitrume chikichík shuar winí nemartusat tusarum. Tura atumi nemari ajasmatai atumjai nankaamas tunáa sumamamnia awajearme.’

¹⁶‘Wáinkiatárum átumka. Jintinkiertiniaitiitrum nékachu asarum kusurua ániuitrume. Ju jintiarme: “Shuar nekasán tajai tusa Yusa Jee páchiakka nii tana nuna umitsuk ikiukminiaiti. Antsu nekasán tajai tusa Yusa Jee kuri ana nuna páchiakka ti nekas umiktiniaiti” tniuitrume. ¹⁷Nétsetrume. Yúsjaínkia ashí kuri ánrachukait. Antsu Yusa Jee írúnna nuka aya nuin ikiusma asa Yusna ajasuiti. Tuma asamtai kurijjai nankaamas Yusa Jee enentáimtusiniaiti. Enentáimcha asarum kusurua áinin wáakuitrume. ¹⁸Nu arantcha tniuitrume: “Shuar nekasán tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” tniuitrume. ¹⁹Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume. ²⁰Enentáimpratarum. Shuar nekasán tajai tusa Yús-sutain páchiakka aya sútainiak páchiatsui antsu sutaincha tura nuí patasmancha mái-metek páchiawai. ²¹Núnisan shuar Yusa Jee páchiakka aya nunak páchiatsui antsu Yus nu jeanam pujú asamtai nunasha páchiawai. ²²Núnisan shuar nayaimpin páchiakka Yus pujutainchsetrume. Penké naman Yusjai ánrachukait. Aya Yúa tura Yus nuí pujana nunasha páchiawai.’

²³‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Kumintsu nukéscha, anisa nukéscha, menta nukéscha tias (10) akantram chikichik akankamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtusintincha, waitnentáimtusintincha tura tuke péñker túratniusha enentáimtusuk ikiuwitrume. ²⁴Átumka jintinkiertiniaitiitrum nékachu asarum kusuru ániuitrume. Kutanam yajasmach enketu wáinkiumeka júwitrume. Túrayatrum kamiriu wáinkiumeka kawai nankaamas úunt ain takamtsuk kújawitrume.’

²⁵‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Átumka tsapasha piniñsha initiaaní niijiatsuk aya pátatek niijiawitrume. Núnisrum pátatek shiir awajmamniuitrume tura enentáiminkia kasamkatniusha tura chíkichna wakeruktincha nujai piákuitrume. ²⁶Kusuru ániuitrume, Pariséutirmeá. Antsu emka initiaaní tsapasha piniñsha niijaktarum. Túrakrumniñka pátatkesha mai péñker átatui. Núnisrum atumsha atumi enentáin ana nu shiir awajsarum pátatkesha shiir átatrume.’

²⁷‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Iwiarsamu pujujai yakarar shiir awajsamua ániuitrume. Aaní shiir ániawai. Tura initkia jaká ukunchijjai piákuiti. ²⁸Núnisaitrume atumsha. Chíkich shuar íismaka ti shiira ániuitrume. Túrasha atumi enentáinkia ashí mujmiái piákuiti.’

²⁹‘Maa wáinkiatárum jintinniutirmesha, Pariséutirmesha. Ántrarum shiir chichamtini-aitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura péñker shuar yaunchu jákarusha shiir enentáimtusintin tusarum ni iwiarsamu shiir awajearme. ³⁰Túrakrum ju tniuitrume: “Íikia yaunchu ii weatrijiai pujaikturkia Yúsnan etserin máatin yáimkiachaaji.” ³¹Nujai ti paant chichaarme atumsha. “Íi weatri Yúsnan etserniun máawar tunáa túrin ármiayi” tárume. Tura “Yáimkiachaaji” táyatrum, atumsha métek túrin asarum “Niijiai méteketji” tárume. ³²Wats, atumi weatri nankamawarmia nu átum amuktatrume’ tmiyai Jesus.

³³ ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuyá žitiurak uwempratarum?’ ³⁴ Untsurí shuaran akuptuktatjarme. Yúsnan etserniuncha, ti nekancha, jintinkiertinnisha akuptuktatjarme. Tura atumsha chíkich máattarme, chikichcha krúsnum ajinruarum máattarme, chikichcha iruntai jeanam asutiáttarme, tura chikichcha ashí nuńkanam áinrattarme. ³⁵ Nu tura asarum péńker shuara numpé puarma nujai átum sumamattarme. Yámankamtaik Apir ti penker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiayi. Wats, Apir máamunmaya Sakarías máamunam ashí péńker shuar ti untsurí máamujai sumamattarme. ³⁶ Nekasan tájarme, yamá pujuiina nú shuar ashí nujai sumamawartatui’ tímiayi Jesus.

Jerusarénnumiá shuaran Jesus aneak útmiania nu
(Rúkas 13.34-35)

³⁷ ‘Jerusarénnumiá tirméa, Yúsnan etserin máiniatirume. Yus akatar akupturmakmasha kayajai tukuram máiniatirume. Túrin árumniń waitnentajrume. Atash ni uchirin weana áitkiasnak weartinian wakerimjarme, tura nakitramarme. ³⁸ Istarum. Ame pépruram ajapamuiti. ³⁹ Tura “Yusa náarijn winiana nu, shiir ati” títiatrumna nu tsawant jeatsain penké wáitkiashtatrume. Nuna tájarme” tímiayi Jesus.

24

Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)

¹ Jesus Yusa Uunt Jeeńia jiinki weai ni unuiniamurí nin tariar Jean iniktusar áujmat-sarmiayi. ² Tura Jesus tiarmiayi “Nu mash yamá wáinrume. Tura nekasan tájarme ukunmańka mash saanaktiatui. Chikichík kayaksha ekentramurí atsuttawai” tímiayi.

Amúamu tsawant nekaatin
(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear nińki nui pujusar ni unuiniamurí Jesusan aniasarmiayi “¿Nusha urutaik túrunatí. Tura ame tátincha tura nuńka amuukatin tsawant jeakuisha warijjain nekaattají? Nu ujkataka” tiarmiayi.

⁴ Túniakui Jesus tímiayi “Aneartarum, anańkramawairap. ⁵ Untsurí shuar winia náarun pachisar “wi Krístuitjai” tiar untsurí shuaran anańkawartatui. ⁶ Ti untsurí meset chicham antuktatrume túrasha sapijmiakarap. Núnisan átiniaiti nuńka amúatsain. ⁷ Apachcha chíkich nuńkanmaya apachjai máaniawartatui. Tura ti tsukasha átatui. Suńkursha ti pampartatui. Uusha ti uurkartatui. Nuka untsurí nuńkanam ashí túrunawartatui. ⁸ Nujai ti wáitsatin aya yama nańkamui’ tímiayi.

⁹ Nuyá atumniasha yajauch awajnsarti tusa surutmakartatui. Tura mantamawartatui. Tura winia naar pachia asakrumin ashí shuar muńjramkartatui. ¹⁰ Nu tsawantai untsurí shuar Yúsán iniaisartatui. Túrawar nuamtak muńjniainiak surunairartatui. ¹¹ Untsurí shuar wáitruiniak “wi Yúsnan etserniuitjai” tiartatui. Túrawar untsurí shuáran nusháa enentáimtikrartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nuńkanam etsernaktatui. Túramtai amuukatin tsawant jeattawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsnan etserin Taniar muńjmiamtik tuke emesratin ana nuna yaunchu aar etserkamiayi. Nuka Yusa Jeeń wantinkiamtai ¹⁶ ashí shuar Jutía nuńkanam írunna nu, muranam pisararti. ¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitijá tichati. Antsu nuyanj wárik pisarti. ¹⁹ Nu tsawantai nuwá ajamtincha tura kuńrchin takaku ainia nusha ti wáitsartatui. ²⁰ Ayampratin tsawantaisha tura michá nántutincha nu pisartin tsawant áchati tusarum Yus seatarum. ²¹ Maa, nu tsawantai ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai.

²² Nu wáitsatin ti esarmaitkiuńkia chikichkísha uwemprachainti. Tura Yus nu wáitsatniun

wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai' tímiayi.

²³ "Tura atumin "Júiti Kristu," tuíniakuisha tura "Nuí pujawai" tuíniakuisha anturkairap. ²⁴ Untsurí shuar Krístuitjai tusar wantinkiartatui. Untsurísha "Yúsnan etserniuitjai" tiartatui. Tura shuáran anaŋkataj tusar aents tujintiamun iniakmasartatui. Tura ti kakaram túruiniak Yús-shuarnasha anaŋkamin ániakuíŋkia anaŋkawarainti. ²⁵ Túrunatsajin nuna emka ujaajrume. ²⁶ Tuma asamtai "Iis, Kristu nuí aents atsamunam pujawai" túramainiakuisha nuí wéerap. "Jui úumak pujawai" tuíniakuisha anturkairap. ²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiattajai. ²⁸ Wats, jaka tepaana nuí chuan káutkachartatuak' tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ "Ti wáitsatin nankaasmatai ti wárik tsawáí nantu kajinkiattawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui. ³⁰ Nuíŋkia Wi Aents Ajasuka, tátiniur paant átatui. Tura ashí nunkanmayá aents Wi winiáí wáitkiar asuttiamattaji tusar úutiartatui. Wisha ti kakaram tura Yusa wincharijjai yuraŋminiam winiáí wáitkiartatui. ³¹ Yusa suntariŋ kachu kakaram umpuatarum tinia akupkamtai nu suntar ashí nuŋkanmayá ashí Yús-shuaran, Yus achikma ásarmatai, irurartatui' tímiayi.

³² "Ikiu numiri nakumea nu nekaatarum. Ni nuken eteakui "esat nantu jeatemayi" tátsurmek. ³³ Núnisan ashí ju wáinkiumeka "amuukatin tsawant nekas jeatemayi" títiniatrume. ³⁴ Nekasan tájarne, yamáí aents pujuinia nu amúatsajin ashí túrunattawai. ³⁵ Nuŋkasha nayaimpisha amuukartatui antsu winia chichamur amuukashtatui' tímiayi.

³⁶ "Tura nu túrunatin tsawant nekanachminiaiti. Yusa suntariŋsha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai' tímiayi.

³⁷ "Wi tátiniur jeamtai yaunchu Nuai pujumia nú tsawantin túrunamia núnisan átatui. ³⁸ Nu tsawantin, tuke amaartsajin, aya júnisaj aa asamtai yurumuk umarar pujuarmiayi. Nuatnainiarmiayi. Ni nawantriŋcha nuatmamtikiarmiayi. Tura tumá pujuiniaí Nuai uunt kanunam enkemamtai ³⁹ nu aents tuke nékainiatsajin ama amarak mash amuukarmiayi. Núnisan átatui Wi tátin jeamtai. ⁴⁰ Nu tswantajk jimiará shuar ajanam pujuttawai. Chikichik junaktiatui tura chikichkia ikiunkittiwai. ⁴¹ Núnisan jimiará nuwá shana nekeak pujuttawai. Chikichik junaktiatui chikichcha ikiunkittiwai' tímiayi.

⁴² "Nu asamtai atumsha iwiarnarum pujustarum. Nekaachminiaiti uruk áintsuk tar-tijjarum. ⁴³⁻⁴⁴ Tuma asamtai aneara pujustarum. Wi nekaachmanum tátin júnisaj enentáimpramniaiti. Shuar ju kashi kasa tátinian nekaŋka kánutsuk kasa táawaj tusa iwiarnar nákasainti. Núnisrum aneara pujutarum.'

Pénker takamtikniuncha yajauch takamtikniuncha Jesus áujmatsamiania nu

(Rúkas 12.41-48)

⁴⁵ "Shuar pénker uminian tura pénker enentáimniun áujmatsattajai. Nuna uuntri yajá irauweak "Yurumátin jeamtai winia takartin ayuratarum" tichanpiash. ⁴⁶ Nu takamtikni-uncha ni uuntri taa takatriŋ tímiatrusaj túran tariŋkia shiir enentáimtusainti. ⁴⁷ Nekasan tájame, umin asamtai ni uuntri ashí ni waririŋ wáitrukát tusa takatan susattawai. ⁴⁸⁻⁴⁹ Antsu úuntur wau táchattawai tusa takamtikin ni uuntri yáintriŋ yajauch awajeak tura takatsuk aya yurumátniun tura nampektinian wararkuŋka nu takamtikin yajauchiiti. ⁵⁰ Turaj ni uuntri aya aneachma taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nuí akupkattawai. Nuísha ti wáitak ti úuttiatui' tímiayi Jesus.

¹Yus akupeamunam pachiinkiatin júnis átatuí. Nuatnaikiatin jísat akui tias nuwá natsa kantiran akaawar nuátkattana nu áishmanñan inñiun jeá itiatái tusar wearmai. ²Señku nuwá enentáimcha armaí. Tura chíkich señku nuwá enentáimin armaí. ³Enentáimcha arma nú nuwá aya akaamunak juñiak amuukamtaí yaraatniun asuitin júkicharmaí. ⁴Antsu chíkich señku núwaka akaamuncha juñiak tura ataksha amuukamtaí yaraatniun asuitin júkiarmaí. ⁵Tura júinkiarmataí nuatkatin áishman wari taachkui karí pujakui kanararmaí. ⁶Nuyá kashi ajapéñ shuar untsukum “Pai nuatkatin winiawai. Werirum inñi-unñarum” timiaí. ⁷Tu untsumun antukar nantakiar kantiran akaataí tusar pujursarmaí. ⁸Nuyá señku nuwá enentáimcha arma nu, chíkich nuwá enentáimniun tiarmaí “Incha atumi asuitirí ishichik ajamprusaitia. Ii kantirísha kajiniawai.”

⁹“Tutai chíkich señku nuwá tiarmaí “Atsá, warí incha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmaí.”

¹⁰“Tura nuyá señku nuwá enentáimcha arma nu, asuitian sumak utitiaí tusar wéarají ukunam nuatkatin áishmanñan tamai. Túramtaí enentáimin nuwá arma nuka nuatnaikiatin námpernam nuatkatniujají wayawarmaí. Túramtaí wáitin epeniarmaí. ¹¹Tura epeniariaí enentáimcha nu táarmaí. Tura tiarmaí “Úuntá, waiti uratritia.”

¹²“Tu untsumainiakui nu uunt kajerak chichak “Cha, zyátsukaitrum? Penké nékat-sjarne” tiarmaí.” ¹³Jesus nuna áujmatas umik tímiayi “Aents Ajasuitjai tura tátin tsawantrusha tura uruk aiñ tátaj nusha nékatsrume. Tuma asarum tuke iwiarnarum pujustarum’ tímiayi.

Kuit susamun áujmatsamiania nu

¹⁴Núnisan Wi tátin júnisaiti. Shuar chíkich nunñanam wéak_u ni takarniurñ untsukar ni kuñtrñ akanak súsarmai. ¹⁵Chikichkiniak señku mir (5.000) kuñtian susamai. Chikichnasha jimiará mir (2.000) kuñtian susamai. Tura chikichnasha chikichik mir (1.000) kuñtian susamai. Nii takastin jearma nujají métek súsarmai. Tura ikuak yajá wemai. ¹⁶Takarñ señku mir kuñtian achikmia nujají takakmas ataksha señku mir kuñtian patakmai. ¹⁷Chikichcha núnisan jimiará míran achikmia nujají takakmas ataksha jimiará míran patakmai. ¹⁸Tura chíkich shuar ni ununtrí kuñtrñ chikichik míran achikmia nuna waja taur úukmai.’

¹⁹Nuyá ukunam nu shuara uuntrí támai. Tura kuñtian súkiarma nujají itirukarmakit tusa untsukarmaí. ²⁰Emka señku mir kuñtian achikmia nu tamai. Nuyá ni uuntrñ chíkich señku mir patakman suak timiaí “Úuntá, señku mir kuit surusmame. Pai, atak señku míran patasmajai.”

²¹Takui ni ununtrí timiaí “Ti penker takakmauwitme. Nekas uminaitme. Ishichkijajisha ti penker takakma asakmin ti núkap yamaikia amastatjai. Winí wayam wijají ti shiir warasta” timiaí.’

²²“Nuyá chíkich shuar jimiará míran achikmia nu tarí timiaí “Úuntá, jimiará mir surusmame. Pai, ataksha jimiará míran patasmajai.”

²³Takui ni ununtrí timiaí “Ti penker takakmauwitme. Nekas uminaitme. Ishichkijajisha ti penker takakma asakmin ti núkap yamaikia amastatjai. Winí wayam wijají ti shiir warasta” timiaí.’

²⁴“Nuyá chíkich shuar chikichik míran achikmia nu tarí timiaí “Úuntá, ti kajen asakmin tura araachiatam tura atsaamprachiatam júurtuktarum tiniu asakmin ²⁵sapñmiakun ame kuñtrumniaka nunká táutran úukmajai. Pai, juñti ame surukmiam nu” timiaí.’

²⁶“Takui ni ununtrí timiaí “Ámeke yajachiiitme. Aya nákiitme. Wi araachiatan tura atsaamprachiatan júurtuktarum tñiuitme túrutsumek. ²⁷Tu enentáimkiunka zurukamtaí kuit-iruntainiam ikiirtuschamam? Nuikia wi táakun patasan achikíajají” timiaí. ²⁸Nuna tñia nuñ wajainian tiarmaí “Ju shuar chikichik mir kuit atankirum tias mir kuñtian takaka nu susatarum. ²⁹Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai. ³⁰Ju umichu shuarsha aa kiritniunam ajapatarum. Nuñ ti wáitiak ti úuttiatui” timiaí”. Tu áujmatsamiayi Jesus.

Akantratin átatna nu

³¹ Jesus áujmatuk t́míayi ‘Aents Ajasuitjiana nu ashí akupin ajasan Yusa suntari éñkekma winittíajai. Tura Uunt Akupin asan shiir pujutairui pujustatjai. ³² Túramtai ashí nunkanmayá aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea ńtísanak shuáran akantrattajai. ³³ Tura kachurtichunka, péñkera nuna, untsuuruini awajsartatjai. Tura kachurtinniaka, yajachia nuna, menaaruiñ awajsartatjai. ³⁴ Túran nekas Uunt Akupin asan untsuuruini wajainian títíatjai “Atumniaka winia Apar shiir awajtamsaitrume. Wi akupeajna nuí wini-tiarum. Yus nunkan najanamia t́mianaik átum nuí warastinian tsankatramkamiarme. ³⁵ Kame Wi tsukamá wekaí ayurtuamiarme. Kitiama wekaísha umartin surusmiarme. Wait ajá wekaísha itiaarum ajamprusmiarme. ³⁶ Pushir atsaísha átumka surusmiarme. Jaa tepaísha íráimiarme. Sepunam enketáísha tarum íráimiarme” títíatjai. ³⁷ Tutai untsuuruini wajainia turutiartatui “Uuntá, ¿urutia tsukamá wekaamnisha ayuramají. Urutiá iisha kitiama wekaá wainkiarsha umartincha amasmají. ³⁸ Tura urutia wait ajá wekaamnisha tura pushiram mamurmataisha iisha amasmají. ³⁹ Urutia iisha jaa tepamin tura sepunam enketmin wainkiarsha winitir ímíají?” turutiartatui.’

⁴⁰ “Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai t́míayi.

⁴¹ “Wi Uunt Akupin asan menaaruiñ wajainian tiartatjai “Atumsha yajá wetarum. Yajachijíají yuminíkrumuitrume. Yus uunt iwianchi ni suntarijijíají tuke kajinkiashtin jinium apeatniua nuí wétatrume atumsha. ⁴² Átumka Wi tsukamají ayurtuachmarme. Kitiamaísha umartin suruschamarme. ⁴³ Wait ajá wekaísha ikiatrachmarme. Pushirun imiampraísha entsartin suruschamarme. Jaa tepaísha tura sepunam enketáísha íraichmarme” tiartatjai.’

⁴⁴ “Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha iisha winitir yáiníchamají?” turutiartatui.’

⁴⁵ “Wi Uunt Akupin asan tiartatjai “Nekasan tájarme, Ashí Wí shuar, péejchachisha waitnentrachmarum nuí Winiasha túrutachuitrume” tiartatjai. ⁴⁶ Nu shuarka tuke wáit-satniunam weartatui. Tura Yus achikma ainia nusha tuke iwiaaku Yusjají pujustinnium weartatui” t́míayi Jesus.

26

*Jesus achiktin chichaman jurusarmiania nu
(Márkus 14.1-2; Rúkas 22.1-2; Juan 11.45-53)*

¹ Jesus ashí nuna tinia umik ni unuiniamurñ tiarmiayi ² “Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” t́míayi.

³ Nuyá Israer-patri uuntrísha Israer-shuara jintinniurísha Israer-shuara úuntrísha Kaipiasa jeen áarin iruntrarimiayi. Kaipiassha Israer-patri uuntriyaayi. ⁴ Nuí anankatin chichamjají Jesus achikar maatai tusar chichaman jurusarmiayi. ⁵ Tura tiarmiayi “Jístatin túrachminiaiti aents téetet ajarain tusar.”

*Nuwá Jesusan kunkuinian ukatramiania nu
(Márkus 14.3-9; Juan 12.1-8)*

⁶ Jesus Petania péprunam pujus tunamaru Semunka jeen pujumiayi. ⁷ Nuí pujají nuwá ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiayi. ⁸ Túramtai ni unuiniamurí nuna ísar kajerkar tiarmiayi “¿Urukamtai au kunkuin imiá kuftniasha áantrasha wasurea? ⁹ Antsu ti kuitjají suruk shuar kufrincha ainia nuna yáitskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwá yajach enentáimtarum? Túrutana ju ti péñkeran túrayi. ¹¹ Kufrincha tuke atumjají pujushtatuak. Antsu Wikia atumjají tuke pujushtatjai. ¹² Ju nuwá kunkuinjají ukatrurají júka, Wi iwiarnastin asamtai

áitkiarayi. ¹³ Nekasan tájarme, ashí nunkanam uwempratin chicham etsernakui tuke ju nuwá pachinias etsernaktatui. Túramtai ni túramuri kajinmankishtatui” tímiayi.

*Jútas Jesusan surukmiania nu
(Márkus 14.10-11; Rúkas 22.3-6)*

¹⁴ Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri unutriin wémiayi. ¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kúitian akikiarmiayi. ¹⁶ Nu akikiam Jútas itiurak Jesusan súsaraintaj tu enentáimias wekaimiayi.

*Kristu jakamu enentaimtustin námper
(Márkus 14.12-25; Rúkas 22.7-23; Juan 13.21-30; 1 Kurintianam 11.23-26)*

¹⁷ Wakapruachu tantan yurumáinia nú námper yama nankamkui Jesusa unuiniamuri tariat aniasarmiayi “¿Tuj paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjai ame jeemijn yurumátjai” tawai” titiarum” tímiayi. ¹⁹ Tutai ni unuiniamuri wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasái Jesus ni tuse (12) unuiniamurijjai misanam yurumuk pujumiayi. ²¹ Nuí yurumáiniaí Jesus tiarmiayi “Nekasan tájarme, átum pujarmena juyá chikichik Winia surutkattawai.”

²² Nuna takui ti kúntuts enentáimprar mai aní awajiararmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú pininnuman jimiartukan yuajna ju Winia surutkattawai. ²⁴ Wi Aents Ajasu asan Yus Chicham tana nujai métek túrunattajai. Túrashashuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuiniaí Jesus yurumkan achik Yúsan yuminsamiayi. Tura puur ni unuiniamurin suiniak tímiayi “Ju yuatarum. Juka winia ayashruiti.” ²⁷ Nuyá pininikian achik Yúsan yuminsamiayi. Tura suiniak tiarmiayi “Jusha ashí umartarum. ²⁸ Juka winia numparuiti. Tura winia numpar puármatai, yamaram chicham nekas uminkiatstawai tawai. Tura puármatai untsuri shuara tunaarin tsankurattawai. ²⁹ Tura ataksha átum Yus akupea nuí jeatsrumnin ju uwa yumirin umarchattajai. Tura tsawant jeamtai atumjai Yus akupeana nuí yamarman umartatjai” tímiayi Jesus.

*Pítur natsantratniua nuna Jesus ujakmiayi
(Márkus 14.26-31; Rúkas 22.31-34; Juan 13.36-38)*

³⁰ Yús-kantan kantamáwar umikiar Uriwiu nánnium wearumiayi. ³¹ Nuí Jesus tímiayi “Ju kashi átum Winia ashí natsantruratrum. Kame Yus-Papiniun áarmaiti “Murikiu wánniun mantuattajai túram murik pisarartatui.” Tu áarmaiti. ³² Tura nantakin Kariréa nunkanam Wi émkattajai átum wéatsrumin.”

³³ Takui Pítur tímiayi “Chíkich natsantramainakuisha wikia túrashtajai.”

³⁴ Tutai Jesus tímiayi “Nekasan tájame, ju kashi atash shiniatsajin menaintiú natsantruratme.”

³⁵ Pítur tímiayi “Maa, Ámijjai métek mántuiniakuisha penkesha natsantrashtatjame.” Ashí ni unuiniamuri núnisan tiarmiayi.

*Jesus Jitsemani ajanam Yúsan áujsamiania nu
(Márkus 14.32-42; Rúkas 22.39-46)*

³⁶ Nuyá Jesus ni unuiniamurijjai Jitsemani náartin ajanam jeá tímiayi “Juí pujusrum nákansatarum. Aranta ai wena Yúsan áujsatjai.” ³⁷ Tinia Pítruncha tura mai Sepetéu uchirí jukí wémiayi. Nuísha ti kúntuts enentáimiuk wake mesekmiayi. ³⁸ Nuyá Jesus tímiayi “Ti kúntuts jakammia enentáimjai. Atumsha juí pujusrum Wijjai métek iwíáa pujutarum.”

³⁹ Tinia Jesus arantach we nuí tikishmar tsunsuma Yúsan áujeak tímiayi “Winia Aparú, Wi túrunatniua nu nusháa iwiaranniatkiuñkia ju wáitsatniua nu tsankatrukaip. Tura Wi wakeraj núniska áchati antsu Ame wakeram núnis atí” áujuk tímiayi.

⁴⁰ Nuyá ni menaintiu unuiniamurí pujuiniamunam waketki kanúu pujuinian jeariar Pitrun tímiayi “Átumka chikichik úraksha Wijjaj*í* iwiáa pujutin *ç*tujinkiermek? ⁴¹ Iwiáa pujusrum Yus áujstarum. Tunáa nupettamkairap. Enentáimin ti wakeriniaitrumé túrasha ayashim pimpiruiti.”

⁴² Tinia ataksha we Yúsán áujeak tímiayi “Winia Aparú, Wi imiá nekasan wáitsatniuitk-iuinkia nuikia Ame wakeramna nu atí.” Tu áujsamiai.

⁴³ Nuyá ataksha taa ni menaintiu unuiniamurí tarimiayi. Tura karí ti nupeteam ataksha kanúu pujuarmiayi. ⁴⁴ Túmainiakui nin ikiukin ataksha áujmia núnisan Yúsán áujstata tusa waketkimiayi. ⁴⁵ Áujas umik ni unuiniamurí pujamunman wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu aín, tunaarintin shuarum surunkatin jeayi. ⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas tímiayi. Nusha ni unuiniamuríyayi. Nujajisha untsurí shuar puniajajisha tura numijajisha winiarmiayi. Nu shuaran Israer-patri uuntrísha Israer-shuara úuntrísha akupka ármiayi. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktaram.” ⁴⁹ Nu asantai Jesusan tarí “Winiajai Uuntá” tinia mukunamiayi.

⁵⁰ Takui Jesus tímiayi “Amikrú, *ç*warí winitiam?” Nuyá achikiar Jesusan júkiarmiayi.

⁵¹ Nuí chikichik Jesusa tsanáfkarí ni puniarín ukuiniak shuara kuishín tsupirkamiayi. Nu shuarsha Israer-patri uuntrí takarniuríyayi. ⁵² Túramtai Jesus tímiayi “Puniarum enkeata. Ashí puniajají máanainia nusha puniajají mantamnashtatuak. ⁵³ Wi wakeraknaka winia Aparun timiá untsurí suntarín seakui páchitsuk akupturkainti. *ç*Nu nékatsmek? ⁵⁴ Tura nuna túramtainkia Yus-Chichamnum tana nu uminkiachainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútiksarum puniajajisha numijajajisha tarutniurme. Kame ashí tsawantaj Yusa Jēen atumjají pujusan Yus-Chichaman etsermijajai. Nujsha achirkachmarme. ⁵⁶ Antsu yamaikia yaunchu Yúsán etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamurí Jesusan Níniak ikiuiniak pisararmiayi.

Israer-patri uuntrín Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntríyayi. Nuísha Israer-shuara jintinniurísha Israer-shuara uuntrí armia nusha irunar matsamarmiayi. ⁵⁸ Tura Pítiur árantak Jesusan nemarkin uuntrí jēen aari jeamiayi. Tura suntarjají tsanín pujusmiayi Jesusan itiurkartín tusa.

⁵⁹ Tura Israer-patri úuntrísha Israer-shuara úuntrísha tura ashí naamka uunt armia nusha Jesusan wait-chichamjají súmamtkiatai tusar áujmatiararmiayi. ⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak ⁶¹ tiarmiayi “Jú áishman chichaak “Yusa Uunt Jēen yumpuaran ataksha menaintiú tsawantin jeamminiaitjai,” tu chichamai” tiarmiayi.

⁶² Nuyá Israer-patri uuntrí wajaki Jesusan tímiayi “*ç*Áimtsumek. Turamainia nusha anturmammek?” ⁶³ Túrasha Jesus tuke áimchamiayi. Túmakui Israer-patri uuntrí chicharuk “Nekas iwiaku Yusa náarín tájame nekasa nu táchakminkia Yus firmastatui. *ç*Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujají wáitkiáttarme. Tura yurañminiam winiajisha wáitkiáttarme” tímiayi.

⁶⁵ Nuyá Patri uuntrí nuna antuk ti kajek ni pushirí jaak tímiayi “Jú áishman ni chichamejají Yúsán nekas yajauch chicharniuiti. Nuyásha *ç*warí atsumají? Atumsha Yúsán yajauch chicharu antukcharumek. ⁶⁶ *ç*Waritia enentáimprum?”

Tutai “Sumamayi. Mantamnati” tiarmiayi. ⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

Pítur Jesusan natsantramiania nu
(*Márkus 14.66-72; Rúkas 22.56-62; Juan 18.15-18, 25-27*)

⁶⁹ Nu túmaiñ Pítur aa pujaí nuwa chikichik jeari tímiayi “Amesha ju Kariréanmaya Jesus tutaíjiaí wekaichamkam.”

⁷⁰ Tutai Pítur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitiaj tusa wéaí chíkích shuar wáiniak nuí pujuinian tiarmiayi “Au áishmansha Nasarénumiá Jesusjai wekainiuiti.”

⁷² Tutai Pítur ataksha tímiayi “Nekasan tájarne, ju áishmankan penké nékatsjai.”

⁷³ Árusañ nuí pujuarmia nu Pítrun tariar tiarmiayi “Nekas amesha aujaí wekaimiame. Warí, chichammijiaí páantaiti.”

⁷⁴ Tutai Pítur “nekas Yus íruu” taku tímiayi “Nu áishmankan penké nékatsjai.” Nuna tai atash shiniukmiayi. ⁷⁵ Túramtai Pítur Jesus nuik tímia nuna enentáimpramiayi. “Atash shiniatsajñ menaintiú natsantruratme” tímiayi Jesus. Pítur nuna enentáimiar jíinki we ti úutmiayi.

27

Piratu Jesusan júkiarmiania nu
(*Márkus 15.1; Rúkas 23.1-2; Juan 18.28-32*)

¹ Kashin tsawarmatai Israer-patri uuntrísha Israer-shuara úuntrísha Jesus maatai tiarmiayi. ² Tiar Jesusan jínkiawar apachi uuntrin Punsu Piratu júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi. ⁴ Tura tímiayi “Nu áishman tunaarinchan máatarum tusan surukan wi sumamajai.”

Takui tiarmiayi “Nusha íjiaísha warí urukatiñ. Nuka amek íschatniukaitiam.” ⁵ Tinia Jútas nuí Yusa Uunt Jee kuítian utsañ ikiuak nuyá we kajempramiayi. ⁶ Nuyá Israer-patri uuntri nu kuítian júkar tiarmiayi “Ju kuit shuar sumakma asamtai Yusa kuítrijiaí irurchamniaiti.” ⁷ Tura nuamtak áujmatsar “nuñka sumaktai” tiar Nuwe Najantai nuñkan sumakarmiayi yajaya shuar nuí iwiarsatniun. ⁸ Shuar sumakma kuitjají sumakma asamtai yamaisha Numpá Nuñka tuke tuñiawai. ⁹⁻¹⁰ Nujají yaunchu Yúsnan etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujají Nuwe Najantai nuñkan sumakarmiayi.” Tu áarmiayi.

Piratu Jesusan aniasmiania nu
(*Márkus 15.2-5; Rúkas 23.3-5; Juan 18.33-38*)

¹¹ Jesusan apachi úuntrin ejeniarmatai nii aniasmiai “¿Nekasmek Israer-shuara uunt akupniurñtiam?”

Tutai Jesus “Ame támena núitjai” tímiayi.

¹² Nuyá Israer-patri úuntrísha Israer-shuara úuntrísha súmamtikia Jesus pachischamiayi. ¹³ Nuyá Piratu tímiayi “Ashí yajauch chichartamainia nu ¿anturmammek?” ¹⁴ Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

Piratu Jesusan “mantamnati” tímiania nu
(*Márkus 15.6-20; Rúkas 23.13-25; Juan 18.39-19.16*)

¹⁵ Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jíiki ankant akupniuyayi. ¹⁶ Nuí sepunam tunáa shuar Parapás náartin pujumiayi. Ashí shuar nékarmiayi. ¹⁷ Tuma asamtai Piratu Israer-shuar iruntrarun aniasmiai “¿Yana ankant akupkat tusarum wakerarum. Parapásnak akupkattaj; Kristu

tutai Jesusnak akupkattaj?” tímiayi. ¹⁸ Kame Israer-shuar ántar kajerainiak ni tiarmian nekaamiayi.

¹⁹ Tura Piratu nuna inintrak pujaj ni nuarj chichaman akuptukmiayi. “Ju péñker áishman súmamtikiatniujaj pachiinkiaip. Mesekranam nii áitkiatniun nekaan wáitsan tsawarjai” tímiayi.

²⁰ Túrasha Israer-patri úuntrijsa Israer-shuara úuntrijsa “Parapás ankant wetí, tura Jesus mantamnati” titiarum tusar shuáran akatrarmiyai. ²¹ Apachi akupniurj ataksha aniasarmiyai “Ju jimiara áentsun çyana ankant akupkat tusarum wakerarum?”

Tutai “Parapás” tiarmiyai.

²² Tutai aniasarmiyai “Jesusnasha. Yusa Anaikiamurj Kristu tuinia nunasha, çitiúrkát-taja?”

Tutai ashí “Krúsnum máatá” tiarmiyai.

²³ Tuíniakui Piratu tiarmiyai “çWarí yajauchinia túrait?”

Tutai kakantar untsukum “Krúsnum máatá” tiarmiyai.

²⁴ Tura Piratu Jesus uwentikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí úimiainiañ ikijmiak tímiayi “Ju péñker áishman máatniunam wikia pachiintsujai. Antsu atumek úistarum.”

²⁵ Tutai ashí shuar tiarmiyai “Iik ii shuarijjaj ju áishman máatin úistaji.”

²⁶ Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. ²⁷ Nuyá akupin pujutai jeanam akupniu suntarj Jesusan júkiar ashí suntaraim irunturarmiyai. ²⁸ Tura pushirj áitkiar akupin entsatain kapaaku pushin áentsrarmiyai. ²⁹ Múuknúmsha tawaspan janke najanamun etsemtikiarmiyai. Tura karisun akupniu numirja áaniun untsuurinj ataksarmiyai. Túrawar wishikiainiak tikishmatrar tiarmiyai “Israer-shuara uunt akupniurjñme.” ³⁰ Tiar usukiarmiyai. Tura karisun jurukiar múuknum awatiarmiyai. ³¹ Tura núkap wishikrar kapaaku pushin áitkiar ni pushirj áentsrarmiyai. Nuyá krúsnum maatai tusar júkiarmiyai.

Jesusa krúsnum máawarmiania nu

(Márkus 15.21-32; Rúkas 23.26-43; Juan 19.17-27)

³² Jesusa júki wésar Serini nunkanmayá shuaran, ni naari Semuñ, Jesusa krúsñ jurukit tusar achikiarmiyai. ³³ Nuyá Kúrkutanam ejeniarmiyai. Kúrkutaka, shuar chichamjainkia, muuka ukunch tútainti. ³⁴ Nuñ Jesusan umutai yapájaj pachimpra najanamun áartaj tusar súsararmiyai. Tura Jesus apas iis umarchamiayi.

³⁵ Krúsnum ajinrurar suntar yáki Jesusa pushirjñ jukit tusar nakurusar awakmakua nuna súsararmiyai. Nújainkia yaunchu Yúsñan etserin áarmia nu uminkiamiayi:

“Winia entsarmanur akantrarmiyai tura nakurusar awakmakua nuna winia pushirun súsararmiyai.” Tu áarmiyai.

³⁶ Nuyá wáinkiatatai tusar pujursarmiyai. ³⁷ Tura urukamtaí máamuit ashí aents nekaawarti tusa áarman muuknumaani anujtukarmiyai. *JUJTI JESUS, ISRAERA UUNT AKUPNIURJ*

Tu áarmauyayi.

³⁸ Núnisañ Nijjaj métek jimiara kasa chikichkin untsurnumanj tura chikichnasha menaanmanj krúsnum máawarmiyai. ³⁹ Shuar nuñ nankaamainiak muuke peatar wishikiainiak ⁴⁰ tiarmiyai “Ame Yusa Uunt Jee sáakim menaintiú tsawantin jeamtatjai tçhakaítiam. Nekas Yusa Uchirínkiumka krúsnumia akaikim uwemprata” tiarmiyai.

⁴¹ Núnisañ Israer-patri úuntrijsa, Israer-shuara jintinniurjsa, Pariséusha, Israer-shuara úuntrijsa, Jesusa wishikiainiak nuamtak tiarmiyai ⁴² “Chikichnaka uwentikraiti tura Nínkia uwemtsui. Israera Uunt Akupniurjñtkiunka krúsnumia akaikimtai nekas enentáimtusatjai. ⁴³ “Yúsñ nekas enentáimtiniaitjai” tawai. Wátsek, Yus nekas Nin aneakka uwentikrati. “Wi Yusa Uchirínjai” turamchamkaj” tiarmiyai. ⁴⁴ Kasá shuarsha Nijjaj ajintruamu armia nusha Nin wishikrarmiyai.

Jesusa jakamurj

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin aḡ tee ajasmiaiyi. Túrunayat ataksha aḡḡku tsáapin ajasmiaiyi. ⁴⁶ Nuni aḡ Jesus kakantar untsumkamiyai. “Erí, Erí, rama sapaktani’ t́miyai. Nusha shuar chicham-jaiḡḡkia “Yusrú, Yusrú, ḡurukamtai ajapa ikiurkiniam?” tawai. ⁴⁷ Shuar nuḡ wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuwawai.” ⁴⁸ Tura chikichik tsékeḡki we uruchin itiamiyai. Tura churuiniian ajamper papajai jiiú mukunati tusa susamiyai. ⁴⁹ Tura chikichcha wíshikeak tiarmiayi “Iníáísatá, Erías tarí uwemtikratpiash.”

⁵⁰ Jesus ataksha kakantar untsamak nuyá jakamiyai. ⁵¹ Nu chichamaik Yusa Uunt Jee tarach ajamu yakiiniya achik nunḡkaani tseu jaanakmiyai. Nunḡkasha úurkamiyai. Kayasha jakukarmiayi. ⁵² Núnisanḡ iwíarsamusha uraniarmatai untsurí Yus-shuar jákarusha nantakarmiayi. ⁵³ Nusha emka Jesus nantakmiatai níisha nantakiar iwíarsamun ikiukiar Yusa péprurin Jerusaréḡnum wayawarmatai untsurí shuar wáinkarmiayi.

⁵⁴ Nuyá suntar Jesusan wáinkarmia nusha tura ni kapitántrísha nunḡka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Ju áishmaḡ nekas Yusa Uchirínti.”

⁵⁵ Nuḡsha nuwá Jesusan nemariarmia nu, arant wajasar, ii wajaarmiayi. Nusha Kariréan-maya pataatukiar Jesusan yainki ejeniarmiayi. ⁵⁶ Nujai Máktaranmaya Marisha, Sepetéu nuwésha, tura chíkich Marisha ármiyai. Chíkich Marikia Jakupuncha tura Jusenchá nukuríyayi.

Jesus iwíarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiarai shuar ti kufrintin Arimatéu péprunmaya ni naari Jusé támiyai. Nusha Jesusan enentáimtiniuyayi. ⁵⁸ Nii Piratuḡ we Jesusa ayáshin seamiyai. Nin súsarat tusa Piratu akupkamiyai. ⁵⁹ Túram Jusé Jesusa ayáshin krusnumia jusa ti péḡker tarachjai penuarmiayi. ⁶⁰ Tura kaya wáá tármanum yamaram amia nuḡ iwíarsamiyai. Ni iwíarsatin táumtikramunam Jusé iwíarsamiyai. Iwíaras kaya uuntjai etektuk ikiuak wémiyai. ⁶¹ Nuísha Máktaranmaya Marísha tura chíkich Marísha iwíarsamunam naka ii pujuarmiayi.

Jesus iwíarsamun suntar wáinkarmiania nu

⁶² Nú kiaraiḡ ayampratin tsawantna mash iwíarnakui Israer-patri úuntrísha Pariséusha Piratuḡ wearmiyai. ⁶³ Tura tiarmiayi “Uuntá, nu wáitrin áishmaḡ iwiaaku pujus “Menaintiú tsawant jakan nantakiatjai” t́niuyi. ⁶⁴ Nu asamtai iwíarsamunam menaintiú tsawant suntar wáinkiarat tusa akuptukta. Ni unuiniamurí kashi tariar tura ni ayáshin kasamkar “Pai, nantakni” shuáran tiaraiḡ. Jujaiḡḡkia nuna nanḡkaamas shuáran anaḡkawarainti” tiarmiayi.

⁶⁵ Tutai Piratu tiarmiayi “Nuḡ suntar takakrume. Werum iwíarsamu urakchamnia péḡker wáinkiatárum.” ⁶⁶ Tutai wear iwíarsamun urankashti tusar etektukma inḡkiun-manum serajai yakarar ni áarmarin anujtukarmiayi. Tura suntarnasha awajtukarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nanḡkaasmatai tumiḡtin yama tsawaana aḡ Máktaranmaya Marisha chíkich Marijaiḡ iwíarsamu iyutai tusar wearmiyai. ² Tumai Yusa suntarai nayaimpinmaya iwíarsamun tarí kaya atutkamun urak nuḡ pujusmiyai. Túmakui nunḡka ti úurkamiyai. ³ Yusa suntarísha péemia t́miatrus wínchayuyai. Pushirísha ti puju áuyayi. ⁴ Tura iwíarsamun wáiniarmia nú suntarsha nuna wáinkiar ashamainiak ti kuraḡkarmiayi. Jaká áinis ajasarmiayi.

⁵ Nuyá nayaimpinmaya suntar nuwān t́miyai “Ashamkairap. Jesus krúsnun máawarmia nu éatsrumek. ⁶ Juḡḡḡkia pujatsui. Nii timia núnisanḡ nantakniuiti. Pai, áepsarma nu ítiarum. ⁷ Wárik wérum ni unuiniamurí “Jesus jakamunmaya nantakni tura wari Kariréanam wétatui. Nuḡ werirum wáinkiatarme” titiarum. Wats, nunak tájai” t́miyai. ⁸ Tutai nu nuwá iwíarsamunmaya wárik jíinkiar ashamainiyat ti warasar tseke

waketkiarmiayi ni unuiniamurin ujaktai tusar. ⁹ Tumaj Jesus wantintiukarmiayi. Tura “pujarmek” takui Jesusan tariat tikishmatrar nawencha miniakrusar shiir awajsarmiayi. ¹⁰ Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuí wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi. ¹² Niisha nuna antukar Israer-shuara úuntrijjái áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamurí taar Jesusa ayashin kasamkarmai” titiarum. ¹⁴ Tura akupin átum kanarman nekamtaisha nijjái ii iwarattaji atumin yajauch awajtamsain tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuíniawai.

Jesus ni unuiniamurin akatar akupkamiania nu

(*Márkus 16.14-18; Rúkas 24.36-49; Juan 20.19-23*)

¹⁶ Nuyá ni auntse (11) unuiniamurí Kariréanam wéarmiayi. Tura Jesus timia nú nainnium jeawar ¹⁷ nuí Jesusan wáinkiar tikishmatrarmiayi. Kame chíkíchka Jesusashit tuíniayat Nin wáinkiar tikishmatrarmiayi. ¹⁸ Nuyá Jesus tíjiuch tantá tímiayi “Ashí nayaimpinmasha nuníkasha akupkatniun kakarman surusuíti. ¹⁹ Tuma asamtai ashí nunkanam werum ashí shuar jintintiarum Wíi shuar awajsatarum. Túrarum Yus Apa náarijjái, Yus Uchi náarijjái, tura Yus Wakaní náarijjái imiaitiarum. ²⁰ Ashí atumin Wí akatramajrum nu nútiksarmek umiktin unuiniartarum. Tura ju nekaatarum: Tuke tsawantái ikiutsuk atumjái pujuttajai” tímiayi Jesus.

Yúsan Shiir Chichamēn MÁRKUS aarmia nu

*Imiakratin Juan̄ka etserkamurī
(Mateu 3.1-12; Rúkas 3.1-9, 15-17; Juan̄ 1.19-28)*

¹Jui Jesukrístunu shiir chicham nánkameawai. Jesukrístu Yusa Uchirínti.

²Yuska imiakratin Juan̄kan pachis ni etserniurīn Isayasan ti yaunchu ni Papirīn juna áamtikramiayi:

“Iisiana, ame wéamurmīn emka wetí tusan winia akatramurun akupeajai. Niisha ame jintimin iwiarattawai. ³Niisha aents atsamunam untsumuk juna títiatui: “Uunta jintī iwiarturtarum; naka awajsatarum.”

Nuke áarmaiti.

⁴Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapajjárūm imiantiarum” tímiayi. ⁵Anturkatai tusar ashí Jutfa nun̄kanmaya shuar tura Jerusarén peprunmaya shuarsha Niīn tariarmiayi. Taar, ni tunaarīn ujakarmatai, Juan̄ Jurtañ entsanam imiainiarmiayi.

⁶Juan̄sha kamiriu ure najantramun entsauyayi. Emenmamkesha nuapeyayi. Tura chini-jiāi yutai-títikriatsnasha yuuyayi. ⁷Niisha áentsun ujaak tímiayi “Wíjjiāinkia nan̄kaamas ana nu winia ukuruj winittiawai. Niisha nekas ii Uuntrī asantai, wikia tsuntsumpruan ni sapatři jñkiamurīnkisha atitrachminiaitjai. ⁸Wikia entsajain̄ aya ayashmin imiaajrume, antsu Niñkia imiantinia áanis Yusa Wakanī atumī enentáin enketramprattarme” tímiayi.

*Juan̄ Jesusan imiaimiania nu
(Mateu 3.13-17; Rúkas 3.21-22)*

⁹Juan̄ áentsun imiak pujurainiaí, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ entsanam Jesusan imiaimiai. ¹⁰Nuiñ, Jesus entsaya jiiniuk, nayaimpin uranniun wáinkiamiayi. Tura Yusa Wakanīn yámpitsa núnin najanar Niīn taarun wáinkiamiayi. ¹¹Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

*Unt iwianch Jesusan anan̄kataj tímiania nu
(Mateu 4.1-11; Rúkas 4.1-13)*

¹²Nuyá wárik Yusa Wakanī Jesusan atsamunam jukimiayi. ¹³Tura nui, yajasma yujamunam, kuarenta tsawant pujumiayi. Nui pujai uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatái tusar nayaimpinmaya suntar tariarmiayi.

*Kariréa nun̄kanam ni takatrīn Jesu nan̄kammiania nu
(Mateu 4.12-17; Rúkas 4.14-15)*

¹⁴Ukunam, Juan̄kan sepunam enkeawarmatai, Jesuska Kariréa nun̄kanam Yusa akupeamurīn pachis shiir chichaman etserki támiayi. ¹⁵“Tsawant jeayi. Shuarnum Yusa akupeamurī jeatemai. Tuma asantai, yaunchu enentáimsamuram yapajjárūm, Uwempratīn Chicham umirkatarum” tu etserkamiayi.

*Jesu namakan achinian ni unuiniamurī ajasat tusa kuaru achíkmiania nu
(Mateu 4.18-22; Rúkas 5.1-11)*

¹⁶Jesu Kariréa antumiānka kánmatkarīn wekas, namakan achinian Semun̄nasha ni yachí Antresnasha nekan ajuntuk pujuinian wáinkiamiayi. ¹⁷Wáiniak “Nemartustarum, tímiayi. Namak achiarmena nútiksanak áentsun-ēau Yusna arti tusan awajsatjarne” tímiayi. ¹⁸Tura nuyānka ni nekarīn ajapa ikiuiniak Jesusan nemarsarmiai.

¹⁹Nuyasha Jesu ishichik arantach wesa, Sepetéu uchirīn Jakupun ni yachīn Juán-nasha kanunam ni nekarīn apáa pujuinian wáinkiarmai. ²⁰Wáiniak, nemartusta tusa

untsukarmiayi. Tutai ni aparíncha, ni aparí takarniuríncha kanunam ikiuiniak Jesusan nemarsarmiayi.

*Jesus iwianchin áishmannumia jiiiki akupkamina nu
(Rúkas 4.31-37)*

²¹ Nuyá Kapernáum péprunam jeawarmiayi. Nui Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiayi. ²² Tura ni jintiniuri jintintiarminia nuna iniankas uunt chichamjai Jesus jintiakui ni chichamen anturkar ti enentáimprarmiayi. ²³ Nui sha nu iruntainiam áishman iwianchraku ámiayi. Niisha untsumuk ²⁴ “¿Warí itiuurtamkattsamea incha taum, Nasarétnumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jiiinkitia, tájame” tímiayi.

²⁶ Tutai iwianch áishman kan ukurak ajakniñkiar untsumak kakaar aa jiiinkimiayi. ²⁷ Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuka timiá kakaram asa ímia iwianchin akupeatsuk. Iisiana umirainiat-suk” tiarmiayi. ²⁸ Tura ti wárik nu túrunamu ashí Kariréa nuñkanam antunkamiayi.

*Jesus Semunka tsatsariñ tsuármiania nu
(Mateu 8.14-15; Rúkas 4.38-39)*

²⁹ Nuyá Israer-shuara iruntai jeenia jiiiki Jesuska Jakupujai Juanjajisha we, Semun ni yachi Antresjai pujuarmia nu jeawarmiayi. ³⁰ Semunka tsatsariñ tsuer peaknum jaa tepemiayi. Núnaka wárik Jesusan ujakarmiayi. ³¹ Nuiñkia Jesus werí uwejnium achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniuríncha ayurawarmiayi.

*Untsurí jaan Jesus péñker awajsarmiania nu
(Mateu 8.16-17; Rúkas 4.40-41)*

³² Nu tsawantai kjarai, ashí jáinian, iwianchrunkuncha Jesusan itiararmiayi. ³³ Tura ashí nú péprunmaya shuar taar wáitiniam Jesusan káutkarmiayi. ³⁴ Untsurí shuáran chíkich sunkuraim jáinian Jesus tsuararmiayi. Tura iwianchruku armia nuna enentáiyán iwianchin jiiirkarmiayi. Jesuska iwianch nékamu asa, winia náarun ántar pachisarain tusa suritkarmiayi.

*Kariréa nuñkanam Jesus Yus-Chichaman etserkamiania nu
(Rúkas 4.42-44)*

³⁵ Nuyá kashik káshik tsawaatsain Jesus nantaki Yúsan áujsataj tusa jiiiki atsamunam wémiayi. ³⁶ Tura Semun ni amikrijjai Jesus wemaanum wéarmiayi. ³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

³⁹ Nuna tí ashí Kariréa nuñkanam Israer-shuar iruntai jeanam etseras wekaimiayi; tura núnisan iwianchniasha jiiiki akupkini wekaimiayi.

*Tunamaru shuaran Jesus tsuármiania nu
(Mateu 8.1-4; Rúkas 5.12-16)*

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

⁴¹ Jesus nin waitnentak uwejejai antinmiayi. Antin “Wakerajme. Péñker ajasta” tímiayi.

⁴² Nu chichamaik, Jesus chichakmatai, ni sunkuri menkakamiayi. Tura péñker ajasmiai.

⁴³ Túrunantai Jesus kakantar chicharuk ⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patrimin iniakmamsata. Túram ashí aents ame péñker ajasmarumin nekaawarat tusam, Muisais aar akupkamina nu umikiam súsatin ana nu susata” tímiayi. ⁴⁵ Tura etserkaip támaiati, jiiiki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nuñkanmaya Jesusan tariarmiayi.

2

Jesus emearun péñker awajsamiania nu

(Mateu 9.1-8; Rúkas 5.17-26)

¹ Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. ² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³ Nuiñkia ni amikrín emearun kuatru shuar tampumpuwar júkiar Jesusan itiararmiayi. ⁴ Tura jeawar, untsurí shuar írunu ásamtai jeá wayatniun tujinkiararmiayi. Tuma ásar, yakininí wakar jea urakar, áan̄kawar, tampunam ni amikrín Jesus pujamunam awaintiuawar itiararmiayi. ⁵ Tura niisha Jesus nekas tsuártatui tu enentáimmiarín Jesus nekáa emearun chicharuk, “Uchirú, ame tunaarumka tsan̄kuramuiti” tímiayi.

⁶ Israer-shuara jintinniurísha nuna antúu pujuarmiayi. Tura ni enentáijjai enentáimsar, ⁷ “Jusha urukamtai emearun tu chichara? Yúsan imiá yajauch chicharu. Warí, yaki tunaan asakarmiiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmiarín nekarawar “¿Urukamtia átum tu enentáimprum? tímiayi. ⁹ Emearu, tunaarum tsan̄kuramuiti títin̄jai, emearu, wajakim tampuram entsakim wekasata títin̄jai ¿tuá imiá yúpichuchit? ¹⁰ Wats wi, Aents Ajasu asan Yusa kakarmarijiai shuara tunaarí tsan̄kuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹ “Wajakta, tájame; túram tampuram jukim jéem̄iin wetá” tímiayi. ¹² Nu chichamaik emearu wajaki, tampurín jukí, ashí íimianiaín̄ jín̄kimiayi.

Nuna túrunamtai ashí ashankarmiayi. Tura “jútikiamu pen̄ké wáin̄chaitji” tiar Yusa náarín uunt awajsarmiayi.

Jesus Riwin untsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumiañnum waketkimiayi. Tura ashí shuar káunkarmatai jintintiawarmiayi. ¹⁴ Tura jintintiawar amuk, akupin akitiai jeanam nan̄kaamak, Arpeu uchirín Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi. ¹⁵ Chíkich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjai ni unuiniamuríjiaisha ashí nuim misanam pujuarmiiai. ¹⁶ Tura kuítian-juu shuarsha yajauch shuarsha Jesusjai irunar yurumáinian wáinkiar, Pariséu jintinniurísha Israer-shuara jintinniurísha Jesusa unuiniamurín aniasarmiayi. “¿Urukamtai ame úuntrum Jesus, kuítian-juu shuarjai tura yajauch shuarjaisha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pén̄keraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Rúkas 5.33-39)

¹⁸ Juañka unuiniamurísha Pariséu unuiniamurísha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juañka unuiniamurísha, Pariséu unuiniamurísha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiamawartiniak ainia? Yama nuatu pujakui ni amikrí warainiak ijiamachartin ainiawai. Núnisañ winia unuiniamur, Wi pujakui, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuiñkia winia unuiniamur ijiamawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jáaktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijikratniuiti. Tura nijiamanch ukarattawai. Nuap

najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu neren yuawarmiania nu

(Mateu 12.1-8; Rúkas 6.1-5)

²³ Chíkich ayampratin tsawantaj Jesus ajanman ajapén nankaamarmiayi. Tura ni unuini-amurj trikiu neren majukiar wearmiayi. ²⁴ Nuna wáinkiar Pariséu Jesusan chicharainiak “¿Wari, urukamtai ame unuiniamuram ayampratin tsawant takastin surimkiamu ajsha takainia?” tiarmiayi.

²⁵ Tutai Jesus tímiayi “Ii uuntri Tawitia túramurj Yús-Papinium áujsachukaitrum. Niisha ni nemarniurjsha tsukamainiak, ni yurumkarj atsakui, túrawarmia nu áujsachukaitrum.

²⁶ Apiatár Yusnan pujurniu uuntri pujaj Uunt Tawit Yusa Jeeen wayamiayi. Tura Tawitkia, patri nankaamas uunt asa, pátrichuítai, iniaktusma tantan, aya patri yútainiak, yuamiayi; tura ni nemarniurjncha ajamsamiayi. Nu áujsachukaitrum, tímiayi. ²⁷ Ayampratin tsawantaj túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wisha, Aents Ajasu asan imia ayampratin tsawantan Nerenniurintjai” tímiayi.

3

Uweje jakan Jesus tsuármiania nu

(Mateu 12.9-14; Rúkas 6.6-11)

¹ Ataksha chíkich tsawantaj Israer-shuar iruntainiam Jesus wayamiayi. Nuñ shuar ámiayi, ni uweje jaka. ² Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi. ³ Nuiñkia Jesus uweje jaka shuaran chicharuk “Ajapén wajasta” tímiayi. ⁴ Nuiñkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait. Shuar uwemtikratin máatniujaj tuá imiá péñkerait?” tímiayi.

Nuna takui niisha pachischarmiai.

⁵ Tura Jesus kajek nin íyarmiayi; tura ni enentájn kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmarmatai ni uweje jaruku ataksha péñker ajatsamiayi. ⁶ Nuyá Pariséu shuar jíinkiar, Jesus maami tusar Erutis shuarjaj áujmatsarmiai.

Untsurj shuar Jesusan káutkarmiania nu

⁷ Nuyá Jesus ni unuiniamurijaj antumiannum wémiayi. Kariréa nunkanmaya untsurj shuarsha Jesusan nemariarmiayi. ⁸ Untsurj nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtañ entsa amainiasha, Tira tura Setun pepru pujuinia nú nunkanmayasha, untsurj shuar ni túramurjn nekaawar, Jesusan káutkarmiayi. ⁹ Untsurj káunkar chanuntawarajñ tusa Jesus ni unuiniamurjn kanuram inianáastarum tusa seamiai. ¹⁰ Kame untsurj shuaran Jesus nuik tsuaru asamtai, jaa shuar nuñ káunkarmiania nu Jesusan antintaj tusar shitianainiakui nuna seamiai. ¹¹ Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. ¹² Tura nuna etserkairap tusa Jesuska kakantrarmiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsuk-miayi. Tura niisha Jesusan weriarmiayi. ¹⁴ Tura Nijijaj wekasar Yus-Chichaman unuinartinian tuse shuáran anaikiarmiayi. ¹⁵ Tura sunkur tsuártinian, iwianchcha jiki akupkatniun ni kakarmarjn súsarmai ní nú shuaran. ¹⁶ Ju shuáran anaikiamu ármiai: Semun, Jesus chíkich naarin Pítiur apujtusmiania nu; ¹⁷ Sepetéu uchirj Jakupu, ni patai Juánsha; ipiamtajaj métek kakaram ásarmatai nuna mai “Puanérjis” naari susamiayi. Nusha shuar chichamjajñkia “ipiamta nuke” tawai. ¹⁸ Nuyá Antressha, Jiripi, Parturumí, Mateu, Tumas, Arpeu uchirj Jakupu, Tateu, ásump Semun, ¹⁹ Jútas Iskariúti. Jesusan ukunam surukmia nú Jútasauyai. Anai amukmatai jeá waketrarmiayi.

*Yusa Wakanin yajauch chicharna nu
(Mateu 12.22-32; Rúkas 11.14-23; 12.10)*

²⁰Waketkiarmatai, ti untsurí shuar taarmatai takatrí ti akui, yurumátniun jeacharmiayi. ²¹Jesusa shuárjsha nuna nekaawar Jesus ti itirchat pujus wártsuash tu enentámsar jukitiai tusar nu jeanam jeariarmiayi.

²²Nuyá Israer-shuara jintinniurí Jerusarénumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarijiaí iwianchin jiiki akupeawai” tiarmiayi.

²³Tutai Jesus winitiarum tusa nin untsukmiayi. Tura enentámtikrataj tusa juna tímiayi: “¿Iwianch Satanáskesha itiu ajapmamatín? ²⁴Chikichik nú nunkanmaya shuar nuámtak kajernaiyakuinikia, nu nunka wari meserchattawak. ²⁵Núámtak shuar ni shuarijiaí kajernaiyakuinikia nu shuarsha amunaikchartatuak. ²⁶Núnisan ¿Satanáskesha ni suntarijiaí máaniakka ititurak tuke pujusarat? Amunaikiartatui. ²⁷Nánkamas shuar kakaram shuara jeen wayá, nérenniun jinkiatsuk ni kuítrín kasarkachminiati. Antsu nérenniun jinkiá ni kuítrín kasarkamniati. ²⁸Nekas tájarne, shuar tunáa ashí túruiniana nuka tsankuramniati. Winiasha winia Aparnasha yajauch áujmatusha tsankuramniati. ²⁹Antsu Yusa Wakanín yajauch áujmatna nuka tsankurachminiati; antsu nu shuar niniki tuke sumamattawai.” ³⁰“Jesuska iwianchrukuiti” tuíniakui Jesus nuní tímiayi.

*Jesusa yachi Jesusa nukurí
(Mateu 12.46-50; Rúkas 5.19-21)*

³¹Nuyá ni yachi ni nukuríjiaí taar aa wajasar, Jesusan untsukat tusa akupkarmiayi. ³²Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³Tutai Jesus chichaak “Ya ainia winia nukursha yatsursha” tímiayi. ³⁴Nin téntakar pujuarmia nuna iis “Júiti winia nukurka, yatsurka, tímiayi. ³⁵Shuar Yusa wakeramurín uminiana nu winia yatsuruiti, winia umaruiti, winia nukuruiti” tímiayi.

4

*Atsaamin atsaampramiania nu
(Mateu 13.1-9; Rúkas 8.4-8)*

¹Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarín pujuarmiayi. ²Jesuska métek-taku chichamjai ti jintintiarimiayi. Jintintiuak juna tímiayi: ³“Antuktarum. Atsaamin atsaampratáj tusa jiinkimiai. ⁴Atsaamkui ni arakrí jintiá iniararmai. Chiniki yakiya káutkar yuawarmai. ⁵Chikichcha kaya irunmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶Tura etsa etsantar sukuám kancape atsa asamtai káararmai. ⁷Chikichcha janí nupanam iniararmai. Jankisha tsapainiar kankar ajakrarmai; túram nereckharmai. ⁸Chikichcha pénger nunkanam iniararmai. Tura tsapainiar nereckharmai, chikich trainta, chikich sesenta, chikich siañ nereckharmai. ⁹Kuñshim ákuinikia antuktarum” tímiayi.

(Mateu 13.10-17; Rúkas 8.9-10)

¹⁰Untsurí wearmatai, ishichik Niijiaí juakarmiania nu, ni tuse unuiniamurijiaí anisarmiayi “¿Ame jintintiamna nusha warimpiait?” tiarmiayi.

¹¹Tutai Jesus chichaak “Yuska ni akupeamurín atumin paant nekamtikramattsa wakerutmarme. Antsu chikich shuarka aya métek-taku chichamjai jintintiawartatui.

¹²Íniyatan wáinkiacharat tusa, antukarsha nekaacharat tusa, umirtsuk ni tunaarí tsankurnacharat tusa túrattawai’ tímiayi.

(Mateu 13.18-23; Rúkas 8.11-15)

¹³Tura tímiayi “Wi jintintiajrumna nú métek-taku chicham nekaachurmek. Nu nekachurmeka ¿itiurak chikich métek-taku chichamsha nekaatarum? ¹⁴Atsaamniua nuka Yus-Chichaman éterna nuna nakumui. ¹⁵Jinikiá jintiá iniaarua nuna chikich

shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. ¹⁶ Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kan̄kape atskui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsaiya kanainiawai. ¹⁸ Chíkich ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat jū nuñkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai. ²⁰ Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siansha nerenawai.’

Ūukma ana nu paant nekanattawai
(Rúkas 8.16-18)

²¹ Nuyá Jesus jūna tímiayi ‘¿Shuar shiripkin ekeemak itiā pitiaknum en̄keattawak. Peaknum wakenam ikiustatuak? Atsá. Ansu misanam ekentsashtinkiait. ²² Núnisan̄ ashí ūukma ana nu ukunam paant nekanattawai. Tura núnisan̄ yamá ishishmasa chichasmasha ukunam paant nekanattawai. ²³ Kuíshim ákuin̄kia antuktarum.’ ²⁴ Tura nuyá tímiayi ‘Ántarmena nu esetrarum enentáimsarum antuktarum. Urutá péñkerak enentáimsatarum, núnisan̄ Yuska ámin nekaatniun suramsattarme, tura nú núkap pata-tramsattarme. ²⁵ Tuma asamtai shuar núkap takakna nu patatnastatui. Ansu chíkich shuar ishichik takakuk jurunkittiawai.’

Yusa akupeamurī júnisaiti

²⁶ Nuyá Jesus chichaak jūna tímiayi ‘Yusa akupeamurī júnisaiti. Shuar jin̄kiain atsaampratniua núniskete. ²⁷ Jin̄kiáin atsaamar, untsurí kanar, tsawar, uruksanpi tusa nákawai. Tura itiura tsapainia núnaka nékatsui. ²⁸ Kame jin̄kiái nuñkanam in̄it aku nin̄ki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar júiniawai.’

(Mateu 13.31-32; Rúkas 13.18-19)

³⁰ Ataksha Jesus tímiayi ‘¿Yusa akupeamurī warijiāink̄i nakumkataj. Warijiāink̄i métek-takuit? ³¹ Mustasa jin̄kiaí araamua nujaī métek-takuiti. Nu jin̄kiaisha ashí nan̄kaamas ishitiupchichiti. ³² Tura araam tsapái ashí nan̄kaamas uunt ajawai; tura tsen̄keakmarisha kámpuram asamtai nūj mikintranam chin̄kisha shiir ayamainiawai.’

(Mateu 13.34-35)

³³ Núnisan̄ Jesus untsurí métek-taku chichamjaī Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamjaī ujaamiayi; antsu ni unuiniamurijiāi Niñki pujus ashí paant jintinrarmiayi.

Nas̄encha, entsan̄cha Jesus imijian̄mia nu

(Mateu 8.23-27; Rúkas 8.22-25)

³⁵ Nu tsawantaī etsa akaikimtai Jesus ni unuiniamurin̄ chicharainiak “Entsa amain kat̄intai” tímiayi. ³⁶ Tutai kanunam en̄kemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. ³⁷ Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi. ³⁸ Jesuska kanú sen̄karin̄ atamprus kanú tepemiayi. Tura, ni unuiniamurī Jesusan ishintiak chicharuk “Uunta ii wayajnia jūka pachitmatmek” tiarmiayi. ³⁹ Tutai Jesus nantaki nasen kakantramiayi. Entsan̄cha chicharuk “Takamatsata. Miaku ajasta” tímiayi. Tutai nasesha men̄kakamiayi, entsasha miaaku ajasmiai. ⁴⁰ Túrunamtai Jesus ni unuiniamurin̄ chicharainiak “¿Urukamtai ashamarum? Itiura Yus nekas enentáimtatsrum” tímiayi. ⁴¹ Tura imiā ashamainiak “¿Maa jusha yait? Nasesha entsasha nin umirainiatsuk” tunaiyarmiayi.

5

*Jataranmayan iwianchrukun Jesus tsuármiania nu
(Mateu 8.28-34; Rúkas 8.26-39)*

¹ Nuyá antumian amaini Jatara nunkanam jeawarmiayi. ² Jesus kanunmaya jiinkimtai áishman iwianchruku, shuar jakáa iwíartainiumiá wárik taa Jesusan inkiunmiayi. ³ Nu shuar iwíartainium tuke pujuyayi. Tura jirujainkia nin jinkiaatniun tujinkiararmiayi. ⁴ Jirujai nawenmasha, uwejnnumsha tuke jinkiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachiniuyayi. ⁵ Tuke tsawaisha káshisha, iwíartainiumsha murasha kayajai ijiunmak untsumuu wekainiuyayi. ⁶ Tura yajayan wáiniak Jesusan tseke tarimiayi; tura tikishmatramiayi. ⁷⁻⁸ Túrunamtai Jesus chicharuk “Iwianchiá, ni enentáiya jiinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

¹⁰ Nuna ti amik, nu nunkanmaya akuptukajin tusa Jesusan ti searmiayi. ¹¹ Nuisha nainnium nuntumas untsurí kuchi shushunmak matsamarmiayi. ¹² Tuma asamtai, kuchiniam enkemátin tsankatrukta tusar Jesusan seawarmiayi.

¹³ Tuiniakui Jesus “ayu” tímiayi. Takui íwianch áishman kajiniá jiinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniañkarmiayi. Nuisha entsá kjakar jakerarmiayi.

¹⁴ Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi. ¹⁵ Túrawar Jesusai jeawarmiayi. Jeawar áishman yaunchu iwianchrukun yamaikia péñker ajasun pushirin entsar pujan wáinkiararmiayi. Wáinkiar ashamkarmiayi. ¹⁶ Tura wakеткиar kuchi túrunamuncha iwianchruku péñker ajasmancha mash etserkarmiayi. ¹⁷ Tuma asamtai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk ¹⁸ “Wi Ámijiai tuke tsaniñkian wekasatjai” tímiayi.

¹⁹ Tura núnaka Jesus suritkiarmiayi. “Antsu ame jeemiin, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

²⁰ Tutai áishmansha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

*Jimiará jaan Jesus tsuármiania nu
(Mateu 9.18-26; Rúkas 8.40-56)*

²¹ Ataksha Jesus kanujai katimatai, aents untsurí Nin irunturarmiayi. Jesuska antumi-añka káanmatkarí wajamiayi. ²² Tura Israer-shuar iruntai jea náampruku, ni naarí Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitíá, túram péñker ajasat tusam uwejmiijiai antintrukta. Nuiñkia jarutkashtatui” tímiayi.

²⁴ Tu tímiatai Jesus niijiai wémiayi. Tura untsurí shuar wena ásar Nin chánuarmiayi.

²⁵ Nui pachitkia nuwá ti jaa wémiayi. Niisha tuse uwí numpan ajapeak wáitias pujuyayi.

²⁶ Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kufrincha ashí ajapaitiat tsuámarchauyayi; antsu tsuamsha nu arant ajauyayi. ²⁷ Nu nuwasha, Jesus túramun antuku asa, ni ukuurini amainian ni pushirin antiñmiayi. ²⁸ “Wi aya ni pushirin antiñnaka péñkerapí ajasaintjia” tu enentáimiar túramiayi. ²⁹ Tura Jesusa pushirin antiñ nú chichamaik numpa ajapman menkakamiayi. Péñker ajasman ayashiin nekapramiayi. ³⁰ Tura nuin Jesuska, ni kakarmarijiai tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruka?” tímiayi.

³¹ Tutai ni unuiniamurí tiarmiayi, “Untsurí Ámin antinmainiasha ¿urukamtai “yaki winia antintkia” tame?”

³² Tura Jesus, yaki túruta tusa ashi ímpramiayi. ³³ Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurin ashí paant ujakmiayi. ³⁴ Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

³⁵ Tura Jesus nuna tuke chichas pujai, iruntai jea uuntri jeeniá tariarmiayi. Tariar chicharainiak “Ame nawantrum jakayi. ¿Urukantai Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatic nekas enentáimtursata’ tímiayi. ³⁷ Tura Niijiai wétinian aya Pítruncha, Jakupuncha ni yachi Juanjai tsankatkarmiayi. ³⁸ Iruntai jea uuntri jeen jeawar, ántsun charaatum ajainian, útainian untsunuk ajainiancha Jesus wáinkiamiayi. ³⁹ Tura nuwach penké jakan nékayat, wayá nin chicharuk “¿Urukantai timiá útrum, tura wa wa ajarum? Nuwach jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jiiir akupkarmiayi. Áyatic nuwachí aparín, nukuríncha tura Niijiai táaruncha nuwachí tepamurin jukimiayi. ⁴¹ Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. ⁴² Nuwach tuse uwí takakuya nu, nú chichamaik nantaki wekasamiayi. Túramtai nuí pujuarmiania nu ti enentáimprarmiayi. ⁴³ Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarénum pujusma

(Mateu 13.53-58; Rúkas 4.16-30)

¹ Jesus nuyá jiiniki ni nunken wakatkimiayi. Ni unuiniamurisha nemariarmiayi. ² Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuí unuimiaruit. Ni nekaatniuríncha yaki susait. Tura aentsti tujintiajnía nuna Niisha itiurak tura? ³ Jusha karpintíruchunkait; Marí uchirínchukait. Ni yachísha Jakupusha, Jusesha, Jútassha, Semuñsha nékatsjik. Tura ni umaisha juí iijiai pujuiniatsuk” tiarmiayi. Túrawar Nin nekas enentáimtustinian tujinkiarimiayi.

⁴ Túrasha Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

⁵ Tura nuisha, ni nunkenkikía aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuarmiayi. ⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurín akupkarmiania nu

(Mateu 10.5-15; Rúkas 9.1-6)

⁷ Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsarmiayi. ⁸ Tura chicharuk “Jintiá yurumátniusha jukiirap, uyuntrumíncha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartíncha jímiar jukiirap, tímiayi. ¹⁰ Tura jea wayarmena nuín pujustarum; pujá-pujakuarum nuyá chíkich peprunmasha wetarum. ¹¹ Tura nánkamas aents atumin awaintiamainiachkuisha, anturtamainiachkuisha, nuyá jínkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nañkamas nin asutiattawai” tímiayi Jesus.

¹² Nuyá Jesusa unuiniamurj jfinkiar enentái yapajjar Yúsaj enentáimtumartinian et-serkarmiyai. ¹³ Tura iwianchruku enentáiya iwianchin jjiirki akupkarmiyai, tura asuitijijai yakarar untsurí jánian tsuararmiyai.

Juanka jakamurj

(Mateu 14.1-12; Rúkas 9.7-9)

¹⁴ Jesusa náarj̄n tura ni túramurj̄n ashí aents áujmatin ásarmatai, uunt akupin Erutis nuna antukmiyai. Erutiska “Imiakratin Juan̄ jakamunmayá nantakni. Tuma asa ti kakaram takaawai” tímiyai. ¹⁵ Tura chíkich shuar “Erasaiti” tiarmiyai. Chikichcha “Yúsnan etserniuiti, yaunchu etserniuya núkete” tiarmiyai. ¹⁶ Erutis nuna antuk “Nekas Juán̄kaiti. Ni muuken tsupiktinian akupkamiyaj nu, jakamunmayá nantakniuiti” tímiyai. ¹⁷⁻¹⁹ Kame Uunt akupin Erutis, ni yachí Jiripi nuarj̄n nuatkamiyai. Nu nuwá naari Jirutíasaiti. Juangsha uunt akupniun Erutisan chicharuk “Yatsumi nuarj̄ akintrukchatniuitme’ tímiyai. Tutai nuwá Jirutías Juán̄kan ti kajerkamiyai. Tura Juán̄kan máataj tusa wakerimiyai. Túrasa uunt akupin Erutis nuna surimkiamiyai. Antsu Juan̄ achikrum sepunam enkeatarum tusa akupkamiyai. ²⁰ Juangsha tuke enentáijijai Yusa jintj̄n wekainiuyuyai. Erutis, ni esetar enentáimniun neka asa Juán̄kan ashamak Jirutías wakeramurj̄n túrawaj̄n tusa suritkiamiyai. Kame Erutis Juan̄ étserman nékachuitiat antuktinian wakerimiyai.

²¹ Jirutías, itiurak máawaj tu pujaj̄, uunt akupin Erutis, ni akiiniamu tsawantrj̄ jeamtai, ni suntarj̄ncha, Kariréa nunkanmayá úuntrincha, kufrintin armia nunasha untsukar, nampenan najanamiyai. ²² Nujsa Jirutíasa nawantrj̄ wayá jantsemámtai Erutis tura nijijai nampernum matsamarmia nusha shiir enentáimsarmiyai. Túramtai uunt akupin nuwáchin chicharuk “Ame wakeram nu seattia. Wi amastatjai. ²³ Nekas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiyai.

²⁴ Tutai nuwách jiinki ni nukurj̄n Jirutíasan chicharuk “¿Wariniak seattaj?” tímiyai.

Tutai “Imiakratin Juangka muuke seata” tímiyai.

²⁵ Nu chichamaik nuwách wari wayá Erutisan chicharuk “Yamaikia uunt amamkunam Juangka muuken wakerajai” tímiyai.

²⁶ Nuna takui uunt akupin ti kuntuts enentáimpramiyai. Tura nii tiniu asa ni amikrj̄ matsatania nu antukaru ásarmatai surimkiatniun tujinkiamiyai. ²⁷ Tuma asa uunt akupin Juangka muuke itiat tusa ni suntarj̄n wárikmas akupkamiyai. ²⁸ Túramtai suntar wari we, sepunam Juangka muuken tsupikmiyai. Tsupik, amamkunam itia, nuwáñ susamiyai. Túram achik ni nukurj̄n susamiyai. ²⁹ Juan̄ maamun antukar ni unuiniamurj̄ ni ayashj̄n iwarsatai tusar júkiarmiyai.

Senku mir áishmankan Jesus ayuramania nu

(Mateu 14.13-21; Rúkas 9.10-17; Juan̄ 6.1-14)

³⁰ Tura Jesusa unuiniamurj̄ Nii akupkarma nu, ataksha wakетки káunak irunturarmiyai. Ashí nii túrawarmia nuna, unuiniarmia nunasha ujakarmiyai. ³¹ Tura untsurj̄ shuar táiniakui, niisha ankant ajastinninsha yurumátniuncha tujinkiarimiyai. Tuma asamtai Jesus chichaak “Iijjaj̄ wemí aents atsuiniamunam; nuj̄ ishichik ayamprarmi” tímiyai.

³² Nuyá Jesus ni unuiniamurijijai kanunam enkemprar, aents atsuiniamunam jeatai tusar jfinkiarimiyai. ³³ Túrasa shuar ni wéenan wáinkiarimiyai. Tura “Jesusaiti” tiarmiyai. Tuma ásar ashí péprunmayá untsurj̄ shuar tseke ashintiukar, ni jeatniunam nákakarmiyai. ³⁴ Jesus kanunmayá jiinki ti untsurj̄ aents iruntrar matsatun wáinkiamiyai. Murik péñker wáinchataiya núnisan̄ matsatu ásarmatai Jesus nin wáitnentrarmiyai. Tura núkap unuiniarmiyai. ³⁵ Nuyá kjakui ni unuiniamurj̄ Jesusan tariar chicharainiak “Atsamunam pujatsjik; tura yamá kátsuk. ³⁶ Shuar wari akupkarta. Tíjuch péprunmasha, shuarnumsha wearti, ni yurumkarj̄ sumarmakarati” tiarmiyai.

³⁷ Tutai Jesus chichaak “Atumek ayuratarum” tímiyai.

Tutai “Iisha ju shuar ayuratai tusar, ¿jimiara sian̄ kuitjaj̄ yurumak sumaktai tusar wétinkiaitiaj?” tiarmiyai.

³⁸ Tura Jesus ni unuiniamurin chicharainiak “Tanta takakrum nu iistarum ζurutmak aa?” tímiayi.

Tutai nekapmarar chichainiak “Tántaka senkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.” ⁴⁰ Ankant ankant sian siansha, senkuenta senkuenta iruntrar matsamsarmiayi. ⁴¹ Jesuska senku tantancha, jímiar namaknasha jusa, yakí nayaimpinmaaní íimias Yúsán yuminsamiayi. Tura yurumkan púurmiayi. Puur ni unuiniamurin súsarmiayi. Namaknasha puur súsarmiayi, ashí shuáran ajamsarat tusa. ⁴² Ashí yurumáwar ejemaramatai, ⁴³ puunaruncha, namak ampirmancha achikiar, tuse chañkinian áimkiar júkiarmiayi. ⁴⁴ Nu yurumkan ti untsurí yurumáwarmiayi. Aya áishmankak senku mir (5.000) ármiai.

Jesus entsá pátatek wekasamiania nu

(Mateu 14.22-27; Juan 6.16-21)

⁴⁵ Nuyá Jesus ni unuiniamurin chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuwaran áujas ikiuktatjai” tímiayi.

⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiai. Jesuska niniki juakmiayi. ⁴⁸ Jesusa unuiniamurisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi. ⁴⁹ Jesus entsá wekaan ni unuiniamurí wáinkiar, wakanchashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wítjai Jesus; ashamprukairap” tímiayi. ⁵¹⁻⁵² Nuiñkia entsaya kanunam waka enkempramiayi. Túramtai nasesha majaantmiayi. Ni unuiniamurinkia enentái kiritia áintsan ásar matai Jesus yurumkan núkap awajsamia nuna paant nekaatniun tuke tujinkiar miayi. Tuma ásar yamáí túrunamu itiurak aankia tusar ti enentáimprar sapijmiakarmiayi.

Jinisarítniumia shuáran Jesus tsuármiania nu

(Mateu 14.34-36)

⁵³ Nuyanka katinkiar, Jinisarít núñkanam jeawarmiayi. Jeawar kanunajuiniarmiayi.

⁵⁴ Kanunmaya jíintrarmatai, nu nuñkanmaya shuar Jesusan nekaawarmiayi. ⁵⁵ Tura “Jesus pujawai” táman antukar, ashí jeañmaya jaan ni peakrintiuk Jesus pujamanum itiaarmiayi.

⁵⁶ Tura Jesus wekaak wémia nuísha, péprunmasha, shuar matsatmanumsha, ishichik matsatkamunmasha jaan itiarar jintiá áepirusarmiayi. Túmainiak Jesusan pushirmin antintaj tusar seawarmiayi. Tura ashí antinkiar nuka péñker ajasarmiayi.

7

Jesus Pariséun áujmatsarmiania nu

(Mateu 15.1-20)

¹ Pariséusha, Israer-shuara jintinniurisha Jerusarénumia Jesusan tariarmiayi. ² Tura Jesusa unuiniamurin ikijmiatsuk yurumun wáinkiar “Israer-shuara túrutairin túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntri jintintiamurin umikiar ti núkap ikijmiarar yurumun ármiai. ⁴ Péprunmaya tari “ikijmiatsuk yurumáshntiniati” tiniu ármiai. Tura ti untsurí ni uuntri túrutairi núnisan ármiai. “Tsapancha, ichinasha, jiruncha, peaknasha nijiakartiniati” tiniu ármiai.) ⁵ Tuma asamtai Pariséusha, Israer-shuara jintinniurisha Jesusan chicharainiak “ζUrukamtai ame unuiniamuram ii uuntri jintintramniuitaj nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniatrume. Isayas yaunchu nekas atumin áartampramiayi juna:

Ju aents ni wenejai Winia “ti péñkeraiti” turutainiawai, tímiayi Yus, tura ni enentáinkia jeachat pujuiniawai. ⁷ Tura tukeneas Winia shiir awajtuiniawai. Aentsu chichame jintiainiyat, “Yus-Chichamaiti” tuñiawai.”

Tu áarmaiti. ⁸ Tura átum Yusa chichame iniaisarum, aentsu jintintiamurj umirkarum, ichinnasha, tsapancha nijiahtin, tura chíkich túrutaisha áintsarmek untsurj túrarme. ⁹ Túrákrum Yus-Chichamka tsukintiaani ikiusurme atumí uuntri chichame umirkatai tusarum. ¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

¹¹⁻¹² Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuñkia, atumsha péñkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.) ¹³ Nekaatarum, Pariséutiram. “Í yaunchu uuntri chichame tuke umiki wétiniatji” tákurum, Yus-Chicham penké ántar chichama núnin awajearme. Núnisrumek chikichcha untsurj túrarme.” Tu timiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. ¹⁵ Aaya ayashnium wayaana nu, shuáran yajauch awajsachminiati; tura antsu ni enentáiniá jiinia nu, yajauch awajsattawai. ¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurj aniasarmiayi “¿Nu métek-taku chicham warintua?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiati. ¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchtsuk yuamniati, tímiayi. ²⁰ Nuyá tímiayi “Shuara enentáiniá jiinia nu, yajauch awajsamniati. ²¹ Shuara enentáiniá, initiá, yajauch enentáimsatniusha, tsanirmatniusha, natsa tsanirmatniusha, shuar máatniusha, ²² kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initiá wininiatsuk. ²³ Ashí nu tunáa ainia nu, shuara enentáiniá jiiniu asa, shuáran yajauch awajainiawai” tímiayi.

Serupinísianmaya nuwá Jesusan nekas enentáimtusmania nu

(Mateu 15.21-28)

²⁴ Tiru pepu, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. ²⁵ Wárik nu nunkanmaya nuwá Jesus pujan nekaamiayi. Nu núwaka nawantri iwianchrुकuyai. Tuma asa Jesusan tarí ni nawen piniakum tepersamiayi. ²⁶ Nu nuwá Israer-shuarcha, Serupinísianmayayuyai. Túmaitiat, nawantru enentáiyá iwianchin jjiirturkitia tusa Jesusan seamiayi. ²⁷ Tutai Jesus nuwan chicharuk “Uchi emka ejemartí. Uchi apatkurj atankir yawach súsatin péñkerchaiti” tímiayi.

²⁸ Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuñniatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumí enentáiyá iwianch jjiinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jjiinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. ³² Nu chichachu ámiayi, kuishin empeku. Nu shuáran Jesusan itiarar, ni uwejejai antinwiat tusar seawarmiayi. ³³ Shuar matsatmanumia Jesus nin akanki júki kuishin tsara uwejejai tsutsukruamiayi. Tura usukia, nu shuara iniajn antintkiamiayi. ³⁴ Tura nayaimpinmaaní ímias súkaska mayati “Epata” tímiayi. Nuka, shuar chichamnumka “chinkiatí” tawai. ³⁵ Nu chichamaik ni kuishisha chinkiamiayi, iniajsha séermiayi. Tura paant chichasmiai. ³⁶ Tura Jesus chicharainiak “Penké etserkairap” tímiayi. Jesuska surf-suritiamaitiat, nu nankaamas

etseriarmiayi. ³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuattru mir shuáran Jesus ayuramiania nu
(Mateu 15.32-39)

¹ Nu tsawantáj shuar timiá utsurí iruntrarmiayi. Yurumkarí atsakui Jesus ni unuini-amurín utsukar juna tímiayi: ² “Ju shuáran waitnentajai. Menaintiú tsawant Wijíají pujuinia ásarmatai ni yurumkarí amuukachaik. ³ Tura ni jeen ayurtsuk akupeamka, tsukariín jintiá pimpikiartatui, yajaya káunkaru ásar” tímiayi.

⁴ Tutai ni unuiniamurí chichainiak “Túrasha juí atsamunam, ju aents ejemarat tusar ¿tuyá yurumkak wáinkiatjaj?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuiñkia ashí áentsun “nuñká pujustarum” tiarmiayi. Tura tantan achik, Yúsan yumínsamiayi. Tura puuk, áentsun ajamsatarum tusa ni unuiniamurín susamiayi. ⁷ Tura uchich namaksha ishichik aan achik, Yúsan yumíñkias, ni unuiniamurín chicharuk “Jusha shuar ajamsatarum” tímiayi. ⁸ Turam ashí yurumáwar ejemarmarmiayi. Ampirma púu-naruncha siati chañkinnium áimkiarmiayi. ⁹ Kuattru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamuríjijai kanunam enkemprar Tarmanúta nuñkanam wearmiayi.

Pariséu Jesusan iniakmasta tiarmiania nu
(Mateu 16.1-4; Rúkas 12.54-56)

¹¹ Paríséu Jesusjají áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukamtai, yamaiya aentstirram, nayaimpinmaya kakarman iniakmasat tusarum wakerarum? Nuka penké sunaschat-tarme, paant tájarne” tímiayi.

¹³ Nuyá nin ikiukiari ataksha kanunam enkemar amain katiñmiayi.

Pariséu túramuríjijai aneartarum, tímiayi Jesus
(Mateu 16.5-12)

¹⁴ Tura ni unuiniamurí yurumak jukitíai tukamá kajinmatkiarmiayi. Kanunmanka aya chikichik tantanak takaku ármiayi. ¹⁵ Jesussha ni unuiniamurín enentáimtikíuk tímiayi “Wáinkiatarum; Paríséusha Erutissha wakaprutain takakainia nújajísha aneartarum” tímiayi.

¹⁶ Tutai ni unuiniamurísha tunaiyarmiayi “Tanta kajinmatkin asakrin nuna túramtsují-ash” tiarmiayi.

¹⁷ Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Penké enentáimtsurmek. Atumí enentájí tuke kiritkíait? tímiayi. ¹⁸ Jimi ajísha itiura wáintsurmea. Kuíshim ajísha itiura ántatsrum. Ashí kajinmatkintrumek. ¹⁹ Nekaatarum, nuik, señku tantan púuran señku mir áishmankan ayurachmakaj. ¿Tura ampirma urutmá chañkinnium chumpiamarum?” tímiayi.

Níisha tiarmiayi “Tuse chañkinnium chumpiamji.”

²⁰ Ataksha Jesus tímiayi “Tura siati tantajají kuattru mir shuaran ayuramtai, ¿ampirmasha urutmá chañkinnium chumpiamarum?”

Níisha “siati” tiarmiayi.

²¹ Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiayi. Jeawarmatai, áishman jíi kusurun Jesusan itiararmiayi. Túrawar antiñta tusar seawarmiayi. ²³ Tuma asamtai Jesus uwejnun achik péprunam aani enkeki júkí jíin usukíjijai kuérmiayi. Tura uwejéjají antiñ “¿íimmek?” tímiayi.

²⁴ Tutaí kusuru ími tímiayi “Aentsun iijajai, túrasha paantcha. Numi wekainian áaniun iijajai” tímiayi.

²⁵ Nuyá ataksha Jesus ni uwejéjaj kusuru jijn antiñmiayi. Tura kusurusha úmamkes iis, péñker ajas, ashí paant ímprimiayi. ²⁶ Jesus chichaak “Jeeñiin weakum péprunam wayawaip tura shuar ujakaip” tímiayi.

Pítiur Jesusan “Yusa Anaikiamurinme” tímiania nu
(Mateu 16.13-20; Rúkas 9.18-21)

²⁷ Jesus ni unuiniamurijjaj uunt pepru Sesaria-jiripiunam jeatsuk, tñjuch uchich péprunam irasarmiayi. Jintia wésar Jesus ni unuiniamurñ chicharainiak, “¿Yaiti turutainiawa Winia?” tímiayi.

²⁸ Tutaí niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eríasaiti, tura chíkichkia, yaunchu Yúsna etserin nantakniua núiti, turamainiawai” tiarmiayi.

²⁹ Tutaí Jesus tímiayi “Atunsha, ¿waritume. Yáitij?” tímiayi.

Tutaí Pítiur tímiayi “Ámeka Krístuitme; Yúsaiya akupkamuitme.”

³⁰ Tutaí Jesus chichaak “Peñké etserkairap” tímiayi.

Jesus ni jákatniurñ ujakmiania nu
(Mateu 16.21-28; Rúkas 9.22-27)

³¹ Unuiniaak: “Wi Aents Ajasuitjiana ju ti wáitsatniuitjai. Israer-shuarti ii uuntrisha, Patri úuntrisha, ii jintinniurisha Winia nakitrurar mantuawartatui. Túrasha menaintiu tsawant nankaasmatai nantaktiniaitjai” tímiayi. ³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutaí Jesus ayantmatar, ni unuiniamurñ iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi. ³⁴ Nuna tuasua amik tura nuñ matsamarmia nunasha, ni unuiniamurñcha untsuk tímiayi, “Shuar Winia nekas nemartustasa wakerakka ni wakeramurñkia iniaisati; tura ni krusrñ yanakñ nemartustí. ³⁵ Kame shuar ju nunkanam aya ninñki anenmamkunka nu shuar ni iwiaakmarñ emenñkattatui. Antsu Winia anentu asa tura winia chichamprun anea asa, shuar aya péñker pujustinniaak enentáimtsuna nu, nekas iwiaakman wáinkiatstawai.

³⁶ Nekaata, shuar ashí ju nunkanam írúnna nuna sumaksha túrasha ni wakanñ jinium wéakuisha, ¿itiurak péñker pujusaint? ³⁷ Shuarka wakanñ unwentikratay tusa wakerak ¿urutmak akimkaint? ³⁸ Antuktarum. Yamaiya aents Yúsna nakitar ajapawaru yajauch ainia nu íimiainiamunam shuar Winia natsantrakuñkia tura winia chichampruncha natsantrakuñkia, wí, Aents Ajasuitjiana ju, winia Aparu kakarmarjijaj tura nayaimpinmaya péñker suntarjaj atak taakun, nú shuaran natsantrattajai Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarjijaj aentsu enentáin akupkattana nú tsawantan wáinkiatatna nu juñ iijajaj pujuiniawai” tímiayi.

Jesus nushá iira ajasmiania nu
(Mateu 17.1-13; Rúkas 9.28-36)

² Nuyá sais tsawant nankaasmatai, Jesus Pítruncha, Jakupuncha, Juáñnasha uunt náinnium júkiarmiayi. Nuñsha Jesus nushá iira ajasmiai. ³ Ni pushirisha ti puju jíitsumir ajattsarmiayi. Nujaj métek puju awajsatin ju nunkanam atsawai. ⁴ Túruna nuñ Erías, Muisajaj wantinkiar Jesusaj chichainian wáinkiarmai. ⁵ Nuyasha Pítiur Jesusan chicharuk “Uuntá, ii juñ pujustin ti péñkeraiti. Menaintiú áakmaktaí, Áminiu chikichik, Muisaisna chikichik, Eríasnasha chikichik” tímiayi. ⁶ Jesusa unuiniamurñ sapijmainiak, Pítiur wariniak titi nekaachmiayi. Nékachu asa nuna tímiayi.

⁷ Tura yurañkim tara mikintiu awajsmiai. Yurañminmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurñ ayantmar iijaj tukamar aya Jesusnak wáinkiarmai. Chíkichkia atsuarmiayi.

⁹ Nuyá náinniumiá akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

¹⁰ Tutai ni tímian ímiatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmiayi. ¹¹ Tura Jesusan aniasarmiayi “¿Urukamtaí Israerti ii jintinniurisha, Erías emka tátiniati, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniati. ¿Tura Aents Ajasunun Yus-Papinium warintiuá?

“Ti wáitsattawai; Nin nakitrartatui.” Tu áarmaiti.

¹³ Wi tájarme, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papiriin Eríasa túrunatniuri aarma amia tímiatrusan túrawarmiayi” tímiayi Jesus.

Jesus iwianchin jiki akupkamina nu

(Mateu 17.14-21; Rúkas 9.37-43)

¹⁴ Tura ni unuiniamurí matsatmanum atak wáketuk, ti untsurí aents káutkar Israer-shuara jintinniurisha níjjai tunai pujuinian wáinkiamiayi. ¹⁵ Tura aencha, Jesusan wáinkiar warainiak, tsékeñki weriar, áujsarmiayi. ¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. ¹⁸ Túmakui íwianch enkentakun paat ajar áepeawai; túram uchisha saun kaput apak najn kátetete awajewai. Túram kakaakcha ame unuiniamurmin seamjai, jíirukti tusan, túrasha tujinrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. ²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunka iniaan péper-péper ajakin wenunam saun apakmiayi.

²¹ Túrunamtaí Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti. ²² Tuma asa tuke jutikiú pujurniuiti; jiniumsha apeawai, entsá maataj tusa ajuawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukamtaí, yaintrukminiaitkiumka, tame? Nekaata, shuar Winia nekas enentáimturna nu ashí túramniati” tímiayi.

²⁴ Tutai uchi aparí kakantar chichaak, “Uuntá, nekas enentáimtajme. Nekas enentáim-tustinian táasjana nu yáintkiata” tímiayi.

²⁵ Tura shuar untsurí káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. ²⁶ Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtaí untsurí shuar “jakayi” tiarmiayi. ²⁷ Támanak Jesus uwejen achik awajkimiayi, tura uchi nantaki wajakmiayi.

²⁸ Tura Jesus jeá wayamtaí, níñki pujusar, ni unuiniamurí aniasar “¿Urukamtaí iisha jíiktin tujinkiamaj?” tiarmiayi.

²⁹ Tutai Jesus tímiayi “Ju iwianchkia ijijarmar Yus áujukur jíikminiaiti” tímiayi.

Jesus ataksha ni jákatniurin ujakmiania nu

(Mateu 17.22-23; Rúkas 9.43-45)

³⁰ Nuyá jíinkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi. ³¹ Unuiniaak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiansamunmayan menaintiú tsawantai nantaktiatjai” tímiayi. ³² Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

³³ Nuyá Kapernáum péprunam jeawarmiayi. Tura Jesus jeá pujus ni unuiniamurin aniniak, “¿Atumsha jintiá winisrum warí áujmatmiarum?” tímiayi. ³⁴ Tura natsarar

pachischarmiayi. Kame jintiá wésar “iijiai zyaki imiá nankaamantu ajasat?” tunainiarmiayi. ³⁵Ni unuiniamurí pachischarmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. ³⁶Tura uchin itiáa miniakas chichaak: ³⁷“Shuar uchin winia naaruí shiir awajeakka Winia shiir awajawai. Tura Winia akuptukua nunasha shiir awajawai” tímiayi.

“Shuar in nakitramachkuŋka in páchitkiawai”

(Rúkas 9.49-50; Mateu 10.42)

³⁸Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijiai frutkachu asamtai nu túratin suritkiamji” tímiayi.

³⁹Tutai Jesus tímiayi “Antsu suritkiarap. Shuar winia náarun pachis tujinkiamun túrakka, nu shuar wari tsanumprutratniun tujinkiattawai. ⁴⁰Shuar in nakitramachkuŋka, in páchitkiawai, tímiayi. ⁴¹Winia nemarka asakrumin shuar yumiichinkesha ajam-pramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

⁴²Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntuŋen kayajai jinŋkiar nayaantsanam ajunmaka maak ainti. ⁴³Ame uwejmek yajauchin túrumtikramamni-aitkuŋkia tsupikta. Mai uwejtuk wáitsatniunam jeatniujainkia chikichík uwejjai ju nuŋkanam pujusar tuke iwiaaku pujustinnium jeatin ti shiiraiti. Warí, wáitsatniunmanŋka ji kajinkiashtin awai, ⁴⁴jákaru akarísha jáiniatsui tura jisha tuke kapaawai. ⁴⁵Nawemsha yajauchin túrumtikramamniatkuŋkia nusha tsupikta. Mai nawentuk wáitsatniunam jeatniujainkia chikichík nawejai ju nuŋkanam pujusar tuke iwiaaku pujustinnium jeatin ti shiiraiti. Wáitsatniunmanŋka ji kajinkiashtin awai, ⁴⁶jákaru akarísha jáiniatsui tura jisha tuke kapaawai. ⁴⁷Jimisha yajauchin túrumtikramamniatkuŋkia ukuinkiata. Mai jiiintiuk wáitsatniunam jeatniujainkia chikichík jijijai ju nuŋkanam pujusar Yus akupeana nuí jeatin ti shiiraiti, ⁴⁸wáitsatniunmanŋka jákaru akarísha jáiniatsui tura jisha tuke kapaawai.

⁴⁹Namaŋ Yus susamu weaktinia áintsan aentstirmesha jijijai nekapnastatrumé. ⁵⁰Weesha ti penkeraitiat michumarka, ¿itiurak jea-jeat áitinkí? Wats, wee jeakua áintsarmek atumek shiir enentáimtunaistarum” tímiayi Jesus.

10

Nuwá ajapatniun Jesus áujmatsamiania nu

(Mateu 19.1-12; Rúkas 16.18)

¹Jesus Kapernáumnumiá jiinki, Jutía nuŋkanam nankaamaki, Jurtaŋ entsa amain jeamiayi. Nuí pujai, aents ataksha Nin irunturarmiayi. Iruntrarmatai tuke túrin asa ataksha unuiniamiayi. ²Tura Pariséu Jesusan nekapsatai tusar wakeruniak, Nin chicharainiak “¿Áishman ni nuarí ajapatin tsanŋkamkamukait?” tiarmiayi.

³Tutai Jesus tímiayi “¿Muisais wariniak timia?”

⁴Tutai “Papíjiai in ajapatniun tsanŋkatramkamiaji” tiarmiayi.

⁵Tutai Jesus tímiayi “Atumí enentái kátsuram asamtai nu chichaman atumin tsanŋkatramkamiarme. ⁶Tura Yus yámankamtaik ashí najanamia nuí, áishman nasha nuwanŋcha najanamiayi. ⁷Tuma asamtai áishman ni aparíncha nukuríncha kanaki ikiuki, ni nuaríjiai tsanintiniati. ⁸Warí, áishman nuaríjiai jímiairaitiat chikichik ajasartatui. Tuma asamtai yamá jímiairachaiti, antsu chikichik ajasuiti. ⁹Tuma asa, Yus atsanŋkiania nuna, aents akankashtiniati” tímiayi.

¹⁰Tura urum jeá wayawar, Jesusa unuiniamurí nu chichaman ataksha aniasarmiayi. ¹¹Tuiniakui Jesus tímiayi “Shuar ni nuarín ajapa ikiuak chikichan nuátkanŋka, emka nuarín yajauch awajas, ikiuak, tsanirmayi. ¹²Nuwasha ni áishrj ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu
(Mateu 19.13-15; Rúkas 18.15-17)

¹³ Antinkiarat tusar uchin Jesusan itiararmiayi. Túruiniakui Jesusa unuiniamurij “itiairap” tiarmiayi.

¹⁴ Tura Jesus nuna wániak, kajek juna tímiayi “Uchi Winí winitin tsan̄katruktarum. Suritkiairap. Iis, shuar ju uchía núnisan̄ peejchach enentáimtumainia nu Yusa akupeamurij pachiinkiamniaiti. ¹⁵ Nuní asamtai tájarme, uchi umiana núnisan̄ Yusa akupkamurij shuar umiachkun̄ka nuna pachiinkiachminiaiti. ¹⁶ Nuyá uchin miniakas, “Yus yáinmakarti” tímiayi.

Kuítrintin Jesusan áujsamiania nu
(Mateu 19.16-30; Rúkas 18.18-30)

¹⁷ Ukunam, Jesus nuyá weaj, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. ¹⁹ Yus akupkamu nékatsmek. Ju ániawai: tsanir-mawairap, man̄kartuawairap, kasamkairap, chíkich shuar tsanumprurairap, anan̄kartuawairap, apasha nukusha umirkatarum. Nu ániawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaun̄kattme. Túram winitia, krus yanaktinia áintsamek itiuurchatrum aijn̄ nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

²³ Nii wématai, Jesus ashí ni téntakmarij iis, ni unuiniamurij chicharuk, “Kuítrintin ainia nu Yusa akupeamurij pachiinkiatin ti itiuurchaiti” tímiayi. ²⁴ Takui ni unuiniamurij nuna antukar niisháa enentáimprarmiayi. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurij pachiinkiatin pen̄ké itiuurchataiti. ²⁵ Uunt kamiriu auja jijn̄ wayatin ana nú nan̄kaamas, kuítrintin Yusa akupeamurij pachiinkiatin itiuurchataiti” tímiayi.

²⁶ Nuna antukar nú arant niisháa enentáimprarmiayi. “¿Nuinkia yaki uwempramniait?” tunaiyarmiayi.

²⁷ Tura Jesus nin iisar chichainiak “Aents nin̄ki túrachminiaiti, antsu Yus túramniaiti. Yuska ashí túramniaiti” tímiayi.

²⁸ Nuyá Pítur Nin chicharuk “Iis, iikia ashí ikiukir némartujuk” tímiayi.

²⁹ Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachincha, umaincha, aparincha, nukurincha, nuarincha, uchirincha, nunkencha uyumatsuk ikiuakka, ³⁰ nu shuar ju nunkanam sian̄ patatnas jeencha, yachincha, umaincha, nukurincha, uchirincha, nunkencha, ju nunkanam wáitiayat sunastatui. Tura ukunam, nūka amuukamtai, nu shuarsha jáchatainiam tuke péñker pujustatui. ³¹ Tura untsurij shuar yamáí pen̄keri ainia nu, ukunam ukunmaan̄i pujusartatui, tura íksan̄ untsurij shuar yamáí ukunmayá ainia nu, ukunam eem pujusartatui” tímiayi Jesus.

Jesus ni jákatniurij ataksha ujakmiania nu
(Mateu 20.17-19; Rúkas 18.31-34)

³² Nuyá arak Jerusarénum wéenak, jintiak wearmiayi. Jesuska émak wémiayi. Ni unuiniamurijsha niisháa enentáimprarmiayi. Ashamainiayat̄an̄ Jesusan nemarsarmiayi. Túmainiaj atak ni nekas unuiniamurij akankiar, ni túrunatniurij ujakmiayi. ³³ Ujaak tímiayi “Antuktarum, arak Jerusarénum wéaji. Nūj Winia, Aents Ajasuitjiana juna, Patr̄i uuntriincha, jintinniummasha surutkartatui. Niisha apachnium mantamnati tusar surutkartatui. ³⁴ Nusha Winia wishikrurar, katsumprukar, usukruawar mantuawartatui. Túramaitatnak menaintiú tsawantaj nantaktiatjai” tímiayi.

Jakupu Juanjaj seawarmiania nu
(Mateu 20.20-28)

³⁵ Sepetéu uchirí Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

³⁶ Tutai Jesus tímiayi “¿Warí ititukut tusam wakerutam?”

³⁷ Tutai “Ame nupetmaktin tsawanturum jeamtai, iisha Ámijjaj pujustaitisar wakeraji, wi untsuurumini, winia yatsursha menaarmi. Nu tsankatrukta” tiarmiayi.

³⁸ Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹ Niisha tiarmiayi, “Túramniaitji, páchitskea.”

Tuúniakui Jesus tímiayi “Wats, Wi umartatjana nu umartatrum, tura Wi imiantiatjana núnisrumek imiantiatrum. ⁴⁰Túrasha winia untsuuruini, menaruinisha átum pujustinian Wikia súsashtinaitjarme, antsu Yus wakerana nu nuin apujsattawai” tímiayi.

⁴¹ Tura chíkich tias unuiniamurí nuna anturkar Jakupuncha, Juánnasha ti kajerarmiayi.

⁴² Tura Jesus ni unuiniamurín irur tímiayi “Ju nékarme; Yus-shuarchanum akupniuitjai tunia nu, waantu enentáimtumas, ni shuarín ti akupeawai; tura uunt ainia nusha ashí shuar ti takamtikiainiawai. ⁴³Antsu atumjaj núnisan atsunuui. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. ⁴⁴Shuar atumí penkeri ajastajtsa wakerakka, takarniua nuke ajas, umirtamkatí. ⁴⁵Wisha, Aents Ajasuitjana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwentikratajtsan táwitjai” tímiayi.

Jesus Partimiásan tsuármiania nu
(Mateu 20.29-34; Rúkas 18.35-43)

⁴⁶ Jesus ni unuiniamurijjai, tura chíkich untsurí aentsjai Jirikiú péprunam jeawarmiai. Nuyá Jirikiúnmayasha jínkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi. ⁴⁷Niisha, Nasarétnumia Jesusaiti táman antuk, untsukum “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

⁴⁸ Tura untsurí nuí matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weea Jesúsá, winia waitnentrurta.”

⁴⁹ Nuna antuk Jesus wajas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsurmawai” tiarmiayi.

⁵⁰ Tuiniakui niisha esekmatairín ajapa ikiuak wajaki Jesusan tseke tarimiayi.

⁵¹ Tura Jesus nin chicharuk “¿Winia ititukut tusamea wakerutam?” tímiayi.

Tutai kusuru chicharuk “Uunta, ímtiasan wakeraji” tímiayi.

⁵² Tutai Jesus chichaak “Shiir wetá. Winia nekas enentáimtura asam pénger ajasume” tímiayi. Tura nu chichamaik ímpramiayi. Tura Jesusan nemarki wémiayi.

11

Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania péprusha Uriwiu naint ínkiasmak ámanum jeawar, Jesus jimiará unuiniamurín ujuikimiayi. ² Ujuiak tímiayi “Aatuniní pépruchiniam werum nuin umpuuru uchich jínkiamu wáinkiatarme. Nu umpuuruka tuke entsamprukhamuiti. Nu atiarum utitiarum. ³ Tura “¿Urukamtia áitkiarum?” turamainiakui sha, “ii Uuntrj wakerawai” titiarum” tímiayi. ⁴ Tutai wearmiayi. Tura umpuurun wáitiniam aani jínkiamun, jintiá yantamnum wajan wáinkiar atiawarmiayi. ⁵ Nuí pujuarmia nu “¿Warí áitkiarum. Urukamtai umpuuru atíarum?” tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi. ⁸ Tura untsurí shuarsha pushirín jintianam ayapar áinkiarimiayi. Chíkichcha jintiá yantamnumian nukan juuk jintianam áintrarmiayi. ⁹ Eem wearmia nusha, uku winiarmia nusha warainiak

“Jusanna” untsumkarmiayi. “Yusa náarín winiana nu imiá péñkeraiti. ¹⁰Li uuntri Tawitia akupeamuri tátatna nu imiá penker atí. Ii Yusri naari shiir ati.” Tu untsumki wearmiayi. ¹¹Tura Jesus Jerusarénum jeamiayi. Jeá, Yusa Uunt Jeen wayamiayi. Tura ashí iiyasua amik, kintiampraj tusa ni tuse unuiniamurijjai tjiuch Petania péprunam wearmiayi.

*Jesus iikiu numin yuminkramiania nu
(Mateu 21.18-19)*

¹²Kashin tsawar, Petanianmaya jintia wesa, Jesus tsukammiayi. ¹³Tura arant wajan iikiu numirin núkenniun wániak, nereatsuash tusa iyumiayi. Tura nereshtairin asamtai neren penké wáinkichmiayi. ¹⁴Nuyá iikiu numin yuminkeak: “Ame nerem penké yunaashti” tmiayi. Ni unuiniamurisha nuna táman antukarmiayi.

*Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)*

¹⁵Nuyá atak Jerusarénum jeawarmiayi. Nui Jesus Yusa Uunt Jeen wayá suruktai tusar pujuarmia nuna jiki akupkatasa nankammiayi. Kuítian yapajin armia nuna misarin tura yampitsan súrin armia nuna kutankrincha ayanturmiayi. ¹⁶Tura káarak entsaki Yusa Uunt Jeen nankaamaktinian suritkiarmiayi. ¹⁷Nuyá “Yus áusatai tusar ashí shuar Yusa jeen wayamnia átatui” tú aarchamukait Yusa Papirijn. Antsu átumka Yusa jee kasa matsamtaiya nútikiarme” tmiayi. ¹⁸Aents nui matsarmia nu Jesusa chichamen antukar ti enentáimprarmiayi. Tuma asamtai Israer-patri úuntrisha, Israer-shuara jintinniurisha, nuna nekaawar, Jesusan ashamainiak mantamnati tusar chichaman jurusarmiayi. ¹⁹Nuyá kiakui Jesus Jerusarénumiá jiinkimiayi.

*Iikiu numin káarun wáinkiamiania nu
(Mateu 21.20-22)*

²⁰Kashin káshik nankaamainiak iikiu numin kanaptuk jaka wajan wáinkiamiai. ²¹Tura Pfiur enentáimias Jesusan tmiayi “Uunta, iista, iikiu Ame yuminkramam nu kanaptuk káarchaik.”

²²Tutai Jesus tmiayi “Yus nekas enentáimtustarum. ²³Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniañti” tákuinkia, páchitsuk iniañtatui, tmiayi. ²⁴Tuma asamtai tájarme, ashí Yus áujkum searmena nuna suramsattarme. “Wi seajna nuna yamá takajai” tu enentáimkiurme, wáinkiatarme. ²⁵Tura Yus áujkum pujarmena nu, kajernaiyamuram ákuinkia tsanurnáiratarum. Atumí Aparí nayaimpiniam pujana nu atumí tunaarin tsanfurturti tusarum túratarum. ²⁶Atumsha tsanurnáiyachkurminkia, núnisan atumí Aparí nayaimpiniam pujana nu atumí tunaarin tsanfurtámprashtatrumé” tmiayi Jesus.

*Yusa kakarmarijjai Jesus takasmiania nu
(Mateu 21.23-27; Rúkas 20.1-8)*

²⁷Ataksha Jerusarénum waketkiarmiayi. Jesus Yusa Uunt Jeen wekai, Israer-patri úuntrisha, Israer-shuara jintinniurisha, Israer-shuara iruntai jee úuntrisha Nin káutkarmiayi. ²⁸Káutkar Jesusan tiarmiayi “¿Yana kakarmarijjai ju túram. Ame túramna nuna ya tsankatrama?” tiarmiayi.

²⁹Tuiniakui Jesus tmiayi, “Chikichiniak aniatatjarme. Áirkatarum. Túrakrumninkia Wisha winia takastinian tsankatrukma nuna ujaktatjarme. ³⁰Wats, turutiarum, ¿ya Juan imiainiun tsanatkama? ¿Shuar tsanatkamka? ¿Yus tsanatkamka? Áirkatarum” tmiayi.

³¹Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³²Antsu “shuar tsanatkaiti” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuiti, tu enentáimainiakui ashammarmiayi. ³³Nuyá Jesusan tiarmiayi “Iikia nékatsji.”

Tutai Jesus tmiayi “Wisha núnisnak yana kakarmarijjai takaaj nuna ujakchattajrumé.”

Yajauch takau armia nu

(Mateu 21.33-46; Rúkas 20.9-19)

¹Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Najana takartusti tusa shuáran ikiuak nin̄kia jeachat wémai. ²Neretai tsawant jeamtai, ni takarniur̄in júukman akankat tusa akupkamai. ³Tura ajanam takau arma nu, nu takarniun achik, katsumkar, áyatik awain̄kiarmai. ⁴Ataksha chíkich takarniun akupkamai, tura nunasha kayajai tukurar, múuknum katsumkar, katsekar awain̄kiarmai. ⁵Tuma ain̄ ataksha chíkichan akupkamai, tura nunasha máawarmai. Ti untsur̄in akupramai. Chikichnasha katsumkarmai, chikichan máawarmai.

⁶Tura niijai chikichik tuke ámiayi, nuka ni aneamu uchir̄i. Nu uchincha ukunam akupkamai. Akupeak “Winia uchirnaka shiir awajsartatui” tímiayi. ⁷Tura ni uchir̄i winian wáinkiar, takau shuar nuámtak chichainiak “Juka ajá nérenniun uchir̄inti. Wátsek, maatai; túramka ajaka iiniun átatui” tiarmai. ⁸Túsar achikiar máawarmai. Ayashincha ajanmaya ajapawarmai” tímiayi.

⁹Tura nuyá aniasmiayi, “¿Wats, warí enentáimsarum; ajá nérenniur̄i itiurkattawa? Jeashtanmayá taa, ajá takainia nú shuaran amuktatui. Ni ajar̄incha chikichan ikiastatui. ¹⁰Ju, Yus-Papiniun aarma ana nu áujsachukaitrum:

Kaya pénkernak, jeammin “yajauchiiti” tusar ajapawarmia nu ashí kayajai nan̄kaamas pénker apujsamuiti. ¹¹Nusha Yus túramuiti. Iisha íisar ti enentáimtaji. Nuke áarmaiti” tímiayi.

¹²Tura nú metek-taku chichamjai nin̄ áujmatma asa achiktai tusar chichaman jur-sarmiayi. Túmainiyat shuáran ashamainiak Jesusan ikiuiniak wearmiayi.

Unt akupin súsatin tura Yus súsatin

(Mateu 22.15-22; Rúkas 20.20-26)

¹³Tura wear, imiaantikiar yajá chichakmatai nújai yajauch títiayi tusar Pariséu shuar-nasha, Erutisa neman̄in shuarnasha akatar Jesusan akuptukarmiayi. ¹⁴Túram Nin̄ jeariar chicharainiak: “Uuntá, aents nakitiainiāin tuke nekas chicham páchitsuk chichaame, nu nékaji. Aents pátatek iyatsme, antsu nekas Yusa jint̄i unuiniamé. ¿Waritia enentáimiam, ii kuitri uunt Sesar súsatin pénkercakait. Susattajik. Suritkiattajik? Nu nekaatai tusar wakeraji” tiarmiayi.

¹⁵Tura Jesus ni yajauch enentáimmiar̄in nekara “¿Urukamtai Winia yajauch titi tusarum wakerutarum? Kuit itiatarum, Wi ístaj” tímiayi.

¹⁶Tutai kuftian itiararmiayi.

Jesus nuna iis tímiayi, “¿Juísha yana yap̄i tura yana naari áarmait?” tímiayi.

Tutai “Uunt Sésarna” tiarmiayi.

¹⁷Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamur̄in antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

¹⁸Nuisha Satuséu aents, jakamunmaya nantaktin pen̄ké atsawai tiniu armia nu, Jesusan tariarmiayi. Taar Jesusan chicharainiak: ¹⁹“Uuntá, Muisais juna áatrampramiai:

“Áishman̄ ni nuar̄i júreats̄ain̄ jakamtain̄kia, yachin yajutmatratsa, ni yachi nu wajen nuátkatniuiti.”

²⁰Wats, siati yachi ármiai. Iwiair̄i nuwan nuatak yajutmatsuk jakamiayi. ²¹Ni yachi wajen akinkiamiayi. Nusha núnisan̄ yajutmatsuk jakamiayi. Nuna yachisha núnisan̄ tura nuna yachisha núnisan̄ túramiai. ²²Tura ashí siati patainman̄, patainman̄ nu nuwan nuátkarmiayi. Yajutmatsuk, yajutmatsuk jíniawarmiayi. Tura ukunam nuwashha jakamiayi. ²³Nuin̄kia nantaktin tsawantai, nantakiarmatai, ¿yana nuar̄in̄ ati? Ashí siati nuátkacharmaka” tiarmiayi.

²⁴ Tutai Jesus tímiayi “Jakamunmayá nantaktin atsawai” tátsurmek. Yusa chichame tura Yusa kakarmari nékachu asarum awajiarme, tímiayi. ²⁵ Iimiatarum, aents jakamunmayá nantakiarmatai, nuatnaikiatin atsuttawai, antsu nayaimpinmayá suntara núnisaran pujusartatui. ²⁶ Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apráama Isaaka tura Jakupu Yúsr̄intjai” Yus tímiayi. ²⁷ Yaunchu jákaru ain, Yus nuna taku, ayashnium jakayat iwiaaku pujuinia nuna Yusr̄intjai, tawai. Nekas jaka ainia nuna Yusr̄inchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu
(Mateu 22.34-40)*

²⁸ Jesussha Satuséusha áujmatnainian Israer-shuara jintinniuri taa anturkamiayi. Anturak, Jesus ti péñker áimkiui, niisha Jesusan juna aniasmiayi: “¿Yus akupkamu tuá imiá péñkeraiti?” tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusr̄i úuntaiti, tura Niñki nekas Yúsaiti. ³⁰ Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi. ³¹ Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas péñker akupkamu atsawai” tímiayi.

³² Tutai jintintin tímiayi “Ee, péñkeraiti, Uunta. Nékasmeke tame. Chikichk Yus awai, chíkichkia atsawai. ³³ Tura tuke enentáimjai ti enentáimsar, ii kakarmarisha Yus íktusar Nin aneakrikia, ii ayashi aneajnia núnik ii írutramurisha aneatniuitji. Nusha ashí Yus sutai ana nujai nankaamas péñkeraiti” tímiayi.

³⁴ Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

*Kristu tutai zyana uchirimpait?
(Mateu 22.41-46; Rúkas 20.41-44)*

³⁵ Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?” ³⁶ Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úntrun tímiayi “Ame nemasrumin nupetkatin amuatsain winia untsuuruinini pujusta”.

³⁷ Kame Tawitkia, Krístun áujmatuk, “winia Uuntru” taisha, ¿itiura ní shuarisha átinkí?” tímiayi Jesus. Tuma asamtai untsurí shuar nuí matsamarmia nu ti shiir antukarmiayi.

*“Israer-shuara jintintin ainia nújai aneartarum” Jesus tímiania nu
(Mateu 23.1-36; Rúkas 11.37-54; 20.45-47)*

³⁸ Jesus unuiniak tímiayi, “Israer-shuara jintinniuri ainia nujai aneartarum. Niisha waantu enentáimtumasar, esaram pushin entsasar wekasatajtsar wakeruiniawai. Péprunmasha shuar shiir áujtusarat tusa wakeruiniawai. ³⁹ Israer-shuar iruntainiam penkeri pujutainium pujustinian wakeruiniawai. Nampernumsha penkeri pujutainium pujustiniasha wakeruiniawai. ⁴⁰ Tura waje jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chikichjai nankaamas Yus asutiawartatui” tímiayi.

*Waje kuítr̄in susamiania nu
(Rúkas 21.1-4)*

⁴¹ Jesus Yusa Uunt Jeen kuit enketainiam naka pujus áents kuítr̄in chumpian wáinkiamiayi. Untsurí kúitr̄intin núkap enkeawarmiayi. ⁴² Nuyá waje kuítr̄incha taa jimiará uchich kuítian, reara áantsan, enkeamiayi. ⁴³ Jesuska unuiniamur̄in untsuk “Nekas tájarne, ju waje kuítr̄inchaitiat, ashí enkeena nú nankaamas núkap enkeayi. ⁴⁴ Iis, kuítr̄inniusha

nii ampirma nuna enkeenawai, tura antsu ju nuwá kuítrinchaitiat, ampirmatsuk ni yurumatniurjín takurmakman ashí enkeayi” tímiayi.

13

Yusa Uunt Jeeñ yumpuntratniun Jesus ujakmiania nu

(Mateu 24.1-2; Rúkas 21.5-6)

¹Yusa Uunt Jeeñia Jesus jiinkimtai, unuiniamuri Nin tímiayi “Iisia, Uunta, kayasha ti shiir ániawai. Jeasha imiá úuntchakait.”

²Tutai Jesus tímiayi “Ju imiá uunt jea wáinmek. Kaya ekentramu au ashí mash yumpuntrartatui” tímiayi.

Amuukatin tsawantin uruku átatna nu

(Mateu 24.3-28; Rúkas 21.7-24; 17.22-24)

³Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, nínkimias Jesusan aniiniak “Uuntá, tímiám nu, ¿urutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵Tutai Jesus tímiayi “Aneartarum, anankramawairap. ⁶Nekaatarum, untsurí winia naarun pachisar winiartatui. Chíkich chíkich “Wíitjai Kristu” taku, untsurín anankawartatui. ⁷Tura meset chicham ántakrumka, yajaya meset chicham ántakrumsha sapijmi-akairap. Nekas túrunashtinkiait. Nujajisha amuukatin tsawantka tuke jeatsui, tímiayi. ⁸Shuar chíkich shuarjái mesetan najanawartatui; apachcha chíkich apachjái núnisarañ mesetan najanawartatui. Untsurí nuñkanam úurkattawai. Tsukasha ártatui, charaatum ajamusha núnisarañ átatui. Tura nujái itiuurchatka aya yama nañkamui.’

⁹Túmaitkui atumsha aneartarum. Akupin iruntainiumsha surutmkartatrume, tura íi shuar iruntainmasha katsumpramkartatrume. Wíi shuar asakrumin, kapitiánnium, akupniunmasha juramkittiarume. Nui jearum, Winia chichastatrume. ¹⁰Nu túruntsain ashí áentsnum Yus-Chicham etsernaktiniaiti. ¹¹Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintintramat-tarmena nu titiarum. Iis, atumí enentájijái tíchattarme, antsu Yusa Wakaní jintintiam títiatrume. ¹²Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisarañ untsurí shuar túrawartatui. ¹³Nuñkia Wíi shuar asakrumin ashí nakitramprartatui. Tura shuar yawetsuk katsuntrañka uwemprattawai” tímiayi.

¹⁴Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkuirmesha, ashí Jutía nuñkanam pujarmena nu, náinnium pisartarum. ¹⁵Jeá yakiini pujana nu akaiki wariri achiktajtsa, jeeñ wayashti. ¹⁶Ajanam pujana nusha ni pushirín jukitajtsa waketkishti. ¹⁷Tura ajantin áiniana nusha, kuírchin umuntsainia nusha, nu tsawantin timiá itiuurchatan wáinkartatui. ¹⁸Tuma asamtai átum pisaarmena nuí yumitin ahati tusarum Yus seatarum. ¹⁹Nu tsawantinkia ti wáitsatin átatui. Yama nañkamtaik Yus nuñkan najanama nuñsha, yamaisha ukunmasha timiu wáitsatin penké atsutawai. ²⁰Tura Uunt Yus wáitsatin tsawantan ishichik awajsattajai tíchaitkuñkia, uwempratin penké atsuinti. Tura ni shuarín anaikiamia nuna yáintajtsa wakerak, nu tsawantan ishichik awajsattawai. ²¹Nu tsawantaj “júiti Kristu” túramkuñkia anturkairap. ²²Kame “Kístuitjai” ántar tuinia nu, tura “Yúsnan etsernuitjai” ántar tuinia nusha wantinkartatui. Wantinkiar Yus anaikiamu shuárnasha anañkatai tusar wakeruiniak, ni kakarmarín iniakmainiak aentsti tujintiamun túrartatui. ²³Tura átum aneartarum. Aetak, túruntsain ujakchajrumek’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴Jesus tuke unuiniak juna tímiayi: “Tura nu wáitsatin nañkaasmatai, etsaasha nantusha etsantrashtatui. ²⁵Yaasha nayaimpinmaya kakekartatui, tura nayaimpiniam kakaram ainia nu muchitrartatui. ²⁶Nuyasha ashí aents Winia wáitkiartatui. Wí, Aents

Ajasuítjiana ju, ti kakaran, ti wincha ajasan, yuranminiam winiái wáitkiartatui. ²⁷ Nui nayaimpinmaya suntarun akupkattajai, Wíi shuaran ashí nunkanmayan irurarat tusan. Arakaaniya, nunkaaniya, ashí nunka nan̄katkamunmayan Wíi shuaran irurartatui.

²⁸ ‘Ikiu numi nakumea nu nekaatarum. Ni chin̄kimpri pun̄kak nukē jeakuí, “ju nunkanam esat jeatemaí” tátsurmek. ²⁹ Núnisrumek Wi tájarmena nu wáinkiumeka, ni tatin̄tri jeatemaí tu nekaattarme. ³⁰ Nekas tájarne, yamaí aents pujuinia nu kajin̄ amuiniatsain̄, ashí Wi tájana nu túrunatniuiti. ³¹ Nayaimpisha nun̄kasha amuukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchirin̄tiantan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ “Tura Wikia ju shuarjai méteketjai. Ju shuarsha jeachat weak, ni jeen ikiuwai. Ikiuak ni shuarin̄ wáitrukartí tusa apujas ikiuak ashí shuaran takatrin̄ súawai. Tura wáitin̄ wáinniun̄, “ameja péñker wáinkiaata” tímiai. ³⁵ Wikia nu jea nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátataj. ³⁶ Nérentin̄ aya aneachmak taa, kanúu tepaj wáitkiaí tusarum aneararum. ³⁷ Wi atumin̄ tájana nu, ashí shuaran tajai, anearum pujustarum” tímiyai Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan̄ 11.45-53)

¹ Jímiarchikí tsawant ajasmiaí paskua tutai námper jeatin. Paskua námpertincha wakapruachu tantan yuatin námpernasha métek najanin̄ ármiyai. Israer-patri uun̄trisha, Israer-shuara jintinniurisha Jesusan anan̄kar achikiar maatai tusar wakeriarmiaí. ² Túrusha “Jista tsawantin̄ túrachmi, aents charaatum ajarain̄ tusar” tiarmiiai.

Nuwā kun̄kuinian Jesusan ukatramiania nu

(Mateu 26.6-13; Juan̄ 12.1-8)

³ Jesussha Petania péprunam tunamaru Semun̄ka jeen misanam pujan, nuwā tarimiai. Nartu kun̄kuinian arapástru tutai kaya najanamunam piakun̄ itiamiyai. Nu kun̄kuin̄ ti kuitiaiti. Mutí chuchukē kupik Jesusa muuken̄ kun̄kuinian ukatramiai. ⁴ Tura nuí pujuarmia nu, kajerar tunaiyarmiiai “¿Urukamtai ju kun̄kuinian ántar wasurea? ⁵ Junasha súrakka, menaintiú siañ kuítnium surukminiuyi. Nu kuitcha kuítrinchan̄ súsan̄ka maak” tiarmiiai. Tusa nuwan̄ kajerkarumiyai.

⁶ Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiyai. ⁷ Kuítrincha atumjai tuke íruntuk. Wakerakrumka tuke péñker awajsatniuitrume. Antsu Wikia atumjai tuke pujushtatjai. ⁸ Ju nuwā ashí nii túramnia núnaka umikiai. Wi jákatin̄ jeatsain̄, iwarsatin̄ kun̄kuinian shiir ukatrarai. ⁹ Nekas tájarne, ashí nunkanam Yus-Chicham etsernaktatna nuí, ju nuwā túramurisha etsernaktatui, nin̄ kajin̄matkiarain̄ tusa” tímiyai.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamur̄intiat, Israer-patri uun̄trin̄ werimiai, Jesusan suruktaj tusa. ¹¹ Niisha nuna antukar, warasar “Kuit amastatji” tiarmiiai. Jútassha Jesusan itiurak yúpichuch tsan̄kamkattaj tusa enentáimias wekaimiai.

Jesusjai iruntrar yurumáwarmia nu

(Mateu 26.17-29; Rúkas 22.7-23; Juan̄ 13.21-30; 1 Kurintiunam 11.23-26)

¹² Wakapruachu tantan yuatin jísat nan̄kama tsawant tsawarmatai, paskua námpertin̄ yúatin murik máatin̄ jeamtai, Jesusa unuiniamur̄i iniasarmiiai “Paskuatin̄ murikui yúatin̄ iwiaratai tusar ¿tuí wétataj. Tuí yurumattam?” tiarmiiai.

¹³ Tutai Niisha jimiará unuiniamur̄in̄ akatar akupeak “Péprunam wetarum. Nuí áishman̄ yumin̄ jukí wéa wáinkiatarme. Nu áishman̄ nemarsatarum. ¹⁴ Wayana nuí jeá nérenniuri

títiarum “Uunt túramui, ¿wisha, unuiniamurjaj tuj yurumáttaj?”¹⁵ Nu nérentin, yakí p̄sunam uunt tesamunam ashí iwíaramun iniakturmastatrumē. Nuí jísat ii najanatin iwíaratarum” tímiayi.¹⁶ Ni unuiniamurí wear, péprunam jeawar, Jesus timia núnisan wáinkiarimiayi. Tuma ásar paskua námperan iwíararmiayi.

¹⁷Nuyá kíakui Jesus ni tuse unuiniamuríjjiai wayawarmiayi.¹⁸ Niisha misanam pekaamak, yurumáiniak pujusar, Jesus tímiayi. “Nekas tájarne, chikichík shuar Wijíaj yurumna nu, surutkattawai.”

¹⁹Nujaj kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰Jesus tímiayi “Ju misanam tuse irunar yurumprum nu, chikichik surutkattawai. Wijíaj piniñnum yurumkan ayak yuana núiti.²¹ Nekas Wi, Aents Ajasuitjiana ju, jákatniunam wéajaj, áarturma áintsanak. Tura áishman súrutna nu ti wáitsattawai. Niisha akiin-mainchu ajakuiti” tímiayi.

²²Yurumainiak Jesus Yúsán yuminkias, yurumkan achik, puuk, chicharainiak “Achik-tarum, júsha winia ayashruiti” tímiayi.²³ Piniñnasha achik, Yúsán yumiñkias, ni unuiniamurín súarmiyai. Ashí umararmiayi.²⁴ Umararmatai Jesus tímiayi “Júiti winia numpar, untsurín yáintajtsa puártinia nu. Nujaj Yamaram Chichaman Yus najanaiti.²⁵ Nekas tájarne, uwa yumirí ataksha juí umarchattajai. Tura tsawant jeamtai, ukunmasha, Yus akupeana nuí yamarman umartatjai” tímiayi.

Pítiur natsantratniua nuna Jesus ujakmiania nu

(Mateu 26.30-35; Rúkas 22.31-34; Juan 13.36-38)

²⁶Yus-kantan kantámawar, jíinkiar, Uriwiu náinnium wearmiayi.²⁷ Nuiñkia Jesus nin tiarmiayi “Ju kashi átum natsantrurtatrumē. “Murikiu wáinniun máattajaj, túram-tai murík tsakiñmakartatui” tu aarchamukait.²⁸ Tura ukunam Wi nantakin atumin Kariréanam émtuktiajrumē” tímiayi.

²⁹Tutai Pítiur chicharuk “Ámin ashí natsantramainiakui sha, wikia natsantrashtatjame” tímiayi.

³⁰Tutai Jesus tímiayi “Nekas tájame, ju kashi atash jimiará shiniatsajin, natsantrurtatme. “Núnaka nékatsjai” menaintiú turuttiatme” tímiayi.

³¹Tutai Pítiur kakaram chichaak “Ámijíaj métek máantuiniakuisha, núnaka penké tíchattajaj” tímiayi. Ashí ni unuiniamurí núnisan tiarmiayi.

Jesus Jitsemaní ajanam Yúsán áujsamiania nu

(Mateu 26.36-46; Rúkas 22.39-46)

³²Nuyá Jitsemaní ajanam wearmiayi. Jeawar Jesus ni unuiniamurín tímiayi “Juí pujus-tarum, Yúsán áujsatasa pujaí”.³³ Pítrun, Jakupuncha, Juáñnasha jukimiayi. Tura Jesuska ti kuntuts enentáimiar wake mesek nekapsatasa nanñkammiayi.³⁴ Tura nin chicharuk “Wi ti kuntuts enentáimjai, tura jakammia nekapeajai. Juí iimia pujutarum” tímiayi.

³⁵Jesussha ishichik arantach we, nuñká piniakumar tepes Yúsán aujmiayi. “Ju wáitsatin átatna nu, túrutatniuitkuñkia iniaitiusta” tu seamiyai.³⁶ Tuke áujuk tímiayi “Apawá, ashí tujinchaitme. Piniñnumiá ashí umartinia áantsañ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”³⁷ Tura ni unuiniamurín tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichiksha iimia pujustin tujinkiamēk? ³⁸Anearum Yus áujsatarum, tunaanum iniaarajj tusarum. Atumí wakaniin kakarmaitrumē, antsu atumí ayashíin kakarmachuitrumē” tímiayi.

³⁹Ataksha we, nuik Yúsán áujsama núnisan áujsamiayi.⁴⁰ Ataksha waketruki, ni unuiniamurín kanúu tepenan tarimiayi. Karí ti pujá asamtai, Jesusan áujsatniun tujinkiarimiayi.

⁴¹Jesus ataksha we, tarí tímiayi “Kanmarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai.⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(Mateu 26.47-56; Rúkas 22.47-53; Juan 18.2-11)

⁴³ Jesus nuna chicháa pujá unuiniamurí Jútas tarimiayi. Niijíají untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinniuri, tura Israer-shuara úuntri akupkarma asa káutkarmiayi. ⁴⁴ Káuntsajín Jútas chicharainiak, “Wi mukunattaj áujkin núiti Jesus. Achiirum, péñker emetarum jukitiarum” tímiayi. ⁴⁵ Tura Jesusan tarí, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nuí wajatusha puniari úkuitsan, patri uuntri takarniurín awati ni kuishín tsupirkarmiayi.

⁴⁸ Túram Jesus áentsun tímiayi “Kasakaitiaj. Puniyají numijíaj, kasá nútiksarmek achirkatai tusarum tarutniurme. ⁴⁹ Ashí tsawant atumjái Yusa Uunt Jéen wayan unuini-akun pujuchmakaj. Túmají nuí achirkachmarme. Tura Yus timia nu uminkiat tusa ju túrunayi.” ⁵⁰ Nuiníakia ni unuiniamurí Niniak ikuiniak pisararmiayi.

Natsa pisarmaniana nu

⁵¹ Tura áishman nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrin ajapa ikuak misú tsékenkimiayi.

Patri uuntriín Jesusan júkiarmaniana nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriín Jesusan ejeniarmiayi. Nuí Patri uuntriísha, Israer-shuara jintinniurísha, Israer-shuara uuntriísha irunturarmiayi. ⁵⁴ Tura Pítiur líkian nemarki Patri jéen aach jeá, Patri suntarijíaí jinia anamuk pujumiayi. ⁵⁵ Patri uuntri ashí naamka uunt armia nujái iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjái mantamnati, tiarmiayi. Túrashá wáinkiacharmiayi. ⁵⁶ Túrashá untsurí shuar Jesusan tsanumpruiniayatan yapajía yapajía chichainia ásarmatai wáinkiacharmiayi. ⁵⁷ Nuyá chíkich wajakar wáitruiniak juna tiarmiayi ⁵⁸ “Yusa Uunt Jéen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajíawar tiarmiayi.

⁶⁰ Nuísha Patri uuntri ajapén wakai Jesusan chicharuk “¿Áimsatin penké tujintiamek. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurínkaitiam. Ii Yusrí Uunt tajinia nuna Uchirínkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuuríni pujái wáitkiattarme. Tura nayaimpinmaya yuranminiam winiaí wáitkiattarme” tímiayi.

⁶³ Tutai Patri uuntri kajek, ni pushirín jaak tímiayi “¿Chíkich títincha warí atsumaji?” ⁶⁴ Nii tana nujái Yúsan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵ Chíkich chíkich Jesusan usukiáwarmiayi. Jiín epetkar awatiar “¿Ya áitkiarma? etserkata” tiarmiayi. Patri suntariísha yapiniam awatiarmiayi.

Pítiur Jesusan natsantramiana nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniájí Pítru nuníak, jeá aani pujan, nuwá Patri uuntri takarniuriya nu tarimiayi. ⁶⁷ Niisha Pítrun jinia anamu pujan wáinkiamiayi. Wáiniak, “Amesha Nasaretnumia Jesúsají wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitainiam jiinkimiayi. Tumai atash shiniukmiayi.

⁶⁹ Nu núwasha Pítrun ataksha wáiniak, shuáran nuí pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuí pujuarmia nu ataksha Pítrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmaníaká átum tárugna núnaka nékatsjai. Wáitrukuiníakia Yus firsati” tímiayi. ⁷² Nuyá ataksha atash shiniukmiayi. Pítrusha, Jesus

nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

15

Jesusan Piratú ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

¹Tura kashin káshik Patri uuntri, Israer-shuara úuntrijjái, Israer-shuara jintinniurijjái, ashí naamka armia nujái irunturar, chichaman jurusarmiayi. Túrawar Jesusan jiníamun apach kapitíán Piratujin ejeniarmiayi. ²Ejeniarmatai Piratu aniasmiayi “¿Amesha Israer-shuara Uuntriníaitiam?”

Tutai Jessusha “Ameke tame” tímiayi.

³Nuyá Patri uuntri ti tsanumprurarmiayi. ⁴Ataksha Piratu aniasmiayi “¿Áimsatin penké tujintiamék? Ti untsurí etserturmainiatsuk.” ⁵Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tíarmiania nu

(Mateu 27.15-31; Rúkas 23.13-25; Juan 18.38-19.16)

⁶⁻⁷Shuar ámiayi, ni naari Parapás. Niisha ni shuarjijái meset ámanum, shuaran maa asamtai sepunam eníeamuyayi. Tura námper tsawantái Piratu sepunmaya chikichik shuarnak jíiki akupniuyayi, aents seawarmia nuna. ⁸Nuisha untsurí shuar Piratun káutkar tíarmiayi “Ame jü námper tin tuke túramna nu túratá. ⁹⁻¹⁰Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuairam ¿atumí akupniurin jíiki akupkattajak? ¿Nu wakerarmék?” tímiayi.

¹¹Tutai Patri uuntri áentsun chichainiak ““Antsu Parapás jíikim akúpkatá” titiarum” tíarmiayi.

¹²Tutai Parapásan seawarmatai Piratu ataksha chicharainiak “Jesusnasha, átum ii akupniuri tarumna nuna, ¿itiurkattaja?” tímiayi.

¹³Ataksha ni kakantar tíarmiayi “Krusnum mantamnati.”

¹⁴Piratusha nin tíarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krusnum mantamnati.”

¹⁵Tuma asamtai, aents shiir enentáimprarti tusa, Piratu tunáa shuaran, Parapásan jíiki akupkamiayi. Tura Jesusnasha katsumkarum krusnum ajintruratum tusa suntaran tsankatkamiayi. ¹⁶Tiniu asamtai suntar Jesusan jukiar, kapitíáni jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi. ¹⁷Ashí káunkar, pushin kapaannium Jesusan áentsarmiayi. Tawasap janí najanamun etsenkrumtikiarmiayi. ¹⁸Nuisha Jesusan áusar “Shíraitme, Jesúsá, Israer-shuara akupniuriya” wishikiainiak tíarmiayi. ¹⁹Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. ²⁰Tura Jesusan wishikrar amukar, kapaantin pushin áitkiar, ni pushirin áentsarmiayi. Túrawar krúsnum ajintrurtai tusar jíikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹Semuñ Serini núnkanmaya shuáruyayi. Arijantruncha, Rupuncha aparíyayi. Semuñkan takatnumiá winian suntar emetawarmiayi, Jesusa krusrin yanaki jukiti tusar. ²²Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

²³Jeawarmatai, karía, mira kunkuinjái pachimprar áartaj tusa susarmiayi Jesusan. Túrusha umarchamiayi. ²⁴⁻²⁵Nantu yakí jatemsamtai krúsnum ayapar ajintrurar ik-iusarmiayi. Túrawar suntar yakí jukit tusar nakurutajjái nakurusar Jesusa pushirin yaruakarmiayi. ²⁶Urukamtai máamuit, ashí aents nuna nekaawarat tusa, ni krusrin ju armauyayi: *ISRAER SHUARA AKUPNIURI*

²⁷Nu náinnium jimiará kasa shuaran Nijjái máawarmiayi. Chikichik Jesusa untsuurinjí krúsnum, chikichik ni menarinjí krúsnum máawarmiayi. ²⁸Yus-Papinium arma ana nujái uminkiauyayi. Nui “tunáa shuarjai nekapmarmauyayi” tu áarmaiti.

²⁹ Shuar nan̄kaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt J̄een yumpun̄tiatjai, tura menaintiú tsawantaj̄ ataksha jeamkattajai” tíchakaitiam, tiarmiayi. ³⁰ Amek krúsnumiã akaikim uwemprata.” ³¹ Núnisañ Patri uuntrišha, Israer-shuara jintinniur̄išha Jesusan wishikrar chicharnaisarmiayi “Chikichan uwemtikraitiat, Niñki uwempratniun̄ tujintiawai. ³² Yusa anaikiamur̄i Krístuashit, ii akup-niur̄iniashit, tiarmiayi. Wats, yamáí krúsnumiã akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusj̄ai krúsnum̄ ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtai ti kiritin ajasmiai ashí nun̄kanam. Tura, nantu nun̄kaach ajasmatai ataksha tsapnirmiayi. ³⁴ Nuin̄ Jesus kakantar un̄sumuk tímiayi “Iruí, Iruí, rama sapaktani.” Nuka shuar chichamj̄ain̄kia, “Yusrú, Yusrú, ¿urukamtai ajapa ikiurkiniam?” tawai. ³⁵ Shuar nūj̄ pujuarmia nu, nu chichaman nékachu ásar, nuna antukar “Eriasan un̄tsúawai” tiarmiayi. ³⁶ Chikichik shuar churuinian uruchj̄ai ajamper, sapapj̄ai ijiú mukunati tusa susamiayi. Tura tímiayi “Wajastarum, Eriás Nin jukitij̄ tusa winishtimpiash. Iistai” tímiayi.

³⁷ Nuñkia Jesus kakaram un̄sumak jakamiayi. ³⁸ Túramtai Yusa Uunt J̄een ejamu niñki jaan̄akmiayi, yakíya nun̄ká. ³⁹ Suntara kapitíántrišha Jesusan ayamtus wajamia nu, Jesus kakaram un̄sumak jaamun̄ iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwaj̄ai Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupun̄cha Jusencha nukuriyayi. ⁴¹ Nu núwaka, Kariréa nun̄kanam Jesus wekaimia nu, Nin nemarsar yáñtait-sar wekasarmiayi. Un̄sur̄i chíkich nuwasha Jesusj̄ai Jerusaréñnum wear, nu nuwaj̄ai arant ii pujuarmiayi.

Jesusan iwiarsarmiania nu

(Mateu 27.57-61; Rúkas 23.50-56; Juan 19.38-42)

⁴² Kiatemantai, ayampratin tsawant jeats̄ain̄, námper iwiaratin tsawant asamtai, ⁴³ Arimiatianmaya Jusé arantutsuk, kakaram ajas, Piratúí jeá Jesusa ayash̄in̄ seatajtsa utuamiayi. Nu Jusencha ashí irunin ainia nu anturin ármiayi. Niisha Yus ju nun̄kanam akupin̄ ajasat tusa nákasmiayi. ⁴⁴ Tura Jesusa ayash̄in̄ seam, Piratusha “wárik̄ jaka” tímiayi. Tuma asa suntara kapitíántrin̄ un̄surak “¿Nekas jakayik?” tímiayi. ⁴⁵ Tutai kapitíán “Ee” takui, Jesusa ayash̄in̄ Jusen tsankatkamiayi. ⁴⁶ Jusesha puju tarachin̄ péñkeran sumarak, Jesusa ayash̄in̄ itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. ⁴⁷ Tura Máktaranmaya Marí, Jusé nukur̄i Marij̄jai ni ikiumun̄ ii wajarmiayi.

16

Jesús nantakmiania nu

(Mateu 28.1-10; Rúkas 24.1-12; Juan 20.1-10)

¹ Tura ayampratin tsawant nan̄kaamasmatai, Máktaranmaya Marisha, Jakupu nukur̄i Marisha, Sarumáisha, kun̄kuinian Jesusa ayash̄in̄ kuertai tusar sumakarmiayi. ² Tura kashin̄ Tumiñtin̄, ti káshik, nantu yáma jiiniiai, iwiarsamunam jeariarmiayi. ³ Wésar chichainiak “Iwiarsamu wáitir̄i kayancha ¿yaki akan̄ketramkattaj̄i?” tiarmiayi. ⁴ Jear uunt kaya akan̄kekman wáinkiar̄miayi. ⁵ Iwiarsamunam wayawar, natsan esaram puju pushin̄ entsar, un̄tsuurnumaan̄i pujan wáinkiar̄ ti ashamkarmiayi. ⁶ Túmainiakui natsa tímiayi “Ashamkairap. Nasaréñnumiã Jesus krúsnum̄ jakama nu éarme. Iniantkimiuiti. Jūj̄ pujatsui. Wátsek, jū ikiusmanum ístarum. ⁷ Túrarum werum Pítrusha, chíkich unuiniamur̄išha jū ujaktarum. Kariréanam atumin̄ émkiyi. Turammarumna núnisañ túruna wáinkiatarme” tímiayi. ⁸ Niisha ti ashamainiak purushniar̄ar iwiarsamunmaya tseke wearmiayi. Ti ashamainia ásar, chíkichkinkesha ujakcharmiayi.

Máktaranmaya Marin Jesús wantintiúkmiania nu

(Juan 20.11-18)

⁹Émkaka Tumiñtin ti káshik Jesus nantaki, Máktaranmaya Marin wantintiúkmiayi. Nu María enentáiya siati iwianchin Jesus yaunchu ajapruyayi. ¹⁰⁻¹¹Marisha Jesusa nemari kúntuts uutu matsatainian werí, “Jesus iwiaakui, imia wi wainkijai” tímiayi. Támaítat anturkacharmiayi.

Jesus jimiará shuaran wantintiukmiania nu
(Rúkas 24.13-35)

¹²Tura urum jimimara shuar Jerusarénnumiá tsaniñ weenan, Jesus nusháa iira ajas tarimiayi. ¹³Niisha Jesusan wáinkiar waketkiar, unuiniamurñ ujakarmiayi, tura ni chichamencha anturkacharmiayi.

Jesus ni unuiniamurñ akupkarmiania nu
(Mateu 28.16-20; Rúkas 24.36-49; Juan 20.19-23)

¹⁴Nuyasha Jesusa auntse unuiniamurñ misanam pekaamkar pujuinian Jesus tarimiayi. “¿Atumí enentáí urukamtaí kátsuram ainia, urukamtaí Winia nekas enentáimtur-sachuram?” tímiayi. Ni nantakmiarñ wáinkiaru chichamen anturkacharu ásarmataí kakantramiayi. ¹⁵Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum. ¹⁶Shuar anturak imiani uwemprartatui. Shuar antukcharka, tuke sumamawartatui. ¹⁷Shuar winia náarun pachis, Yúsan nekas enentáim-takka, juna túrawartatui, Yusa kakarmarñ iniakmastaj tusa: iwianchin jñiki akupkartatui; chfíkich chichamjaj chichasarukamtaí Winia nekas enentáimturtatui; ¹⁸napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péñker awajsartatui.” Tu tímiayi.

Jesus nayaimpiniam wakamiania nu
(Rúkas 24.50-53)

¹⁹Jesus chichas amukmataí, Yus nayaimpiniam jukimiayi. Túruna Yusa untsuuriní pujusmiayi. ²⁰Ni unuiniamurisha jfinkiar, ashí nunkanam Yus-Chichaman etserkarmiayi. Tura Uunt Yus nin yáimmiayi. Tura etserainiakui, ashí aents ni kakarmarñ nekaawarat tusa, aentsti tujintiamun túratniun susamiayi. Nuke atí.

Yúsan Shiir Chichamēn RÚKAS aarmia nu

¹ Nekas iiní Jesus túramia nuna “ímiatrusan̄ áartajai” untsurí aents tiarmiayi. ² Yámankamtaikniumiān̄ ísarmia nú shuar, tura Yus-Chichaman etserkatniun yáinkarmia nusha in unuitiamprarmia nútiksaran̄ áartinian wakeriarmiayi. ³ Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru. ⁴ Jintintramawarma nú nan̄kaamas nekaata tusan wakerakun áatjame.

Imiakratin Juan̄ka akiiniatniur̄in ujakmiania nu

⁵ Jutía nun̄kanam uunt akupin Erutis akupkama nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwēsha Irisapít Arun̄ weeauyayi. Irisapítia úntrisha Israer-shuar Yúsnan pujurin ámiayi. ⁶ Yúsjaisha Sakaríassha Irisapítcha mái-metek pen̄ker ámiayi. Yus akupkama nunasha umirin ámiayi. Tuma asamtai pen̄kēsha chíkich nin yajauch chicharkatin atsuarmiayi. ⁷ Yusjái pen̄ker wekainiyat Irisapít júrechuyayi. Túrasha mai úuntach ámiayi.

⁸⁻⁹ Israer-shuar Yúsnan pujurin chíkich weeanmayá nuyá chíkich weeanam, an̄kant an̄kant Yusa jeen takáu ámiayi. Chíkich tsawant, Sakarías weeá takastin amia nuí, Sakaríaska kuñkuinian ekeemaktaj tusa inít wayatniuyayi. ¹⁰ Inít kuñkuinian ekeemaj untsurí aents aani matsamsar Yúsan áujtak pujuarmiayi. ¹¹ Sakarías inít pujaí kuñkuin ekeematainiam untsuurnumaan̄i aya aneachma nayaimpinmayá suntar wajamiayi. ¹² Nuna wajan wáiniak Sakaríaska purushnairmiayi. ¹³ Túrasha nayaimpinmayá suntar chicharuk tímiayi “Sapijmiakaip Sakaríasa. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata. ¹⁴⁻¹⁵ Ame uchiram akiiniattana nuka Yusjaisha nan̄kaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áetak akiinchanak Yusa Wakan̄i pimiutkattawai, tímiayi. ¹⁶ Tura ni shuarin̄ Israer-shuar ániana nuna, ii Uuntri Yusjái ataksha nawamtikiartatui. ¹⁷ Uunt Yúsajya akatramu átatui. Yaunchu Yúsnan etserin Erías kakaram etserkamia núnisan̄ niisha etserkattawai. Nujái shuaran ni uchir̄jiaí nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentáí iwiamu arti tusa etserkattawai” tímiayi nayaimpinmayá suntar.

¹⁸ Nuna takui Sakarías nayaimpinmayá suntaran tímiayi “¿Nunasha warijiaín̄ paant nekaataj? Wisha nuar̄jai mái-metek ti úuntchichukaitiaj” tímiayi.

¹⁹ Tutai nayaimpinmayá suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wi tájamna nu “nekasaiti” tu enentáimprachume. Tura asam uchiram akiintsain̄ muut ajastatme. Chichastin pen̄ké tujinkiattame. Tura wi tajana nu, tsawant jeamtai túrunattawai.”

²¹ Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik inít we imiá men̄kaka?” tu enentáimprarmiayi. ²² Nuyá Sakarías jiinkimtai, áusartaj tukamá tujinkiarmiayi. Sakaríaska, muut ajasu asa, aya úwjmiasan̄ chichamiayi. Túmakui, Sakarías inít pujus Yúsai wáimiakun nekaawarmiayi.

²³ Yusa jeen takastin tsawantri amuukamtai Sakaríaska ni jeen waketkimiayi. ²⁴ Nuyá ukunam ni nuar̄i Irisapít ajaprukmiayi. Tura sen̄ku nantutin aya jeen pujusmiayi. ²⁵ Jeá pujus, “Aents wishikruiniakui natsantan jurutkitiaj tusa uchi takustinian Yus tsan̄katrukai” tu enentáimpramiayi Irisapít.

Jesusa akiiniatniur̄in nayaimpinmayá suntar etserkamiania nu

²⁶ Nu seṅku nantu naṅkaasmatai Yus ni suntariṅ Kapriiran Nasarét péprunam akupkamiayi. Nu pepru Kariréa nunṅanam pujawai. ²⁷ Nasarénumiṅ nuwaṅ, naari Marí, iyutí tusa akuptukmiayi. Nu núwaka áishmanjái pujuchuyayi. Niisha Jusejái nuatnaikiatsa anajmanair pujumiayi. Juseka uunt Tawit weeayayi. ²⁸ Wats, nayaimpinmayaṅ suntar Marí pujamunam wayá tímiayi “Yus péṅker enentáimturma asamtai, ámin winitjame, Mariya. Yuska ámin nemartamuk ashí nuwaṅ naṅkaamas péṅker awajtamui” tímiayi.

²⁹ Tura Marisha nayaimpinmayaṅ suntaran wániak, chichaamun nékatsuk “Urukamtaik tu chicháa” tu enentáimpramiayi. ³⁰ Nuyá nayaimpinmayaṅ suntar chicharuk tímiayi “Mariya, sapijmiakaip. Yus shiir enentáimturmawai. ³¹ Antukta. Amesha ajapruktatme. Túram Uchi takustatme. Nusha “Jesus” anaikiata. ³²⁻³³ Niisha uunt átatui. Nincha “Uunt Naṅkaamaku Yusa Uchiriṅ” tiartatui. Tura Uunt Yuska yaunchu Tawitian uunt akupniurí awajsamia núniṅame Uchirmin ame shuárumin Israer tutain Uunt akupin awajsettawai. Ni akupeamurísha Yus susamu asa peṅké amuukashtiniaiti” tímiayi.

³⁴ Nayaimpinmayaṅ suntar nuna tutai Marí tímiayi “Nusha winia áishur atsaisha, ḷitiurak túrunataj?”

³⁵ Tutai nayaimpinmayaṅ suntar Marín tímiayi “Yusa Wakaní tarutramtatui. Tura yuramnia núniṅame Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchiriṅti” tiartatui, tímiayi. ³⁶ Tura Irisapít ame kaná kaimia nusha núniṅame weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. ³⁷ Yúsjaínkia itiurchatka peṅké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmayaṅ suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nunṅanam ni kaná kaṅin Irisapítian iyutaj tusa wémiayi. Sakaríasaj jeá, ni jeen wayá, Irisapítian áusamiayi.

⁴¹ Marí áujeamun antukmatai Irisapítia ampújén uchiriṅ muchitkamiayi. Tumaṅ Yuska Wakaní ni enentáin pimiutkamiayi. ⁴² Nuiṅkia kakantar chichaak Marin tímiayi “Yus amincha ti shiir awajtsaiti. Tura Uchiram akiiniattana nusha Yus shiir awajsamuiti.

⁴³ Kajrua, ame winia Uuntru nukurí áminin, Yus winia ti waitnentra asa, áusata tusa ámin akuptamkachaik, tímiayi. ⁴⁴ Warí, wisha ame áujtamna nuna ántakui ampuruṅ uchi waras muchitrukayi. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai. ⁴⁷ Tura Uunt Yuska winia Uwemtikruru asamtai ti waraajai. ⁴⁸⁻⁴⁹ Wisha pééjchach aiṅ ni wakeramurin umiktajtsan wakerakui winia enentáimturayi. Tuma asamtai ashí aents, “Marincha Yus shiir awajtsaiti” tuke turutiartatui. Yuska imiá peṅker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajtsaiti” turutiartatui. Núnaka yamá naṅkamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itiurchatan páchitsuk túraitai Nii. “Naṅkaamantuitjai” tu enentáimtumainia nuna nupetkaiti. ⁵² Ashí akupin ainia nuna awakkaruiti. Tura íksaṅ pééjchach ainia nuna uunt awajsaruiti. ⁵³ Péṅker ana nuna kitiamainiakui Yus péṅkeran súsaruiti. Tura antsu “ashí takakjai” tuinia nuna aya júnik awajsaruiti. ⁵⁴ Israer-shuar Niiniu ájnia núnaka waitnentratniun kajinmattsuk yáinmákuítj. ⁵⁵ Yaunchu ii Uuntri Apraáman tura ní shuarnasha “túrattajai” timia nuna ímiatrusaṅ tuke túraitai.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketikimiayi.

Imiakratin Juangka akiiniamuri

⁵⁷ Nuyasha ni jurertin tsawantri jeamtai Irisapítcha uchin áishmanṅkan takusmiayi. ⁵⁸ Tura ni shuarisha, ni írutramurísha “Irisapítian Yus ti shiir yáinmiayi” tuṅniak, nin iyuwearmiayi. Tura máí-metek warasarmiyai.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiai. Wats, Irisapítia uchirí akiiniamuríniá uchu tsawant jeamtai tsupirkatai tusar ni jeen jearmiai. Nuiñkia ni aparí naarí Sakarías anaikiataitsar wakeriarmiai. ⁶⁰Tura ni nukurí tímiayi “Atsá. Antsu ni naarí Juan átatui.”

⁶¹Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶²Nuiñkia uchi aparín “¿Warí anaikiatajtsam wakeram?” tusar aya úwejejin iniasarmiayi.

⁶³Tutai uchi aparísha “Nakash surusta; áartaj tusan wakerajai” tusa aya úwejejin iniakmiamiayi. Takui nakash susam, ni naarí Juánkaiti, tu áarmiayi. Nuna wáinkiar “Ayawá urukakuñ ta” tu enentáimprarmiayi. ⁶⁴Nú chichamaik Sakarías chichatsuk pujamun chichakmiayi. Tura nuiñ Yusa náaríncha shiir awajsamiayi. ⁶⁵Nuiñkia ni írutramurísha ashamkarmiayi; tura ashí Jutía nuñka murá amia nuñ nu túrunamun ujakam ashí nekaawarmiayi. ⁶⁶Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷Uchi aparí Sakarías, Yusa Wakaní pimiutkam tura Yus jintintiam, juna tímiayi: ⁶⁸“Israer-shuartí ii Yusrí naarí shiir awajsatnuiitji. Ii Yúsrísha tarutmaittji. Tura uwemtikrampraitji. ⁶⁹Yaunchu ii uuntri Tawit Yusa wakeramuríjjai uunt akupin áchamkia. Tura ni ukurín ti kakaram Uwemtikiartinian suramsaitji. ⁷⁰⁻⁷²Yuska ii nemasriya tura in nakitramainiajnía nuyá uwemtikrampratniun enentáimsamia nuna, yaunchu ni etserniurín péñker armia nuna ujakmiayi. “Winia ti péñker chichamprun tájana nuna yapajitsuk umirkan tuke wáitnentratajrume” yaunchu ii úuntrín tímiania nunasha ni etserniurín ujakarmiayi. Yaunchu nu ujakma yamá iisha wainji. ⁷³⁻⁷⁵Nu ujakman Yuska yámankamtaik imiá yaunchu ii uuntri Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiayi Apráaman. Iisha ni shuari asakrin, nuna taku incha túramaji. ⁷⁶Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkim wétatme. ⁷⁷Ni shuari, ni tunaarí tsankurnar uwemprarat tusam túrattame. ⁷⁸⁻⁷⁹Yuska ashí shuaran anea asa, incha wáitnentrakam ni pujamunmaya ni tsápnintriñ suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsápnintri jeatⁱ tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

⁸⁰Uchisha tsakarmiayi. Tura Yúsan nekaki-nekaki wémiayi. Israer shuarum etserkatin tsawantri jeatsajñkia atsamunam pujuyayi.

2

Jesusa akiiniamurí (Mateu 1.18-25)

¹Wats, Juan akiiniamia nú uwitin uunt akupin Akustu ashí nuñkanam áentsun nekapmarartí tu chichakmiayi. ²Nu nekapmartinian yaunchu túrushtain yamá túriarmiayi. Siria nuñkanam Seriniu akupin pujái túrawarmiayi. ³Ni naarí áartaj tusa ashí shuar ni nuñkenin wétin ármiai. ⁴Tuma asamtai Jusé Nasaréé péprunmaya Kariréa nuñkanam amia nuyá jinki Pirin péprunam Jutía nuñkanam amia nuñ wémiayi. Juseka Tawit weeanam akiinia asa, ni nekas nuñkenka Pirínkauyayi. ⁵Nu asamtai, ni náarín áartaj tusa Jusé wémiayi Maríjjai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmaríjjai ajamtiniuyayi. ⁶Tura nuñ Pirinnum pujuiniaí Marí takustintri jeamiayi. ⁷Nuñ iwiairín uchin áishmankan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirinnum tjiich murikiun wáinin kashi murikrin wáiniuk pujuarmiayi. ⁹ Túmainiaj nayaimpinmaya suntar murikiun wáinin matsatainian wantintiukmiayi. Tura Yúsumia tsáapnin ni matsatainiamunam etsantramiayi. Túrunamtai murikiun wáiniuka ti ashamkarmiayi. ¹⁰ Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjiarme.” ¹¹ Júiti: yamá tsawantaj uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi. ¹² Tura jujaj nekaattarme: uchi penutajijaj penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” ¹³ Nu chichamaik nayaimpinmaya suntar ti untsurj, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjaj nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketiarmatai murikiun wáinin tiarmiayi “Wats, Pirinnum wárik wetá. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarumiayi. Tura uchinchá waaka yurumtainiam tepan wáinkiarumiayi. ¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi. ¹⁸ Tura murikiun wáinin tiarmia nuna antukaruka ti enentáimtusarmiayi. ¹⁹ Túrasha Marikia ashí túrunamia nuna ni enentáijiainkia enentáimtu pujumiayi. ²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksaj “Jesus” anaikiarmiayi. ²² Tura Muisais akiinatniunam akupkamia núnisan, tsawantri jeamtai, Yusa Uunt Jeen Jerusarénum uchin Yus iiktustai tusar júkiarmiayi. ²³ Kame Yus-Papinium ju aarma awai:

“Ashí uchi iwiajri áishman akiinkiuñka Yusna átatui.” ²⁴ Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénum pujana nu itiarumiayi. Tura yampitsan jímiaran súsarmiayi. Muisáís akupkamun umiiniak nuna túrawarmiayi.

²⁵ Nu túmaj Semeún naartin áishman Jerusarénum pujumiayi. Semeúnsha Yusa Wakaní pujurma asa penker áishmankauyayi. Yúsán nekas enentáimtinuiyayi. Yusa anaikiamurijijaj Israer-shuar ankant ajastin jeati tusa nákauyayi. ²⁶ “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi. ²⁷ Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantaj Muisáís tímia núnisan umirkatai tusar Marisha Juseshá uchin Jesusan Yusa Uunt Jeen itiarumiayi. ²⁸ Itiariarmatai Semeún uchin jusa miniakas Yúsán áujuk juna tímiayi:

²⁹ “Yamaikia, Uunta, Amiin wi jeatin ankant atí. Turutmiamna nu ímiatrusmek umikiume.

³⁰⁻³¹ Ju Uchi ashí aents uwentikrartá tusam susamna nuna yamá imia winia jirujaj wáinkiajai. ³² Israer-shuarchá ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinja nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

³³ Tura Semeún Uchinium tu chicharkui Juseshá Jesusa nukursha ti enentáimprarmiayi.

³⁴ Semeúnsha chichaak “Yus shiir enentáimturmasarti” nin tímiayi. Nuyasha Marin chicharuk tímia “Nekaata. Ju Uchin Israer-shuartisha untsurj nakitrar iniarartatji. Tura chikich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurj Aun yajauch chichariatatui.

³⁵ Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiai Semeún.

³⁶ Nuwasha Ana naartin nuí Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwá. Niisha ti úuntchiyayi. Niisha yama nuatnaikiamujai siati uwi ni áishrijiai tsaniñ pujusarmiayi. ³⁷ Tura wajemamiayi. Tura uchenta kuaru uwi takakuyayi. Tura ninkia Yusa Uunt Jeeniá jíintsuk káshisha tsawaishsha tuke Yúsan áujniuyayi. Tura yurumtsuk Yúsan áujniuyayi. ³⁸ Semeún tuasua amikmatai Anasha taa, Uchin wáiniak Yúsan yumínsamiayi. Tura Jerusaréñnum Yus uwentikrampratái tusa nákarmia nuna áujkunka uchin áujmat wémiayi.

Nasarénum waketiarmiania nu

³⁹ Nuyá Yus tímia nuna ashí túrawar amikiar Kariréa nuñkanam, kame nii pujumia nú peprunam Nasarénum Jusesha Marisha Uchisha waketiarmiayi. ⁴⁰ Uchi Jesus tsakaki, kakaram ajaki tura nú nañkaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusaréñnum weu áarmiayi. ⁴² Ni túrutairi túruiniak, Jerusaréñnum weak Jesusan tuse uwi jeamtai júkiarmiayi. ⁴³ Námper amuukamtai ni nukurísha Jusesha nékachmanum Jesuska Jerusaréñnum juákmiayi. ⁴⁴ Marisha Jusesha “wí shuarjai winiawai” tusa, núnaka eatsuk chikichik tsawant wekasarmiayi. Nuyá wáinkiataj tukamá, ni shuariñ tura ni nékamunam eakarsha, ⁴⁵ wáinkiacharmiayi. Nuiñkia Jerusaréñnum ataksha waketrukiarmiayi, eaktai tusar. ⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak aninrú pujan wáinkiarimiayi. ⁴⁷ Tura nuí ashí Jesusan anturkarmiania nu, niisha ti nékaku tura áimtanash ti péñker áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurj chichaak tímiayi “Uchiru, ¿ausha urukamtai itiurchat enentáimtikurram? Ame apasha wisha urukayik tusar ti eakjame” tímiayi.

⁴⁹ Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

⁵⁰ Tura tímia núnaka penké nekaacharmiayi. ⁵¹ Nuyá Jesus niijiai Nasarénum waketikimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yusha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwi jeamtai, Jutía nuñkanam Punseu Piratu akupin pujumiayi. Tura Kariréa nuñkanam Erutis akupin pujumiayi. Itiurea nuñkanmasha Trakuniti nuñkanmasha ni yachi Jiripi akupin pujumiayi. Tura Apirinia nuñkanam Risania akupin pujumiayi. ² Tura nu uwitin Anassa Kaipíssa Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. ³ Nuyá Jurtan entsanam supichik matsamarna nuna Juan wekaatusar juna tímiayi “Winia tunaarun Yus tsankurturat tusarum, enenta yapajíarum imiantiarum.” Tu ujakmiayi. ⁴ Nu ujakman Isayas yaunchu juna áarmiayi:

Atsamunam wekaana nu untsumun ántuiniawai. Nii untsumuk juna tawai: Atumí enentáí Uunta jintí iwiarturatum; naka awajsatarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. ⁶ Túrunamtai ashí nuñkanmaya aents Yúsaiya uwempratín aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áa-niutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. ⁸ “Iikia Apraám weeatiji, tuma asakrin Yus shiir enentáimturmaji” tu enentáimtumasaírap. Antsu enentáim yapajíamuitkiuinñkia péñker wekaamurmijiai paant

iniakmatarum. Warí, Yus wakerakka, ju kayan Apráama shuarin páchitsuk najankainti, tímiayi. ⁹ Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kufrin juu shuar armia nú shuar imiantiaj tusar Juánkan weriar aniasarmiayi. “Uunta, ¿iisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniankasrum achikiairap.”

¹⁴ Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijiai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juan Yusa anaikiamurinchuashit” tu enentáimsar paant nekaataitsar nákararmiayi.

¹⁶ Tumaj Juan tímiayi “Wikia aya ayashmin entsanam imiajrume. Tura wijiai nankaamas ana nu tátatui. Ni sapatrj jinkiamurinkisha atitrachminiaitjai. Niisha taa, imiantinia áanis tura jiya áanis Yusa Wakanin enketramprattarme. ¹⁷ Shuar aruasan awajtia núnisan, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi. ¹⁹ Tura nuyasha akupin Erutisan chicharkamiayi. Ni yachj Jiripi nuarin Jirutifasan kasararak nuatkui tura chikich yajauchincha túrakui chicharkamiayi. ²⁰ Tura Erutis núnaka ántutsuk chikich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juañsha ashí nú nunkanmaya áentsun imiak pujurainai Jessusha imianmiayi. Niisha Yúsan áujuk pujai nayaimpisha uranmiayi. ²² Tura Yusa Wakanj yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Amin ti wararjame” tímiayi.

Jesukrístu shuari

(Mateu 1.1-17)

²³ Jesus trainta (30) uwí takaku asa ni takatrj nankamamiayi. “Jusé uchirinti” tiniu armiai. Jusésa Iria uchiriyayi. ²⁴ Irisha Matata uchiriyayi; Matat Riwi uchiriyayi; Riwi Mirkia uchiriyayi; Mirki Jana uchiriyayi. Jana Jusé uchiriyayi; ²⁵ Jusé Matatfasa uchiriyayi; Matatías Amusa uchiriyayi; Amus Najuma uchiriyayi; Najum Esri uchiriyayi; Esri Nakaia uchiriyayi; ²⁶ Nakai Maata uchiriyayi; Maat Matatfasa uchiriyayi; Matatías Semái uchiriyayi; Semái Jusé uchiriyayi; Jusé Jutáa uchiriyayi; ²⁷ Jutá Juana uchiriyayi; Juana Resa uchiriyayi; Resa Surupapira uchiriyayi; Surupapir Saratiira uchiriyayi; Saratiir Nerí uchiriyayi; ²⁸ Neri Mirkí uchiriyayi; Mirki Atí uchiriyayi; Atí Kusama uchiriyayi; Kusam Irmutama uchiriyayi; Irmutam Ira uchiriyayi; ²⁹ Ir Jusué uchiriyayi; Jusué Iriesera uchiriyayi; Irieser Jurema uchiriyayi; Jurem Matata uchiriyayi; ³⁰ Matat Riwi uchiriyayi; Riwi Semeúnka uchiriyayi; Semeún Jutáa uchiriyayi; Jutá Jusé uchiriyayi; Jusé Junañka uchiriyayi; Junañ Iriakimia uchiriyayi; ³¹ Iriakím Mirea uchiriyayi; Mirea Mainiánka uchiriyayi; Mainián Matata uchiriyayi; Matata Natanka uchiriyayi; ³² Natan Tawitia uchiriyayi; Tawit Isai uchiriyayi; Isai Upitia uchiriyayi; Upit Puusa uchiriyayi; Puus Saramúnka uchiriyayi; Saramún Naasunka uchiriyayi; ³³ Naasun Aminiatapa uchiriyayi; Aminiatap Arama uchiriyayi; Aram Esruma uchiriyayi; Esrum Paresa uchiriyayi; Páres Jutáa uchiriyayi; ³⁴ Jutá Jakupa uchiriyayi; Jakup Isaka uchiriyayi; Isak Apráama uchiriyayi; Apráam Tarea uchiriyayi; Taré Nakura uchiriyayi; ³⁵ Nakur Seruka uchiriyayi; Seruk Rakaua uchiriyayi; Rakau Pirikia uchiriyayi; Pirik Epera uchiriyayi; Eper Sará uchiriyayi; ³⁶ Sara Kainiánka uchiriyayi; Kainián Arpaksata uchiriyayi; Arpaksat Sema uchiriyayi; Sem Nuaia uchiriyayi; Nuai Ramikia uchiriyayi; ³⁷ Ramik Matusarínkia uchiriyayi; Matusarín

Enuka uchiríyayi; Enuk Jaritia uchiríyayi; Jarit Maararíira uchiríyayi; Maararíir Kainianka uchiríyayi; ³⁸Kainian Enusa uchiríyayi; Enus Seta uchiríyayi; Set Atanka uchiríyayi; tura Atan Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹Jesusa enentáin Yusa Wakaní pimiutkamiayi. Jesussha Jurtan entsanmaya waketkimtai Yusa Wakaní aents atsamunam jukimiayi. ²Tura nuísha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi. ³Nuínkia íwianch chicharuk “Amesha nekas Yusa Uchiríntkiiumka ju kaya apatuk najanata” tímiayi.

⁴Tutai Jesus tímiayi “Yus-Papí tawai:

“Aya apatkujain shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

⁵Tura nuyá íwianch naint yakí wájakmanum jukí, ashí nunka ainia nuna ju chichamaik iniaktusmiayi. ⁶⁻⁷Tura chicharuk tímiayi “Ashí ju nunka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nunkanam ashí akupkatniun susattajme. Tura nuí ni wariri ainia nusha áminiu átatui” tímiayi.

⁸Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáimtustiniaitme.”

Tau asamtai, werumta, iwianchi” tímiayi.

⁹Ataksha íwianch Jesusan Jerusaréñ péprunam jukimiayi. Tura Yusa Uunt Jee yakiini iwiak tímiayi: ¹⁰“Yus-Papí tatsuk:

“Yuska ni suntarin wáinkiatá tusa akupturmaktatui. ¹¹Kayanam ajintrañ tusa wenkur-maktatui.”

Tuma asamtai nekas Yusa Uchiríntkiiumka juyá akaikim iniaata” tímiayi. ¹²Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

¹³Tuma asamtai íwianch penké tujintiak ishichik tsawant Jesusan iniaisamiayi.

Kariréa nunkanam Jesus ni takatrín nankamamiania nu

(Mateu 4.12-17; Márkus 1.14-15)

¹⁴Jesus ni enentáin Yusa Wakaní kakarmari pimiutkamu ajas Kariréa nunkanam waketkimiai. Nu nunkanam nankaamantu túramurín áujmاتيarmiayi. ¹⁵Nu nunkanam ashí péprunam Israer-shuar iruntai jea armia nuí unuiniarmiayi. Tura anturkarmia nuka ni náarín shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶Ni tsakarmariñ Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áusataj tusa wajakmiayi.

¹⁷Nuínkia Yúsnan etserin Isayasa áarmarín súsarimiayi. Nuna urak, nuí juna áarman wáinkiamiayi:

¹⁸Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péñker awajsatniuncha, ¹⁹tura Uunt Yus, shuáran yaiñtin tsawantri jeán etserkatniuncha akuptukuiti.

²⁰Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹Jesussha chicharuk tímiayi “Yus-Chicham yamáí antukurmena nu yamáí tsawantin túrunayi.”

²² Jesusan ashí péñker áujmatiarmaiya. Tura Jesus ti shiir chichaakui ti enentáimprar “Juka Jusé uchrínchukait” tiarmiayi. ²³ Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juísha túrata tusarum nu turuttiatrume. ²⁴ Túrasha nekas tájarne, Yúsnan etsermin ni nunñenkikia nii tana nuna anturainiatsui. ²⁵ Nuyasha tájarne, Irías pujumia nú tsawantin, menaintiú uwí nanñkaamas yumi yutukcha asamtai ashí Israer núnkanam ti tsuka amia nuí ti untsurí waje irunmaiya. ²⁶ Tuma aiñ nu wajen yañti tusa Yus Iríasan akuptukchamiayi. Antsu chíkich nunñkanmaya wajen Sarepta péprunam pujumia nuna yañti tusa akuptukmaiya. Sarepta pepru Sitiún péprunam tíjiuch pujawai. ²⁷ Núnisan ii nunñeksha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nunñka, Sírianmaya Naamanñkan tsuármiaiya” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerarmiayi. ²⁹ Tura wajatkjar Jesusan jiki péprunmaya akuparmiayi. Tura pepru amia nuí naint yakí nanñkatkamunam, nuyá akaki ajuatai tusar júkiarmiayi. ³⁰ Túrasha Jesuska irunar matsataniamunman etempraktak jiinki wémiayi.

*Iwianchrkun Jesus tsuármiania nu
(Márkus 1.21-28)*

³¹ Nuyá Jesus Kariréa nunñkanam Kapernáum pepru amia nuí wémiayi. Tura Israer-shuara ayampratin tsawantrijn tuke etserki wémiayi. ³² Yusa kakarmarín takaku asa nujai etserkamiayi. Tuma asamtai “Yusa kakarmarijiai unuitiamtsujik” tiar ti enentáimprarmiayi.

³³ Chíkich tsawantai áishman iwianchrku Israer-shuar iruntai jeenam pujumia nu untsumuk tímiayi, ³⁴ “Inikiartusta. Iikia Áminkia pachistin nakitiaji. ¿Warí, incha amurkatkataj tusam táchamek? Wikia nékajme. Ámeka ti penker Tunaaríncha naitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik íwianch áishmannumia jiinki weak nunñka ajuant ikiukmaiya. Túrasha nekas yajauch awajtsuk ikiukmaiya.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmarijiai iwianchin jiki awematsuk” tiarmiayi.

³⁷ Tura ashí nú nunñkanam Jesusa túramurín áujmatiarmaiya.

*Semun Pitru tsatsarín Jesus tsuármiania nu
(Mateu 8.14-15; Márkus 1.29-31)*

³⁸ Jesussha Israer-shuara iruntai jeenia jiinki Semunka jeen wémiayi. Semunka tsatsari tsuer ti jáamiayi. Ti jaakui Jesusan “tsuárturtá” tiarmiayi. ³⁹ Jesussha jaa tepan tsunsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

*Untsuríjaan Jesus tsuármiania nu
(Mateu 8.16-17; Márkus 1.32-34)*

⁴⁰ Etsa akaikin ai ni shuari nanñkamas sunkurjai jaarmia nuna Jesusan ikiaatkarmiayi. Jesussha jáinian chikichiniak chikichiniak uwejejai antinjar tsuármiaiya. ⁴¹ Ti untsurí iwianchrku armia nunasha iwianchrín jirkiarmiayi. Jiinkiar íwianchka unsumainiak “Ámeka Yusa Uchrínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmantikiarmiayi.

*Kariréa nunñkanam Jesus etserkamiania nu
(Márkus 1.35-39)*

⁴² Kashin káshik tsawaak Jesus péprunmaya jiinki atsamunam Niñki wémiayi. Tura shuarsha eakiar ni pujamunam jeariarmiayi. Tura iijiai tuke pujusat tusar emetataitsar wakeriarmiayi. ⁴³ Túmaiñ Jesus tímiayi “Yus ii enentáin akupkatajtsa wakera nú shiir

chichaman chíkich péprunam matsatainia nunasha ujaktiniaitjai. Nu túrata tusa akup-kamuitjai” tímiayi. ⁴⁴Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

5

Namakan ti untsurín achikiarmiania nu
(Mateu 4.18-22; Márkus 1.16-20)

¹Chíkich tsawantaj Jesus Jinisarít antumianka tutainium káanmatkarj pujaj ti untsurí shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kaē ajattsarmiayi. ²Tura jimiará kanun antumiankan káanmatkarjin tepan wáinkarmiayi. Ni nérenniurinkia jínkiar ni nekarin nijjá pujuinia asamtai kánuka ankant ármiayi. ³Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktá” tímiayi. Nuiñkia kanunam enkemas áentsun káanmatkanam pujuinian unuiniamiayi. ⁴Unuiniasua amik Semunkan chicharuk “Kanu kunanam jukim neka aj ajunkatarum” tímiayi.

⁵Tutai Semun tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

⁶Tura ajunkar namakan ti untsurín achikiarmiai. Túram nekasha jaanaki wémiayi. ⁷Tuma asamtai ni írutkamurín chíkich kanunam pujuinian uwejéjaj “winitia, yáintki-amniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha inít wayastatuk ajamiayi. ⁸Nuna túramtai Semun Pítiur Jesusan tikishmatar tímiayi “Uuntá, wikia ti tunaitjai. ¿Wíjjajsha itiurak pujustam?” ⁹Semunsha ni írutkamurijjaj namakan timiá untsurín wáinkiar ashamkarmiayi. Tuma asa Semunsha nuní tímiayi. ¹⁰Tura Sepetéu uchirí Jakupusha Juansha Semunjaj pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-ēau ajastatme.” ¹¹Nuyasha kanurín kukar júkiar, ashí takakmarincha ikiukiar Jesusan nemarki wearmiayi.

Tunamaru áishmankan Jesus tsuármiania nu
(Mateu 8.1-4; Márkus 1.40-45)

¹²Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

¹³Nuna tutai Jesus antiñ tímiayi “Wakerajaj. Tsuaajme.” Tura nú chichamaik tunamarusha péñker ajasmiai. ¹⁴Túrasha Jesus chicharuk “Ámeku nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkama núnismek susata. Nujaj ashí shuar ame péñker ajasmarmín nekaawartatui” tímiayi.

¹⁵Tura Jesusa túramurj ti etsernamiayi. Túmakui untsurj aents anturkataj tusar káutkarmiayi. Tura ni sunkurincha tsuámartaj tusar káutiarmiayi. ¹⁶Núnisan Jesuska aents atsuiniamunam we ni Aparin áujmiayi.

Emearun Jesus tsuármiania nu
(Mateu 9.1-8; Márkus 2.1-12)

¹⁷Chíkich tsawantaj Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénumiasha káunkarmia nu antúu pujuarmiayi. Jaa tsuártinian Yusa kakarmarín takakuyayi Jesus. ¹⁸Nuiñkia emearun tampumprua kuaru shuar itiararmiayi. Jesus pujamunam inít awayattsar wakeriarmiayi. ¹⁹Tura shuar ti untsurj piaku asamtai wayamnia atsumiai. Túmaitkui yakiniñ wear jean urakar, aents kaē ajas matsatmanum Jesus pujamunam emearun tampunam nená itiararmiayi. ²⁰Nin itiarmanian nu, Jesus Yusa kakarmarín takakui, tú enentámtamun Jesus nekáa emearun tímiayi “Ame tunaarum tsankuramuitme.”

²¹Nuiñkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsankurachminkiait” tu enentáimsarmiayi.

²²Tura Jesus ni enentáimsamurin nekáa tímiayi “¿Urukamtai tú enentáimprarum átum? ²³Nuinkia ¿warí imiá yúpichuchit, tsuártiniak, ni tunaari tsankuratniuk? ²⁴Wats, Aents Ajasu tutai Wisha tunaan tsankuratniun Yusa kakarmarin takakjai. Jujai nekaatarum tusan wats itiurchat tárumna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemiin wetá.”

²⁵Nú chichamaik emearu niisha fimiainiamunman tampurin achik wajaki ni jeen Yúsan wararki wémiayi. ²⁶Túmakui ashí shuar ti enentáimprar Yusa náarin shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

*Riwin Jesus untsukmiania nu
(Mateu 9.9-13; Márkus 2.13-17)*

²⁷Ukunam Jesus wekas akupniu kuítrin-juu, naari Riwi, ni chíkich naari Mateu, akupin akitiai jeenam pujan wáinkiamiayi. Wáiniak “nemartusta” tímiayi. ²⁸Tutai Riwi wajaki takakmarinkia ikuak Jesusan nemarsamiayi.

²⁹Nuyá ukunam Riwi namperan Jesusan najatamiayi. Tura untsurí akupniu kuítrin-juu tura chíkich shuarsha káunkar misanam pujuarmiayi. ³⁰Tura Pariséusha Israer-shuara jintinniurisha Jesusan tsanumpruiniak Jesusa unuiniamurin tiarmiayi “¿Maaj, urukamtai atumsha akupniu kuítrin-juu ainia nújajisha tura chíkich yajauch shuarjajisha iruntrarum yurumprum?”

³¹Tutai Jesus áimkiamiayi “Shuar jaachu péñker ainiana nu ¿tsuákratniun atsumaini-awak? Antsu jaa ainia nu tsuákratniun atsumainiawai. ³²“Wikia péñkeraitjai” tuinia nuna untsukajtisan táchaitjai. Antsu yajauch shuar ni enentáin yapajjá Winia ajasat tusan untsujai” tímiayi.

*Yurumtsuk Yus áujatniun Jesusan aniasarmiania nu
(Mateu 9.14-17; Márkus 2.18-22)*

³³Nuyá Jesusan aníak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiayi.

³⁴Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamáinuatu pujai? ³⁵Atsá. Wats Wisha ukunam junaktiatjai; nuinkia ijiarmatin átatui” tímiayi.

³⁶Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijiai mai metek yamaram wáinkiachminiaiti. ³⁷Núnisan nijiamanch yamá nawamu nuap najanam arutnum yaraachminiaiti. Túramka nijiamanch karíak ijiakratniuiti; túmak nijiamchisha nuap najanamusha mai metek menkainiawai.

³⁸Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniait. ³⁹Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatui” tímiayi Jesus.

6

*Ayampratin tsawantai trikiu neren achikiarmiania nu
(Mateu 12.1-8; Márkus 2.23-28)*

¹Ayampratin tsawantai Jesussha unuiniamurijiai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi. ²Nuna túruiniakui Pariséu tiarmiayi “Maaj, atumsha ayampratin tsawantai takaschatniua nu, ¿urukamtai takaarum?”

³Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴Tawit Yusa jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yuátin ámiayi. Tuma ain Tawitcha yajauchin túrutsuk achikmiayi, tímiayi. ⁵Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu

(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeanam Jesus wayá unuiniartasa nan kamamiayi. Nuí shuar uweje untsuurja nu jakaa pujumiayi. ⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruniak, “ju ayampratin tsawantaj nu shuaran tsuártimpiash” tusar ii pujuarumiayi. ⁸ Túrashá Jesúska ni enentáimmiarín nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiai. ⁹ Nuínkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujajá ¿tuá péñkerait? ¿Uwemtikratin, máatniujajásha tuá péñkerait?” tímiayi. ¹⁰ Nuyá téntakarmia nuna iis áishman kan tímiayi “Uwejem takuítia.” Áishman sha uwejen takuimtai nú chichamaik péñker ajasmiai. ¹¹ Tura chíkichkia ti kakerkarmiayi. Túrawar “Jesus warí itiurkamniakit” tusar aniniaismiai.

Tuse unuiniamun Jesus anaikiamiania nu

(Mateu 10.1-4; Márkus 3.13-19)

¹² Nuyá Jesus Yúsan áúsataj tusa náinnium wakamiayi. Tura nu kashi Yúsan auajkuwa tsawarmiayi. ¹³ Tsawarmatai unuiniamurín ikiankar tuse anaikiamiai. “Winia akatramuruitrume” tímiayi. ¹⁴ Ju ármiai: Emka, Semuñ chíkich naari Pítiur apujtusmia nu; tura nuyá ni yachí Antres, Jakupusha, Juan sha, Jiripisha, Parturumísha, ¹⁵ Mateusha, Tumassha, Arpeu uchirí Jakupusha, Ásump Semuñ sha, ¹⁶ Jakupu yachí Jútassha, tura Jútas Iskariúti Jesusan ukunam surukmia nu. Nu tuse achikma ármiai.

Untsurí shuaran Jesus yáñkarmiania nu

(Mateu 4.23-25)

¹⁷ Niijjai Jesus náinniumia pakanam taawarmiayi. Nuí pujusarmiayi. Nuísha untsurí unuiniamurísha, tura Jutía nun kanmaya, tura Jerusaréñnumia tura nayaantsanam ayamach Tíru, tura Setun péprunmaya ti untsurí aents antuktaitsar pujuarumiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tujinkiachu asantai ashi shuar antintaj tusar wakeriarmiayi.

Náinnium Jesus etserkamu

(Mateu 5.1-12)

²⁰ Ni unuiniamurín Jesus iis juna tímiayi: ““Yusan atsumajai” tárumna nu, Yus akupeanunam páchitkaiatrume; tuma asantai warasminiaitrume.’

²¹ ‘Yamáí tsukamarmena nu ukunam ejemartatrume. Tuma asantai warasminiaitrume. Yamái úutrumna nu, ukunmanka wishirtatrume. Tuma asantai warasminiaitrume.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkrarmataisha warasminiaitrume.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsnan etserniun nútiksaran yajauch awajsacharmakia.’

²⁴ ‘Tura kuítrinniutiram atumsha atumí waratairí aya yamaik waintrume. Ukunmanka waraschattarme.’

²⁵ ‘Atsumatsjai, tu enentáimprumna nu, ukunmanka atsumattarme. Nuínkia waraschattarme. Yamái wishíarmena nu, ukunmanka wátiakrum úuttiatrume. Nuínkia waraschattarme.’

²⁶ ‘Ashí aents atumin shiir awajtamkurmin aneartarum. Nujaj waraschatniutrume. Warí nuna uuntri ántar-yusnan etserín armia nuna nútiksaran yaunchu shiir awajsarmiayi.’

Ii nemasri aneatniun Jesus unuiniamiayi

(Mateu 5.38-48; 7.12)

²⁷ ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata; ²⁸ yajauch chichartamainia nusha shiir enentáimtusarta; katsekramainia nusha Yus áujtusarta. ²⁹ Ame yapimin ijiutmamtai áatui yapirujásha ijiuti

tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. ³⁰ Seatmana nu susata, tura áminiuñ jurutramainiakuisha ataksha awaṅturkitia tiip. ³¹ Chíkich winia túrutati tusam wakeramna nútiksamek chikichcha túrata.'

³² 'Iista, aya atumin anenmainia nuke aneakmesha, ḡnusha warí péñkera túrarum? Yajauch shuarsha nuna túrin ániawai. ³³ Tura atumniasha péñker awajtamainia nuke péñker awajkurmesha ḡnusha warí péñkera túrarum? Yajauch shuarsha nuna túrin ániawai. ³⁴ Awaṅturkimmniaiti tu enentáimtarum nuke íkiakrumsha ḡnusha warí péñkera túrarum? Yajauch shuar nuamtak yajauch shuarjaí awaṅturkimmniaiti tu enentáimsar ikianainiawai. ³⁵ Tura atumsha nemasrum aneatniuitrume, tura péñker túratniuitrume, tura awaṅturkittiawai tu enentáimtsuk ikiastiniuitrume. Túrakrumniñkia Uunt Yus péñker akirmaktatrume; tura ni uchríntjai tu iniakmastatrume. Yuska, "yumiñsajme" ticha nunasha tura yajauch shuarnasha shiir awajeawai. ³⁶ Ii Aparí waitnentrarniua nútiksarmek atumsha waitnentratarum.'

Chíkicha túramurí ti enentáimtusairap

(Mateu 7.1-5)

³⁷ Chíkicha túramurí ti enentáimtusairap. Núnisan Yuska atumí tunaarín iirtamsash-tatui. Chíkicha tunaarín "nuke asutniatniuiti" tiirap. Núnisan Yus atumin sumamtikra-mashtatrume. Tsañkurnairatarum. Núnisan Yus tsañkurtamprattawai. ³⁸ Chíkichcha susata. Núnisan Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksar atumniasha túrutmattarme."

³⁹ Tura nuyasha juna métek-taku chichaman ujakarmiayi: "Jíi kusurusha ḡitiurak chíkich kusuruncha jukimniaiti. Mai metek wañanam iniaashtatuak? ⁴⁰ Unuiniamua nu unuiniana nuna nañkaamas áchatniuiti. Túrasha niisha ti unuimiatar unuiniana nujaj métek nekaamniaiti.'

⁴¹ 'ḡItiurtsuk atumi jíin numi enketna auk ítskesha atumí yachí jíin tsuat enketusha iiyarum? ⁴² Ame jíimjín numi tuke enketaisha ḡitiurtsuk ame yatsumi jíiyá tsuátan jurustajme tame? ¡Ántrairume! Emka ame jíimjín numi enketna nu jusata. Nuiñkia paant wáinkiatame yatsumi jíin tsuat enketna nu jurustin.'

Nerejai numi nekaatainti

(Mateu 7.17-20; 12.34-35)

⁴³ Péñker numi yajauchín nereatsui; tura yajauch numi péñkeran nereatsui. ⁴⁴ Numisha ni neren nékanui. Tsachikniumiasha kushinñkiap júukchamniaiti. Tura naranmaya shuinia júukchamniaiti. ⁴⁵ Núnisan péñker shuar ni enentáí péñker asamtai péñkeran chichaawai; tura yajauch shuar, enentáí yajauch asamtai yajauchín chichaawai. Páantchakait. Enentáin pimiutkamu ana nuyaj ni wenejai chichaawai.'

Jimiará jeḡ ukurtin

(Mateu 7.24-27)

⁴⁶ 'Wi tájana nu túrachiatrumsha ḡurukamtai Winia, Uunta, túrutrum? ⁴⁷ Shuar winia chichamprun ántuinia nu jeḡ jeammajaj méteketete. Winia anturtuk umiana nu jujaj méteketete: ⁴⁸ Shuar jeḡn jeamuk emka init taur kayanam ukurmai. Tura yumi ti yutuk, entsa nujanñkua tukummaitiat pukukachmai kayanam ukuamu asa. ⁴⁹ Antsu Winia anturtukiat umiatsna nuka jujaj méteketete: Shuar jeḡn jeamuk aya naikminiam jeammai. Tura entsa nujanñkua tukumpram nu jeḡka pukukamai. Tura mash sántramai." Tu unuiniamiayi Jesus.

7

Suntara yáintrin Jesús tsuármiania nu

(Mateu 8.5-13)

¹ Jesús áentsun unuinasua amik Kapernáum péprunam wémiayi. ² Nuí Rúmanmaya suntara kapitántri pujumiayi. Nu kapitání takarniuri, ti aneamurí, jakamnia jaamiayi.

³ Tura Jesusan pachis áujmatainian antuk, ame shuarum Jesusan itiertiti tura winia

takarniun tsuárturti tusa Israer-shuara úuntrin akupkumiayi. ⁴Niisha Jesusan weriar, umirtukat tusa ti seainiak tiarmiayi “Ju kapitíán nekas yáintin péñkeraiti. ⁵Niisha yajaya apachitiat in shiir enentáimturmajai. Tura iruntai jean jeamtinniasha niñki chicharkaiti, tura yayawai.”

⁶Nuyá Jesus niijjai wémiayi. Tura ni jeen jeastatuk jatemsantai kapitíáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nankaamaku asam winia jearuí wayachminiatme. ⁷Tuma asakmin imia wiki Amiin jeatniun arantukjame. Ayatik “pénker ajasti” tákumin winia takarniusha péñker ajatrustatui. ⁸Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitíá” tutai winiawai. Tura winia takartinian “ju túratá” tutai umíawai.” Tu tmiayi.

⁹Jesus nuna antuk ti enentáimias ni nemarainian tmiayi “Nekas tájarne Israer-shuar Yúsán tmiatrus enentáimtinian wáinchaitjai.”

¹⁰Tura kapitianí akatramurí jeá waketkiar, takarniurí péñker ajasun wáinkiarumiayi.

Wajé uchirín Jesus iniantkimiania nu

¹¹Nuyá ukunam chikich pepru Naín tutainium ni unuiniamurijjai tura chikich untsurí aentsjai Jesus wémiayi. ¹²Tura pérunam nuntumas jakaan iwíarsatai tusar juñian wáinkiarumiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmaya nin nemarsarmiayi. ¹³Jesus nu wajen wáiniak tura waitnentar “úutip” tmiayi.

¹⁴Nuñkia Jesus jakaa enkerman tarunt antiñmiayi; nuna juñiasha wajasarmiayi. Nuñkia Jesus jakaan chicharuk “Umpa nantaktia, tájame” tmiayi.

¹⁵Tutai niisha nantaki pujus chichaumiayi. Tura Jesus ni nukurín “Jujú uchiram” tmiayi.

¹⁶Tura matsamiarmia nu, nuna wáinkiar ashamkarmiayi. Tura Yusa náarin shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

¹⁷Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrin akatar Jesusan akuptukarmiania nu

(Mateu 11.2-19)

¹⁸Juan ni írutkamurí ujakam Jesus túramun nekaumiayi. Nekáa ni írutkamurín jímiarun untsukmiayi. ¹⁹Tura Jesusaj akupkarmiayi. “Atumsha Jesus aníastarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tmiayi.

²⁰Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

²¹Wats, nii jeawarmia nuí Jesus untsurí jaan tsuártasa pujurmiayi. Iwianchrukuncha iwianchrín jírki akupkatasa pujurmiayi. Tura kusuruncha ímtikmiayi. ²²Tuma asa Jesus akatramun juna tmiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchunumsha uwempratin chicham ujakmaiti. Juan nu ujaktarum. ²³Yawetsuk Winia tuke shiir enentáimturna nú shuar shiir átatuí” tmiayi Jesus.

²⁴Waketkiarmatai Jesus Juánkan pachis áujmatman antuk shuar matsamarmia nuí juna tmiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. ²⁵Nuikia ¿warí werimiarum. Shuar péñker iwíarmampra ístai tusarmek wémarum? Warí, péñker iwíarmampraka uunt

akupniu jeen pujuiniatsuk. ²⁶ Nuiñkia ¿warí werimiarum. Yúsnan etserniuk werimiarum? Maa, nú nankaamas wáinkiarne. ²⁷ Yaunchu Yus-Chichamnum ju áarmaiti:

“Winia akatramurun amíini emka akupeajai ame jintimin iwiarat tusan.”

Juan nu akatramuiti. ²⁸ Nekasan tájarme, Yúsnan etserin imiakratin Juanjají nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjají nankaamas átatui” tímiayi. ²⁹ Peñké shuarsha, kuítian-juusha, Juan imiaimuijají imianiarmia nu, Jesus timian antukar Yusa náarín shiir awajsarmiyai. ³⁰ Túrashá Paríséusha Israer-shuara jintinniurísha Yus yáintaj támaitiat Juan imiaamujají imiancha ásar nakitrarmiyai. ³¹ Nuiñkia Uunt Jesus tímiayi “Yamaiya áentstiram, warijiaín métek árum nuna paant títiatjarne. ³² Uchijiaí métek árume. Ni ajiíai iruntrar nakurustaj tukamá tuíniawai “Námpera áinis nakurustaitsar peem umpuarji, túrashá jantsemáchurme. Nuyá iwíarsatniua áinis nakurustaitsar íwiarekur kantamtaí kantamáaji, túrashá átum úutcharme.” Tu tuíniawai. ³³ Atumsha núnisaitrume. Kame Juan núkap yurumtsuk úmutsuk wekaimiyai. Túmakui átumka “iwianchrúkuiti” tímiarme. ³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. ³⁵ Wats, nekas neka ainia nu, Yusa nekatairín iniakmainiawai.” Tu tímiayi.

Pariséu Semun náartin Jesusan ni jeen ipiaamiania nu

³⁶ “Winí yurumáitia” tusa Paríséu Jesusan ipiaamiayi. Tutai Jesus ni jeen werí misanam pujusmiayi. ³⁷ Nuiñkia nu péprunmaya yajauch nuwa, Jesus Paríséu jeen yurumátsa weyi táman antuk, kayá mutinium kunkuín asuiti áimkiamun takukí jearmiayi. ³⁸ Tura úutki Jesusa nawen pujuras neajkijiaí nijjarmiyai. Tura intiashijiaí japirmiayi; nuyá nawenam mukuta kuñkuinain ni nawen ukatramiyai. ³⁹ Paríséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwa ántiana nuna nekaawainti. Warí, niisha netse nuwachukait” tu enentáimsamiayi.

⁴⁰ Nuiñkia Jesus Paríséun chicharuk tímiayi “Semunká, ámin titiaj tusan wakerajai.”

Tutai Paríséu chichaak “Turuttia, Uuntá” tímiayi.

⁴¹ Tutai Jesus tímiayi “Kuítian ikiamniun jimiará áishman tumashmakarmiyai. Chíkich kiniantus (500) tura chíkichka aya senkuentak tumashmakmiayi. ⁴² Akiktin tsawant jeamtaí máí-metek takakcha ármiyai. Tuma asamtaí kuítian ikiamin ni tumashrín máí-metek asakátrarmiyai. Wats, turuttia ¿tú áishmanka ikiamniun nekas aneamia?” tímiayi.

⁴³ Tutai Semun tímiayi “Enta, núkap tumashrín tsankuramia nu.”

⁴⁴ Tutai Jesus tímiayi “Nekas tame.” Nuiñkia nu nuwan iis Semunkan tímiayi “Ju nuwa wáintsumek. Ame jeemiin wayamtaí winia nawer niijartin entsa suruschamame; antsu ju nuwaka nawerun neajkijiaí nijjarturai, tura intiashijiaí japirturai. ⁴⁵ Mukutam áujtuscamame; antsu niñkia nawerun tuke mukutui. ⁴⁶ Winia muukaruísha asuiti ikiurtuschamame; antsu niñkia nawerui kuñkuín asuitin ukatrurai. ⁴⁷ Nu tuma asamtaí tájame, niisha Winia ti anentu asamtaí ni tunaari untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

⁴⁸ Nuiñkia nuwan tímiayi “Ame tunaarum tsankuramuitme.”

⁴⁹ Tura chíkich ipiaamu Jesusjají misanam pujuarmiania nu “¿Jusha ya asan tunaancha tsankurea?” nuamtak tunainiarmiyai.

⁵⁰ Tura Jesus nuwan chicharuk ““Uwemtikiartiniaiti” tu enentáimturu asam uwempraitme. Shiir wetá” tímiayi.

8

Nuwa Jesusan yáinñkiarmiania nu

¹ Nuyá untsurí péprunam Jesus wekaráktak Yus akupeana nuna shiir chichaman etserkini wekaimiyai. Tura ni unuiniamurí tuse ármia nu nemarsarmiyai. ² Yaunchu untsurí nuwa jaa armia nuna tura iwianchrúku armia nunasha Jesus tsuáarmiyai. Nu nuwasha Nin nemarsarmiyai. Nusha ju ármiyai: Maktaranmaya Marí, siati íwianch

jírkiimiuyania nusha ³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takamarin súsar Jesusan yáinkiarmaiya.

Atsaamin atsaampramun Jesus unuiniamiania nu
(Mateu 13.1-9; Márkus 4.1-9)

⁴Untsurí péprunmaya Jesusan iistai tusar jíinkiarmaiya. Tura untsurí káunkarmatai ju métek-taku chichaman Jesus unuiniamiya:

⁵“Atsaamin atsaamprataj tusa jíinkimiya. Atsaamki wesa jinkiái jintiá iniaararmiya. Túrnamtai weenak najakarmiya. Nuyá chiníki tariar yuawarmiya. ⁶Chíkich jinkiái kaya írunmanum iniaararmiya. Nu jinkiái tsapainiar, wárik nantu sukuam káararmiya. ⁷Chíkich jinkiái janíiniam iniaararmiya. Tura janíkisha jinkiáisha máí-metek tsapainiar, janíki kaníkar ajakramiya. ⁸Tura chíkich jinkiáisha péñker nuñkanam iniaararmiya. Tura tsapainiar, péñker nerekar chíkichia siansha (100) nerekarmaiya.” Tuasua amik kakantar chichaak Jesus tímiya “Kuishim ákuñkia antuktarum.”

(Mateu 13.10-17; Márkus 4.10-12)

⁹Nuyá ni unuiniamurí Jesusan aniak tiarmiya “Ju métek-taku chicham tamena nu ¿warintkumea tame?”

¹⁰Tutai Jesus tímiya “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiyat kusurua núnin ártí tusan, tura ántuiniayat nekaacharat tusan aya métek-taku chichamjai jintintiatjai,” tímiya.

Atsaampramu chichaman Jesus paant jintintiamiania nu
(Mateu 13.18-23; Márkus 4.13-20)

¹¹“Wats, ju nekaatarum, tímiya. Jinkiáisha Yusa chichamen nakumui. ¹²Jintiá iniaaru tana nuka shuar aya ántana nuna nakumui. Yúsan nekas enentámtus uwempracharti tusa íwianch wárik taa nu chichaman ni enentáiyán júawai. ¹³Kayanam iniaaru tana nuka shuar antuk waras umiana nuna nakumui. Tura nú shuar kaníkapé atsaá asamtai, ishichik tsawantiniñ umíkiar itiurchatan wáinkiar wárik kanainiawai. ¹⁴Janíiniam iniaaru tana nuka tuke enentáijiai umiatsna nuna nakumui. Nu shuarsha ántuiniawai, túrasha ni wakeramurijiai wekainiawai. Ju nuñkanman ana nuna ti páchiniakuí, tura kuítian ti wakeruiniakuí, warastinniak enentámtuiniakuí, Yus-Chicham ni enentáin takaatsui. Nujai kaníkarma ásar nerektiniam tujintainiawai. ¹⁵Tura jinkiái péñker nuñkanam iniaaru tana nuka shuar antuk umiinia nuna nakumui. Niisha antukarmia nuna péñker enentámtusar, yawetsuk umirkar ti péñker nerenawai.”

Ashí iwainiakma átatui
(Márkus 4.21-25)

¹⁶¿Shiripkin ekeemak nukuktinkiait? Peaknum waaptak ikuschatniuiti. Ansu jeñam wáiniana nu paant wáinkiarat tusa yakí ekentsatniuiti. ¹⁷Núnisan ashí nekaachma ana nu paant átatui. Tura úukma ana nu nekanattawai. Tura iwainiakma átatui. ¹⁸Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentámtumana nuka jurunkittiawai.” Tu timiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹Jesus pujamunam nukurí ni yachiísha tariarmiya. ²⁰Turamtai Jesusan tiarmiya “Ame nukusha yatsumsha aa wajasar untsurmainiawai.”

²¹Tutai Jesus tímiya “Ee, nukuruiti, yatsuruiti, tura Yus tana nuna antuk umiána nusha winia nukuruiti, winia yatsuruiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²²Chíkich tsawantai Jesus ni unuiniamurijiai kanunam eníkemprar “Antumian amaini wetai” tímiya. ²³Entsanam wesar Jesus kanarmiya. Tura aya aneachma nase ti kakaram násentkui chíchimi tampá tukumar kanun inít awayastatuk awajmiya. ²⁴Túram nuñkia Jesusan ishintiainiak “Uuntá, iisha entsá wayajai” tiarmiya. Nuñkia Jesus

nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiai. ²⁵Nuyá ni unuiniamurin chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

Jatara nunkanam Jesus iwianchrुकun tsuármiania nu
(Mateu 8.28-34; Márkus 5.1-20)

²⁶Kariréa nunka amaini Jatara nunkanam jeawarmiayi. ²⁷Kanunmaya Jesus jinkimtai nu péprunmaya áishman Nin taruntamiayi. Nu áishmansha yaunchu iwianchrुकuyayi. Misú wekas, jeá pujutsuk aents iwiarsamunam pujuyayi. ²⁸⁻²⁹Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tujinkiarimiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchiri Jesusa? Winia wáitkiarsaip tusan seajme” tímiayi. Íwianch nin pujurun Jesus jiki akupeam tu tímiayi. ³⁰Jesus nu áishmankan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch nin pujurma asa nuna tímiayi. ³¹“In uunt wáanam ii jinkimtai nuin akuptukam amutkaip” íwianch seawarmiayi Jesusan. ³²Nu ishichik arantach náinnium untsurí kuchi shushumak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

³³Nuna takui íwianch áishmannumia jinkiar kuchiniam wayawarmiayi. Túrám kuchisha nánatanam akaiki iniaawar entsanam utsanawarmiayi. Túrúnawar jakekarmiayi.

³⁴Kuchin wáinniusa túrunan wáinkiar, ashamkar, péprunmasha tura arantcha etserkatai tusar tseke wearmiayi. ³⁵Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jintiukiarmia nú áishmankan pénger ajas pushí entsar Jesusa nawen pujan wáinkiarimiayi. Tura ashamkarmiayi. ³⁶Iwianchrुकu áishman tsuármian wáinkiarimia nu yama taan ujakarmiayi. ³⁷Tura ti ashamainiak Jatara nunkanmaya aents ashí Jesusan “Wetá” tiarmiayi. Tutai Jesus kanunam epkemar wémiayi. ³⁸Íwianch jintiukiarmia nú áishman Jesusan, wisha ame wéamunam winitai tusa seamiayi. Tutai Jesus nuna suritai, ³⁹“Antsu ame jemijn weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

Jairu nawantríncha tura chikich nuwancha Jesus tsuármiania nu
(Mateu 9.18-26; Márkus 5.21-43)

⁴⁰Tura Jesus katiniki Kariréanam tatí tusar nákas pujuarmiayi. Tuma ásar Nii wakетки katiniki támatái nu aencha warasar áusarmiayi. ⁴¹Tumai Israer-shuara iruntai jeá uuntri Jairu naartin támiayi. Nii taa, Jesusa nawen tikishmatar “Winia jearu waitneasam winitritia” tímiayi. ⁴²Ni nawantri chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

⁴³Nu nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrin ashí ajapaitiat tsuámarchauyayi. ⁴⁴Jesusa úkuriini winia weantuk ni pushirí nankatramurin antiñmiayi. Nuna tura nú chichamaik numpé ajapeamuncha pénger ajasmiai. ⁴⁵Nuinkia Jesus chichaak “¿Ya Winia antintkia?” tímiayi.

Tura “penkesha antiñchajme” tuíniakui Pítur ni tsaniakmarjijai Jesusan chicharuk “Uuntá, ti untsurí antiñmasha, tura ti untsurí chanunmainiasha jitiura “ya Winia antintkia” tame?” tímiayi.

⁴⁶Tútaisha Jesus tímiayi “Nekas Winia antintkiayi. Winia kakarmarjai tsuárajna nuna nékajai” tímiayi.

⁴⁷ Nuyá nu nuwasha, nekarayapi tusa kurañki taa Jesusa nawen tikishmatramiayi. Tura ashí aents ántuiniamunam urukaku antiñkia tura itiura wárik péñker ajasmia nuna ujakmiayi.

⁴⁸ Nuñkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujaí uunt Jairu jea, ti untsurí antiñmasha, turenía taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jessussha Nijjái untsurí wayatniun surimkiamiayi. Antsu aya Pítrun, Jakupun, Juágnasha tura nuwachi aparín nukuríncha wayatniun tsanekatkamiayi. ⁵² Ashí úutaniak atakka wáinkiashtatjapi tu úutiarmiayi. Túmainiakui Jesus penké jakaan nekayat tímiayi “Úutirpa. Nuwáchkia jákachai, antsu kanarai” tímiayi.

⁵³ Jakaancha urukaku ta tusar wishkrarmiayi. ⁵⁴ Nuyá Jesus nuwachi uwejeñ achik, kákantar chicharuk “Nawantru nantaktia” tímiayi. ⁵⁵ Túram niisha jakayat atak iwiaka ajasmiai. Tura nú chichamaik nantakmiayi; túrunamtai Jesus “ayuratarum” tímiayi.

⁵⁶ Nuwachi aparí nukurísha ti enentáimprarmiayi. Tura Jesus “Ju túramu penké et-serkairap” tímiayi.

9

*Jesus ni unuiniamurín etserkati tusa akupkarmiania nu
(Mateu 10.5-15; Márkus 6.7-13)*

¹ Ni tuse unuiniamurín ikiaanak ni chichamejai iwianchrukun enentáiyen iwianchin jjiirki akupkatniun tura sunkurjai jaa tsuártinniasha ni kakarmarín súsarmiayi. ² “Yus akupin ajastin ujaktarum, tura jaa tsuártarum” tinia akupkarmiayi Jesus. ³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichik pushí jukitiarum. ⁴ Nánkamas jeanam jearam wayarmeka nuñ pujustarum. Nuñ pujusrumek chíkich péprunam wéakrum jínkitiarum, tímiayi. ⁵ Tura atumin awáintiamatniun nakitiana nú péprunmaya jínkirum nawemiya nunka akakekrum ikiuktiarum. Awáintiamachma paant ati tusarum nu túratarum” tímiayi.

⁶ Nuyá jínkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesusan iistaj” tímiania nu
(Mateu 14.1-12; Márkus 6.14-29)*

⁷⁻⁸ Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asantai Erutis penké nekaachmiayi. ⁹ Tura tímiayi “Wiki, Juanka muuke tsupirkatarum, tíchamkaj. Tuma ajsha, ¿ju shuar, ni túramurí ashí shuar chichainia nusha yátsukait?” Tu enentáimiuk “iistaj” tímiayi.

*Senku mir áishmañkan Jesus ayuramiania nu
(Mateu 14.13-21; Márkus 6.30-44; Juan 6.1-14)*

¹⁰ Atak Jesusa akatramurí waketki taar ni túramurín Jesusan ujakarmiayi. Nuñkia aents atsamunam Petsaitia péprunam tíjuch weak nu júkiarmiayi. ¹¹ Tura penké shuar nuna nekaawar nemariarmiayi. Túram Jesus nin shiir áujsmiai. Tura Yusa akuptairí pachis unuiniamiayi. Tura jaa armia nuna tsuáramiayi.

¹² Tura kíakui, tuse unuiniamu Jesusan wérior tiarmiayi “Uuntá, shuar akupkachmini-ashit. Tíjuch péprunmasha, shúarnumkesha wear ni yurumátniurín sumarmakarti, tura kanartintrín wáinkarti. Juí pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “iisha aya seṅku tanta tura namaksha jímiarchik takakji. Ju shuar ayuratin sumaktai tusar wétiniaitji” tiarmiayi.

¹⁴ Aishmansha ti untsurí seṅku mir (5000) jeeá ámiayi. Tura Jesus ni unuiniamurín chicharainak ““seṅkuenta seṅkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá seṅku tantan tura jimiará namaknasha Jesus achik, yakiiní ímias Yúsan yuminsamiayi. Nuyá ajamsarat tusa ni unuiniamurín súsararmiayi. ¹⁷ Ashí yurumáwar ejemarmarmiayi. Tura ampirman tuse chaṅkinnium áimkiarmiayi.

Jesus Yusa anaikiamurínti ujakma amia nu
(Mateu 16.13-19; Márkus 8.27-29)

¹⁸ Jesus ni unuiniamuríjiaí áentsnumiá kanakí pujuarmiayi. Jesus Yúsan aujsua umik ni unuiniamurín tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Imiokratín Juánkaiti” turamainiawai; chikichcha “Íriasaiti” tura chíkichkia “yaunchu Yúsnan etserín nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítur chichaak “Ámeka Yusa Anaikiamurí, Kristu tutai, núitme” tímiayi.

²¹ Tutai Jesus “Peṅké etserkairap” tímiayi.

Ni jákatniurín Jesus ujakmania nu
(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wí shuara uuntri, tura ni Pátrirí úuntriṣha tura ni jintinniuríṣha nakiturrar maantuáwartatui. Túrashha iwiartusarmatai menaintiu tsawant jeamtaí nantaktiatjai.”

²³ Nuyá ashí áentsun chicharuk juṅa tímiayi “Shuar Winia nekas nemartustajtsa wakerakka ni wakeramurínkia iniaisati. Tuke tsawant ni krusí yanaki nemartustí. ²⁴ Kame shuar ju nunkanam aya péṅker pujustaj tákuṅka nu shuar uwemtsuk jakattawai. Antsu Winia anentu asa péṅker pujustinniak enentáimtsuna nú shuarka nekas iwiakman wáinkiatawai. ²⁵ Íimiata, shuar ashí ju nunkanam ana nuna súmakui tura jinium wétin ákuisha ¿itiurak péṅker pujusat? ²⁶ Wi Aents Ajasuitjiana ju Winiasha tura winia chichampruncha shuar natsantraitkuṅkia, winia wincharujai, winia Aparu wincharíjiaí tura nayaimpinmaya péṅker suntara wincharíjiaí atak táakun shuar natsantrurmia nuna natsantrattajai Wí. ²⁷ Tura shuar Yusa akuptairín wáintsuk jákachartatna nu juí pujuiniawai. Nuna nekas tájarme” tímiayi.

Jesus nusháa iira ajasmiania nu
(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujsataj tusa Jesus náinnium wakamiayi. Pítur, Jakupu, Juanjai nemariarmiayi. ²⁹ Jesus auju pujus nusháa iira ajattsarmiayi. Ni pushiríṣha ti puju jíitsumir ajasmiai. ³⁰ Nuṅkia jimiará áishman Níijiaí chicháa wajarmiayi. Nuka Muisáis Eríasjai ármiai. ³¹ Níncha wincha jíitsumir téntakarmiayi. Tura Jesus wáitias Jerusarénnum jákatniurín amia nuna áujmatiarmiayi. ³² Pítur ni tsaniakmaríjiaí karí ti pujainiaín iwiáa pujuarmiayi. Tuma ásar Jesusan tura jimiará áishmanjai jíitsumir ajas wajainian wáinkiararmiayi. ³³ Tura nu áishman Jesusan ik-iuki weenaj Pítur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisainasha, Eríasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujaj yuraním tarí kaput amúawarmiayi. Tura yuraním amum ti ashankarmiayi. ³⁵ Nuṅkia yuranminmaya ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikiar Jesus níñki wajan wáinkiararmiayi. Nuṅkia takamtak pujuarmiayi. Tura wáinkiarimia nuna peṅké etserkacharmiayi.

Uchi iwianchrukun Jesus tsuármiania nu
(Mateu 17.14-21; Márkus 9.14-29)

³⁷ Kashin tsawantai, náinniumiá táarmatai, ti untsurí shuar Jesús inkiuntai tusar wearmiayi. ³⁸ Nu shuarnumiá chikichik áishman Jesusan untsuak tímiayi “Uuntá, wait-neasam uchir írtústá. Uchirsha júchikiiti. ³⁹ Íwianch achik núpeteam niisha nápkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai. ⁴⁰ Túmakui ame unuiniaturmin iwianchin jíirtukit tusan seamjai. Túrasha tujinkiarmai” tímiayi.

⁴¹ Tutai Jesús tímiayi “Yus enentáimtichutirmin, tutupnik wekaichatirmin ¿urutmá tsawantsuk atumjai pujustaj. Urutmá katsuntratjatsuk? Uchiram jui itiatá” tímiayi.

⁴² Tura uchi winiaí íwianch nunká ájuant chichichiptu áepsamiayi. Tura Jesús iwianchin kakantar chicharkamiayi. Tura uchin pépker awajas ni aparín awantuki susamiayi. ⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

Jesus ni jákatniurín ataksha ujakmiania nu
(Mateu 17.22-23; Márkus 9.30-32)

Jesús túramun ti enentáimtu pujuiniaí Jesús ni unuiniaturín tímiayi ⁴⁴ “Wi tájarmena ju pépker antuktarum. Winia Aents Ajasu tútain surutkartatui.”

⁴⁵ Tura Nii timia nuna unuiniaturí nekaacharmiayi. Nekaawarain tusa paantcha awajsamuyayi. Tura warinkit tusa anintrustinniasha arantukarmiayi.

“¿Yaki imiá nankaamantuit?”
(Mateu 18.1-5; Márkus 9.33-37)

⁴⁶ Nuyá ni unuiniaturí, yaki imiá nankaamaku ati tusa, nuamtak mai tunai ajarmiayi. ⁴⁷ Tura ni enentáimsaturín Jesús nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winisha shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nankaamantuchu tárumna nu ti nekas nankaamantuiti” tímiayi.

(Márkus 9.38-40)

⁴⁹ Nuyá Juan tímiayi “Uuntá, shuar ame náarmin pachis iwianchin jiki akupea nu wáinkiamji. Tura in páchitkiachu asantai nuka suritkiamji.”

⁵⁰ Tutai Jesús tímiayi “Antsu suritkiarap. Shuar in nakitramachkunka in páchitkiawai.”

Jesus Jakupun Juánasha chicharkarmiania nu

⁵¹ Jesús, nayaimpiniam waketkitniurí jeatemamtai, enentáimmia ímiatrusan Jerusarénum we-wémiayi. ⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. ⁵³ Tura Samarianmaya aentska, Jerusarénum wéenan nekaawaru ásar itiatniun nakitrarmiayi. ⁵⁴ Jesusa unuiniaturí Jakupusha Juansha nuna nekaawar, Jesusan tiarmiayi “¿Uuntá, Eriás yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, titiatjik?”

⁵⁵ Tutai Jesús nin ísar kakantar chicharuk tímiayi “Atumsha atumi enentái urukukit nuka nekamatrume. ⁵⁶ Wi Aents Ajasu áentsun emesratsan táchaitjai. Antsu uwentikratajtsan táwitjai” tímiayi. Nuyá chíkich péprunam wearmiayi.

Jesus nemarsatin
(Mateu 8.19-22)

⁵⁷ Jintiaí weenai, chíkich áishman Jesusan chicharuk “Uuntá, tuí wétatam nuisha nemarsatjame” tímiayi.

⁵⁸ Tutai Jesús tímiayi “Kujanchmasha ni wáarin takaktsuk. Chinkisha pasunken takaktsuk. Tura Wi Yusa Uchirintiatan tepesan ayampratniur atsawai.”

⁵⁹ Chíkich áishmankan Jesús “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsankátrúktá” tímiayi.

⁶⁰ Tutai Jesus tímiayi “Jakaa ainia nu ni shuarin iwiersatniunka enentámtusarti. Tura ámeká weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasa wíi shuaran emka áujsan ikiuweartaj tsankátrúktá” tímiayi.

⁶² Tutai Jesus tímiayi “Shuar arayát ukunmaaní apajas iimna nu, Yus akupeana nuí takaschamniati.”

10

Ni unuiniamurin setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamurin setenta anaikiarmiayi Jesus. Tura jímiar jímiar an apatak émkitiarum tusa ashí péprunam ashí nunkanam ni wétin amia nuí akupkamiayi. ² Akupeak tímiayi “Nekas tájarne, Yus-Chicham étserkum, júuktinia núnisan, aents Yus-shuar awajsatin ti awai. Tura zyaki júukat, aya ishichik takainiasha? Tuma asamtai ni takarniuri akupkat tusarum Nerentin seatarum. ³ Wetarum. Átumka murikiua núninaitrume. Uunt yawá yujamua núninnium tsummai ámunam akupeajrume. ⁴ Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap. ⁵ Jea wayakrum emka ju titiarum: “Ju jeanam pujuinia nuna Yus shiir awajsarti.” ⁶ Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuiñkia túrunashti” titiarum. ⁷ Jéa wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuí werum nuí werum ajairap. ⁸ Awaintiamawartatna nú peprunam jearmeka ajampramsattatna nu yuatarum. ⁹ Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum. ¹⁰ Íksarmek itiaarmachartatna nú peprunam jearum, jintiá wajasrum ju titiarum, ¹¹ “Yusna nakitra asakrumin, atumi pépruriniá nunka ii nawen peema japir akakekji. Túrasa ju paant nekaatarum: Yus ju nunkanam akupkatin ishichik ajatemsai.” ¹² Yusa nekapsatin tsawantri jeantai nu peprunmaya shuaran ti asutiáttawai. Yaunchu Sutumanmaya shuaran asutiámia nujai nankaamas asutiáttawai. Núnaka paant tájarne tímiayi.

(Mateu 11.20-24)

¹³ “Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprurini aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuinkia yaunchu ni enentáin yapajíwarayai. Túrawar kúntuts pujutai pushin entsasar yuñkunim ajakiaarayai. ¹⁴ Tura atumsha aents tujintiamu túramu wáiniatrum yapajíachu asakrumin Tirunmaya tura Setunnumiá aentsjai nankaamas asutniáttarme. ¹⁵ Tura atumsha Kapernáumnumiá tirmesha, “ti nankaamantu ajaras nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakittrakka Winia akuptukua nunasha nakitiawai.” Tú áujas Jesus nin akupkarmiayi.

Setenta unuiniamu wakетки táarmiania nu

¹⁷ Ukunam nu setenta unuiniamu waras wakетки táarmiayi. Tura chichainiak “Uuntá, ame náarmiin íwianch jiki akupeam umirtamkamji” tiarmiayi.

¹⁸ Tutai Jesus tímiayi “Ee, Wisha nayaimpinimaya peem peetna núnisan, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarne, napi najarmasha titin najarmasha yajauch awajtamsairum tusan; tura ii nemasri kakarmari nupetkatniuncha susamjarne. ²⁰ Túrasa íwianch umirtamkui nu enentáimсам warasairap. Antsu atumí naari nayaimpiniam aarma aa asamtai warastarum” tímiayi Jesus.

Jesus warasmiayi

(Mateu 11.25-27; 13.16-17)

²¹ Nuiŋkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijiaí nuŋka Úuntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurin iis tímiayi “Wi tájarme, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkiacharmiayi. Tura átum yamáí ántarme nuna antuktinian wakeruiniayatan antukcharmiayi. Tura Yus achirmaku asakrumin, wáintrumna nu ti péŋkeraiti” tímiayi.

Samarianmaya áishman katsumkamun yaŋmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitia?” tímiayi.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

²⁸ Tutai Jesus tímiayi “Péŋker áimsame. Nu túrakmeke tuke iwiaaku átatme.”

²⁹ Tutai akupkamun jintinkiertin ni aninramun kíishtumakajtisa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusarénumia jintia Jirikiú péprunam jeana nú jintianam áishman wean, kasa áishman tariar ni waririn, pushirincha kasarkarmiayi. Tura katsumkar mayáí ashirak ajuantar ikiukiarmiayi. ³¹ Tura Israer-shuar Patri ukunman winis nu áishman kan wániak aya íkiaŋ iis ikiukmiayi. ³² Nuyá ukunam Patri yáintriŋsha nu jintianam wesa, nu áishman kan wániak, áyatik iis ikiuak wémiayi. ³³ Tura nuyá Samaria nuŋkanmaya áishman sha nu jintianman wesa, nu áishman kan wániak ní shuárinchunak wáitnéntramiayi. ³⁴ Nuyá nu áishman kan weantuk ni numpamnamurin asuitijiaí tura winiujai tsuar jaanchjiaí penuarmiayi. Tura ni kawairin ekenak jukimiayi. Tura írar kanutainiam juki ejé nu áishman kan péŋker wáinkiamiayi. ³⁵ Tura kashin tsawarmatai Samarmanmaya áishman weak jimiaraí kuítian jusa jeá nérenniurin susamiayi. Susa tímiayi “Ju áishman péŋker wáitrukta. Tura wi amaajna ju táasmataisha wi wáketkun akiktajme” tímiayi. ³⁶ Ayu, ámiijaisha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

Marta ni kajjiaí Marí jeen Jesus pujusmiania nu

³⁸ Nuyá Jesus jintia wesa chíkich péprunam jeamiayi. Nu péprunmaya nuwa naari Marta ni jeen itiaamiayi. ³⁹ Marta kai ámiayi ni naari Marí. Marisha unuiniamun anturkataj tusa Jesusa nawen pujursamiayi. ⁴⁰ Tura Mártaka ni takatrin ti enentáimtak Jesusan weantuk tímiayi “Uuntá Jesusá, ¿winia kajr takatan winiak íktursainia nuka enentáimsumek? Winia yáintá turuttia” tímiayi.

⁴¹ Tutai Jesus tímiayi “Maaj Martí, untsurí túratin ana nu ti enentáimsam itit awajtamui.

⁴² Tura aya chikichik nekas túratniuiti. Marikia nekas péŋker ana nuna achikiai. Nusha penké jurunkishtatu” tímiayi.

11

*Jesus Yus áujsatniun unuiniamiania nu
(Mateu 6.9-15; 7.7-11)*

¹Chíkich tsawantaj Jesus Yúsan áujsataj tusa atsamunam pujumiayi. Áujsua amikmatai ni unuiniamurij chikichik Nin tímiayi “Uuntá, imiakratin Juan ni unuiniamurij unuiniamia núnismek Yus áujsatin unuitiurta.”

²Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisañ ju nunkanmasha uminkiatí.

³Aparú, ii yurumkarí ashí tsawant amasta. ⁴Tura winia nemasrun tsankurajna núnismek, Aparú, winia tunaaru tumashrisha tsankururta. Tunáa wakeruktin tsankatrukaip. Antsu ashí tunaanumiá uwentikrurta.”

⁵⁻⁶Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tichatameash. ⁷Tura nii init pujusañ chichaak “Warí, wáitisha epenmiiati, tura winia uchirsha wijiaí ashí tepeenawai. Itiur nantakniak amastaj. Itit awajtipia” turamchanpiash. ⁸Wats, paant tájarme, niisha amikrum asa, nantaki ikiatmastinian nakitiayat, itit awajtin tusa nantaki ashí wakeramna nuna suramsattawai. ⁹Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awáintiamattarme. ¹⁰Seana núnaka súniatsuk. Eana nuka wáintsuk. “Winiajai” tuinia núnaka awáiniatsuk.’

¹¹“Wats, átum uchirtintiram, ame uchiram apatkun seatmakui zkayaash súsaintiam? Namakan seatmakui ñapíash súsaintiam? ¹²Nujintian seatmakuisha ñtitiñkiash súsaintiam? ¹³Warí, átum imiá yajachitirmesha atumí uchirí penker ana nu tuke súchakitrum. Atumí Aparí nayaimpiniam pujana nu, seakrumniñkia nú nankaamas ni Wakanin suramsattawai.” Tu unuiniamiyai.

Jesusan “iwianchi kakarmarijiaí túrawai” tiarmiayi

(Mateu 12.22-30; Márkus 3.19-27)

¹⁴Shuar iwianchraku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jinkimtai chichachu chichasmiayi. Túramtai shuar nuí pujuarmia nu ti enentáimprarmiayi. ¹⁵Tura chíkich tiarmiayi “Juka iwianchi kapitíántri Satanásan, ni chíkich naarí Pirsepún umirniuiti. Tuma asa nuna kakarmarijiaí iwianchin jiki akupeawai.”

¹⁶Tura chíkichkia, nekas Yúsnumiá taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuñkia nu nupka wárik meserchattawak; nuamtak shuarsha ni shuarijiaí kajernaiyaksha amunaikchartatuak. ¹⁸Wíniaka “Pirsepú iwianchi kakarmarijiaí iwianchin jiki akupeawai” túruttsurmek. Tuma asamtai tájarme, uunt iwianch Satanás naartin, ni suntarijiaí kajernaiyaksha ñitiur tuke kakaram áting? ¹⁹Tura Wi Pirsepú kakarmarijiaí iwianchin jiki akupeakuñkia, atumi shuarisha ñyana kakarmarijiaí iwianchin jiki akupena? Niisha “iwianchi kakarmarijiaí túrichuitji” tuiniaisha ñitiura Winiasha, “iwianchi kakarmarijiaí túraiti” turutminiaitrum? ²⁰Wikia Yusa kakarmarijiaí iwianchin jikin akupeajai. Nu nekaarum Yus atumí enentáin akupin ajasuana nu nekarme.’

²¹“Kakaram áishman kúishtumaktajtsa iwiarnar wajas jeen wáinkui, ni warirí init ana nusha tímiatrusañ ániawai. ²²Antsu niijiaí nankaamas kakaram ana nu winiakka nupetkashtatuak. Tura kúishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. ²³Iista. Winia nemartatsna nu winia nemasruiti. Núnisañ Winia yáintsuna nuka aya iturchat nájateawai.’

Iwianch jiki akupkamuitiat wáketna nuna ujakmiania nu

(Mateu 12.43-45)

²⁴Nuyá Jesus juna tímiayi: ‘Shuara enentáiya íwianch jinki ayamprataj tusa yumi penké yútatsna nuí wéawai. Tura ayampratniun wáincha asa ataksha waketitniun enentáimui.

“Wi jíinkimijaj nuñ waketkitjai” tawai. ²⁵ Tura waketki péñker iwiamun tura ankant aan wáiniui. ²⁶ Nuna wáiniak, ni ain siati iwianchin níijijai nankaamas yajauchin itia epkemáwartatui. Túrunantai nu shuar nuiki nuna nankaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuñ Jesus nuna chichaa pujaj, nuwá untsumuk “Ame nukun Yus ti yáinkiai. Ni ampujén ame pujuschkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru áiniawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Níin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin áiniawai. ³⁰ Kame Junas túrunamujai Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmastatume. ³¹ Yaunchu Sarumún uunt akupin pujaj Sepa núnkanmaya nuwá akupin Sarumunka chichamen nekaataj tusa ti jeashtanmaya tímiayi. Tura yamaikia Sarumunjai nankaamas pujaj átumka anturtatsrume. Tuma asantai Wi tájarne, Yus ashí shuaran nekapsattana nu tsawant jeamtai nu nuwá, akupniun péñker anturka asantai, Yus ímianum péñker átatui. Antsu atumsha Winia anturtukcha asakrumin Yus ímianum yajauch átatume. ³² Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarin enentámtusar enentáin yapajíawarmiayi. Tura jui yamá Junasjai nankaamas etserin pujajai. ¡Tuma asantai nekapsatin tsawant jeamta Níniwinmaya shuar yamaiya shuar árumna nuna sumantikramattarme!

Ayashi tsáapnintrí

(Mateu 5.15; 6.22-23)

³³ ¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti. ³⁴ Ame jíimijijai wáinkiam nujai wekasatin nekaattame. Tuma asantai ame jíimijijai péñker ana nu wáinkiumka péñker wekasattame; antsu ame jíimijijai yajauch ana nu wáinkiumka, kiritniunam wekasatniua núnisan yajauchiniam wekasattame. ³⁵ Anearta. Enentáimin tsáapin ana nu kiritin ajaschati tusam anearam wekasata. ³⁶ Ame ayashmiin kirit ajatsuk aya tsáapniniaitkiuñkia, shirikip paant awajea núnisan ashí paant wáinkiatame” tímiayi.

Pariséuncha, Israer-shuara jintinniurísha “yajauchiitume” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi. ³⁸ Tura Israer-shuar ikijmiartin ana nuna túrutsuk aya pujakuí Pariséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtaijijai méteketume. Pátatek péñker túrarme. Tura atumí enentáinkia kasamkatniusha tura yajauchia nusha piakuiti. ⁴⁰ ¡Enentáimcha! Warí, ashí pátatek wáiniaji nuna Yus najanachmakia; tura init paantcha ana nunasha Yúsak najanachmakia. ⁴¹⁻⁴² Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenarmena nusha péñker enentáimsatniutume. Wats init, enentáimin ana nútiksarmek jusam susarta. Nuñkia ashí chamir átatui.’

⁴³ “Tura aneartarum Pariséutirmesha. Yus áujtai jeanam penkeri pujutainium pujustin wakerarme. Tura jintia aents ímiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Pariséutirmesha máí-metek aneartarum. ¡Antar shiir chicham-tinia! Iwiarsamu paantcha núniniaitrum. Shuar nu naŋkaamaksha nájamiat nékatsui. Núnisaŋ shuar atumí chichame antukar yajauchia nuna nekartamturme.’

⁴⁵ Nuikia Israer-shuara jintinniurí chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutaí Jesus tímiayi “Atumsha jintinniutiram aneartarum. Atumí akupkamuríjjai káarak ti kijin entsakchamnia súarme. Tura átumka yáíntaj tusarum atumí uwejejaisha penké ántiatrum.’

⁴⁷ ‘Aneartarum tájarme. Yaunchu atumí uuntri Yúsnan étserniu máawarmia nuna iwiarsamurí átum jeamniutrum nu etserin ti penker ásar matai kajinmatkishtin. ⁴⁸ Nu túrakum atumí uuntri túrawarmia nu, “yajauchichui” tarume. Warí, niisha máawarmi-ayi, tura atumsha máawarai táyatrurum niíjjai méteketrum. Warí, Yúsnan etserniu iwiarsamurí jeamkuram atumek sumamarme.’

⁴⁹ ‘Atumí túramurí nekáa Yus juna yaunchu tímiayi: “Winia etserturuniu tura winia akatramurnasha níjn akuptukartatjai. Túramtai chikichnaka máawartatui, tura chikichnaka pataatukartatui.” ⁵⁰ Tuma asamtai ashí ni etserniurí maamu ainia nuna, yamaiya áentstirmin Yus sumantikramattarme. Nunka najanamunmaya júkí ⁵¹ yamá ímiajjai maamu ainia nuna, kame Apir maamunmaya júkí yamá Sakarías maamua tímiájai anintrustatui. Namaŋ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurí maantamnwarmia nuna yamá matsatrumna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimi-arme. Atumkesha nékatsrum. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Pariséusha, jintinniusha ti kajerkarumiayi. Tura nii tana nujai “yajauch túrame” titiai tusar wakeruiniak untsurí anintriarmiayi.

12

¹ Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurí tótan juarkimiayi. “Pariséu ántar chichamtin ániawai. Nuka wakaprutaiya núnisai. Wakaprutaikia nijiamanch yumirniun yama enkeam páantchaiti. Tura ukunam nekaamniati. ² Núnisaŋ ashí paantcha ana nu iwaiiniakma átatui. Uukma ana nusha nekaamu átatui. ³ Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.’

Yusak ashamkatniuiti

(Mateu 10.28-31)

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniutrum, nuna paant jintintiattajrum. Ame ayashmí maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.’

⁶ ‘Jimiará chiniki ishitiúpchich ishichik kuitjai surukchatniukait. Túrasa Yussha nu chinikin penké kajinmatkishtatui. ⁷ Wats, ashamkairap. Untsurí chinikíjjai naŋkaamas Yusa atumin enentáimturarme. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

⁸ ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí ímiainiamunam natsantrashtatjai; ⁹ antsu shuar ímiainiamunam Winia natsantrana núnaka Wisha Yusa suntarí ímiainiamunam natsantrattatjai.’

¹⁰ ‘Winia, Aents Ajasu tutain, shuar yajauch chichartakuinika nusha tsanukuramniati, tura Yusa Wakaníncha yajauch chicharkuinika nuka penké tsanukurachminiati.’

¹¹ ‘Wats, Israer-shuar iruntai jeanmasha, tura Israer-shuar kapitíanniumsha, uunt-numsha juramainiakui, aninmainiakui sha warintiajak tusam ti enentáimsáip. ¹² Ame áimkiatin jeamtai, Yusa Wakaní ame títiatmena nuna jintinramattawai,” tu timiayi.

Kútiak enentáimtuschatniuiti

¹³ Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

¹⁴ Tutai Jesus tímiayi “Áishmanka, atumin nu túratin anaikiamukaitiaj.”

¹⁵ Nuyá tímiayi “Pénker enentáimsatarum. Nii takakna nújajin shuar iwiaaku, áchat-niuiti. Tuma asantai kufrintin ajastin aya nuke enentáimsaip.”

¹⁶ Nuyá juna métek-taku chichaman unuiniak tímiayi:

“Kufrintin áishman ni ajariyan arakan ti nukap juukmai. ¹⁷ Tura “¿Ti nukap asantai tuij ikiustaj. Itiurkatjak?” tu enentáimsamiai. ¹⁸ Wats, wi nékajai. Winia ikiutái-jearun ashiran nú nankaamas úntan najanatajai. Tura nuí ashí ikiustajai. ¹⁹ Nuiñkia untsurí uwitin shiir pujustinian ikusman takustatajai. Tuma asantai, ayampran, yurumán, umaran shiir pujustatajai” timiai.’

²⁰ “Tura Yus nin chicharuk timiai “Netse. Yamái kashi jakattame. Nuiñkia imiá núkap ikiusumna nusha ¿yana átata?” timiai” tímiayi.

²¹ Nuyá Jesus tímiayi “Shuar niñki kufrin ikiauntumna nu, núnisaiti. Túrashá Yusjai íismaka kufrinchaiti.”

Yus ni uchirín péñker wáinkiaiti

(Mateu 6.25-34)

²² Nuyá ni unuiniamurin Jesus juna tímiayi: “Warí yuarik pujustají tura warin entsaratají tusarum nuke ti enentáimsairap. ²³ Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. ²⁴ Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma ain Yuska ni yurumátniurin tuke súawai. Atumsha chinkea nú nankaamaschakaitrum. ²⁵ Tura ya shuarak, ti enentáimtana nujai nú naya ajasminiait. ²⁶ Kame yúpichuch ana nusha túrachminiaiatrumsha, ¿urukamtaí chíkich ainia nusha ti enentáimtarum?”

²⁷ “Ístá, kukujsha takaachitiat tura nájanchitiat ti shírmach ániawai. Yaunchu akupin Sarumún ti shiir iwiarmanuiitiat kukujia tímianchayuyai. ²⁸ Iis, nupa yamáí tsakaawai tura kashin aents tsupikiar jinium apeánawai. Tuma ain Yus ti shiir awajatsuk. Nuna tura asa atumniasha nú péñker wáitmakchattawak. ¿Urukamtaí Yus nekas enentáimtatsrum? ²⁹⁻³⁰ Ju nunkanam ana nu ti pachiiirap. Chíkich shuar, Yúsan nékainiatsna nu, warin yuataj, warin umartají nuna ti pachiiinawai. Tura atumsha tu enentáimsairap. Urukataj, tiirap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtarum. Túrakrumniñkia atsumamna nuna Yus suramsattawai.’

Kuítian pachis Jesus unuiniamiania nu

(Mateu 6.19-21)

³² “Winia murikrutiram ashankairap. Untsuríchuitrume. Túrashá atumí Aparí ni akuptairin pachitaktasa ti wakerutmarme. ³³⁻³⁴ Kufrum tuij aa, nuí tuke enentáimtit-tiarme. Tume asantai takakrumna nu surukrum atsumainia nu susatarum. Nuka enketai arut ajatsna nuí enkeatinua núniskete. Túrakrum nayaimpinmaya kuit amuatsna nu íkiawearme. Nuisha kasa nu kuitian kasamkataj tusa wayachminiaiti, tura kayasha nu kuitian yúatniun tujintiwai.’

Anearar wekasatniuitji

³⁵⁻³⁶ “Ju enentáimsatarum. Ni uuntri nuatnaikiatin námpernumiaj taa, “uraitia” takui, takarniurj jinia ekeemakar wárik urattiai tusar nakáa pujuiniawai. Atumsha núnisrumek Wi atumj Uuntri támatai, shiir itiaatai tusarum anearum wekasatarum. ³⁷ Ni uuntri taak iwíáa pujuinian wáinkiarai nuka shiir pujuiniawai. Nu úntak iwiar, “misanam pujustarum” ni takarniurj títiatui tura yurumkan súsaratui. ³⁸ Kashi ajapén taaksha tura tsawaana aj taaksha ni takarniurj iwíáa pujuinian wáinkiuñka, nu takarin shiir pujuiniawai. ³⁹ Tura jusha nekaatarum. Jeenniua nu, kasa tátinian nékaitkuñka, iwíáa pujusaayi. Kasa wayá kasamkatniun suritkiaayi. ⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai

(Mateu 24.45-51)

⁴³Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?’ tímiayi.

⁴²Tutai Jesus tímiayi “Atumsha péñker takatan wáinnia núnisketrume. Takatan wáinir ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura péñker enentáimtana nu. ⁴³Ni uuntri taa, takatrin tímiatrusan túran wáinkiuñkia nu wáinniusha shiir enentáimsamniaiti. ⁴⁴Umirin asamtai, ni uuntri ashí ni waririn wáitrukat tusa apujsattawai. Nuna paant tájarme. ⁴⁵Tura nu takatan wáinniusha “úuntur wau táchattawai” tu enentáimias, ni uuntri takarniurin yajauch awajeakuñkia tura niñki ti yurumá, ti umar nampeakuñkia, ⁴⁶nuiñkia ni uuntri ni nákachmanum aya aneachma taa ti asutiáttawai. Umichu pujuinia nuí akupkattawai.’

⁴⁷“Takaran ni uuntri wakera nuna nékayat, iwiartsuk umitsuk pujakka ti awatramu átatui. ⁴⁸Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisañ nankaamas seawartatui.’

Jesusjai shuar akannartatui

(Mateu 10.34-36)

⁴⁹“Jijjai nekapsatnua nútiskanak nuñkanam jinia ikiapartaj tusan tamajai. Tura túrunat tusan ti wakerajai. ⁵⁰Imiantinia núnisan itiurchat ukatruktatui. Nusha wárik amuukat tusan ti wakerajai. ⁵¹“Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. ⁵²Yamá jukimiutak chikichik shuarnum señku ainia nu akannakartatui; menaintiu shuar ni shuarin jimiaran nakitratatui. Jímiarsha ni shuarin menaintiun nakitratatui. ⁵³Apasha ni uchirin nakitratatawai. Núnisañ uchisha ni aparin nakitratatawai. Nukusha ni nawantrin nakitratatawai, nawantrisha nukurin nakitratatawai. Tsatsarisha ni najatin nakitratatawai; najatisha tsatsarin nakitratatawai.”

(Mateu 16.1-4; Márkus 8.11-13)

⁵⁴Jesus áentsun chicharuk junasha tímiayi “Atumsha nantu akaatainmaani kjarматаi “yutuktatui” tátsurmek. Nusha nekas tárume. ⁵⁵Tura anaaraniá nase násenkamtai “sééjik átatui” tárume. Tura nekas tárume. ⁵⁶Yurañminmasha nuñkanmasha túruna nu nékarme. Túmaitiatrumsha ju tsawantaj túrunattana nusha ¿itiura nékatsrum? ¿Maaj, ántrairume!”

Nemasrumjaisha nawamnaikiata

(Mateu 5.25-26)

⁵⁷“Túrasha péñker ana nusha ¿urukamtai atumek enentáimsarum wáintsuram? ⁵⁸Irutramuram úuntnum júramkuñkia jintia wésamek “nuamtak iwiartai” titiá. Túrachkumñkia akupniunam juramkittieme. Tura niisha suntarnum akuptamkattame. Tura niisha sepunam enketmattawai. ⁵⁹Tura nekas tajai, nuí enkemamka ashí rearchisha akikmachkumka jíinkishtatme” tímiayi.

13

Ii enentái yapajátniuitji

¹Nu tsawantin chícham ujaktai tusar Jesusan tariarmiayi. Kariréa nuñkanam Israer-shuar ni waakarín máawar Yus susatai tusar pujuiniaj, Piratu nin maa, nuna numpen waaka numpejai pachimpramun ujakarmiayi. ²Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ¿tu enentáimprumek? ³Atsá; atumí enentái yapajáchkurmeka núnisrumek atumsha jakattarme. Nuna paant tájarme, tímiayi. ⁴Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusarénumiaj shuarjai nankaamas tunáa ásar túrunawarai ¿tu enentáimprumek? ⁵Atsá, tájarme. Atumí enentái yapajáchkurmeka núnisrumek atumsha jakattarme.”

Iikiu numi nereatsna nu

⁶Júnasha Jesus métek-taku chichaman tímiauyi. Júiti:

Shuar ni ajarin iikiu numin araamun takakuyi. Nerekchiash tusa iyumai. Túrasha nere atsumai. ⁷Nuñkia ni ajarin wáinniun timiai “Antukta, menaintiú uwitin júna nere átai tusan waketru pujajai; túrasha penké wáinkiachjai. Ajakta. ¿Urukamtaí ántrash wajastata?”

⁸Tutai ajá wáinin timiai “Atsá, uuntá; jú uwitin wajastí. Wajamurin takarsatjai tura péñker nuñkan matsatkatjai. ⁹Nujai nerekchampiash. Tura tuke nereachkuñkia nuñkia ajakta” timiai”, tímiayi.

Nuwan punuá kaarun Jesus tsuármiania nu

¹⁰Ayampratin tsawantai Israer-shuar iruntai jeanam Jesus unuiniak pujumiayi. ¹¹Nuisha nuwá pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiramiayi. Túramu asa pañkái nakuenkataj tukamá penké tujinmiayi. ¹²Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

¹³Nuna tinia ni uwejejai antinmiayi. Tura nú chichamaik nuwasha pañkái nakuenkamiayi. Tura Yusa náarin uunt awajsamiai. ¹⁴Tura Jesus ayampratin tsawantai tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nui tátinaitrume.”

¹⁵Tura Jesus tímiayi, “¿Ántar chichamtinia! ¿atumí waakarisha atumí umpuururisha yumi aartai tusarum ayampratin tsawantin atiarum júatsrumek? ¹⁶Tura jú nuwasha, atumí shuari Apraám shuarnumiá akiiniati. Nii tiasiúchu uwi Satanás yajauch awajsamujai jinkiamuyayi. Nincha ayampratin tsawant ain yajauch awajsamunmayá atíachminkiait” tímiayi.

¹⁷Jesus nuna takui ni nemasriisha natsaararmiayi. Tura penké shuar ni péñker túramurin wáinkiar warasarmiayi.

Mustasa jinkíái

(Mateu 13.31-32; Márkus 4.30-32)

¹⁸Nuyá Jesus tímiayi “¿Yusa akupeamuri warijiaín métek-takuit? ¹⁹Mustasa jinkiaíjiaí métek-takuiti. Mustasa jinkiaíncha shuar ni jariin araamiayi. Tsapái, tsakaak, uunt numi ajasmiai. Ti uunt asamtai chiní ni kanawen pasunmarmiayi.”

(Mateu 13.33)

²⁰Tura junasha tímiayi: “¿Yusa akupeamuri warijiaín métek-takuit? ²¹Tanta wakapru-taia métek-takuiti. Arinia núkap ana nui nuwá wakaprutain ishichik enkéamiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²²Jesus Jerusarénum jeatts weak untsurí peprunam wayá unuiniarkutak wémiayi. ²³Weai chíkich shuar aniasmiayi “Uuntá, ¿uwemainia nu ishichikiait?”

²⁴Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiartatui, tájarme. ²⁵Jeá nérenniuri wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarne. ¿Tuyantskaitrum?” turamtatrume. ²⁶Nuyá átum títiatrume “Túrasha, uuntá, iisha ámijiaí yurumámji, ámijiaí umarmaji. Tura ii pépruríncha unuiniamame.” ²⁷Túrasha nii títiatui “Tuyantskaitrum, nékatsjarne, tátsujrumek. Yajauch túrintirmeka winiyanka kanaktiarum.”

²⁸‘Nuyá Apraámsha, Isaksha, Jakupsha tura ashí Yúsnan etserin Yus akupeana nui wayawaru wáinkiarum tura aa ajapam pujusrum ti úutkuram naim tásarara ajattarme. ²⁹Tura Yus akupeana nui, nantu tatainmaaniyasha nantu akaatainmaaniyasha, arakiasha, nuñkaaniyasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrum, wayashtatrume. ³⁰Nuisha yamáí ukunmaani ania nusha emka ártatui; tura yamáí emka ainia nusha nuisha ukunmaani ártatui.”

Jerusarénnumaani Jesus wémiayi
(Mateu 23.37-39)

³¹ Nu tsawantaj Pariséu aents Jesusan tariat tiarmiayi “Erutis mantamattsá wakerut-mawai. Tuma asantai juyanka wetá.”

³² Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin júkin akupkartajai; túran jaancha tsuárartajai. Tura ukunam amuk-tatjai.” ³³ Tura Jerusarénnumaaní ishichik tsawant tuke wétiniatjai. Yúsnan etserin aya Jerusarénnuman jákatniuiti.’

³⁴ ‘Jerusarénnumiatiram, Yúsnan etserin máiniaitrumé; tura Yus akatar akupturmak-mania nusha kayajai tukurum máiniaitrumé! Tuma aín atash ni shiamprín etkétana núnisnak Wisá weaktasan wakerimjiarme, túrasha nakitramarme. ³⁵ Iistarum. Atum-niasha Yus ajapramaitrumé. Tura “Yusa náarijn winiana nu, shiir ati” títiatrumna nú tsawant jeatsain penké wáitkiashtatrumé. Nuna tájarne” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantaj Pariséu uuntri jeen Jesus yurumáttá wémiayi. Tura chíkich Pariséu wariniak túrat tusar ii pujuarmiayi. ² Nuí áishman eaak-jaa Jesus pujamunam naka pujumiayi. ³ Jintinniunchar Pariséunchar Jesus aniasmiayi “¿Warí tárúm? ¿Ayampratin tsawantaj jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuiñkia jaan antiñ tsuármiai. Tura “shiir wetá” tímiayi. ⁵ Nuyá Pariséun chicharuk, “Atumí umpuurarísha, waakarísha waq táurmanum akaiki iniamtai, ayampratin tsawant aín nu chichamaik júatsrumek” tímiayi.

⁶ Takui áimkiatniun penké tujinkiarimiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaitsar ti wakeruiniakui, Jesus nuna wáiniak juna jintinramiayi:

⁸ “Nuátnaikiatin nampernum penkeri pujutainium pujusaip. Nuí pujakminkia, chíkich ámijjai nankaamas penkeri táchatpiash.’

⁹ “Tura ipiatmania nu chichartamuk “Chíkich iiktusta” turamchatpiash. Nuiñkia chíkich náñkatkamu pujutainium wéakum natsartatme. ¹⁰ Antsu ipiatmakmin, náñkatkamu pujutainium pujustá. Nuiñkia ipiatmamnia nu chichartamuk “Amikru, ámeke juí penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui. ¹¹ Iimiata, “penkerintjai” tu enentáimtumá nuka péejchach awajnastatui. Tura ímianchach enentáimtúmana nuka waantu ajastiniaiti.”

¹² Nuyá Nin ipiaamua nuna chicharuk tímiayi “Amesha yurumáiti tusam untsuktajtsam wakerakmeke, ame amikrumsha, yatumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. ¹³ Antsu yurumáiti tusam untsuktajtsam wakerakmeke, kuítrincha, wekaicha, shutuapsha, kusurussha ipiaawarta. ¹⁴ Niisha akirmaktinian tujintiniawai. Péñker shuar nantakiartatna nuí akinkiatatme. Nu tuma asantai warastatme” tímiayi.

Unt namperan Jesus nekapmá chichasmiania nu

¹⁵ Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiniak, yurumkunka ti shiir ainti.”

¹⁶ Nuna takui Jesus juna jintintiamiayi: “Áishman namperan nájanuk, untsurí shuaran taarti tusa akatar akupkamai. ¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurñ akupkamai. ¹⁸ Tura winichiniaitji tusar ashí ujakarmai. Chíkich timiai “Nunñkan yamá sumarmakjai. Iyutaj tusa wéakun winishtatjai. Tsankurturti” timiai. ¹⁹ Tura chíkich chichaak “Wishá tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. ²⁰ Tura chíkich chichaak “Yamá nuatnaikajai. Tuma asan winishtatjai” timiai. ²¹ Takarin waketki ni úntrin ashí nuna

ujakmai. Nuna antuk niisha kajekmiayi. Tura ni takarniurin timiai “Ju péprunam pénger jintianmasha tura uchich jintiachinmasha weme, kuítrincha tura wekaichasha, shutuapsha, kusurusha itiaarta.”²² Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

²³ ‘Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearuj piakat tusan wakerajai. ²⁴ Emka ipiaawarmajnia nuka penké chikichkíksha winíngkia yurumáchartatui, tajarme’ tmiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearmiayi. Niisha nuna apajas iis juna tmiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umaincha Wijiai nankaamas enentáimtakka, tura shiir pujustinian wakerak Winí winitniun nakitiakka winia unuiniamur ajaschamniaiti. ²⁷ Ni wakeramurin ajakeak ni krusri yanakí nemartatsna nu winia unuiniamur ajaschamniaiti.’

²⁸ ‘Jea yaki jeamtaj tusam wakerakmekka, kuítian urutmak ajapawaintiaj tusam tura urutmajaink³ amukaintiaj tusam emka enentáimsashtatmek. ²⁹ Túrutusk aya ukura iniaisam amuktin tujinkiamínkia, nuna wáiniainia nu, wishikiainiak juna tiartatui: ³⁰ “Íiskua. Nu shuar jeamtinian nankamamiayi. Túrasha amuktinian tujinkiamiyai.”’

³¹ “Tura uunt kapitíán chíkich kapitíánjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaintjash tusa enentáimsashtatmak. ³² Tujintiakka, chíkich kapitíán jeachat pujaanak, nawamnaiki-atai tusa akatar akupkashtatmak. ³³ Wats, “Kristu unuiniamuri ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

Wee michumarka yajauchiiti
(Mateu 5.13; Márkus 9.50)

³⁴ ‘Weeka jeaku péngeraiti. Tura michumarka çitiurak atak pénger ati? ³⁵ Wee michumarka arakmatniunmasha yayaatsui. Tura tsuatnum ikiusmasha ántraiiti. Aya ajapatniukete. Kuishim ákuínkia antuktarum” tmiayi.

15

Jesus murik menkakamu chichaman unuiniamiania nu
(Mateu 18.10-14)

¹ Akupniu kuítrin-juu tura yajauch shuarsha Jesusan anturkatai tusar tarú wearmiayi. ² Tuma asantai Pariséusha, Israer-shuara jintinniurísha Jesusan áujmatainiak “Jusha tunáa shuaran itiaawai tura niijjai yurumáiniawai” tiarmiayi.

³ Nuna tuiniakui Jesus ju métek-taku chichaman jintintiwarmiayi:

⁴ “Shuar sian (100) murikiun takuschampiash. Nu siánumia chíkichik menkakamtai nuwintia nuwíngkia ni matsatmarin ikuak, menkaka nuna ti eakchattawak. Wáintsuk iniaiashtatui. ⁵ Tura wáiniak yakainium awankek waras jeen wáketui. ⁶ Tura jeen jeá ni amikrin, írutrampuríncha ikiaanak “Wijiai warastarum. Murikiur menkaka nuna wáinkiajai” tawai. ⁷ Wats, nuwintia nuiwi pénger shuar akui nayaimpiniam warastin awai. Tura antsu chíkichk yajauch shuar ni enentáin yapajiamtáinkia, nú nankaamas warastin átatui, tajarme’ tmiayi.

Kuit emenkakman Jesus unuiniamiania nu

⁸ ‘Nuyá chíkich enentáimsatai. Nuwá tias kuítian takakna nuna chíkichik menkakamtai, wáinkiataj tusa jinia ekeemak, jean japimiak émamkes eakchattawak. ⁹ Tura wáiniak ni amikrin, írutrampuríncha ikiaanak, “Wijiai warastarum. Kuit menkakamia nuna wáinkiajai” tawai. ¹⁰ Núnisan yajauch shuar ni enentáin yapajiamtai, Yusa suntarí matsatmanum ti warastin awai” tmiayi.

Uchi ni aparín waketitniun Jesus unuiniamiania nu

¹¹ Nuyá Jesus juna unuiniamiyai:

“Áishman̄ jímíarâ uchin takakuyi. ¹² Tura pátatka uchi ni aparín timiai “Apawá, surustiniaitmena nu yamá surusta.”

“Tutai ni aparí ni kuítrín jímiapetek nakak mai uchin susamai. ¹³ Ishichik tsawant nan̄kaamasaj̄ pátatka uchi ni warirín irur jukí jeachat chíkich núnkanam wémai. Nuísha nán̄kamas yajauchin túrak kuítrín ashí ajapamai. ¹⁴ Ni kuitr̄j ashí amuuka aín̄ nu nun̄kanam ti tsuka ámai. Niisha núnisan̄ tsukar̄jín wáitsamai. ¹⁵ Túmak takatan eaktajtsa nu nun̄kanmaya apachiin werimiai. Nu áishman̄sha kuchirín wáitrukta tusa akupkamai. ¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha pen̄ké súcharmai. ¹⁷ Tumáa pujus nuínkia enentáimpramai. “Winia aparuí takau shuar pen̄keran ti yurumáiniawai. Tura wikia juí tsukaruj̄ wáitajai. ¹⁸ Wats, aparuj̄ waketkitjai. Tura aparun chicharkun “Apawá Yúsjaisha ámij̄jaisha tunaan túrajai, titiajai. ¹⁹ Ame uchiram áchamniatjai yamaikia. Ame takarniurmea áantsanak átaj tusan wakerajai” titiajai” tu enentáimsamai. ²⁰ Tura wajakí ni apar̄jín waketkimiai’ t̄imiayi.

“Tura ni apar̄sha jeachat winian wáiniak waitnentramai. Aparí tsékepen̄ki in̄kiun miniakak mukunámai. ²¹ Nuínkia uchir̄sha timiai “Apawá, Yúsjaisha ámij̄jaisha tunáan túrajai. Ame uchiram áchamniatjai.”

²² Túrasha ni apar̄nkia ni takarniurín chicharuk “Ti pen̄ker pushí itiarum áentsratarum, timiai. Tura uwejn̄um aweetaisha aweemtikiatarum. Tura sapat̄cha aweemtikiatarum. ²³ Túrarum waaka nueram ana nu maatarum. Námper nájankur shiir enentáimsar yurumámi. ²⁴ Warí, ju winia uchir̄ jakaapitia tu enentáimsamjai. Túrasha iwiaakui. Men̄kakama nuna wáinkiajai.” Nuínkia ti warasarmai’ t̄imiayi.

²⁵ “Tumaj̄ iwíái úchikia takatnum pujumai. Tura wáketuk, jeá nuntumas jantsemáiniak túntuuyamun antukmai. ²⁶ Nuínkia yaintr̄j matsatun chikichkiniak untsuk “¿Warimpait?” timiai.’

²⁷ “Tura nii chichaak “Ame yátsum tayi. Túramtai ame apa waaka nueram maatai tawai, ame yatsum pen̄ker tau asantai” timiai.’

²⁸ “Tura iwíai uchi kajek wayat̄niun nakitramai.’

“Tuma asantai ni aparí jiintiuki “wayata” timiai.’

²⁹ “Tura uchisha aparín chicharuk “Wisha ámin umirkun untsur̄j uwitin ame takatrumin túraitjai. Nu nékame. Túrasha winia amikruj̄aj̄ námper najanatin chiipiuksha pen̄ké surichuitme. ³⁰ Tura ju ame uchiram nuwaj̄aj̄ yajauchin túrak ame kuítrumin wasurkania nu támat̄ai, waaka nueram wáachumek” timiai.’

³¹ “Takui aparí chicharuk “Uchir̄j, ámeka wij̄j̄aj̄ tuke pujame. Tura wi takakjana nusha ashí áminuiti. ³² Tura ame yatsum jákai ti enentáimsamaj̄ nu iwiaakuiti. Men̄kaka nu yamaikia wáinkiajai. Tuma asantai námper najanar waraschat̄niukaitaj̄” timiai’ t̄imiayi.

16

Takatan wáinin

¹ Ju métek-taku chichamnasha Jesus ni unuiniamu? “Tura nii chichaak “Ame yátsr̄j̄n unuiniamiayi.

“Kuítrintin áishman̄ka takatr̄j̄n wáinniur̄j̄ ámai. Tura nérenniun ujaniak “Ame wáinniuram ame kuítrumin nán̄kamas ajapeawai” tiarmai.’

² Nuna antuk ni wáinniur̄j̄n untsuk “¿Warinia jusha turamainia? timiai. Yamaikia winia wáinniur̄ áchattame. Tuma asantai winia kuítruj̄aj̄ itiurkamea nu iniaktursata” timiai.’

³ “Tutai takatan wáinin enentáimsamai. “Maaj, wisha itiurkat̄jak, timiai. Nuñka táurtinniasha jeatsjai. “Kuit surusta” t̄itinniasha natsamajai. ⁴ Winia takatur atsakui yurumkan ajamprusarat tusan túrat̄ajna nuna nekajai” tu enentáimsamai. ⁵ Nuyá nérenniun tumashmaku armia nuna an̄kant an̄kant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

⁶ “Niisha ámiuk “Asuitin siañ taru tumashiit̄jai” timiai.’

“Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya sen̄kuentachik aarta” timiai.’

⁷ “Nuyá chíkich tumashmaku támat̄ai “¿Amesha urutma tumashiit̄iam?” timiai.’

‘Tutai nii chichaak “Shana siaṅ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

⁸‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjají nan̄kaamas Yus-shuarcha aijjají ni túratniuriniak takainiak imiá enentáimkia ániawai.’

⁹‘Ju nuṅkanam anaṅkatin átsuk. Tura kuitscha aya ju nuṅkanmayan̄kete. Tuma asamtai atumsha kuitrumjají “shuaran yaiṅtaj” tu enentáimsatarum. Kuitjají yaiṅtin amuukamtai atumsha amuicha jeṅnam ipiaamu átaj tusarum túratarum.”

¹⁰‘Shuar ishichik takakna nujají péṅker túrakka, núkap takakna nujajísha péṅker túrat-tawai. Tura ishichik takakna nujají péṅker túrachkuṅka, núkap takakna nujajísha péṅker túrashatui. ¹¹Tuma asamtai ju nuṅkanmaya anaṅkartin kuitjají péṅker túrachkurmeka, tuke átin ana nujají takastincha žitiur takastarumek? ¹²Takakme nuna Yus ikiatmasuiti. Nujají péṅker túrachkurminkia, atumnia átinia nuna žitiurak suramsat?’

¹³‘Takarniurí jimiará úuntrintin ajastinian tujintiawai. Warí, chikichnaka anek chikichnaka nakitrashta túrattawai. Turya seṅkuentachik aarta” timiaituak. Chikichan umiruk chikichnaka umirkashtatui. Yussha kuitcha máí-metek enentáimtuschamni-aitrume” tímiayi Jesus.

¹⁴‘Pariséusha kuítian anen armia nu, ashí ni táman antukar Jesusan wishikrarmiayi. ¹⁵Túmakui Jesus nin tímiayi “Atumsha aents ímmianum péṅker awajmamprume. Túrashataumí enentáincha Yus péṅker nekawai. Kame winia “nan̄kaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶‘Juan étsertsají Muisáis aar akupkama nunasha tura Yúsnan etserin unuiniarmia nunasha antuktin ármiayi. Tura yamaisha tímianiaí ti shiir chicham awai. Yus akupeana nuí urukukit nuka paant etserkamuiti. Tura ashí shuar nuí pachiiṅkiataj tusar ni kakarmarjijaiṅ ti takainiawai.’

¹⁷‘Túrashataunchu akupkamu ashí chicham uminkiatniuiti. Nu chicham uminkiashtinka nayaimpisha nuṅkasha amukatniujají nan̄kaamas itiurchataiti.’*

¹⁸‘Áishman̄ nuarṅin ajapa chikichan nuátkuṅka tsanirmawai. Tura nuwá ajapamu niiniurtakka nusha núnisan̄ tsanirmawai.’

Kuítrintin áishman̄ Rásarujají

¹⁹‘Áishman̄ kuítrintin ámai. Niisha imiá shiir pushin ti kuit ainia nujají iwiarmamniuyi. Tura tuke tsawant yurumak ti kuit amia nujají namperan najannuiyi. ²⁰Tura kuítrincha ámai ni naarí Rásaru. Niisha kuchapruku tunamaruyi. Tuke tsawant kuítrinniu wáitirijín pujuyi. ²¹Ti tsukamak kuítrinniu misarinia kakekan yuattsá wakerimiai. Tura yawasha ni kuchaprin̄ nukatiarmai. ²²Kuítrincha jakamai. Jakamtai jaka shiir pujutainium, Apraám pujumia nuí nayaimpinmaya suntar júkiarmai. Kuítrinniusha jakamai. Jakamtai iwiarsarmai. ²³Jaka pujutainium wáitias pujus, paṅkái ímias, Rásarun Apraámjají pujuinian wáinkiamai. ²⁴Wáiniak untsumuk “Apawá Apraamá wáitnentrurta, timiai. Rásaruka tsara uwejejají entsan uchupir winia iniairun imichturat akupturkata. Wisha juí jinium pujusan ti waitiajai” timiai.’

²⁵‘Tutai Apraám timiai “Uchirú enentáimpratá. Ame nuṅká iwiaaku pujusam ti shiir pujumame. Antsu Rásaruka nuí ti yajauch pujumai. Tura niisha yamaikia juí áyamui tura ámeka wáitiame. ²⁶Tura nú arant nánata ti uunt awai. Tuma asamtai juyá aj wétinian wakeruiniayat tujintiainiawai. Tura aiyá juí tátinian wakeruinia nusha tujintiainiawai.”’

²⁷‘Nuṅkia kuítrintin timiai “Nuṅkia apawá Apraamá, juna seajme. Winia aparú jeṅn Rasaru akupturkata. ²⁸Nuisha winia yatsur seṅku matsatainiawai. Niisha ju wáitsatniunam tácharat tusa ujákartí, tájame” timiai.’

* 16:17 Mateu 19.1 ya seṅkuentachik aarta” timiai-12; Márkus 10.1-12

²⁹“Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

³⁰“Tutai kufrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajíawarainti.”’

³¹“Tura Apraám timiai “Muisáis áarman tura Yúsnan etserin áarman anturainiachkuṅka jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti

(Mateu 18.6-7, 21-22; Márkus 9.42)

¹Jesus ni unuiniamurṅin juna tímiayi, “Aentsun yajauchin túrumtikiattana nu tuke átatui. Tura shuar ni áin tunaan wakerumtikna nu aneartí. ²Ju shuar uchich ainia nuna yajauchiniun túrumtikna nuna Yus imiá asutiáttawai. Tuma asantai nuna túratsajṅ uunt kayajajṅ kuntujnum jinṅkiá nayaantsanam ajunkam maak ainti. ³Túrasha atumek ímias-tarum. Ame yatsun ámin tunáa túrutmamtaṅkia chicharkata; tura niisha “tsaṅkurturta” túramkuṅkia tsaṅkurata. ⁴Chikichik tsawantiniṅ siati túrutmamtai, tura “tsaṅkurturta, atakka túrashtatjai,” siati túramkuṅkia, tuke tsaṅkurata.”

Yus nekas enentáimtakrikia tujinkiashtatji

⁵Jesusa unuiniamurṅin Nin chicharuk “Yus enentáimtajnia nú naṅkaamas enentáimtustin jáinmaktá” tiarmiayi.

⁶Tutai Jesus tímiayi “Mustasa jinkiá ti ishitiúpchich ana núnisaṅ ishichkisha Yus enentáimtaikturmeka, sikiumuru numi wajana nu, “Wajamurmijaṅka ukuiniakam nayaantsanam wajasta” tákurmin nú numi umirtamkainti.”

Yusa takatrṅ takasar “ti peṅker túraitji” tichatniuitji

⁷“Atumí takarniurṅin arakmasua amik, waakancha iis támatai, ṅnú chichamaik amesha, “Winitíá, yurumáitíá” tíintmek? ⁸Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tichaintmek. ⁹Nii túratin ana nunak túratsuk. Tuma asantai yumisashatme. ¹⁰Atumsha núnisrumek Yus túramna nu ashí umikiam “ti peṅker túraitjai” tichatniuitme. Antsu “aya ii túratniurṅin ana nuke tura asar iikia ánthraitji” tíiniuitme.” Tu tímiayi Jesus.

Tias áishmanṅan tunamarun Jesus tsuármiania nu

¹¹Jesus Jerusaráṅnum wesa Kariréa nuṅka ikiuki Samaria nuṅkanam naṅkaamakmiayi. ¹²Tura péprunam jeamtai, tias áishmanṅ ripra suṅkurjajṅ tunamaru armia nu, arant wajasarmiayi. ¹³Tura unsumainiak “Uunt Jesusá, waitnenturta” tiarmiayi.

¹⁴Jesus nin wáiniak, “Pátriṅ werirum iniaktumastarum” tímiayi.

Tura wésar peṅker ajasarmiayi. ¹⁵Nuyá chikichik ni tsuamarman nekáa kakantar chichaki Yusa náarṅin uunt awajki wakетки Jesusan tarimiayi. ¹⁶Yumisataj tusa Jesusan tikishmatar piniakumar tepesmiayi. Nu áishmanṅka Samarianmayayuyai.

¹⁷Nuna wáiniak Jesus tímiayi “Tsuámaru tiáschakait. ṅChikich nuiwisha tui pujuinia?

¹⁸ṅJuṅ yajaya áishmanṅ niṅkik Yusa naarṅin uunt awajsataj tusa wakетки tai?” ¹⁹Nuyá áishmanṅkan tímiayi, “Winia nekas enentáimtura asam peṅker ajasume. Wajakim shiir weta” tímiayi Jesus.

ṅYusa akupeamurṅin urutaik ati?

(Mateu 24.23-28, 36-41)

²⁰Pariséu aents Jesusan aníak “ṅYusa akupeamurṅin urutaik ati?” tiarmiayi.

Tutai Jesus tímiayi, “Yusa akupeamurṅin paant wáinkiachminiaiti. “Yamaí naṅkamnaya” tichamniaiti. ²¹“Juṅ awai, nuṅsha awai” tichamniaiti. Warí, Yusa akupeamurṅinṅka atumiṅin pujawai” tímiayi.

²²Nuyá ni unuiniamurṅin chicharuk juna tímiayi: “Tsawant jeattawai atumsha Winia Aents Ajasu tutan “aya chikichik tsawantkesha Nii wáinkiarṅka mak” turuttiatrume. Túrasha tujinkiatarme. ²³Aents Ajasu tutai “juṅ pujawai, nuṅsha pujawai” tuṅniakui weriirap. Tana nu nemariirap. ²⁴Wi, Aents Ajasuitjiana nu tátinian tsawantur jeamtai

paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. ²⁵ Tura nu túruntsain yamai pujuinia nu Winia nakitruiniakui ti wáitsatniitjai. ²⁶ Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai. ²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuinai Nuái uunt kanunam enkemprantai, amarak nu aentsnasha mash amuukarmiayi. ²⁸ Tura Sutuma péprunmasha Rauta íru-tramurísha núnisan Yusa asutiátniurj enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi. ²⁹ Tura Raut Sutuma péprunmaya jinkintai asupri tutai kaya keek yútana áintsan nayaimpinmaya kakeetuk nu áentsun mash máawarmiayi. ³⁰ Núnisan winia atak tátiniur jeamtai enentáimtsuk pujusartatui.'

³¹ 'Nu tsawant jeamtai jea yakiinj pujana nú shuar ni warirj achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti. ³² Rauta nuarj túrunamu enentáimpratarum. ³³ Aya ju nunkanmayan enentáimias "iwiaku átaj" tana nu ni iwiakmarj emenkáktatui. Tura ju nunkanam ni iwiakmarj emenkana nu nekas iwiakma ana nuna wáinkíattawai. ³⁴ Paant tájarne. Nú káshitin jimiará áishman nuu peaknuman kanúu tepeartatui. Chikichik junaktiatui, chikichkia ikiunkittiwai. ³⁵ Jimiará nuwá mái-metek nekée pujuartatui. Chikichik junaktiatui, chikichkia ikiunkittiwai. ³⁶ Jimiará áishman kampuniunam wekainiartatui. Chikichik junaktiatui, chikichkia ikiunkittiwai." Tu tímiayi.

³⁷ Nuna antukar "Uunta ¿tuj túrunatta?" tiarmiayi.

Tutai ni chichaak "Jaka tepana nuí chuan káutkartatui."

18

Shuar yawetsuk Yúsan tuke áujsatniuiti

¹ Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

² "Chíkich péprunam shuaran akupin amai. Nú áishman Yúsnasha ashamchauyi; shuárnasha péñker enentáimtichuyi. ³ Tura nú péprunam waje amai. Niisha shuáran akupin chicharuk "Áishman winia yajauch awajtusmania nu írtusta" tusa tuke waketru pujuyi. ⁴ Yámankamtaikkia nin anturkatniun nakitmiai. Tura ukunam enentáimias "Wisha Yúsan ashamachiatnak shuárnasha péñker enentáimtichuiatnak ju waje tana nuna túrattajai. ⁵ Warí niisha tuke taa itit awajtatsuk. Tuma asamtai nin kajerkañ tusan wárik túrattajai" timiai" tímiayi.

⁶ Nuyá uunt Jesus tímiayi "Shuaran akupin yajauchiitiat nuna timiai. ⁷ Tura Yus ti péñker asa, ni achikmarin tsawajsha, káshisha untsuamka nú napkaamas anturkashtatuak. ¿Yáitsuk menkakatuak? ⁸ Atsá, wárik yáinkíartatui, tájarne. Tura Wi Aents Ajasuitjana ju atak támatai, ¿shuaran tuke Winia nekas enentáimturainia nuna wáinkíatjash?" tímiayi Jesus.

Pariséusha, kuítian-juuncha Yúsan áujsarmia nu

⁹ "Péñkeraitjai" tu enentáimtumainiak chikichnaka yajauch enentáimtiarmia nuna Jesus nekapmá chichasmiai. Juna tímiayi:

¹⁰ "Jimiará áishman Yusa Uunt Jeen Yus áujsatatui tusar wearmai. Chíkichkia Pariséuuyi, chíkichkia kuítian-juuyi. ¹¹ Pariséusha wajakí Yúsan áujuk júnis tímiayi: "Yusrú, chíkich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújajsha métekchaitjai. ¹² Warí, Ame akupkamna nuna iniañkasan wisha chikichík semanatinij jimiará tsawant ijarman áujeajai; tura wi achiajna nuna tiásnumia chikichkiniak Yúsnaiti tusan akanan súajai." Tu tímiayi.'

¹³ "Tura kuítian-juusha arant wajas, nayaimpinmaanñ pankáñ fimsatniunkesha natsaam, tsunsuma, ni netsepen awatí "Yusá, ti tunaitjai. Waitnénturtrá" timiai.'

¹⁴ "Wats tájarne, nu kuítian-juu shuar Yus ímmianum ni enentáñ péñker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar

naŋkaamantu enentáimtumana nuka pééjchach awajnstatui. Tura antsu pééjchach enentáimtumana nu, naŋkaamantu awajnstatui” tímiayi Jesus.

Uchisha Jesusna áminiaiti
(Mateu 19.13-15; Márkus 10.13-16)

¹⁵ Jesus antiŋkiarat tusar uchin itiararmiayi. Tura Jesusa unuiniamurisha nuna wáinkiar suritkiarmiayi. ¹⁶ Tura Jesus nin untsukar tímiayi “Uchi Winí winitin tsanŋkamkatarum, surimkiairap. Enentáimsatarum. Uchichia áintsan enentáimtumana nú shuárak Yus ni enentáin akupin ajasminiaiti. ¹⁷ Uchi ni úuntrin umira núnisan shuar Yúsán umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjái áujmatsamiania nu
(Mateu 19.16-30; Márkus 10.17-31)

¹⁸ Shuara uuntri Jesusan tarí áujsamiayi. “Uuntá, amesha péŋkeraitme. Tuma asam, turuttia, ¿warinia túrakna tuke iwiaaku áтатаj?” tímiayi.

¹⁹ Tutai Jesus, “¿Urukamtia Winia, péŋkeraitme, túrutam? Aents péŋkerka atsawai. Aya Yusak péŋkeraiti. ²⁰ Tura Yus akupkamu ana nu péŋker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáim-tustarum. Nusha nékame” tímiayi.

²¹ Tutai áishman tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatransai, tímiayi. Ame takakmena nu ashí surukam kuítrincha ainia nu susarta. Nuiŋkia nayaimpiniam kuítrum átatui. Túram nemartustaj tusam winitia.”

²³ Tura nuna antuk, nu áishman ti kuítrintin asa ti kuntuts enentáimpramiayi. ²⁴ Tura kúntuts enentáimpramtaí Jesus nuna nekáa “Kuítrintin ainia nu Yus akupeemunam pachiinkiatin ti iturchataiti, tímiayi. ²⁵ Kamiriuka, uunt ana nu, auja jín wayatin itiurchataiti. Tura shuar kuítrin ti enentáimtana nu Yus akupeemunam pachiinkiatin nú naŋkaamas itiurchataiti.” Tu tímiayi.

²⁶ Tura nuna antukarmia nu tiarmiayi “¿Nuiŋkia yaki uwempramniait?”

²⁷ Tutai Jesus tímiayi “Aents tujintiainia nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkesha, uchirínkisha ikiuakka ju nuŋkanmasha núkap wáinkiatstawai nu shuar. Tura tuke iwiaaku pujustinniasha wáinkiatstawai.”

Ataksha ni jákatniurin Jesus ujakmiania nu
(Mateu 20.17-19; Márkus 10.32-34)

³¹ Jesus ni tuse unuiniamurin akanki ikiaanak juna tímiayi:

“Jerusarénum jeatemaji. Juŋsha Jerusarénum Winia, Aents Ajasu tutain, túrunatniurun Yúsán etserin yaunchu áatrurarmia nu uminkiatstawai. ³² Apachnum surutkartatui. Túrawar wishikrurar, katsekrukar usukruawartatui. ³³ Awatiar mantuáwartatui. Túramaitnatnak menaintiú tsawantai nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

Jirikiúnmayá áishmanŋkan Jesus ímtikmiania nu
(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nuí áishman jii kusuru, kuítian surusarat tusa jintiá pujumiayi. ³⁶ Untsurí aents naŋkaamainian antuk “¿warinŋkit?” tímiayi.

³⁷ Tutai, “Nasarétnumiá Jesus naŋkaamawai” tiarmiayi.

³⁸ Kusurusha nuna antuk untsukum “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

⁴⁰Nuñkia Jesus wajas “itiatarum” tímiayi. Tura nii támatai, ⁴¹“¿Warí itiuurtukat tusamea wakerutam?” tímiayi.

Tutai kusuru ámiuk “Uuntá, ímtiasan wakerajai” tímiayi.

⁴²Tutai Jesus chichaak “ímtia. Winia nekas enentáimtura asam péñker ajasume” tímiayi.

⁴³Nu chichamaik kusuru ímimiayi. Tura Yusa naarí uunt awajki Jesusan nemarmiayi. Tura ashí aents nuna wáinkiarmla nusha Yusa náarín uunt awajsarmiayi.

19

Sakú Jesusjaj

¹Nuyá Jirikiú péprunam wayá nuñ wekaikini ajamiayi. ²Nuñ kuítrintin áishman ni naarí Sakú pujumiayi. Nu Sakú kuitian-juu úuntriyaayi. ³Aents ti káunkámtai, Sakú ti sútarach asa, Jesusan ístaj tukamá tujinkiamiayi. ⁴Tuma asa Jesus nuke nañkaamaktin asamtai, eemki tsékiniki sikiumuru numi wajamunam wakamiayi iistaj tusa. ⁵Jesus nuñ nañkaamak pañkáj ímias chicharuk “Sakú wárik akáikitiá. Ame jeemiin yamá kanartiniatjai” tímiayi.

⁶Tutai Sakúsha wárik akaiki, shiir enentáimias Jesusan itiaamiayi. ⁷Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

⁸Nuyá Sakú wajaki Jesusan chicharuk “ístá Uuntá, wi takakjana juna jímiapetek nakakan kuítrincha ainia nuna susartatjai. Tura wáitruan chikichan kasarkaitkiuncha menaintiu patatsan awainkittijai” tímiayi.

⁹Tutai Jesus tímiayi “Ju áishman Apráama shuárintiat yamá niisha níniujaj uwempra asa nekas Apráama shuarí ajasuiti. ¹⁰Wisha Aents Ajasu asan menkakarú ainia nuna ekan uwentikrartaj tusan táwitjai.” Tu tímiayi.

Kuítian nekamá chichasmiayi

¹¹Nu aents Jesusan anturkarmia nu “Jerusarénnum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusarénnum nuntumsaraj, nuna enentáimsarajín tusa Jesus juna métek-takun chichasmiayi:

¹²“Áishman péñkerí amai. Nu áishmansha jeachat chíkich núnkanam kapitíán náamkan tátaj tusa wemai. ¹³Tura wétsuk ni takarniurín tias armia nuna untsukarmai. Tura ankant ankant kuit kurijaj nañkaamas péñker armia nuna suíniak “Ju kuitjai wi táatsajín takakmá ajatarum” timiai.’

¹⁴“Tura ni nunkeniá shuarka nakitiarmai. Túmainiak “nu áishman ii kapitíántrí ajasajín túsar nakitijai” nu titiá túsar áishmankan akatrar akuptukarmai.’

¹⁵“Tuma ajín kapitíán náamak ni nunken waketki tamai. Taa “winia kuítrujaj warí túrarum” títij tusa ni takarniurín kuitia súsarmla nuna untsukarmai.’

¹⁶“Ni takarniurí emka chikichik taa “ame kuítrumajaj takakmasan tias patasan achikmajai” timiai.’

¹⁷“Tutai kapitíán chichaak “Péñker túrame. Ishichik susamjamna nújajínkí wi tímiajna tímiatrusmek túrame. Tuma asakmin tias péprun akupin awajsattajme” timiai.’

¹⁸“Chíkich taa “ístá Uuntá, ame kuítrumajaj takakmasan senku patasan achikjai” timiai.’

¹⁹“Nunasha chicharuk “Amincha senku péprun akupin awajsattajme” timiai.’

²⁰“Nuyá chíkich taa “Uuntá, ame kuítrumin panijajaj íjian ikiusmajai. ²¹Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

²²“Tutai kapitíán timiai “Maaj, amesha ti yajauchiitme. Ame támena nuke makurmawai. Wi kakaram chichau ajsha, ikiuschiatan achin ajsha tura araknasha arakmachiatan juu ajsha, ²³nuñkia ¿jurukamtia kuit-ikiutainiam ikiuschamam? Nuñkia wi atak táakun patasan achikíajajna” timiai. ²⁴Tura nuñ wajarmia nuna chicharuk “Kuítian takakmarí juruktiarum; túrarum tias takakna nú shuar susatarum” timiai.’

²⁵“Tura niisha chichainiak “túrasha Uuntá, tias takakja” tiarmai.’

²⁶ Tutai kapitían chichaak “Takakna nujaj takaakuinkia patatnastatui tájarme. Tura takakna nujaj takaachkuinkia ishichik takakkuisha jurunkittiawai. ²⁷ Tura winia nemasur kapitían ajasain tusar nakiturrarmania nu itiatarum. Tura wisha íimiaiñ máatárum” timiai.” Tu tímiayi Jesus.

Jerusaréñnum Jesus wayamiayi

(Mateu 21.1-11; Márkus 11.1-11; Juan 12.12-19)

²⁸ Nuna tuasua amik Jesus Jerusaréñnumaani wémiayi. ²⁹ Petpajái pepru tura Petania péprusha Uriwiu náinnium tjiuchiayi; nuí jeastatuk ajatemas ni unuiniamuriñ jímiarar chicharuk, ³⁰ “Tjiuch péprunam wetarum. Túrarum nuí umpuuruch ekemtukchamu jinkiamu wájá wáinkiatarme. Nu atíarum itiatarum. ³¹ Tura “¿urukamtai atíarum?” turamainiakuisha, “ii uuntri wakerawai” títiarum” tímiayi.

³² Tutai unuiniamuriñ wear, Jesus timia ímiatrusañ wáinkiarimiayi ³³ Tura umpuuruchin atíakui nérentin chichainiak “¿Urukamtai umpuuruchsha atíarum?” tiarmiayi.

³⁴ Tutai unuiniamusha “ii uuntri wakerawai” tiarmiayi.

³⁵ Tura umpuuruchin Jesusan itiarimiayi. Túrawar ni pushiriñ umpuuruchiniam awantkar Jesusan ekenkarmiayi. ³⁶ Tura Jesus wétinnium ni pushiriñ jintianam ayaparar áintrarmiayi. ³⁷ Tura Uriwiu naint awankénamunam tjiuch ajasarmatai untsurí aents Jesusan nemariarmia nu warainiak kakantar untsumainiak aents tujintiamun untsurí túran wáinkiaru ásar Yusa náarín uunt awajsarmiayi. ³⁸ “Yusa náarín winiana ju ii uunt Akupniuiti. Níncha Yus shiir awajsati. Nayaimpiniam pujuinia nu shiir enentáimsar Yusa náarín uunt awajsarti” tiarmiayi.

³⁹ Tura Pariséu aents nuí páchitra pujuarmia nu Jesusan chicharainiak “Uuntá, nemarkamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuiñkia ju takamatsarmatainkia, kayasha untsumkarainti. Nuna paant tájarme” tímiayi. ⁴¹ Jerusaréñnum tjiuch ajatemas péprun wáiniak útuk júnis tímiayi: ⁴² “Jerusaréñnumiá shuártiram, ju tsawantinkesha shiir pujustintrum nekaarmeka maak. Túrusha yamaikia nekaatin nañkaamasai. ⁴³ Kame ti itiuichat tsawant jeartamtatrum. Atumí nemasri nuñkajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrum. ⁴⁴ Túrutma nuñká ajuñmartatrum. Tura atumiñ pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamuriñ tarijrumna nu nekaachu asakrumin túrutmattarme.” Tu tímiayi.

Yusa Uunt Jeeñ suruktinian Jesus surimkiamiania nu

(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeeñ wayá suruktasa pujuarmia nuna sumaktasa pujuarmia nunasha jiki awemarmiayi. ⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrusha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeeñ Jesus uwempratin chichaman unuiniak pujaj Israer-patri úuntriñsha, Israer-shuara jintinniurishá, Israer-shuara úuntriñsha táarmiayi. ² Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

⁴⁸ Túrusha ashí aents émamkes anturainiakui máatniun tujinkiarimiayi.

20

Yusa kakarmarjijai Jesus takasmania nu

(Mateu 21.23-27; Márkus 11.27-33)

¹ Yusa Uunt Jeeñ Jesus uwempratin chichaman unuiniak pujaj Israer-patri úuntriñsha, Israer-shuara jintinniurishá, Israer-shuara úuntriñsha táarmiayi. ² Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

³ Tutai Jesus tímiayi “Wisha aniañstajrum tusan wakerajrume. ⁴ ¿Ya Juáñnasha imiakratia tusa akupkamia? ¿Yusak? ¿Aentsuk? Turuttiarum” tímiayi.

⁵Tútaisha niisha nuamtak warintiajik mai tunai ajarmai. ““Yus akupkaiti” tákurn-
in⁵nia, “¿urukamtai enentáimtuscharum?” turamat⁵taji. ⁶Túrasha “aents akupkaiti”
tákur⁵nisha ashí aents kayaj⁵ai tukurmar mantamattaji. Warí “Juan Yús⁵nan etserni⁵iti”
tuíniatsuk” tiarmiayi. ⁷Nui⁵nia Jesusan ániak “Íisha nékatsji, Juan imiakratinniasha
yátsuk akupkamia” tiarmiayi.

⁸Tutai Jesus tímiayi “Wisha núnisnak winia akuptukua nuna tíchattajrume” tímiayi.

Pénker-takachu armia nu
(Mateu 21.33-44; Márkus 12.1-11)

⁹Nuyá Jesus ju métek-taku chichamj⁵ai aentsun jintintiamiayi:

“Áishmañ ni ajar⁵iñ uwa araa amuk, shuaran takartusti tusa ikiukmiai. Tura niñ⁵nia wau
táchataj tusa jeachat wémai. ¹⁰Tura júuktin tsawant jeamtaí juukman akanak jurumkit
tusa takarniur⁵iñ takau shuari⁵iñ akuptukmai. Tura takarniur⁵iñcha katsumkar áyatik
awain⁵kiarmai. ¹¹Nuyá nérentin chíkich takarniur⁵iñ akupkamai; tura nunasha núnisañ
katsekkar, awatiar, sútsuk akupkarmai. ¹²Nuyá ataksha chikichan akupkamai. Tura
nunasha takau shuar katsumkar akupkarmai.’

¹³“Nuyá ukunam ajá nérenniur⁵i “Itiurkatjak, timiai. Winia aneamu uchirun akupkatta-
jai. Nin wáinkiar shiir enentáimtuschartimpiash” timiai.’

¹⁴“Túrasha takau shuar nuna wáinkiar, nuamtak chichainiak “Juka ajá nérenniur⁵i
ajastatui. Maatai. Nuikia aja iiniu átatui” tiarmai. ¹⁵Nuna tuíniak ajanmaya jji⁵ki
máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniur⁵i itiurkattawa?

¹⁶Niisha taa, nu takau shuáran máawartatui. Tura núñkanka chikichan susattawai”
tímiayi.

Nuna anturkar “Yus núnaka tsan⁵katkashti” tiarmiayi.

¹⁷Tura Jesus nin émamkes ísar tímiayi “¿Nuikia Yus-Papinium áarma nu warintia? Ju
áarmaiti:

Kayan pénkernak jea⁵ jeamin “yajauchiiti” tusar ajapawarmia nu ashí kayaj⁵ai nan⁵kaamas
pénker apuj⁵samuiti. ¹⁸Nu kayan tukumainia nuka kupin⁵trattawai. Tura nu kaya
shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)

¹⁹Israer-patri uuntri⁵ tura Israer-shuara jintinniur⁵i⁵sha “nu métek-taku chichamj⁵ai in
túramji” tu nekaawar nuik⁵ Jesusan achikiar emetatai tusar wakeriarmiayi. Tura un⁵surí
shuar Jesusan wakeruiniakui, ashamainiak túracharmiayi. ²⁰Tura Kapitiánnium suruk⁵tai
tusar wakeruiniak mamikmau shuaran Jesusan akuptukarmiayi. Nu shuar pénker shuara
núnisañ jeariar, Jesus nékatsuk yajauch chichakat tusar, ania⁵staj tusar wear⁵miayi. Ni
chichakmarij⁵ia⁵ uuntnum suruk⁵tai tusar túrawarmiayi. ²¹Tu enentáimsar tíarmiayi
“Uuntá, ame tuke nekas chicham chichaame, nu nékaji. Aents pátatek íyatsme, antsu
nekas Yusa jintí jintintia⁵me. ²²Wats turuttia, ¿Rúmanmaya uunt akupin ii kuitr⁵i akiktin
pénkerk⁵ait? ¿Akiktink⁵iait? ¿Suritkiatniukait? Nu nekaatai tusar wakeraji” tiarmiayi.

²³Tura Jesuska ni yajauch enentáimsamur⁵iñ nekáa chicharainiak, ²⁴“Kuit itiatarum.
¿Yana yapi tura yana naari⁵ jui áarmait?” tímiayi.

Tutai nii tiarmiayi “uunt akupniunu.”

²⁵Tutai Jesus tímiayi “uunt akupniunu átinia nu uunt akupin susatarum. Tura Yusna
átinia nu, Yus susatarum.”

²⁶Aents ántamunam ni chichakmarij⁵ia⁵ achiktinian penké tujinkiar⁵miayi. Antsu aya
ímprarmiayi tura takamtak pujusarmiayi.

Satusésha achiktai tusar wakeriarmiania nu
(Mateu 22.23-33; Márkus 12.18-27)

²⁷Nuyá Satuséu “jakamunmaya penké nantakchamniaiti” tuinia nu, Jesusan ania⁵stai
tusar tariarmiayi. ²⁸Aniiniak tiarmiayi “Uuntá, Muisáís juna áartampramij⁵ai: “Áishmañ
ni nuar⁵i júreatsaiñ jakamtain⁵nia ni yach⁵i nu wajen nuátkatí, yach⁵iñ yajutmatratsa.”

Tu áarmaiti, tiarmiayi. ²⁹ Wats, siati yachi áрмаi, tiarmiayi. Iwiajri nuwan nuatak yajutmatsuk jakamai. ³⁰ Ni yachi wajen akintiak, nuatak, niisha yajutmatsuk jakamai. ³¹ Nuna yachisha núnisan nu wajen nuátkamai; tura núnisan ashí siati nuna patajnk' nuátkarmai. Yajutmatsuk yajutmatsuk kajin'kiarmi. ³² Tura ukunam nuwasha jakamai. ³³ Nantaktin tsawantaj, nantakiarmatai, ¿yana nuarjñ ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin ániatsuk. Nayaimpinmaya suntara áintsan ajasartatui. Tura nantakiaru ásar Yusa uchirjñ ajasartatui. ³⁷ Tura jákaru nantakiartin ainia nuna imia Muisáis jintímiayi. Warí, numichiniam ji wajái keamunan Yus nijjajñ chichaamun, Yus-Papinium Muisáiska áarmiayi. Nú áarmanum Uunt Yus Apráama, Isaka tura Jakupu Yúsrñti, tímiayi. Nú áishman yaunchu jákaru aijñ “ni Yúsrñti” tímiayi. Nuna taku nantaktin awai tu jintímiayi. ³⁸ Kame jaka men'katniunam pujuinia nuna Yúsrñchuiti. Tuma asamtaí jakáa Yúsrñti tíchamniaiti. Antsu iwiaaku ainia nuna Yúsrñti. Ashi Niiniun iwiaarkainiawai” tímiayi.

³⁹ Nuna antukar Israer-shuara jintinniuri “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchirjñpiat?

(Mateu 22.41-46; Márkus 12.35-37)

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm?

⁴² Warí, Sarmu papinium Tawit niñki juna tátsuk:

“Uunt winia Úntrun “Akupin pujutainium Winia untsuuruinjñ pujustá, tímiayi. ⁴³ Ame nemasrumin núpeteatsajñ nuñ pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úntur” tajisha, ¿itiurak Kristu tutai Tawitia pampanmarí átin'k'?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniajñ ni unuiniamurjñ Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeenam penkerjñ pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. ⁴⁷ Túrásha wájé jeencha atantainiawai. Túrawar aents nekaracharat tusar ti esaram chichamjajñ Yúsán áujainiawai. Nincha chíkichjajñ nan'kaamas Yus asutiáwartatui.”

21

Waje ni kuítrjñ susamia nu

(Márkus 12.41-44)

¹ Yusa Uunt Jeen kuítrjñ kuit enketainiam kuítian enkeenan Jesus wáinkiamiayi.

² Tura waje kuítrjñcha jimiará uchich kuítian, reara áaniun, enkean wáinkiamiayi.

³ Wáiniak tímiayi “Nekas tájarme, ju waje kuítrjñchaitiat, ashí enkeena nú nan'kaamas núkap enkeayi. ⁴ Warí, chíkichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu

(Mateu 24.1-2; Márkus 13.1-2)

⁵ Yusa Uunt Jeen kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamá shiir wáintruma nu ashí emesnartatui. Kaya ekentramusha mash yumpuuntrartatui” tímiayi.

Amuukatin tsawantin uruku átata nu nekaatin

(Mateu 24.3-28; Márkus 13.3-23)

⁷ Nuyá Jesusan chicharainiak “Uuntá, nusha ¿urutaik túrunat? ¿Kame ju túrunatin jeatemamtaisha warijjaïn nekaattaj?” tiarmiayi.

⁸ Tutai Jesus tímiayi “Aneartarum; ananawairap. Nekaatarum. Winia náarun pachisar, “wi Kástuitjai” tau ti untsurí jjiinrtartatui. “Nunka amuukatin jeayi” tu etserkartatui. Tuíniakui anturkarum nemariirap. ⁹ Tura meset chichamsha, kapitíán mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

¹⁰ Nuyá tuke chicharuk tímiayi ‘Shuar chíkich nunkanmaya shuarjai mesetnum ti nekas maaniawartatui. ¹¹ Ti uurkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarín iniakmstatui.’

¹² “Tura ju túruntsaïn atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuiñkia atumin túrutmakrumin wi túramu etserkatin arutmattarme. ¹⁴⁻¹⁵ Tura atumí nemasri nakitramainiak “wáiti-aiti” títinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

¹⁶ “Tura imia atumí aparísha surutmakartatui. Atumí yachísha, atumí shuarísha amikrumsha núnisarañ surutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitramprartatui. ¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiatarme.’

²⁰ “Ju pepru Jerusaréñka aa tanishriin suntar téntakar matsatu wáinkiumeka, emesratin jeá nekaattarme. ²¹ Nuikia jui Jutía nunkanam pujuinia nu, náinnium pisartin áiniawai; tura jui Jerusaréñnum pujuinia nusha juyanka jiiñki wétin ainiawai. Tura ajanam pujuinia nusha, péprunam waketkishtin áiniawai. ²² Nu tsawantincha Yus asutiámun wáinkiatatui. Yús-Papiniun nu túrunatin yaunchu aarma nu uminkiatatawai nu tsawantin. ²³ Nunkanam ti wáitsatin átatui. Tura ju aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiatatui. ²⁴ Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajaya apach, Yúsnan enentáimtuiniatsna nu, jui Jerusaréñnum wayawar najakartatui. Nu túratniunka Yus tsanatkana nuñ túrawartatui.’

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ “Nuiñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáimsar mayái ashinkiatatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yurañminiam ti shiir ajasan winiaí wáitkiartatui. ²⁸ Nu túrunatin náñkamkui uwempratín jeatemayi tusarum kakaarum shiir enentáimsatarum.’

²⁹ Tura ju chichamnasha nekapmamiayi. ‘Ikiu numi tura náñkamas numisha enentáimsatarum. ³⁰ Ju nunkanam ni nuké yama punkaktatai “esat jeatemayi” táturmek. ³¹ Núnisañ Wi tájana nu wáinkiumeka, Wi ju nunkanam akupin ajastin jeatema nu nekaatarum.’

³² “Tura aents yamaí pujuinia nu jáatsaïn nusha ashí túrunattawai. Núnaka paant tájarme. ³³ Nayaimpisha nunkasha amuukartatui. Tura winia chichampruka amuukachminiaiti. ³⁴⁻³⁵ Nu tsawant aya aneachma jeattawai. Ashí aents ju nunkanam pujuinia nu, nuna enentáimsuk pujuiniaí jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusurum, ju nunkanam ana nu ti wakerakrumniñkia péñker enentáimsatin tujinkiatarme. Nu atsufí tusarum tura nu tsawant aya áwaktamkaij tusarum péñker wekasatarum. ³⁶ Anearum wekasatarum. Túrunattana nuñ katsuntrataj tusarum Yus aujsa pujustarum. Túrarum Aents Ajasu tutai íimmianum péñker átaj tusarum túratarum.”

³⁷ Tuke tsawant tsawajsha Yusa Uunt Jeeen Jesus unuiniamiayi. Tura káshikia Uriwii náinnium we-wémiayi. ³⁸ Tura tuke tsawant Yusa Uunt Jeeen Jesus chichaamun anturkakai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai enketaachma tanta yuatin námper, paskua tutai, jeatemamiayi. ² Israer-shuara Pátririsha Israer-shuara jintinniurisha áentsun ashamainia ásar, itiurak máawain-tiaji¹ tusar ti enentáimsarmiayi.

³ Nuinkia Iskariúti Jútasan enentáin íwianch wáintiamiayi. Nú Jútaska Jesusa unuini-amuriin páchitkiauyayi. ⁴ Israer-patri úuntrin tura Yusa Uunt Jee kapitíán pujuarmia nuna werimiayi. Tura Jesusan tu surukminiaiti tusa niijjai chichasarmiayi. ⁵ Niisha nuna antukar warasar “kuit amastatji” Jútasan tiarmiayi. ⁶ Niisha “ayu” tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintionam 11.23-26)

⁷ Wats, wakaprutai enketaachma tanta yuatin námper jeamiayi. Paskua tutainium murikchin máatin ármiai. ⁸ Tura Jesus Pitruncha, Juánnasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tui iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishman yumin takaku wekáa wáinkiatarme. Nú áishman nemarsatarum. Tura jeá wayaakui, ¹¹ nú jea nérenniur chichareakrum “Uunt chichartamuk unuiniamurjai paskua yurumátin ¿tui aa? turamui” titiarum, tímiayi. ¹² Tákurmin nu nérentin yakí písunam uut kuártun ashí iwiamun iniakturmastatru. Nui ii yurumátin iwiaratarum” tímiayi.

¹³ Tutai niisha wear Jesus tímiania tímiatrusan wáinkiararmiayi. Tura paskua namperan nu iwiararmiayi.

¹⁴ Yurumátin jeamtai ni unuiniamurijjai Jesus misanam pujusarmiayi. ¹⁵ Pujusarmatai, Jesus chichaak “Wisha játsuk atumjai ju paskua najanatniun ti wakerimjai, ¹⁶ atakka ju nunkanam atumjai najanashtin asan. Tura antsu Yus akupeana nu jear atak najanattaji” tímiayi.

¹⁷ Nuyá pininkian achik, Yúsán yumininkias, ni unuiniamuriin tímiayi “Ju pinin achikrum sunaisatarum. ¹⁸ Atakka ju nunkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjai umartaji” tímiayi.

¹⁹ Nuyasha yurumkan achik, Yúsán yumininkias puuk susarmiayi. Tura chicharainiak “Juka winia ayashruiti. Winia ayashur atum pénker pujustinnium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai pininkian achik, “Ju pinin winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai’ tímiayi.

²¹ Túrasa winia surutkattana nu Wijjai métek ju misanam pujawai. ²² Kame Wi, Aents Ajasuitjiana ju, Yus iwiamua nútiksanak jakattajai. Túrasa Winia surutkana nu nekaatí. Ti asutniattawai’ tímiayi. ²³ Nuna antukar “Wáshitiaj, yákit” tunaim ajarmiayi.

Nañkaamantu ana nu

²⁴ “¿Iijjai yakí imiá nañkaamantu aint?” tunaim ajarmiayi. ²⁵ Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura akupenakui “pénker túrin áiniawai” tuiniawai. ²⁶ Tura atumjainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarnia núnik ajastiniaiti. ²⁷ Enentáimsatarum. Misnam pujus yurumna nu, yurumkan ajamana nujai ¿tuá imiá nekas nañkaamantuit? ¿Yurumna nu nekas nañkaamantuchukait? Tura Wisha atumin yurumkan ajamna núnisnak pujajai.’

²⁸ “Winia itiurchatrūn wáinmijaj nuĵ atumsha Wijijai tuke pujumarme. ²⁹ Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuĵ atumsha Wijijai yurumáttarme, tura Wijijai umartatrume, tájarme. ³⁰ Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

Pítiur “atsá nékatsjai” títinian Jesus ujakmiania nu
(Mateu 26.31-35; Márkus 14.27-31; Juan 13.36-38)

³¹ Nuyá Uunt Jesus tímiayi, “Nekaatá, Semunká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi. ³² Tuma aiñ Yus enentáimtustinian kajinmatkiin tusan Wisha Yúsán seamjai. Tura Yúsnum waketkim ame yatsum ikiakárarta” tímiayi.

³³ Tutai Semun tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

³⁴ Tutai Jesus tímiayi “Pitru, nekas tájame, yamaik atash shiniatsain ame menaintiú natsantruratme” tímiayi.

Itiurchat winiawai

³⁵ Nuyá Jesus tímiayi “Wisha yurumkajainchu, kuftjainchu, sapatjainchu akupkamjar-mena nuĵ táatramsamkarum?”

Niisha “Atsá penké táatramsachmaji” tiarmiayi.

³⁶ Tutai Nii tímiayi “Antsu yamaikia yurumkan takakkunka takustí, kuftniasha núnisan; tura puniancha takachakka ni pushirín suruk punian sumakti. ³⁷ Nekaatarum. Yus-Papinium yaunchu aarma ana nu wi túrunamujai uminkiatwawai. Juiti aarma: Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

³⁸ Tutai ni unuiniamurĵ tiarmiayi “Uuntá, juĵ jimiara puniá awai.”

Tutai Niisha “Asati” tímiayi.

Jitsemanĵ ajanam Jesus Yúsán áujsamiania nu
(Mateu 26.36-46; Márkus 14.32-42)

³⁹ Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurĵisha nemariarmiayi.

⁴⁰ Ai jeá nin chicharuk “Itiurchat winiakui iniarajĵ tusarum Yus áujsatarum” tímiayi.

⁴¹ Tuasua amik arantach, kaya nankimiam jeana núnik Jesus wémiayi. Tura Yúsán áujsataj tusa tikishmarmiayi. ⁴² Tikishmar juna tímiayi “Apawá, pininnum yapá umartinia ántsān Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atf, tajai” tímiayi.

⁴³ Nuyá, ikiakártaj tusa Yusa suntariĵ nayaimpinmayá tarimiayi. ⁴⁴ Tura Jesus imiá wáitias pujak nú kakaram Yúsán áujsamiayi. Tura ni searmarĵisha numpá ántsān nunká kitiawarmiayi.

⁴⁵ Yúsán aajsua amik wajaki ni unuiniamurĵin werimiayi. Tura kúntuts enentáimmi-arijĵai ti pimpiki kanúu tepenan tarimiayi. ⁴⁶ Nuiñkia chicharainiak “ĵUrukamtai kanúu teparum? Itiurchat winiakui iniarajĵ tusarum nantakrum Yus áujsatarum’ tímiayi.

Jesusan achikiarmiania nu
(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujaĵ, untsurĵ shuar táarmiayi. Tura nuní eemka Jesusa unuiniamurĵi Jútas naartin winimiayi. Tura Jesusan mukunatajtsa tarunmiayi. ⁴⁸ Támatāi Jesus chicharuk “Jútasá, ĵAents Ajasu tutai mukunamek surutkattam?” tímiayi.

⁴⁹ Jesusjai pujuarmia nu, túmamun wáinkiar “ĵUunt puniājai ĵjuartatĵik?” tiarmiayi.

⁵⁰ Tura chikichik Patri uuntriĵ takarniurĵ kuishĵin untsuurĵin tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishĵin antiñ tsuarmiayi. ⁵² Nuyá Israer-patri úuntrin, Yus-jeá úuntrincha, tura pepru úuntrincha, Nin achiktaj tusa tariarmia nuna chicharuk “ĵWisha kasakaitiaĵ. Urukamtai puniājajisha numijiaĵisha

tarutniuram? ⁵³ Nuik Yusa Uunt Jeen tuke tsawant atumjaj pujumaj nuĵ achirkachmarme. Túrashá átum kiritniumiá kakarmajaj nupetkatin yamáí tsawantin tsanĵatkamuitrume” tímiayi Jesus.

Pítuur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuñkia Jesusan achikiar emetawar Israer-patri uuntri jeen júkiarmiayi. Tura Pítrusha íkiañ nemarki wémiayi. ⁵⁵ Tura aach jinia ikiapáarmiayi. Túrawar anamuk pujuarmiayi. Pítrusha niijjaj pujusmiayi. ⁵⁶ Tura nuwá, Patri takarniuri amia nu, Pítuur jinia anamuk pujan wáiniak “Ju áishmansha Niijjaj pujumiayi” tímiayi.

⁵⁷ Tutai Pítuur chichaak “Nuwá, Nin nékatsjai” tímiayi.

⁵⁸ Tura árusañ chíkich nin wáiniak “Amesha Niin páchitkaiatme” tímiayi.

Tutai Pítuur tímiayi “Atsá. Wikia áñkia páchitkiatsjai” tímiayi.

⁵⁹ Chikichik ura nanĵaamasmatai chíkich apach chichaak “Nekas ju áishmansha Niijjaj pujumiayi. Warí, niisha Kariréanmayanĵhakait” tímiayi.

⁶⁰ Tutai Pítuur chichaak “Ame támena núnaka nékatsjai” tímiayi. Nú chichamaik Pítuur chicháa pujajñkí atash shiniukmiayi. ⁶¹ Tura nuñkia Uunt Jesus Pítrun apajas ísmiayi. Túra “atash shiniatsañ ame menaintiu natsantrurtatme” Uunt Jesus timia nuna enentáimpramiayi. ⁶² Nuyá Pítuur jiinki ti útmiayi.

Jesusan wishkrarmiayi

(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiararmiayi. ⁶⁴ Jiin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chikichnasha nanĵkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntrisha, Israer-patri úuntrisha, Israer-shuara jintin-niurisha iruntrar ni iruntairiin ejeniarmiayi. Nuĵ chicharainiak ⁶⁷ “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tichattarme. ⁶⁸ Tura Wi aníamsha áirkashtatrume, túrashá akuptukchattarme. ⁶⁹ Tura wárik Wissha Aents Ajasuitjiana nu, ashí nanĵaamaku ajasan, Yusa untsuurinj pujustatjai” tímiayi.

⁷⁰ Tutai niisha tiarmiayi “¿Nuñkia amesha Yusa Uchirñkaitiam?”

Tutai Jesus tímiayi “Ee, Wítjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia niñki chichaamu antukchajik” tiarmiayi.

23

Piratuĵ Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarria nu wajatkiar Rúmanmaya akupin Piratuĵ Jesusan júkiarmiayi. ² Nuĵ jeawar, Piratun chicharainiak “Ju áishman íi shuaran awajimtikiar enentáimtikiania nu nekaamji. Rúmanmaya uunt akupin Sésaran kuit akiktinian suritramaji. Tura nu arant Niñki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniurinkaitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntrincha tura aents nuĵ iruntrarria nunasha Piratu chicharainiak “Ju áishman tunaan túran penké wáinkiachuitjai, tajai” tímiayi.

⁵ Túrashá niisha nú kakantar chicharainiak “Antsu nekas ashí Jutía nunĵanmaya aentsun ni unuiniana nuĵaj akajenawai. Kariréa nunĵanmaya nanĵaamas ímiajajsha tayi” tímiayi.

⁶ Piratusha nuna antuk “Nu áishman ¿Kariréanmayanĵkait?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupni-yuyai. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurin áujmatman ti antukmiayi. Tuma asa, “Wi ímiai aents tujintiamun túrashimpiash” tusa Jesusan wáiniak warasmiayi. ⁹ Jesusan ti nukap aniasmiayi; túramsha penké áimkiachmiayi. ¹⁰ Nujsha Israer-patri úuntriasha, tura Israer-shuara jintinniurisha yajauchiiti tusar charaatum awajarmiayi. ¹¹ Tura Erutissha ni suntaríjiaí Jesusan yajauch enentáimtuiniak Nin wishikiainiak ti penker pushin, akupni entsatairiya ánniun, áentsrarmiayi. Nuyasha Erutis ataksha Piratuín akupkamiayi. ¹² Túram nu tsawant Piratu Erutisjaí nawamnaikiarmiayi. Kame yaunchuka nemasnaikiau ármiai.

*Jesusan “mantamni” tiarmiania nu
(Mateu 27.15-26; Márkus 15.6-15; Juan 18.39-19.16)*

¹³ Nuyá Israer-patri úuntrin aentsu úuntriíjiaí tura penké aentsjaí Piratu ikiaanak tímiayi. ¹⁴ “Ju áishman aentsu awajimtkiui tusarum itartintrume. Túrasha átum ímprumni anintrusan yajauch átum tárumna nuna penké nekarachjai. ¹⁵ Erutissha núnisan yajauchin nekaachai. Warí, juí awaíkichmaka. Nuikia páantchakait jú aishman jakamnia tunaanka túrchuítí” tímiayi.

¹⁶⁻¹⁷ Túraitiat tuke túrutai asamtai, jísat jeakui sepunmaya chikichík áishmankan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

¹⁸ Tura aencha iruntrar ti unsumainiak “Atsá; jucha. Ju nakitjai. Antsu Parapás akupkata” tiarmiayi. ¹⁹ Nu Parapássha akupniun nakitai mesetan najana asa tura mankartin asa sepunam enkeamuyayi.

²⁰ Piratuka Jesusan akupkatsa wakerak ataksha aentsun áusarmiayi. ²¹ Túrasha nú arant unsumainiak “Atsá. Krúsnum mantamni” tiarmiayi.

²² Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

²³ Tura niisha kakaram unsumainiak “Jesus mantamni” tiarmiayi. Kame aencha tura Patri úuntriasha ti unsumaina ásarmatai ni wakeramurj tsanekatnakarmiayi. ²⁴ Nii wakerarmia nuna Piratu “túrattajai” tímiayi. ²⁵ Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

*Jesusan krúsnum ajinrurarmiania nu
(Mateu 27.32-44; Márkus 15.21-32; Juan 19.17-27)*

²⁶ Jesusan jukitiasa pujuiniaí Serini nunkanmaya Semun ni pépruriya Jerusarénum yama jeamiayi. Nin achikiar, Jesusa krusrí ayantkar “ni ukurj wetá” tiarmiayi.

²⁷ Untsurí aents Jesusan nemarmiayi. Tura untsurí nuwasha ti kuntuts enentáimainiak úutkiar tura wa-wa ajakiar wearmiayi. ²⁸ Túmainiakui Jesus nin iis, “Jerusarénumia nuwqtiram Winia enentáimtursarum úuttiirap. Antsu atumniak tura atumi uchiirí enentáimtusurum úuttiarum. ²⁹ Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsjaí nankaamas penker pujuiniawai” tiartatui. ³⁰ Nu tsawantaj aents chicharainiak “Náint in nekentmak yuturmaartai” tiartatui. ³¹ Warí, numi sameka áinis yajauch aya nánkamna ainsha ju iturchat átsuk. Tura numi kukaru ainkiamtai ituirak nú yajauch túrunachatí.” Tu timiayi Jesus.

³² Tura Jesusjaí krúsnum maatai tusar jímiar yajauch áishmankan júkiarmiayi. ³³ Karawír nain tutainium jeawar Jesusan krúsnum ajinrurarmiayi. Tura Jesusa untsuuriní chikichík yajauch áishmankan tura ni menaarini chíkich yajauch áishmankan núnisan krúsnum ajinrurarmiayi.

³⁴ Tura Jesus krúsnum ajintraku pujuram, chichaak “Apawá, tsanukurarta. Nii áitkianina nuna nékainiatsui” tímiayi.

Tura suntar pujuarmiania nu, yaki Jesusa pushiri jukit tusar nakurusarmiayi. ³⁵Péprunmayá aents ii wajatiarmiayi. Tura uunt armia nusha Nin wishikiainiak “Chikich-naka uwemtikniuiti. Wats, yamá nekas Yusa anaikiamuri Kristu tútainkiuñka imia Niñki uwémprati” tiarmiayi.

³⁶Suntarsha Nin wishikrarmiayi. Tariar churuñnian aartai tusar awajiararmiayi. ³⁷Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. ³⁸Tura muuknumaani, Kriaku chichamjai, Rúmanmayá apach chichamjaisha tura Israer chichamjaisha ju árar anujkamu ámiayi: *JÚITI ISRAER-SHUARA UUNT AKUPIN*

³⁹Chikichik yajauch áishman nui ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwemtikramprata” tímiayi. ⁴⁰Tura chikich ni tsaniakmarin kakantar chicharuk “¿Amesha Niijjai métek asutniátasa pujayatam, Yus ashamatsmek? tímiayi. ⁴¹Iikia yajauch asar wáitsatniuitji; ii tunaari akikmakur wáitijai. Antsu ju áishmanka yajauchin túrichuiti” tímiayi.

⁴²Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³Tutai Jesus chicharuk “Nekas tájame, jakar shiir pujutanium yamá tsawant Wijjai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴Tutupin ai ashí nunkanam ti kirit ajasmiai. Tura menaintiú ura nankaamasu ain, nantu nunkaach ajassha tuke kirit ámiayi. ⁴⁵Tsawái nantusha mushatmarmiai. Tura Jerusarénum Yusa Uunt Jeencha tarach ajamu aa jimiapetek nakaakamiai. ⁴⁶Nuyá Jesus untsumuk “Apawá, winia wakantrun Amijn ikiujai” tímiayi. Nuna tinia jakamiai.

⁴⁷Suntara kapitiantri nu túrunamun wáiniak, Yusa náarin shiir awajeak “Jusha imiá nekas pénger áishmankuyi” tímiayi.

⁴⁸Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. ⁴⁹Tura Jesusa amikriisha tura nuwá Kariréanmayá Nin nemariarmia nusha íkian wajasar ii wajiararmiayi.

Jesusan iwiansarmiania nu

(Mateu 27.57-61; Márkus 15.42-47; Juan 19.38-42)

⁵⁰Naka enentáimin pénger áishman ámiayi ni naari Jusé. Arimatéa pepru Jutía núñkanam ana nuyayuyai. Israer-shuara Uunt Iruntairin páchitkiayuyai. ⁵¹Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. ⁵²Tuma asantai Piratuí we Jesusa ayashin seamiayi. ⁵³Piratu “ayu” takui, Jesusa ayashin krúsnumia jusa tarachjai penuar kaya táurmanum iwiansamiayi. Nu táurmanum chikich iwiansachmauyai. ⁵⁴Iwiaratin tsawantai, ayampratin tsawant tsawastatak ajasmatai túrunamiayi.

⁵⁵Tura nuwá Kariréanmayá jukiniutak Jesusan nemarsarmia nusha iwiansamunam weriar, Jesusa ayashí itiuur ikiusmait nuna iisarmiayi. ⁵⁶Iisar ikiuak ni jeen waketkiarmiayi. Tura Jesusa ayashí mejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmiayi.

24

Jesuan nantakmiania nu

(Mateu 28.1-10; Márkus 16.1-8; Juan 20.1-10)

¹Tumintin káshik kunkuinian iwiamun júkiar nu nuwá Jesus iwiansamunam weriarmiayi. Tura chikich nuwasha atampriarmiayi. ²Tura iwiansamu kaya atutkamu urani aan wáinkiararmiayi. ³Tura wayáwar uunt Jesusa ayashin wáinkiacharmiai. ⁴Wáinkiachu ásar ashamkarmiayi. Tura “itiurkatjik” tiarmiayi. Tumaj jimiará áishmankan pushin wincharpatniun entsar nin ayagmach wajainian wáinkiararmiayi. ⁵Nuna wáinkiar ti sapijmiainiak tsuntsumawarmiayi. Túmakui nu áishman chicharainiak “¿Iwiaakusha urukantai jakaantumsha earum? tiarmiayi. ⁶Jui pujatsui. Antsu nantakni. Nékat-srumek. Niisha Kariréanam tuke pujus ⁷“Wi, Aents Ajasuitjiana nu, yajauch aentsnum

surunkattajai. Túran krúsnum mantamnattajai. Tura menaintiú tsawantaj nantaktiatjaj” turamchamkarum” tímiayi.

⁸Nuna takui Jesus tímian enentáimprarmiyai. ⁹Tura iwiarsamunmayá waketki taar, Jesusa unuiniamurijn auntse armia nuna tura chikichnasha ashí nu túrunamun ujakarmiyai. ¹⁰Jesusa unuiniamurijn ujakarmia nu ju ániawai: Maktaranmayá Marí, Juánasha, Jakupu nukurj Marisha, tura chíkich nuwajai. ¹¹Tura Jesusa unuiniamurisha nuwá tuíniakuisha nekasaiti tu enentáimtsuk “wáuruk tuíniawai” tiarmiyai.

¹²Túrasha Pítrusha jiinki Jesus iwiarsamunam tsékenki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu
(Márkus 16.12-13)*

¹³Nu tsawantajk Jesusa nemarniurj jímiar Emaús péprunam wéarmiyai. Emaúska Jerusarénumiá auntse kirumitru jeá pujawai. ¹⁴Túrunamia nuna chichaki wearmiayi. ¹⁵“Itiurkit” tu aujmatki weenai imia Jesus taa nuj páchianiak niijiai wearmiayi. ¹⁶Tura wáinkariat nekaashtin asamtai yait nekaacharmiyai.

¹⁷We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

¹⁸Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹Tutai Jesus tímiayi “¿Warí urukait?”

Tutai tiarmiyai “Entá, Nasarénumiá Jesusa túrunamurj taji. Niisha Yúsnan etserin asa Yusa kakarmarjijai chichasmiayi tura nuna kakarmarjijai takasmiayi. Núnaka ashí aents nékainiawai. ²⁰Tura ii Pátrirj uuntri tura ii péprurj uuntri “tunáa jakamnia túrayi” tusar “krúsnum mantamnati” tiarmiyai. ²¹Tura ii Israer-aentstin uwemtikrampratin tu enentáimsamji. Tura ni maamusha menaintiú tsawant nankaamasai. ²²⁻²³Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. ²⁴Nuyá íi shuar iwiarsamun weriar, nuwá tiarmia tímatrusan wáinkiarimiayi. Tura Jesusnaka wáinkiacharmai.” Tu ujakarmai Jesusan.

²⁵Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsarume. ²⁶¿Yusa anaikiamurj, Kristu tutai, shiir awajnantsuk ti wáitsashtinkiait?” tímiayi.

²⁷Tura nuyá Yus-Papiniun Muisáis aarmia nuyá jukin ashí Yúsnan etserin ni túrunatniurijn áararmia nuna jintintiatasa nankamamiayi.

²⁸Ayu, nii wearmia nú peprunam jeawarmiyai. Tura Jesuska nuj nankaamaki wétaj tau ajamiayi. ²⁹Tura niisha chicharainiak “Weep. Iijiai pujustá. Warí, nantu akaikiyi, kirit ajatemsai” tiarmiyai.

Tutai Jesus niijiai pujustaj tusa wayamiayi. ³⁰Tura niijiai irunar misanam pujus, yurumkan achik, Yúsán yuminkias nincha puuk súsarimiayi. ³¹Nu chichamaik, ni jii uranniua núnikiarmatai Jesusan nekaawarmiyai. Tura Niisha nú chichamaik menkakamiayi. ³²Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiyai.

³³Nuyá, Emaúsnumiá wárik jínkiar Jerusarénum waketkiarmiyai. Nu j Jesusa unuiniamurijn auntse armia nuna tura chíkich shuar Jesusan nemariarmia nunasha iruntrar pujuinian wáinkiarimiayi. ³⁴Auntse armia nusha tiarmiyai “Uunt Jesus nekas nantakni. Semun Nin wáinkiaiti.”

³⁵Tutai niisha jintiá túrunamun ujakarmiyai. “Jesus yurumkan ajaamakui nuj nekaamji” tiarmiyai.

*Ni unuiniamurijn Jesus wantintuikmiania nu
(Mateu 28.16-20; Márkus 16.14-18; Juan 20.19-23)*

³⁶Nuna áujmatuk pujuiniaj Jesus aya aneachma ajapén wajas “Shiir enentáimsatarum” t́miayi.

³⁷Nuna antukar, ti sapijmiakar, wakanchashit, enentáimsarmiayi. ³⁸Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” t́miayi.

⁴⁰Nuna tinia ni uwejéncha nawéncha iniaktusarmiayi. ⁴¹Warainiyat sapijmiainia ásar, Niimpiashit tu enentáimtusarmiayi. Tuma asantai, nin chicharainiak “¿Yurumak takakrumek?” t́miayi. ⁴²Takui, namaknasha, míshkincha súsarmiayi. ⁴³Tura Jesus nuna achik niisha íimiainiamunman yuamiayi. ⁴⁴Tura nin tiarmiayi “Winia túrutawarma nuna, Wi atumjai nuik pujusan t́miajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” t́miayi.

⁴⁵Nuyá Yus-Papinium aarman jintintiawarmiayi. ⁴⁶Jintintiuk juna t́miayi: “Yusa anaiki-amurí Kristu tutai jaka menaintiú tsawantaj jakamunmayá nantaktinia nu yáunchuk áarmauyayi. Tura Wi nú Krístuchukaitaj. ⁴⁷Winia náarun pachisar, Jerusarénumiá naḡkama ashí nunḡanam nu chicham etsernaktinia nu áarmauyayi. Shuar ni tunaari tsanḡurnarat tusar enentáin yapajiatniuiti. Tura tu etserkatniua nusha yaunchu áarmauyayi. ⁴⁸Tura wi túrunamu neka asarum etserkatniuitrume, t́miayi. ⁴⁹Tura winia Apar, winia Wakantrun susartatjai, turammarumna nuna akuptuktatjarme. Tura nayaimpin-mayá táatsain jui Jerusaréḡ péprunam pujústárum. Taa ni kakarmariḡ suramsattarme.” Tu t́miayi.

*Jesus nayaimpiniam wakamiania nu
(Márkus 16.19-20)*

⁵⁰Nuyá Jesus Jerusaréḡ péprunmayá júkiar Petania péprunam ejeniarmiayi. Tura nuí ni uweje takuí, “Yus yáinmakarti” t́miayi. ⁵¹Nuna tu pujus, niyá kanakmiayi. Tura nayaimpiniam junakmiayi. ⁵²Ni unuiniamurísha Nin imiá shiir enentáimtusarmiayi. Tura nuyá ti warasar Jerusaréḡnum waketkiarmiayi. ⁵³Tura Yusa Uunt Jeḡḡn pujusar Yusa náarḡḡn shiir awajú pujuarmiayi. Áukete.

Yúsan Shiir Chichamēn JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham t́iniiaiti. Chichamsha Yusjái pujuyayi. Chichamsha Yúsauyayi. ² Yáman̄kamtaik Niisha pujuyayi Yusjái. ³ Ashí najanamú ainia nu Niijjái najanamuiti. Nii najanachmaka pen̄ké atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishman̄ ámiayi, Yus akupkamu, ni naarí Juan. ⁷ Niisha tsáapnin chichaman etserkatajtsa támiayi. Nuna étserek ashí umirkarat tusa támiayi. ⁸ Juansha nu tsáapninchauiyayi. Áyatik akupkamuyayi tsáapnin chichaman etserkat tusa. ⁹ Nu tsáapninkia nekas tsaapniniaiti. Ju nuṅkanam taa ashí shuaran enentáin tsáapniartiniiaiti.

¹⁰ Chichamsha taramiayi ju nuṅkanam. Tura nuṅkasha ni najanamú aín, nuṅkaya aents Nin nekaacharmiayi. ¹¹ Támiayi ni nuṅkén tura ni shuarsha ni enentáin itiaacharmiayi. ¹² Tuma aín chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. ¹³ Niisha Yusa uchirí ajasar ataksha númpentin ayashímkiacharmai. Áentsnúmiá akiiniachu ániawai niisha. Áishman̄ wakeramujáisha akiiniacharmai. Antsu Yúsnumiá akiiniawaru ásar Yusa uchirí ániawai.

¹⁴ Nú Chichamsha ayashtin ajas iijjái núkap tsawant pujumiayi. Yusa anen̄kratairijjái piakuyi. Aya nekasa nunak chichaamiayi. Núnisan̄ ni pen̄kerin, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. ¹⁵ Juansha Nin neka asa, étserek t́imiayi “Júiti wi t́imij nu: “Winia ukuruiní winittiana nu wj́ijjain̄kia émkaiti. Maa, wi atsáisha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniaitsuk śuramji. ¹⁷ Yusa akupeamurín Muisais yaunchu jintintraiti, antsu aneatniuncha tura ashí nekas ana nunasha Jesukristú jintintraiti. ¹⁸ Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjái tsaníaku asa Yúsan paant awajturmasuitji.

Imiakratin Juan Jesukristunun etserkamiania nu (Mateu 3.11-12; Márkus 1.7-8; Rúkas 3.15-17)

¹⁹ Jerusarénumiá Israer-shuar ni Pátririn̄cha Riwí-shuarjái Juan̄kai akupkarmiayi yákit túsar.

²⁰ Inintruiniakui paant ujakmiayi. “Wikia Krístuchitjai” t́imiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juansha “Atsá, núchaitjai” t́imiayi.

Nuyá ataksha aniasarmiayi “Nuikia ¿Yúsnan etserin t́atinia núkáitiam?” tiarmiayi.

Niisha “Atsá” t́imiayi.

²² Takui “¿Nu arantcha yáitiam. In akuptamkajnia nusha warí t́itiatjái. Warintia enentáimiam?” tiarmiayi.

²³ Juansha t́imiayi “Yúsnan etserin Isayas yaunchu timia núitjai. Niisha áarmiayi “Aents atsamu nuṅkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsamna nú shuaraitjai” t́imiayi.

²⁴ Juan̄jái chichainiakka Pariséu akupkarma árimiayi.

²⁵ Niisha tiarmiayi “Nuikia Krístuchitiatmesha, Eríashaitiatmesha, Yúsnan etserin t́atinia núchaitiatmesha ¿urukamtaí imiakratam?” tiarmiayi.

²⁶ Juan sha tímiayi “Wikia entsajain imiokratjai. Tura átum írutramunam shuar átum nékatsrumna nu wajaawai. ²⁷Niisha winia ukuruiní winiayat wíjiainkia ti nan kaamantuiti. Nii ti péñker asantai wisha ni sapatrí jin kiamuríncha atitrachminiaitjai” tímiayi.

²⁸Nuka Petapara peprunam túrunamiayi. Petaparasha Juan imiokratmia nuí Jurtañ entsa amain amai.

Jesus Yusa Murikrinti

²⁹Nuyá kashin Juan Jesusan winian wániak tímiayi “Istarum. Núiti Yusa Murikrí ashí aentsu tunaarín júana nu. ³⁰Núiti wi timiaj nu, “Winia ukuruí winiana nu wíjiainkia nan kaamantuiti. Tura wi atsajsha tuke pujuyayi” tímiajai. ³¹Wisha Nin nekaachmajai. Tura ashí Israer-shuar Nin nekaawarat tusan imiakín támajai” tímiayi.

³²Nuyá tímiayi “Yusa Wakanin yámpitsa núnin nayaimpinmayan táarun wáinkíámjai. Tura ekemsamai. ³³Nu túruntsain tuke Nin nekaachmajai. Tura Yuska winia imiokrat-tinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Péñker Wakaníjiai imiokratniua núiti” túrutmiayi. Tura nujai Nin nekaamjai. ³⁴Yamaikia wainkia asan ti paant nékajai tí nekas Yusa Uchirínti” tímiayi Juan.

Jesusa unuiniamurí emka armia nu

³⁵Kashincha ataksha Juan nuí wajasmiaayi ni unuiniamurí jímiarjai. ³⁶Jesussha nuí nan kaamakui Juan tímiayi “Istarum, Yusa Murikrí áuwiti.”

³⁷Juan ka unuiniamurí nuna antukar mai Jesusan pataatukarmiaayi. ³⁸Jesussha úkumur ímias nu jímiarar wininian wáinkíamiayi.

Tura tímiayi “¿Ya earum?”

Niisha “Uuntá, ¿tuí pujam?” tiarmiayi.

³⁹Jesussha tímiayi “Wats, iitarum.”

Niisha wear ni pujutairín wáinkiar miayi. Tura áan kú ajasmatai nu tsawantaj nuí kintiamprarmiayi.

⁴⁰Juan ka chichamen antukar Jesusan pataatukaruka jímiar ármiayi. Chikichik Antre-sauyayi. Niisha Semun Pítru yachi iyayi. ⁴¹Antressha wárik ni yachi Semun kan eaktajtsa wémiayi. Tura wániak “Misías wáinkiaji” tímiayi. Misiaska ni chichamen “Kristu” tawai. Krístuka Israer-shuaran yainkíarat tusa Yus anaikiamuiti.

⁴²Nuyá Antres ni yachi Semun kan Jesus pujamunam jukimiayi. Jesussha wániak tímiayi “Ámetme Semun, Junasa uchirí. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijai tura Natanaérjai chichasmiana nu

⁴³Kashincha Jesus Kariréa nun kanam wétajtsa pujumiayi. Tura Jiripin wániak “Nemartusta” tímiayi.

⁴⁴Jiripisha Petsaita péprunmayayuyayi. Antressha Pítrusha nu péprunmayayuyayi.

⁴⁵Nuyá Jiripi Natanaéran eakmiayi.

Tura wániak tímiayi “Muisais Yus akupkamu papinium “Anaikiamu tátatui” tu áar-chamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶Natanaérsha tímiayi “¿Nasarétnumia péñker shuar áminkiait?”

Jiripisha “Winim ítiá” tímiayi.

⁴⁷Jesussha Natanaéran tíjiyuch winian wániak tímiayi “Ju shuar iistarum. Ti péñker Israer-shuaraiti. Penké anan kartichuiti.”

⁴⁸Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíájme iku numirín ejamkam wajamin.”

⁴⁹Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰Tura Jesus tímiayi “¿Aya wi “Iku numirín ajamkam wajamin wáinkíájme” takui Winia enentáimturamek? Antsu nuna nan kaamas nekaachmin ana nusha wáinkíáttame”

tímiayi. ⁵¹ Nuyasha Jesus tímiayi “Wi nekas tájarne, Aents Ajasu asan atumsha nayaim uranmianum Yusa suntari Winin tara waka ajainia wáinkíáttarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. ² Jesussha ni unuiniamurísha nu natnayamunam ípiaamu ármiayi.

³ Umutai amuukamtai Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtai Winia túrutam? Iníáitiústá. Winia kakarmar iniakmástin jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmayá Israer-shuar ni ewejéncha ni nawencha nijiamau ármiayi Yus shiir enentáimtursatí tusar. Chíkich chíkich yaraatainiam učenja (80) rítrusha, sian (100) rítrusha yumi wayámniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiyai. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksán túrawarmiyai.

⁹ Jista chicharusha nu umutai ajasun nekáprámiayi. Yaraatainmayá yumi jusamun nekaachmai niisha tura umutai ajamau jusaru ásar nékarmai. Jista chicharusha nuwátun untuk ¹⁰ tímiayi “Jístanmañka péñker umutain emka suíniatsuk. Tura jémararmatainikia tímianchan suíniatsuk. Túrasha ámeke péñker umutai ikisam yamá jíkchamek” tímiayi.

¹¹ Jesus túramu Kananum Kariréa nunkanam túrunamiayi. Nújainikia Jesus emka ni kakarmarín paant iniaktusmiayi. Nuna ísar ni unuiniamurísha Nin enentáimtusarmiyai.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiyai. Nuísha untsurí tsawant pujusarmiyai.

Yusa Uunt Jéen suruktinian Jesus surimkiamiania nu

(Mateu 21.12-13; Márkus 11.15-18; Rúkas 19.45-46)

¹³ Israer-shuara namperi, paskua tutai, ishichik ajasmatai Jesus Jerusarénum wémiayi.

¹⁴ Nuí jeá Yusa Uunt Jéen súruinian wáinkíamiayi. Turuncha murikniasha yampitsnasha súrin ármiayi. Chíkichcha ni misarín pujusar kuítian yapajñiancha wáinkíamiayi.

¹⁵ Nuna wáiniak yaranken chapikmar asutkiartutain najana nujai ashí waakartiuk murikrintiuk aa jírmiayi. Kuítian yapajniú misaríncha ayantar ni kuítrin nunká ut-sankarmiyai. ¹⁶ Yampitsan súrinniasha tímiayi “Nuka juyá jítiarum. Winia Aparu Jéen surutai jeá najanawairap” tímiayi.

¹⁷ Nuna ísar ni unuiniamurí yaunchu Yus-Papinium áarman enentáimprarmiyai. Ju áarmaiti: “Ame Jéem shiir atí tusan ti wakerukuitjai.”

¹⁸ Nuikia Israer-shuara untri Jesusan aniasarmiyai “Juna túramnaitjai tusam ¿warí kakarmak iniakmástam?”

¹⁹ Jesussha tímiayi “Ju jeá sáakiakrumin menaintiú tsawantá iniantaittíajai Wikia.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujursarmiyai. Amesha menaintiú tsawantái jeamtámeash.” ²¹ Kame Jesus “jeá” chichayat ni ayashín tímiayi. ²² Tuma asamtai Jesus ukunam jakamunmayá nantakmiatai ni unuiniamurí ni tímian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiyai.

Jesus ashí shuara enentáin nékawai

²³ Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiyai. ²⁴ Tuma ain Jesus ashí neka asa ninkia enentáimtusarmiyai. ²⁵ Nínki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujai

¹ Shuar ámiayi ni naarj Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriayayi. ² Niisha kashi Jesusaj irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsajyanchuitki-umka aentsti tujintiamu túramna nu tujinkiaintme’ tímiayi.

³ Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurj ampujén enkempramniakait atak akiiniatniuna?”

⁵ Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. ⁶ Ayashniumiá akiinia nuka ayashchakait. Núnisan Wakanniumiá akiinia nuka wakanchakait. ⁷ Wi “atak yamaram akiiniatniuiti” takui itirchat enentáimpraip. ⁸ Nase enentáimpratá. Nase nanksamán umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniumiá akiinia nu.”

⁹ Tuma asantai Nikiutémussha atak anias “¿Jusha itiurak áminiait?” tímiayi.

¹⁰ Jesus áikmiayi “Ame Israer-shuara jintinniuríntiatmesha ¿itiura nékatsme? ¹¹ Ti nekasán tájame. Nekas nékakur chichaaji. Ísmajnia nusha ujaaji. Tuma ain ii chichame ántatsrume. ¹² Aya ju nunkanmaya túramu ujaam ántachkurmeka ¿itiurak nayaimpinmayá túramussha antuktarum?”

¹³ “Shuar chikichisha nayaimpiniam waka atsawai. Aya Wiki, nayaimpinmayá taran Aents Ajasu asan, túraitjai. Tura Wikia nayaimpinmayaitjai. ¹⁴ Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajitniuitjai. ¹⁵ Nújainkia ashí Winia enentáimturna nuka jinium wétsuk Yusaj tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. ¹⁷ Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium penké surunkashiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. ¹⁹ Yusa Uchirín tsáapninia áintsan ii tunaari paant awajturmajai. Nu tsáapnisha ju nunkanam tárait. Shuar tunáa ti tura ásar tsáapninian nakitrar kiritniun wakeri-armai. Nuna tura ásar jinium surunkaruiti. ²⁰ Ashí tunaan túruinia nuka tsáapninian mujiainiawai. Túrawar yupitaiainiawai ni tunáa túramu paant ajasaj tusa. ²¹ Antsu ashí nekas túratniun uminiána nuka tsáapninian weantainiawai. Yus ni enentáí pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jesussha ni unuiniamurijjajisha Jutía nunkanam wear nuj pujusar imiakratiarmi-ayi. ²³ Juansha Enun nunkanam, Sarim tjiuchia nuj, imiakratuk pujumiayi entsa nuj núkap aa asantai. Tura aents táarmatai imiainiarmiayi. ²⁴ Nusha Juánkan sepunam enkenatsain túrunamiayi.

²⁵ Tura Juanka unuiniamurí Israer-shuarjai jianaiktinian nankamawarmiayi. “¿Ya imiakratma imiá péngerait?” tusar áujmatiararmiayi. ²⁶ Juánkaj inintrustai tusar wéarmiayi. “Uunta, ame nuik Jurtan entsa amain pujakum shuar nuj pujá “núiti Yusa Murikrj” tíchamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutaí Juan tímiayi “Ashí kakarmaka aya Yúsaiyañchakait. ²⁸ Wisha paant tímiajai “Wikia Krístuchitjai antsu ni jintin iwiarat tusan emka akupkamuitjai.” Nusha antukmarme. ²⁹ Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikrijsa nuna antuk ti waraatsuk. Wisha núnisnak aents Jesusai wénakui ti waraajai. ³⁰ Niisha tuke nankaamaku uunt ajastiniaiti antsu wikia tuke tímincha ajastiniaitjai.” Juan tu chichasmiayi.

Nayaimpinmaya tara nu

³¹ Nayaimpinmaya tara nuka ashí nankaamakuiti. Nun kaya nuka, nun kaya asa jú nunkanmayanak áujmatui. Nayaimpinmaya tara nuka ashí nankaamakuiti ³² tura nuí antukmancha ísmancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichame imiá nekasaiti” tawai. ³⁴ Yus akupkamuka Yusa chichamen éterui. Yuska ni Wakanin ementutsuk susa asamtaí tu éterui. ³⁵ Yus Apa ni Uchirín anea asa ashí ana nuna iisti tusa ataksaiti. ³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirín enentáimtsatsna nuka nu iwiaakmanum akiiniachuiti antsu Yus tuke nin kajerkaíti.

4

Jesus Samaria nunkanmaya nuwajai chichasmiania nu

¹ “Jesus untsurí shuaran ni nemarin awajeawai; kame Juanjai nankaamas untsurí imiaawai” taman Pariseu shuar antukarmiayi. ² Nekaska Jesus imiakratchamiayi, antsu ni unuiniamurí túrawarmiayi. ³ Paríséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

⁴ Wáketuk Samaria nunkanmaaní nankaamaktiniuyayi. ⁵ Samaria nunkanam wéak Sekar péprunam jeamiayi. Nu pepru jeastatuk Jakupa nuñke ámiayi. Jakupsha nu nunkan ni uchirín Jusén tí yaunchu susamiayi. ⁶ Nujsa yumirmat ámiayi. Jakup taurma asamtaí “Jakupa yumirmatrí” tiarmiayi. Tutupin jeamtaí Jesussha pimpiki winis yumirmat ayamach pujusmiayi. ⁷ Nuí pujai Samaríanmaya nuwá yumí shikiktajtsa támiayi. Tura Jesus “Entsa surusta” tímiayi. ⁸ Jesusa unuiniamurísha yurumkan péprunam sumaktajtsa wéaru asamtaí aya Jesusak pujumiayi.

⁹ Samaríanmaya nuwá Jesusan tímiayi “¿Itiura Israer-shuaraitatmesha Samaríanmaya nuwá áisha entsa seatam?” Kame Israer-shuar Samaríanmaya shuarjainkia penké chichachu ásar nuna tímiayi.

¹⁰ Jesussha tímiayi “Yus súamu nékakmeka tura entsa surusta tájam nusha nékakmeka ame antsu seatínme tura Wikia iwiaaku entsan amasaintjai.”

¹¹ Nuwasha tímiayi “Uunta, entsasha ti iniitaiti tura shikiktincha takaktsume. ¿Tuyan iwiaaku entsasha surustam? ¹² Ii untrí Jakup jú yumirmatan taur juyanak niisha ni uchirísha ni waakarísha umararmiayi. Nuyá ikiirtamkimiayi. ¿Amesha Jakupjai nankaamas kakarmakaitiam?”

¹³ Jesussha tímiayi “Ashí shuar jú entsan umarka ataksha kitiamtiatui. ¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunía áintsan tuke pajamtiatui nujai tuke iwaaku pujustí tusa.

¹⁵ Tutaí nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsan cha shikiktinian táchataj” tímiayi.

¹⁶ Nuwasha Jesus tímiayi “Áishrum untsukam utitia, turam juí tatá.”

¹⁷ Nuwasha “Winia áishur atsawai” tímiayi.

Tutaí Jesus tímiayi “Maa, nekas tame. Áishrum atsawai. ¹⁸ Kame ame áishrum señku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsán etserniuchukaitiam. ²⁰ Ii untrínkia tuke Samaríanam pujuarímia nu jú nainnium Yúsán tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. ²² Átum tikishmatrum nuka

nékatsrume. Iikia tikishmatrajnia nu nékaji. Israer-shuarnumiá Uwemtikiartin winiakui nékaji. ²³Tsawant winittiana nu yamáí jeayi. Ashí shuar Yus Apan nekas tikishmatainiakka tuke wakanjáí tuke enentáíjiaísha awajitsuk tikishmatrartatui. Núnisañ tikishmatrurat tusa wakerawai Yus Apa. ²⁴Yuska Wakaniiti tura ashí Nin tikishmatainia nuka tuke wakanjíaí tura tuke enentáíjiaí awajitsuk tikishmatratin ániawai.”

²⁵Nuwasha tímiayi “Anaikiamua nu tátiniati. Nusha Krístitui. Niisha taa ashí jintinramattaji.”

²⁶Jesus tímiayi “Wiitjai. Ámin chichaaajmena nú Krístitujai.”

²⁷Nuin ni unuiniamurí táarmiayi tura nuwajai chichaa pujan wáinkiar ti enentáimpru-rarmiayi. Tumaitiat “¿Wari wakerakmea nuwajai chichaa?” títinian arantukarmiayi.

²⁸Nuyanka nuwá ni yumirín ikiiki péprunam we ashí áentsun tímiayi ²⁹“Winiirum ítiarum, shuar ashí wi túramun túruta nu. ¿Juka Krístitiia?” ³⁰Tutai péprunmaya jíinkiar Jesus pujamunam wearmiayi.

³¹Jeainiatsajín ni unuiniamurí seak tiarmiayi “Uunta, yurumáta.”

³²Tura Jesus tímiayi “Wi yúatniunka takakjai átum nékachman.”

³³Ni uniuiniamurísha nuámtak anniasarmiayi “¿Chíkich shuar yurumak itiarím tát-suash?” tiarmiayi.

³⁴Tura Jesus tímiayi “Winia akuptukua nuna wakeramurí túrakun tura ni takatrín takaakun Wíjiaínkia yurumátnia áintsañ ikiakáatui. ³⁵Átumka “Tuke kuaru nantu árak júuktin taasai” tátsurmek. Túrusha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. ³⁶Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisañ arakan araana nusha júana nusha mai metek warasartatui. ³⁷Tiniu armia nuka nekasaiti: “Chikichik araawai chíkichcha júawai.” ³⁸Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pachiintiukuitrume” tímiayi.

³⁹Tura núwaka péprunam jeá “Ashí wi túramun ujtakayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiai. ⁴⁰Nu asamtai ashí Jesusai taar níijiaí pujusát tusa seawarmiayi. Tutai Jesus jimiará tsawant nuí pujusmiayi.

⁴¹Nú shuar untsurí ni chichamen antukar Jesusan ti shiir enentáimturarmiayi. ⁴²Nuyá nuwan tiarmiayi “Yamaikia aya ame chichammijiaín Jesus enentáimtatsji antsu imia iisha ni chichamen anturkaji. Tura nékaji nekas Krístitui, ashí shuaran Uwemtikin.”

Jesus akupniu takarniurí uchirín tsuármiania nu

⁴³Jimiará tsawant nankaamasmatatai Jesus Samaria nuñkanmaya jiinki Kariréa nuñkanam wémiayi. ⁴⁴Kariréasha Jesusa nuñke asamtai, aínsha Jesus timia áintsañ ámiayi: “Yúsnan etserniun ashí shuar péñker anturainiawai antsu nuna nuñkeyanka nin anturainiatsui.”

⁴⁵Tuma aín Kariréa nuñkanam jeamtai auya shuarsha Jerusaréñnum paskua námpernum wearu ásar tura ashí ni túramun nuí wainkia ásar ti shiir awajsarmiayi.

⁴⁶Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiai. Jesussha nuí pujai yajá péprunam Kapernáunnum akupniu takarín ámiayi. Ni uchirísha jaa tepemiayi. ⁴⁷Niisha Jesus Jutíanmaya Kariréa nuñkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiayi.

⁴⁸Jesussha tímiayi “Aya aents túrachminian túrakui ísrum aya nújain Winia enentáim-tarme.”

⁴⁹Tura takarín tímiayi “Uunta, winia uchir jáatsain wari winitia.”

⁵⁰Nuñkia Jesus tímiayi “Jeemiñ waketkitia. Yamaikia ame uchiram péñker ajasai.” Tutai nú aishman Jesus táman antuk wémiayi.

⁵¹Ni jeen jeátemámtai ni takarniurí inkiun tiarmiayi “Yamaikia uchiram péñker ajasai.”

⁵²Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí aparísha enentáimsamai. ⁵³ Nantu pukunta aḡi Jesus “Ame uchiram péñker ajasai” timia nuní aḡi michatraití. Tuma asamtaí niisha ashí ni shuarísha Jesusan nekas enentáimturarmiayi.

⁵⁴ Jesus nu túramujai ni kakarmarín jimíará iniakmasmiayi. Nunasha Jutíanmaya jiinki Kariréa nuḡkanam jeá túramiayi.

5

Petesta amia nuḡ tampemarun Jesus tsuármiania nu

¹ Nu nanḡkaamasmatai, Israer-shuar namperan najanainiakui Jesus ataksha Jerusarénum waketkimiayi. ² Jerusaréni yama wayamunam murik wayatín waiti tḡijuch amia nuḡ entsa pajamtaí jeammauyayi. Nu pajamtain Petesta tiarmiayi. Nuna waítirísha senku (5) ármiayi. ³ Nuḡ untsurí jáiniak nuḡkanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi. ⁴ Kame ni tátaj taku Yusa suntarí táuyayi entsan umuchkiattsá. Nuyánka emka shuar entsá wayá nu ni jáamuriya tsuámarmiayi. ⁵ Áishmaḡ traintiúchu (38) uwi jaa tepá nuḡ ámiayi.

⁶ Jesussha nu shuaran nuḡ tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki enḡkétát? Kame wi enḡkemátaj tai chíkich emka enḡkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishmaḡ shiir ajasmíayi. Tura ni peakrín jukí wémiayi. Nusha ayampratin tsawantai túrunamiayi. ¹⁰ Tuma asamtaí Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmaḡsha tímiayi “Winia tsuara nu “Peakrum jukim wetá” turutni” tímiayi.

¹² Nuínkia aniasarmiayi “¿Ya “Peakrum jukim wetá” túramam?” tiarmiayi. ¹³ Tura áishmaḡsha Nin tsuárun nekáchmiayi. Untsurí shuar nuḡ aa asamtaí tura Jesus weu asamtaí nin nekaachmiayi.

¹⁴ Atak Jesus Yusa Uunt Jéen áishmaḡkan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasám” tímiayi. ¹⁵ Nuínkia áishmaḡ Jesus nin tsuárman nekáa Israer-shuaran ujakmiayi. ¹⁶ Tuma asamtaí ayampratin tsawantai túramtaí Israer-shuar Jesusan maatai tusar áintrarmiayi. ¹⁷ Tura Jesus tímiayi “Wina Apar tuke yamaisha takawiti. Núnisnak Wissha takaajai.” ¹⁸ Tutai Israer-shuar nuna nanḡkaamas maatai tusa wakermiayi. Ayampratin tsawantai takaakuí kakerkarmiayi. Tura nu arantcha “Yus winia Aparuítí” takuí Yusjai métek enentáimtumawai tusar nu arant kakerkarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentáijjiaín takaatsui. Antsu aya winia Apar takaana nuna ísan métek takaajai. Ashí winia Apar túramun Wissha ni Uchirí asan métek takaajai. ²⁰ Ni Uchirí asamtaí winia Apar anentui tura ashí tura nuna iniakturui. Tura nuna nanḡkaamas tujinkiamnian iniaktursattawai Wissha túratniun. Tura nuna túrakui ashamkattarme. ²¹ Winia Apar jakamunmayaan iwiaaku ajasat tusa Ni wakerana nuna iniantesatuk. Núnisnak, ni Uchirí asan, Wi wakeraj nuna iwiaaku awájsámniatjai. ²² Winia Aparka súmantiktusui antsu shuar súmantikiatniun ni Uchirín súsaiti. ²³ Tuma asamtaí ashí shuar Yus Apan shiir awajainia áintsan ni Uchiríncha métek shiir awajsatín áiniawai. Yus Apa ni Uchirín akupka asamtaí, Uchin shiir awajeatsna nuka Yus Apancha shiir awajeatsui’ tímiayi.

²⁴ “Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarín tuke amuukashtinian takakui. Nu shuarsha ayashí iwiaakuitiat jákauyi antsu yamáí nekas iwiaakuiti. Tuma asa sumamashtatui. ²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsunman antukar umirkarka iwiaaku ajasartatui. ²⁶ Iis, winia Apar iwiaaku awajsatniun takakui. Tura Winiassha, ni Uchirí asamtaí, iwiaaku awajsatniun surusuiti. ²⁷ Nu arantcha wi Aents Ajasu asamtaí,

shuaran súpamtiaktianiu surusuiti. ²⁸ “Ju chicham itiuurchataiti” enentáimprairap. Atak tsawantaj wi untsumman ashí jákaru ainia nu antukartatui. ²⁹ Tura ashí iwiarsamunmaya jíinkartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsaiyáiti” tu áujmatainia nu

³⁰ ‘Imia Wíki takaatsjai. Antsu Yus tana núnisnak súpamtiakajai. Wi wakeraj nuna enentáimtsuk antsu winia Apar wakera nuna wakerukan, Nii akupta asantai, awajitsuk súpamtiakajai. ³¹ Aya Wiki “Yúsaiyáiti” tákunka winia chichamur ántar ainti. ³² Chikichcha awai. Niisha “Yúsaiyáiti” túrutui. Ni chichamesha imiá nekasaiti. ³³ Atumsha Juankej wi túramu inintrusmarme tura nii timia nu nekasaiti. ³⁴ Tuma aijn aents táman atsumatsjai. Antsu Juanke chichame enentáimkiuram uwempratarum tusan tájarne. ³⁵ Juansha jiya núnis keemai. Atumsha ishichik tsawantin nú tsáapninnium warastin enentáimprarmarme. ³⁶ Tura Winia “Yúsaiyáiti” túrutna nu, Juanjaj nankaamas péñkeran takakjai. Wi takasma núiti. Winia Apar takastinian surusma nuna takaakun nujai pántaiti Yus Apa akupkamuitjai. ³⁷ Winia Aparsha, akuptuku asa, ayamprutui. Túrasa átumka ni chichamesha antukchaitrume tura wáintiash wáinkichuitrume. ³⁸ Yus Apa akuptukuiti. Tuma asantai Winia enentáimturhakrum winia Aparu chichamesha atumi enentáin wayachuiti. ³⁹ Átumka Yus-Chicham yaunchu aarma nuj iwiaaku átinian wáinkiatatjar tusarum ti unuimiaruitrume. Nu chichamsha Wínian áujmatui. ⁴⁰ Tuma aijn nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisa nuna páchiatsjai. ⁴² Maa, Wi nékajrume. Átumka Yus aneatsrume. ⁴³ Winia Apar akuptukmatai táwitjai túrasa nakitrarme. Antsu chikichka ní enentáijjajin jeartamkuinkia nuka átum wakerarme. ⁴⁴ Átumka nuámtak “Shiir enentáimtursati” tu enentáimtuaiyarme. Tura Yus enentáimturma nuka páchiatsrume. Nújainkia çitiurak Yus enentáimtustam? ⁴⁵ “Ii tunaarjin Yusaj etserturmakatjij” turutiirap. “Muisais akupkamun umirkan uwemprattajai” tátsurmek. Antsu Muisais aarma nujaj atumí tunaarj etsernakatui. ⁴⁶ Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume. ⁴⁷ Tura ni aarma enentáimtachurmeka çitiurak wi tama enentáimtustarum?” tímiayi Jesus.

6

Jesus senku mir (5.000) áishmanjan ayurawarmiania nu

(Mateu 14.13-21; Márkus 6.30-44; Rúkas 9.10-17)

¹ Nu nankaasmatai Jesus Kariréa antumiannum amain katinmiayi. Nu antumiansha Tipirias antumian tuiniawai. Jimiará náartiniaiti. ² Untsurj shuar Jesus ti jáinian timiá wárik tsuan wáinkiaru ásar Nin nemariarmiayi. ³⁻⁴ Israer-shuara paskuanamperi ishichik ajasmatai Jessusha ni unuiniamurjjaj náinnium waka nuj pujusmiayi. ⁵ Jessusha untsurj aents wininian wáiniak Jiripin tímiayi “Tímiá untsurj shuar ayuratniusha çituyaj yurumak sumaktajjij?” tímiayi. ⁶ Kame Jesuska Nii túrattana nuna neka asa Jiripi warittin tusa tímiayi.

⁷ Jiripisha nuyá tímiayi “Tímiá nukap kuitjaj tanta sumakmesha ashí ishichik susamsha jeachaintjia” tímiayi.

⁸ Nuyá chikich unuiniamurj Antres, Pitru yachj, tímiayi ⁹ “Uchi juj senku (5) tantan jimiará namakjaj takakui. Ausha timiá untsurjnmasha jeatpiash” tímiayi.

¹⁰ Nuyajka ““Ashj pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asantai nujsa senku mir (5.000) áishman pujusarmiayi. ¹¹ Jessusha nu tantan achik Yúsán yuminkias ni unuiniamurjin susamiayi. Niisha ashí nuj pujuinian súsarmiayi. Namaknasha núnisan ashí ni wakierarmiania nuna súsarmiayi.

¹² Jémararmataisha Jesus ni unuiniamurjin tímiayi “Ampirma júukrum chaninnium chumpiatarum. Wasúrniakain.” ¹³ Niisha senku (5) tantanmaya ampirman júukar tuse (12) chaninnium áimkiarmiayi.

¹⁴ Nu shuarsha Jesus túramun ísar tiarmiayi “Ju nekas Yúsnan etserin tátinia núchakait.” ¹⁵ Shuar Jesusan uunt akupin awajsataj tutai Jesus nekáa Niŋki náinnium wémiayi.

Jesus entsá pátatek nanamas wekasamiania nu
(Mateu 14.22-27; Márkus 6.45-52)

¹⁶ Kíakui Jesusa unuiniamurj antumiañnum wearmiayi. ¹⁷ Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarmiayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajaras Jesus entsá pátatek nanamas tíjiuch winian wáinkiar ashamkarmiayi. ²⁰ Tura Jesus “Wiitjai. Ashamprukairap” tímiayi. ²¹ Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurj Jesusjainchu chikichik kanu amia nujai wéarun nekaawarmai. ²³ Nuí chichak matsataj Tipirias péprunmaya chíkich kanu táarmiayi. Yau Jesus Yúsán yumíŋkias tantan ayuramunam tíjiuch táarmatai ²⁴ nu shuar, Jesussha ni unuiniamurjsha nuí atsuiniakui, nu kanunam enkemáwar Kapernáum péprunam Jesusan eaktajtsa wearmiayi.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutfa jujsa támam?”

²⁶ Jesussha tímiayi “Ti nekas tájarme. Aents tujintiamu nekáa asarum éatsume. Antsu tanta yuarum jémaru asarum éatrume. ²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuarán Yáinŋkiartiniaiti” túrutui” tímiayi.

²⁸ Tutai inintrusarmiayi “¿Warí túratniuitiaji Yus wakerana nu umiktin?”

²⁹ Jesussha tímiayi “Yus akupta asa Winia enentáimtursarat tusa wakerawai.”

³⁰ Tutai aniasarmiayi “¿Aentsti tujintiamuka warí túratam ii ísar Ámin nekas enentáimtustin? Chikichcha túratá. ³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úuntriñ nayaimpinmaya yurumkan súdachmiayi. Antsu winia Apar yamáí nekas apatkun nayaimpinmaya súramui. ³³ Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasa wi túramu wáinkiuromesha winia chichamur enentáimtatrume. ³⁷ Ashí shuaran winia Apar tsankatrukarmiania nu, Wíí shuar ajasartatui. Winin winiana núnaka penké nakitrashtajai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. ⁴⁰ Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittijai” tímiayi Jesus.

⁴¹ Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nekátsjik. ¿Itiurak “Nayaimpinmaya táraitjai” ta?” tiarmiayi.

⁴³Jesussha t́miayi “Tu áujmatrukairap. ⁴⁴Shuáran winia Apar akúpturkachuitkiuñkia penké weanturkachainti. Tura Winia akupturna nuna amuukatin tsawantaj iníántkít-tia-jai. ⁴⁵Yúsnan etserniu áarmarín tawai “Ashí Yus jintintiamu ártatui”. Núnisan ashí Yusa chichamen antukar unuiniataniakka Winí táiniawai’ t́miayi.

⁴⁶“Aya Wiki Yúsaiya tau asan Yúsan wáinkiaitjai. Ch́kíchka penké wáinkiachuiti. ⁴⁷Ti nekas tájarme. Winia enentáimturna nú shuarka yamaram iwiaakman amuukashtinian takakui. ⁴⁸Wikia iwiaakman súana nú apatkuitjai. ⁴⁹Iis, atumí uuntri aents atsamunam maná yurumkan yuawariatcha ashí jákarmiayi. ⁵⁰Antsu Wi tájana nú apatkun shuar yúakka jákachartatui. ⁵¹Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusartí tusan winia ayashrun susattajai” t́miayi Jesus.

⁵²Nuyá nuántak áujmattsar tiarmiayi “¿Itiurak ni ayashínkeshá ayurtamattaj?” tiarmiayi.

⁵³Jesussha t́miayi “Ti nekas tájarme, Wi Aents Ajasu asamtai winia ayashur yúat-niuitrume. Winia ayashur yúachmeká tura winia numpar umarchamka nekas iwiaaku pujatsrume. ⁵⁴Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iníántkít-tiajai. ⁵⁵Winia ayashruka nekas yurumkaiti tura winia numparsha nekas umutainti. ⁵⁶Winia ayashruncha yúaká tura winia numparnasha úmaká Wijjaj tsaniñ pujawai tura Wisha nu shuarjaj tsaniñkian pujajai. ⁵⁷Yus Apa, Winia akuptukuka, nu iwiaakma nérenniuiti. Tuma asamtai ni iwiaakmariñ iwiaaku pujajai. Núnisan Winia yurakka winia iwiaakmaruj iwiaaku pujustatui. ⁵⁸Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” t́miayi Jesus. ⁵⁹Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹Jesussha ni áujmatman nekáa t́miayi “Átum “ju chicham itiurchataiti” tárumek. ⁶²Wátsek, Wi nayaimpiniam pujumiaj nuñ waketkimtaisha ¿urukawaintrume? ⁶³Warí, aya wakanik iwiaakman súwaiti. Ayashkia penké áantraiti nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” t́miayi Jesus. ⁶⁴Tura Jesus Nin enentáimtachun tura Nin suruktatna nunasha yaunchu neka asa ni unuiniamurj t́miayi “Atumíncha winia chichamprun enentáimtachu tuke awai. ⁶⁵Nu asamtai t́mia-jrume “Shuáran winia Apar akupturkachamitkiuñkia penké weanturkachainti” t́miajai” t́miayi Jesus.

⁶⁶Nuyasha ni nemarniurj untsurj armia nu Jesusan ikiukiar atakka Nijjaj wekasacharmi-ayi. ⁶⁷Nuyá Jesus ni tuse (12) unuiniamurj chicharainiak “¿Atumsha wétin wakerarmek?” t́miayi.

⁶⁸Semuñ Pítrusha áikmiayi “Uunta, ¿yáiniñ wetaji? Ame chichammijjaj nekas iwiaaku áminiaiti. ⁶⁹Ame Kristu asam nekas iwiaaku Yusa Uchirínme. Nuka enentáimtusar ti paant nekaji” t́miayi.

⁷⁰Jesussha t́miayi “Ashí tuse (12) árumna nu achikiuitjarme nekas Wí shuar ajastin. Tuma aiñ atumjñ chikichik iwianchiiti” t́miayi. ⁷¹Nuna taku Jútas Iskariútin, Semuñka uchirín, enentáimtus t́miayi. Jútassha ni unuiniamurjntiat Jesusan ukunam surukmiayi.

7

Jesusa yachisha Nin enentáimtuscharmiaiyi

¹Nu nankaamasmatai Jesus Kariréa nunkanam wekaimiaiyi. Jutía nunkanam wéchami-ayi Israer-shuara uuntri nuñ máataj tutai. ²Tura Israer-shuar aakamatai namperi jeatemamtai ³Jesusa yachí wishikiainiak tiarmiayi “¿Urukamtai jujsha pujam? Jutía nunkanam wetá, aishá ame unuiniamuram túram nuna ísarat. ⁴Ashí shuar nekaawarat

tákumka úukam túrawaip. Ti tujintiamu túriniaitkiumka ashí shuar íimmianum túratá” tiarmiayi. ⁵ Ni yachísha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainkia nánkamas tsawant wétin péñkeraiti. ⁷ Ju nuñkanmaya aents atumniaka kajertamatsume. Antsu ni tunaarín etsertin asamtai Wíniaka kajertuiniawai. ⁸ Átumka nampernum wetarum. Wikia tsawantur jeachkui wéatsjai.” ⁹ Juna tinia Jesuska Kariréa nuñkanam juákmiayi.

Aak aakmatai nampernum Jesus timia nu

¹⁰ Ni yachí wearmatai Jesussha nampernum wémiayi. Tura nekarawarain tusa úumak wémiayi. ¹¹ Israer-shuara úuntriasha námpér irunturmanum eakar “Nu aishmansha ¿tuin pujá?” tiarmiayi. ¹² Ashí shuarsha Nin áujmatiarimiayi. Chíkich “péñkeraiti” tiarmiayi. Tura chikichcha “Péñkerchaiti. Aya anañkartawai” tiarmiayi. ¹³ Tura Israer-shuara úuntrin ashamainiak uuk áujmatiarimiayi.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiayi.

¹⁵ Israer-shuara úuntriasha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniayna nu winia chichampruchuiti antsu Winia akuptukua Núnan unuiniajai. ¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaitkiuinikia, nuna nekaattawai. Aya wi enentáim-miajain chichaakuisha, nuna nekaattawai. ¹⁸ Ni enentáimmiajai chichaana nuka ashí shiir enentáimtusarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. ¹⁹ Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jesussha tímiayi “Ayampratin tsawantai chikichkí túramtai ti enentáimtsurmek.

²² Muisais ashí tsupirnaktinian akupkachmiayi. Antsu ni uuntrinikia nuna akupka áiniawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume. ²³ Wátsek, Muisais akupkamu uminkiatí tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantai áishmanka ayashí takamtsuk tsuármatai kajertarum? ²⁴ Shuar túrana nu ísam wárik súmamtikiaiwai. Antsu inintrúsam paant nekaam, nekas nu enentáimtusta” tímiayi Jesus.

Jesus Yúsnumiá akupkamuiti

²⁵ Nuyá Jerusarénnumiá shuar tiarmiayi “Maatai tuinia núchakait. ²⁶ Tura nuj ashí ántamunam étserei tura suntar páchiniatsui. ¿li uuntriasha “Nekas Krístuiti” tu enentáimtuiniawash? ²⁷ Antsu nekas Kristu taa tuyan winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen wájá kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuíti. Niisha ti nekas akupniusha átumka nékatsume.

²⁹ Antsu Winia akuptukuitkiui aiyá tau asan Wikia nékajai” tímiayi. ³⁰ Nuyá sepunam enkeataj táyat achikcharmiayi ni tsawantri jeachu asamtai. ³¹ Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

“Éátkáttarme tura wáitkiashtatume” tímiayi Jesus

³² Pariséusha Israer-patri úuntriasha Jesusnan timian antukar suntaran akupkarmiayi Jesusan achikar sepunam enkeawarat tusar. ³³ Nuyá Jesussha tímiayi “Aya ishichik tsawant atumjai pujustatjai. Nuyá ataksha Winia akuptuku pujana nuj waketkítajjai. ³⁴ Átumka éátkáttarme tura Wi wéajna nuj wéchamniaitkiuram wáitkiashtatume.”

³⁵ Israer-shuarsha nuamtak aniniaisarmiayi “¿Jusha tuj wéakuin iisha wáinkiashtataj. Israer-shuar apachnium pujuinia nuj we apachin unuiniartatuak. ³⁶ Nii timia nu ititurkit. “Átumka éátkáttarme tura Wi wéajna nuj wéchamniaitkiuram wáitkiashtatume” tana nu ititurkit?” tiarmiayi.

Yamaram iwiaakman súana nú entsa

³⁷Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkrati. ³⁸Winia enentáimturna nuka ni enentáiyá entsa wa áintsan̄ yamaram iwiaakman súana nú entsa jiinkittiwai.”

³⁹Nuna taku Jesus “Ashí Yúsán enentáimtusarun Yusa Shiir Wakaní súsatniuiti” tímiayi. Tura núnisán̄ Yus-Papiniumsha áarmaiti. Antsu Jesus tuke nayaimpiniam wéatsain̄ Yusa Wakaní shuar súdachmauyayi.

Shuarsha niisháa niisháa enentáimprarmiania nu

⁴⁰Chíkich shuarsha nuna antukar “Ju nekas Yúsán etserin tátinia núiti” tiarmiayi. ⁴¹Chíkichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nun̄kanmayá Kristu áminkiait? ⁴²Yus-Papinium paant tawai “Krístuka yaunchu uunt akupin Tawit weeanmayá akiiniatniuiti, tawai. Tura Tawitia pépuriyá Piriñnumiá átiniaiti” tawai” tiarmiayi. ⁴³Tuma asamtai shuar niisháa niisháa enentáimprar kanakiarmiayi. ⁴⁴Chíkich áiyá nuka “sepunam en̄keatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵Suntarsha waketkiarmiayi. Tura Pariséusha Israer-patri uuntri sha “¿Urukamtai itiachuram?” tiarmiayi.

⁴⁶Suntarsha tiarmiayi “Chíkichkisha ju áishman̄ chichaa áanis chichaschaiti” tiarmiayi.

⁴⁷Nuyá Pariséu tiarmiayi “Atumsha anan̄narume. ⁴⁸Pariséutisha uuntcha nuna enentáimtuiniawash. ⁴⁹Peñké shuarka yaunchu akupkamun nékachua nuka yajauchiniam yumiñkramu áiniawai” tiarmiayi.

⁵⁰Nikiutémusha, kashi Jesusan tarimia nu, Pariséuitiat tímiayi ⁵¹“Ii shuartikia, shuar ni túramun etserkamu ántutsuk súmamtikiaichminiaiti” tímiayi.

⁵²Nuiñkia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmayá Yúsán etserin peñké táiniatsui” tiarmiayi.

Nuwá wáinmakman Jesusan itiararmiania nu

⁵³Nuyá ashí ni jeen waketkiarmiayi.

8

¹Tura Jesuska Uriwiu náinnium wémiayi. ²Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. ³Nuyá Israer-shuara jintinniurisha Pariséusha nuwan wáinmakman Jesusan itiararmiai. Tura ashí iruntramunam ajapén awajsarmiayi. ⁴Tura Jesusan tiarmiayi “Uunta, ju nuwá tsanirma pujá achinkiyai. ⁵Muisais akupkamunmasha nuna túraka “kayajaj̄ tukurar máatniuiti” tawai. ¿Amesha warintmea?” tiarmiayi. ⁶Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejéjaj̄ nuñká áarmiyai. ⁷Tura tuke iníam wajaki tímiayi “Ayu, atumiyya tunáa túrichu ákuñka kayan achik nin emka tukuti” tímiayi. ⁸Tura nuna t̄j̄, ataksha tsuntsumá nuñká áimiayi.

⁹Tura ni chichamen antukar ni enentáin̄ sumamawar úntnumiá jukí chikichik chikichik jiinki wéarmiayi.

Ashí wéarmatai Jesus Niñki nuwájaj̄ juákmiayi. ¹⁰Jesusha wajaki aya nuwanak wáiniak tímiayi “¿Ámin súmamtikramainia nusha tuñ̄ pujuinia. Chikichkisha áwak?” tímiayi.

¹¹Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikatsjame. Yamaikia weme atakka tunáa túrawaip” tímiayi.

Jesus tsáapninia áintsan̄kete

¹² Ataksha Jesus Yusa Uunt Jee iruntrarun tímiayi “Ju nunkanam Wi tsáapninia áintsan shuara enentáin tsáapniajai. Ashí Wijiái tsaniñ wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

¹³ Pariséu nuikia tiarmiayi “Ame péñkerum tau asam támena nu áantraiiti.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiiti. ¹⁵ Ju nunkanmaya aents enentáimijajai enentáimtakrum ti súmamtikrume. Tura Wikia chikichinkesha súmamtiksujai. ¹⁶ Tura súmamtikkiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijiái métek shuar túramun nékawai. ¹⁷ Atumí akupkamuriñ áarmaiti: “Jimiará shuar mai nú chichamnak tákuñkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jee Yusa kuítrñ suinia nuí tímiayi. Tuma aijn sepunam enkeatniun achikcharmiayi ni tsawantri jeachu asamtai.

“Wi wéajna nuí wéchanmiaitrume” tímiayi Jesus

²¹ Jesus ataksha tímiayi “Wikia wéajai. Atumsha éatkáttarme tura wi wéamunam wéchanmiaitkiuram atumí tunaarijiañ jakattarme.”

²² Israer-shuarsha tiarmiayi “Wi wéamunam wéchanmiaitrume” tutai, nuñkia máamat-piash” tiarmiayi.

²³ Nuñkia Jesus tímiayi “Átumka nunkeyaitrume antsu Wikia nayaimpinmayaitjai. Ju nunkeyaitrume tura Wikia juyanchuitjai. ²⁴ Tuma asamtai tájarne “Atumi tunaarijiañ jakattarme.” Nekas Wi tájana núitjai. Tura nu enentáimtachkurmeka atumi tunaarijiañ jakattarme” tímiayi.

²⁵ Niisha aniasarmiayi “¿Amesha yáitiam?”

Jesussha tímiayi “Yaunchu tájarne. ²⁶ Nu arantcha atumin súmamtikiatjarum tusan ti tímniaitjai. Winia Apar akuptukua nuka tuke nekas nuna tawai. Tura aya ni taman antukan ashí shuaran nunak taji” tímiayi. ²⁷ Tuma aijn ni Aparñ áujmatman penké nekaacharmiayi. ²⁸ Tuma asamtai tímiayi “Aents Ajasuitjiana ju, numiniam ajinruarum yakí takuriakrumin nújainkia nekarattarme. Wi tájana núitjai tura winia enentáirjain takatsuk aya winia Apar unuitiurmanak tájai. ²⁹ Winia akuptukua nuka tuke Wíjiañ pujawai. Winia Apar wakeramun tuke shiir túrakui ikiurkichiiti” tímiayi. ³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átratume. ³² Nújajisha timiá nekas ana nu nekaattarme tura nekas ankant ajastatume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetach-maitji. ¿Urukamtai “Ankant ajastatume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti. ³⁵ Takarniusha ajapnamnia asamtai Yus atumin ajapramanniaitrume. Tura Akupniu Uchirñkia ni Aparjiañ tuke pujawai. ³⁶ Tuma asamtai Akupniu Uchirñ ankant awajtamsamtainkia imiá nekas ankant pujustatume. ³⁷ Átum Apraám weeittrume nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaktursamun áujmatjai. Átumka atumí ununtri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úuntrinñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaktursamtai nuna ujakjarne, tuma aijn mantuataj tarume. Apraámka nuní túrachmiayi. ⁴¹ Antsu atumí ununtri túrana áintsarum túrarme” tímiayi.

Tutai niisha tiarmiayi “Warí, tsanirnumiã akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuñkia Winiasha anentíntrume Yúsnumiã tau asamtai. Wisha winia enentáimmarjají jui táchaitjai antsu Yus akuptukuiti. ⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparíñkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti. ⁴⁵ Tura Wikia nekas takuí átum enentáimturtsurme. ⁴⁶ ¿Yaki chikichkí tunaajají súmamtikruamniat? Nuikia Wi nekas nuna tau aisha ¿urukamtai enentáimturtsuram? ⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsajín Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchruchaitjai. Áyatik winia Aparun shiir enentáimtikiajai. Tura átumka yajauch chichartarme. ⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túruma péñkerashit tusa nekaattawai. ⁵¹ Ti nekasaiti. Wi tájana nuna enentáimta nú shuarka penké jákashtiniaiti” tímiayi.

⁵² Nuiñkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruítí tura Ame “Wi tájana nuna enentáimtaka penké jákashtiniaiti” tátsumek tiarmiayi. ⁵³ ¿Nuiñkia ii uuntri Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuítí. Nusha átumka “winia Yúsruiítí” tárúmna núítí. ⁵⁵ Nusha táyatrum Nin nékatsrume. Wikia Nin nékajai. “Nin nékatsjai” tákunka atumjají métek wáitrin áintjai. Tura Nin neka asan Nii tana nuna tuke túriniaitjai. ⁵⁶ Apraámka, atumí uuntri, imiá yaunchu jákaiítai Wi ju nuñkanam tátinian wararas nákasmiayi. Tura wáitiak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraáman wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsajín Wikia pujajai” tímiayi Jesus.

⁵⁹ Nuna takuí kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jejenia jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurijjají wesa áishmankan kusuru akiinian wáinkiamiayi. ² Ni unuini-amurísha aniasarmiayi “Uunta, jusha ¿urukamtai kusuru akiiniawit. Yana tunaarjijajín kusuru akiiniat. Niiniujajímpish, aparíniujajímpish túrunawit?” tiarmiayi.

³ Jesus tímiayi “Ni tunaarjijajínchusha ni aparíniujajínchusha túrunaiti. Antsu Yus ni ayashín túratniua nu paant atí tusa túrunaiti. ⁴ Tsawaikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai. ⁵ Jú nuñkanam pujakun shuara enentáin tsáapnimitkratniuitjai” tímiayi. ⁶ Nuna chichas nuñká usukmi nuñkajají pachimiar kusuru jiiñ yakarmiayi. ⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusuruusha we nijiamar péñker ímiar támiayi.

⁸ Nuyá ni írutkamurjsha nuik wáinin ármia nusha tiarmiayi “Juka pujus tuke kuítian seamniuya núchakait.” ⁹ Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niñki “Ee, wiitjai” tímiayi.

¹⁰ Tutai aniiniak “¿Itiurak yamaikia ímiam?” tiarmiayi.

¹¹ Niisha tímiayi “Áishman Jesusa nu tsakusan jíirun yakartur “Siruí pajamtai entsanam nijiamauta” turutmiai. Takui wena nijiamaran paant iimpramjai” tímiayi.

¹² Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Pariséunam júkiarmiayi. ¹⁴ Kame Jesus kusurun tsuarmia nuí ayampratin tsawantauyayi. ¹⁵ Tuma asantai Pariséusha itiurak ímnnium tusar aniasarmiai.

Niisha tímiayi “Jíiruín tsakusan yakaarámtai, nijiamaran paant iimjiai.”

¹⁶ Nuyá chíkich Pariséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantai túraití” tiarmiayi.

Tura chikichcha “Tunáa shuaraitkiuinjia júnisai túratniun tujinkiaayi” tiarmiayi. Nujai akannaikiarmiayi.

¹⁷ Tsuármancha ataksha aniasarmiai “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

¹⁸ Tura Israer-shuar nekas kusuruitiat yamá ímiui tu enentáimtuscharmiai Pariseu. Tuma ásar ni aparíncha untsukar ¹⁹ inintrusarmiai “¿Ame uchiram kusuru akiinia tárumna nukait. Itiurak yamaikia íimia?” tiarmiayi.

²⁰ Ni aparísha tiarmiayi “Ii uchirínkia kusuru akiiniama nu nékaji. ²¹ Tura iisha nékatsji itirak yamaikia íimia. ¿Yátsuk péñker tsuáruit? Niisha úuntchakait, nii aniastarum. Niñki ujatmakarti” tiarmiayi. ²² Sapijmiak tiarmiayi. Israer-shuara úntrinjia “Jesus Yus akupkamu asa nekas Krístuiti” tuinia núnaka Israer-shuara iruntainmaya jíiki akupnakti tiniu ásar matai tsuarma aparí ashamkarmiai. ²³ Nu asantai ni aparí “Niisha úuntchakait, nii aniastarum” tiarmiayi.

²⁴ Nuínkia Israer-shuara uuntri kusuru tsuárman ataksha untsuk tiarmiayi “Yus ímmin-anum nekasa nu titiá, ju áishmanjka tunaarinniuiti nékaji” tiarmiayi.

²⁵ Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia íimjiai.”

²⁶ Ataksha aniiniak “¿Itiurtámkama. Itiur ímtikrammia?” tiarmiayi.

²⁷ Niisha tímiayi “Yaunchu tájar me tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

²⁸ Nuínkia katsekkar “Ámeke ní shuarinme. Tura iikia Muisaisa shuaríntji, tiarmiayi.

²⁹ Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

³⁰ Áishman tsuarma tímiayi “¿Ausha itirtsuk áminiait? Winia ímtikurma nu átumka nékatsrume tuyankit. ³¹ Paant nékaji tunaarinniun Yus anturtsui. Tikishmatar ni wakera-mun túruinia nunak anturui. ³² Yaunchusha kusuru akiinian tsuáruka tuke atsuwaiti. ³³ Ju áishman Yúsaiyanchuitkiunka penké túrachaaayi” tímiayi.

³⁴ Nuínkia tiarmiayi “Ámeke tunaarintin akiinaiiatmesha ¿in jintintin átaj tamek?” Nuna tiar jíiki awemarmiayi.

Wakanín kusurua nu

³⁵ Kusuru tsuárman jíiki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

³⁶ Tsuarma tímiayi “Uunta, turuttia wisha nekaan enentáimtustaj.”

³⁷ Jesusha tímiayi “Wainme. Wiitjai ámijai chichaajna nu.”

³⁸ Tutai, tikishmatar “Uunta, enentáimtajme” Jesusan t́miyai.

³⁹ Nuyá Jesus t́miyai “Shuara enentáin nekaan, akantratajtsan táwitjai. Ni enentáin kusuru aín iimtikinian tura ananmamuk “Yusnan nekaan paant iimjai” tana nuna ukusturtinian táwitjai” t́miyai.

⁴⁰ Tutai Pariséu shuar nuí pujuarmia nu nuna antukar “¿Nuínkia iikia kusurukaitiaji?” tiarmiayi.

⁴¹ Jesussha t́miyai “Átum kusuruitkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” t́miyai.

10

Iikia murikiua áintsar aji

¹ Jesus t́miyai “Wi tájana nu ti nekasaiti. Shuar murikiun takakna nu ni murikrin wenuimiuman kashi ikuuawai. Tura murik wenuimiuman pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. ² Antsu murikiu wáinniuka wáitiniam wayaawai. ³ Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawaikia ni murikrin jiki ayurtainiam yarumui. ⁴ Tura ashí ni murikrin jir émtuki wéawai. Muriksha ni chichamen ántuiniak untsuam nemarainiawai. ⁵ Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus t́miyai “Ti nekasana tájarne. Wenuimiu wáitiri murik wainia nuka Wiitjai. Shuarsha murikiu áintsar Winí wayamin áiniawai. ⁸ Wi táatsain ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wíi shuar áiniak nu shuaran anturkacharmiayi. ⁹ Wikia wáititjai. Ashí Winin wayaaka uwemprattawai. Tura murikiua áintsar wenuimiumaya jinki pénger yurumáttawai tura atak wayá ayamprattawai’ t́miyai.

¹⁰ Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia pénger wáinniutjai. Pénger wáinniuka ni murikrin uwemtikrartaj tusa jakattawai. ¹² Antsu aya kuitjai takauka ni murikri chu áiniakui tura nekas wáinniuchu asa pénger wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. ¹³ Nu shuarsha akiam takáa asa murikiun enentáimtatsui. Nu asamtai aya pisaawai’ t́miyai.

¹⁴⁻¹⁵ “Wikia pénger wáinniutjai. Winia Aparsha nékarui. Wisha Aparun nékajai. Núnishnak murikrun nékajai tura winia murikrusha nékarui. Wisha murikiun uwemtikrataj tusan jakattajai. ¹⁶ Chíkich muriknasha takakjai. Nusha ju wenuimiumayanchu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiumaya ajasartatui tura chikichik wáinin átatui’ t́miyai.

¹⁷ “Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuínkia chíkichkia mantuachminiati. Jákatniuncha tura nantaktinnishasha winia Apar surusuiti” t́miyai Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurí tiarmiayi “¿Urukamtai ántarum wáuruk tausha. Yajauch wakanin takaktsuk?” ²¹ Tura chikichcha tiarmiayi “¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?” tiarmiayi.

Israer-shuarka Jesusan nakitiarmiania nu

²² Mícha nantutin Israer-shuar Jerusarénnum namperan najanainiawai. Nu nampernumsha Yusa Uunt Jee atak jeamman enentáimtuiniawai. ²³ Jesussha Yusa Uunt Jee áachiniam wekasamiayi Sarumúnka wáitirja nuí.

²⁴ Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

²⁵ Tutai Jesus tímiayi “Yaunchu tiniu aḡn enentáimturachmarme. Winia Apar akup-kamun takaajna nu ti paant awajtawai. ²⁶ Tura átumka winia murikruchu asarum enentáimtursturme. ²⁷ Wisha winia murikrun utsuam anturtuiniak nemartuiniawai. Wisha wínianak mash nékajai. ²⁸ Tura yamaram iwiakman tuke jákashťinian súajai. Nu asamtai niisha meḡkakachartatui antsu Wi wainkia asamtai ¿yaki jurutkit? ²⁹ Winia Apar murikiun surusuiti. Niisha ashí naḡkaamas kakaram asamtai ¿yaki uwejeýan atankit? ³⁰ Wisha winia Aparjaj iisha aya chikichkiitji” tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi “Winia Aparu kakarmarijaj ti untsurí péḡkera nuna takasuitjai. ¿Tújajmpia mantuattarum?”

³³ Israer-shuarsha Nin tiarmiayi “Péḡker túra asakmin máataj tátsum antsu Yus yajauch chicharkumin túrattaji. Ámeka shuáratiatam Yusa nuke enentáimtumame” tiarmiayi.

³⁴ Nuyá Jesussha tímiayi “Atumí akupeamuriḡn Yus timia nu áarmaiti: “Átum yúsaitrume” tawai. ³⁵ Kame Yus-Papiniun aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. ³⁶ Niisha yúsaitkiuḡkia nuikia Yus Apa anaikia ju nuḡkanam akupkamu asan ti nekas Yúschakaitaj. Nújajḡkia wi “Yusa Uchirintjai” takui ¿itiurak “Yusan yajauch chicharui” túrutrum? ³⁷ Winia Apar túramu túrachkuḡkia enentáimtursairap. ³⁸ Tura nekas túrachkuḡkia enentáimtursatarum. Tura Winia nakitrakrumsha nuikia wi túramu enentáimtusatarum. Nújajḡkia winia Apar Winin pujamu ashí nekaattarme. Núnisḡka Wisha Niḡn pujajai. Iisha chikichkiitji.” ³⁹ Tutai ataksha sepunam eḡkeatai tiarmiayi. Túrásha Jesus uwempramiayi.

⁴⁰ Nuyá Jesus Jurtaḡ entsa amain wé yaunchu Juan imiakrattainium pujusmiayi. ⁴¹ Ti untsurí shuar iyumar tiarmiayi “Nekas Juank aentsti tujintiamun túrachiat ashí Jesusnan tímia nu nekasaiti” tu tiarmiayi. ⁴² Nuḡsha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajjaj Mártajaj pujumiayi. ² Niisha Rásaru umai ármiayi. Nu Marisha ukunmanka kuḡkuinian sumak Jesusan kuer ni intiashjajaj japirmiayi. ³ Tura Rásaru jaaku ni umaj Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmariḡsha tura ni Uchirí kakarmariḡsha jú suḡkur tsuármanum paant atí tusa jaawai.” ⁵ Jesus Mártancha ni kajḡncha tura ni umaj Rásaruncha nekas aneemiayi. ⁶ Túmaitiat Rásaru jaawai taman antukiat ni pujamunam jimiaḡ tsawant pujusmiayi. ⁷ Nuyá ni unuiniamuriḡn “Ataksha Jutía nuḡkanam wetái” tímiayi.

⁸ Tura ni unuiniamuriḡsha tiarmiayi “Uunta, nuiksha Israer-shuar kayajaj tukurmar mantamatai tícharmaka. ¿Nuḡ ataksha wétai támek?”

⁹ Jesussha ju métek-taku chichaman tímiayi “Tsawaikia páantchakait. Tsawaj wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkát-tawai. Núnisaḡ Wí tuke pujakun winia takatrun takastiniaitjai. Túraknasha itiruchatan wáinkiashtatjai.” ¹¹ Nuyásha Jesus atak tímiayi “Ii amikri Rásaru kanarai. Wi ishintiartatjai.”

¹² Tutai ni unuiniamuriḡ tiarmiayi “Uunta, aya kanarka nuḡḡkia péḡker ajastatui.”

¹³ Jesuska Rásaru jakamu nékayat “kanarai” tímiayi. Tura ni unuiniamuriḡ Rásaru kajin-makua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuḡ pujuscha asan kúntuts pujatsjai. Jean túrattajna nu físrum ti nekas enentáimtusattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chikich unuiniamuriḡ nuḡ armia nuna “Iisha weri Niijaj métek jakatai” tímiayi.

Iwiaaku átinnishasha jaka nantaktinnishasha Jesus nérenniuiti

¹⁷ Nuj̄ taa, Rásarun kuartru tsawant ikiusman wáinkiamiyai. ¹⁸ Petania pépruka Jerusarénnunumiā menaintiú kirumitru áinis t̄jiuch̄iiti. ¹⁹ Tuma asamtai untsur̄i Israer-shuar Mártaasha Marísha, ni umaj̄ jakamtai uutkui atsankrataj tusa weriarmiayi. ²⁰ Mártaasha Jesus t̄jiuch̄i ajasan nekáa in̄kiuntajtsa wémiayi. Antsu Marikia jeá pujumiayi. ²¹ Tura Marta Jesusan in̄kiun̄ t̄miayi “Uunta, Ame pujakminkia winia umar jákachaayi. ²² Tura tuke nékajai ashí Yus seamna nuna súramui.”

²³ Jesussha t̄miayi “Ame umaimisha nantaktiatui.”

²⁴ Mártaasha t̄miayi “Nekas, ashí amuamunam jákaru nantaktin tsawantaj̄ nantaktiatui. Nuna nékajai.”

²⁵ Nuyá Jesus t̄miayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtakek?”

²⁷ Niisha “Ee, Uunta, ame Yusa Uchir̄inme. Kr̄stuitme, uwentikkiartin j̄u nun̄kanam tátinia nu” t̄miayi.

Jesus Rásaru iwiansamunam taa úutmiania nu

²⁸ Mártaasha nuna t̄i, ni kaj̄ Marin untsuk úukan̄ t̄miayi “Uunt j̄u taa untsurmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta in̄kiun̄manum pujumiayi. ³¹ Marí wari wajaki wématai Israer-shuar nu jeanam atsankratta pujuiniasha nuna ísar weriarmiayi. Iwiansamunam úuttiasa wéatsush tusa weriarmiayi. ³² Marisha Jesus pujamunam jeá tikishmatar t̄miayi “Uunta, Ame pujakminkia winia umar jákachaayi.”

³³ Jesussha Marincha tura niij̄aj̄i úutuncha wániak wáitnentaimta asa ti kúntuts pujumiayi. ³⁴ Tura “Tūj̄ iwiansamarum” t̄miayi.

Niisha “Uunta, iitia” tiarmiayi.

³⁵ Jesussha úutmiai. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuaruchukait. Nii pujakuisha Rásaru jákaampiash” tiarmiayi.

Rásaru iniantkimi

³⁸ Jesussha ti kuntuts enentáimiar iwiansamunam weankámiayi. Náinnium asa paka taurna áuyayi. Tura kaya atutkamuyayi. ³⁹ Tura Jesus “Kaya jurustarum” t̄miayi.

Rásaru umaj̄ Marta t̄miayi “Uunta, kuartru tsawant jákaiti. Mejeatsuk’ t̄miayi.

⁴⁰ Tura Jesus t̄miayi “Yus enentáimtakmeke Yusa kakarmarī wáinkiattame t̄chamkajam.” ⁴¹ Nuikia kayarin̄ uratiarmatai Jesus nayaimpin iis t̄miayi “Aparu, Winia anturtakmin yuminsajme. ⁴² Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.” ⁴³ Nuna tinia kakaram untsuak “Rásaru j̄inkitia” t̄miayi. ⁴⁴ Nuj̄ain̄kia penuarmartiuk j̄iinkimiayi. Yapinmasha jaanch̄ij̄ai ijiamuyayi. Tura Jesus “Atirtarum. Wéti” t̄miayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsur̄i Israer-shuar Marin nemariaru Jesus túramun ísar enentáimtusarmiayi. ⁴⁶ Tura chíkichkia Pariséunam wear Jesus túramun ujakarmiayi. ⁴⁷ Nuna antukar Pariséusha Israer-patri úuntrīsha ashí naamka uunt armia nuj̄ai iruntrar tiarmiayi “¿Warí itir̄kamniait? Nu shuarka aentsti tuj̄intiamun ti túratsuk. ⁴⁸ Aya j̄unik̄ iniaiyakrinkia ashí shuar Nin enentáimtuschartatuak. Nuyá Rúmanmayā apach taar mesetan najanawartatui tura in amutmakar Yusa Uunt J̄ēncha emesrartatui.”

⁴⁹ Nu uwitin Kaipias Israer-patri uuntrīyayi. Niisha t̄miayi “Átumka nékatsrume. ⁵⁰ ¿Ashí Israer-shuar mesertin péñkerk̄ait. Antsu aya chikichik shuar jákatin péñkerchakait?” t̄miayi. ⁵¹ Kaipiaska aya ni enentáimmaj̄ain̄ t̄chamiayi. Antsu nu uwitin Israer-patri uuntrī asamtai Yus nuna enentáimtikramiayi. Nuj̄ain̄kia Israer-shuar Jesus jaruktinian̄ ujakmiayi. ⁵² Tura aya Israer-shuarnakcha antsu niij̄aish̄a ashí nun̄kanam Yus-shuar ajararun irurtajtsa jákatniuyi. ⁵³ Tuma asamtai nu tsawantinī Israer-shuara uuntrī Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutfa nunkanmaya jiiinki atsamu nunkanam Eprain pepru tjiyuch wémiayi. Tura nuñ pujusmiayi ni unuiniamurijjai.

⁵⁵ Israer-shuara namperj paskua ishichik jatemsamtai untsurj shuar yajá péprunmaya Jerusarénum káunkarmiayi. Kame paskua jeatsajñ Muisais timia núnisan ni ayashísha enentáisha iwiarnarat tusa wakeriarmiayi. ⁵⁶Jesusnasha eak ujarmiayi. Tura Yusa Uunt Jeeñ pujusar nuamtak aniniaisar “¿Warí enentáimiam. Jístanam tatimpiash?” tiarmiayi. ⁵⁷Pariséusha Israer-patri uuntriña akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiania nu
(Mateu 26.6-13; Márkus 14.3-9)

¹ Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuññ pujumiayi. ²Jesus jeamtai ayurawarmiayi. Rásarusha nijjai yurumámiayi. Mártaasha yurumkan iwiasmakmiayi. ³Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijjai japirmiayi. Jeasha nu kunkuinjai ti shiir kunkuñmiayi. ⁴Jútas Iskariúti, Semunka uchrí, nuñ pujumiayi. Niisha Jesusa unuiniamuríntiat ukunam Jesusan surukmiayi máawarat tusa. Niisha tímiayi ⁵“¿Urukamtai nu kunkuinian ti kuitjai surukchama kuítrinchan súsatniun?” ⁶Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷Tura Jesus tímiayi “Iniaisata. Wi iwiarnakui kuératniun sumak ikiurtsuuti. ⁸Kuítrincha tuke atumjai íruntsuk. Antsu Wikia atumjai tuke pujuschattajai” tímiayi.

Rásaruncha máataj tiarmiania nu

⁹Israer-shuarsha Jesus Petania péprunam pujan antukar Jesus íistaisar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. ¹⁰Túramtai Israer-patri uuntrin kichichaman jurusarmiayi Rásaru maatai tusar. ¹¹Untsurj Israer-shuar Rásaru iniantkimium nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir waygmanian nu
(Mateu 21.1-11; Márkus 11.1-11; Rúkas 19.28-40)

¹²Paskua namperan pachiintiuktajtsa ti untsurj shuar Jerusarénum wearmiayi. Kashin tsawar Jesus nú peprunam tátinian nekaawarmiayi. ¹³Niisha tintiuki nuké áinis nukan júurar Jesusan inkiuntai tusar jínkiarmiayi. Túrawar untsumainiak “Shiir tati, tiarmiayi. Yusa kakarmaríjjai winiana nu tí péñkeraiti. Israer-shuara uuntri asa shiir ati” tu untsumiarmiayi. ¹⁴Jesussha umpuurun wáiniak entsamkamai. Núnisan áarmaiti Yus-Chichamnum:

¹⁵“Seun péprunmaya shuara, ashamkairap. Atumj Akupniurj umpuurunam entsamak winiawai.”

¹⁶Nu chichamaik Jesusa unuiniamurj nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

¹⁷Jesus Rásarun iwiarsamunmaya iniantkimium wáinkiarua nú shuar nuna áujmatiarmai. ¹⁸Tuma asamtai shuar Jesus nu tujintiamun túramtai nekaawar Jesusan inkiunktaj tusar jínkiarmiayi. ¹⁹Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakeriarmiania nu

²⁰Paskua nampernum Yus shiir awajsatniun Jerusarénum weriaruka untsurj nunkanmaya shuar ármiai. Kriaku apachcha ármiai. ²¹Niisha Jiripin weantukarmiayi. Kame nu Jiripi Petsaitia péprunmayayuyayi. Petsaitia péprusha Kariréa nunkanam awai. Nincha

Kriaku apach seainiak “Uunta, Jesusjaj chichastaitсар wakeraji” tiarmiayi. ²² Jiripisha Antresan werí ujakmiayi. Nuyá niijijaj métek tsaninkiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnás-tatjai. ²⁴ Wi tájana nu ti nekasaiti. Jiñkiaia ántsanketjai. Araachmaka niñki pujatsuk. Antsu araamka tsapain jinkiaichiri kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. ²⁵ Shuarsha jinkiaia nuke aya ju nunkanam péñker pujustinian enentáimkiunka ántar pujak nekas iwiaakmarin emenkkatui. Tura ju nunkanam péñker pujustinian enentáimtsuk jákatniuncha asham-chaa nú shuarka nekas iwiaakman wáiniak tuke iwiaaku átatui. ²⁶ Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui’ tímiayi.

Jesus ni jákatniun éterseri

²⁷ “Yamaikia enentáiruí ti iturchat pujajai. ¿Warittijak. “Aparu, ju túrunatniunmaya uwemtikrurta” titiajash? Antsu jú túrunatniun táwitjai. ²⁸ Aparu, wi túramujaj ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsattajai tura ataksha shiir awajsattajai” tímiayi.

²⁹ Shuarsha nuí pujuinia “ipiamtachuashit” tiarmiayi. Tura chikichcha “Nayaimpin-maya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura numiniam awajnaintai ashí nunkanmayanuka shuar enentáimturartatui” tímiayi. ³³ Juna taku krúsnum jákatniun ujakmiayi.

³⁴ Shuarsha awajirar tiarmiayi “Yaunchu Yus akupkamu papiniumia áusjar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnitniuiti” tame? Aents Ajasuka Kristuchukait, Yus anaikiamu. Núchaitkiuinikia Aents Ajasuka yait?” tiarmiayi.

³⁵ Nuiñkia Jesus tímiayi “Wi tsáapninia ántsanketjai. Tsáapnisha atumíin aya ishichik tsawantin tsáapniartatui. Tsáapin ana juik wekasatarum kirit ajatsajin. Kame kiritniunam wekaana nusha nékatsui itituranimpia wea. ³⁶ Tsáapnin wáinkuram nin enentáimtus-tarum. Túrakrum winia tsáapninruí wekasattarme.” Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiai. ³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

³⁹ Nuna uminiak Jesusan enentáimtuscharmiai. Tura nu arantcha Isayas áarmiayi:

⁴⁰ “Yus nin kusuru awajsaiti tura ni enentáincha kátsuram awajsaiti. Ni jijijaj ímsajin tusa tura ni enentáijijaj nekaawajin tusa túrait. Kame ni tunaari íisar enentáimtuiniakui Yus nin tsuáraini” tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ajin untsurí Israer-shuarsha tura ni uuntrinmayasha Jesusan nekas enentáimtusarmiayi. Tura niisha Paríséun ashamainiak paant tícharmiai. Israer-shuara iruntairiya jiiiki awetamaj tusa ashammiarmiayi. ⁴³ Yus shiir enentáimtursati tutsuk antsu shuar shiir enentáimtursati tusar túrawarmiayi.

Shuaran sumamtikiatniun táchaitjai antsu uwemtikratniun táwitjai, timiania nu

⁴⁴ Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawaí. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturainia nuka kiritniunam wekasajin tusan ju nunkanam táwitjai. ⁴⁷ Shuáran sumamtikiatniun táchaitjai antsu uwemtikratniun táwitjai. Tuma asantai shuar winia chichamprun antuk umíachkunka

sumamaiti. Tura Wikia sumamtikiachuitjai. ⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai. ⁴⁹ Wi enentáimmiájaj chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamurj nawen niijatramiania nu

¹ Paskua jísat jeatin chikichík tsawant ajasmatai Jesusa tsawantrj jeatemayi. Túramtai ju nuṅkan ikiuki ni Aparin wétiniuyi. Jesussha nuna nekaamiayi. Ashí Níiniun ju nuṅkanam pujuinian tuke anea asa amúamunmasha yapajitsuk tuke aneemiayi. ² Nu tsawantaisha murikiun yúatin ármiayi. Tura yurumátin jeatsain, uunt iwianch Semuṅka uchirj Jútas Iskariúti enentáin Jesusan surukat tusa enentáimtikramiayi. ³ Tura Jesus Yusaiya tau asa wakétkitniuyi. Tura Yus Apa ashí mash susamiayi akupin atí tusa. Jesussha nuna nekáa ⁴ chíkich yurumuk pujuiniaj wajakmiayi. Tura pushirin ámiak awaṅkémán emenmamamiayi. ⁵ Nuyá nijiaamatainiam entsan yará ni unuiniamurj nawen niijatramiayi. Tura awaṅkémajai japirmiayi. ⁶ Semuṅ Pítrunam jeamtai Pítiur tímiayi “Uunta, ¿Winia nawer niijartaj tamek?”

⁷ Jesussha tímiayi “Wi túrajna nu yamáí nékatsme tura ukunam nekaattame.”

⁸ Tura Pítiur tímiayi “Peṅké winia nawer niijarchattame.”

Jesussha tímiayi “Wi nijiaachkuṅkia Wijjaj tsaniṅkia pujuschamniaitme.”

⁹ Tutai Semuṅ Pítiur tímiayi “Nuṅkia, Uunta, aya nawerkechu antsu uwejrusha tura muukarsha niijatruṛta.”

¹⁰ Tura Jesus tímiayi “Yamáí mainkia ayashí shiir asantai aya nawenin nijiamártiniaiti. Atumí enentáin ashí peṅkeraitrume. Túrashá ashí shuaracha” tímiayi. ¹¹ Kame Jútas Nin suruktinian nekáa “ashí shuaracha” tímiayi.

¹² Jesussha nijiar umik ni pushirin entsarmiayi. Tura atak pujus tímiayi “¿Atumsha Wi túrajna nu nekaarmek? ¹³ Wi atumí Uuntrj asantai nekas “Uunta” túrutrume. Nusha peṅkeraiti. ¹⁴ Tura Jintinniuitiatan tura Úuntaitiatan atumí nawen niijarchajak. Atumsha núnisrumek nuamtak náwem niijatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekasán tajai. Takarniuka ni uuntrj naṅkaamaschaiti. Akupkamusha akupea nuna naṅkaamaschaiti. ¹⁷ Nu nekaarum túrakrumka shiir átatrume.”

¹⁸ Tura tájana nuna ashí tátsujrume. Anaikiaitaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjaj yurumna nu winia nemasur ajasai.”

¹⁹ Nuka túmatsajin ujaajrume. Nuyá túrunamtai Yusa Uchirintjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserui

(Mateu 26.20-25; Márkus 14.17-21; Rúkas 22.21-23)

²¹ Nuna tj, Jesus ni enentáin ti itiuṛchat enentáimpramiayi. Tura paant tímiayi “Nekas tajai, chikichik juj atumjai pujana nu Winia surutkattawai.”

²² Tutai ni unuiniamurj nuamtak íniaisar “¿Yanak ta?” tiarmiayi. ²³ Chikichík unuiniamurj, Jesus ti aneamu, Nijjaj tsanin yurumuk pujumiayi.

²⁴ Tuma asantai Semuṅ Pítiur ni uwejéjaj iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiai. “¿Yait, Uunta?” tímiayi.

²⁶ Jesussha ayak “Tantan túumnium ajuṅkan susattaj núiti” tímiayi. Nújajin tantan túumnium ajuṅ Semuṅka uchirín Jútas Iskariútin susamiayi. ²⁷ Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túratamna nu wárik túrata.”

²⁸ Tura ashí nuí yurumainiak pujuarmia nusha wariniak ta tusa nekaacharmiayi. ²⁹ “Kuítríncha kuit súarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi. ³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkintai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujai Yusa kakarmarísha ti paant átatui. ³² Wi Yusa kakarmarín paant awajeakui Wisha ni Uchirí asamtai winia kakarmarnasha Yuska wárik paant awajsattawai. ³³ Uchichiru, atumjai ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia éátkáttarme tura wi wéamunam winishtatume. ³⁴ Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitume. ³⁵ Anenaiyakrumniñkia nujai ashí shuar “Kristu unuiniamurí áiniawai” túramartatui.

Pítur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semuñ Pítur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuí yamaikia winichminiaitume. Tura ukunam winitiarne.”

³⁷ Nuyá Pítur tímiayi “Uunta, ¿urukamtai yamaikia winichminiaitaj? Ámin yáintajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimtustarum, Winiasha enentáimtursatarum. ² Winia Aparuñ átum pujustin ti ankant awai. Tura nuna iwiarataj tusan Aparuñ wéajai, nekasaiti. Nekaschaitkiuñkia ¿itiurak ujakaajrum? ³ Tura iwiaraan amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

⁶ Jesussha tímiayi “Wi nekas jintiaitjai. Wíjiaínchu wekaana nuka winia Aparuñ jeatniun penké tujintiawai. Tura Wisha tuke nekas tiniu asan nekas ana nuna shuáran nékantikijai. Wisha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuñkia Jiripisha tímiayi “Uunta, Apasha wáinkiarka maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame?

¹⁰ Winia Aparjai tsaniñkian pujakun tura winia Aparsha Wijiai pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wisha winia Aparjai tsaniñkia pujakur nekas chikichkiitji. “Nu chicham itirchataiti” enentáimkiurmeka wi túramu nuikia enentáimpratarum. Wi túramujai chikichik ájnia nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuñ wéakui nuna nankaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nújainkia winia Apar shiir awajnastatui. ¹⁴ Winia enentáimtursarum seakrumniñkia ashí túrattajai’ tímiayi.

Jesus Yusa Wakanín akupkattawai

¹⁵ ‘Atumsha anentkurmeke winia chichamur umiktaram. ¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui. ¹⁷ Nusha Yusa Wakanjinti. Yus-shuarcha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakai Nii nékarme. Niisha atumi enentáin tuke pujustatui. ¹⁸ Mitiakia áitkiasnak ikiukchattajrume. Atumjin atak tátatjai. ¹⁹ Ishichik tsawant nankaamasmatai chikich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatume. Tuma asarum wáitkiattarme. ²⁰ Tura nu tsawantai ju nekaattarme. Wisha winia Aparjai tsaniñkia pujakur chikichkiitji. Núnisnak Wisha atumjai tsaniñkian pujajai. Tura atumsha Wijjai tsaniñkia pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustajai.” Jesus nuna tímiayi.

²² Chikich Jútas, Iskariútiachu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtawai. Winia Aparsha nu shuarn aneattawai. Tura Wisha winia Aparnum nu shuarjai tsaniñkia pujustatji. ²⁴ Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjai tuke pujakun nuna tájarme. ²⁶ Yus Apa ni Shiir Wakanjin atumin yáinmak atsantamprarat tusa akupturmaktatume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

²⁷ ‘Imiatkinchanum pujustaram. Imiatkinchanum pujajna núnisrumek pujustaram tusan amaajai. Jú nuñkanmañka warastin wáinkiashtatume. Antsu itiurchatnum pujayatrumpkesha Wijjai imiatkinchanum pujustatume. Ashamtsuk pujustaram. Itiurchat enentáimprairap. ²⁸ Nuik timiaj nu antukmarme. Aparuí wena atak atumiñn tátatjai. Winia Aparka Wijjai nankaamas úuntaiti. Tuma asamtai ti nekas anentkurmeke “Aparuí wéajai” takui ashí warasaarme. ²⁹ Nuka túmatsain ujaajrume. Túrunamtai nuyá Winia enentáimursattarme” tímiayi.

³⁰ ‘Jú nunkanmayan akupin winiakui atumjai núkap chichaschattajai yamaikia. Wíniaka nupettukchamniaiti. ³¹ Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsan ketjai

¹ ‘Winia iwiaakmarun amaakun numi arakma áintsan ketjai. Wikia kampuñtjai atumsha kanawentume. Winia Aparsha arakan wáiniua núnisaiiti. ² Winia kanawernasha nereat-sna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujai puruarmaitume. ⁴ Numí kanawesha kampuin áchitkiachkunka niñki nerechamniaiti. Núnisrumek atumsha Winí áchitkiachkurmeke nerechamniaitume. Wi atumjai áchitkiaj núnisrumek atumsha Winí tuke áchitkia atarum’ tímiayi.

⁵ ‘Wikia kampuñtjai atumsha kanawentume. Kampuñkia kanawen áchitkia núnisnak achiakjarme. Tura kanawe ni kampuñin áchitkia núnisrum Winí áchitkia atarum. Túrakrumka núkap nerektatume. Antsu Wjjainchuka penker túratin penké tujintiarume. ⁶ Winí áchitkiachchuka ajapam kukartatui. Kanawesha kukarmatai shuar irumkar áesawartatui’ tímiayi.

⁷ ‘Tuke Winí áchitkaiitkiurmeka tura winia chichamprusha kajinmattsuk emetarmeka átum wakerarmena nu seakrumin amastatjai. ⁸ Átum núkap nereakrumniñkia ashí shuar “Nekas Jesusa unuiniamurñti” túramartatui tura winia Aparnasha shiir awajartatui. ⁹ Winia Apar anenna nútiksanak Wisha atumin aneajrume. Winia aneamur tuke atarum. ¹⁰ Winia Aparu akupkamurñn umiakun tuke ni aneamurñntjai. Núnisrumek winia akupkamur umiakrumka tuke winia aneamur átatume’ tímiayi.

¹¹“Wi waraajna áintsarmek warastarum tusan nuna tájarme. Tura ti shiir warastatrumé.
¹²Wi akupkamu júiti: “Wi aneajrumna nútiksarmek ashí anenaitiarum.” ¹³Shuar ni amikrin yáintaj tusa jakaŋka ti aneŋkartichukait. ¹⁴Wi akupeamu takaakrumka atumsha winia amikruitrumé. ¹⁵Takarniuka ni uuntri takaana nuna nékatsui. Tuma asamtai “winia takarniuruitrumé” tátsujrumé. Antsu ashí winia Apar táman ujaku asan “winia amikruitrumé” tájarme. ¹⁶Aya atumí enentáimsamurijjain Wíi shuar ajaschamarne. Antsu akatramur ajastarum tusan atumniaka achikjarme Wi. Winia takatur takastini-aitrumé. Túrarum péŋker túratniuitrumé nerektinia áintsarmek. Tura nu nere amuutsuk tué átiniaiti. Tuma asamtai winia Apar searmena nuna amastatui. ¹⁷Júnaka akupeajrumé: Nuamtak mai anenai ajatarum’ tmiyai.

Yus-shuarcha Jesusnasha Níniuncha nakitiainiawai

¹⁸“Ju nuŋkanmaya shuar Winia emka nakitrurar atumniasha nakitramarme. ¹⁹Atumsha ju nuŋkanmaya shuaraitkiurminkia niiniua nútiksaj anenmaintrume. Antsu Wíi shuar ajastarum tusan ju nuŋkanmaya achikmajrumé. Túramtai nekas ju nuŋkanmayanchnuitrumé yamaikia. Nu asamtai nu shuar nakitramainiawai. ²⁰“Takarniuka ni uuntri nankaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. ²¹Winia Akuptukun nékachu ásar Winia enentáimturkurmin yajauch awajtamsartatui’ tmiyai.

²²“Wi tana Yus-Chichaman nin ujakchamtaiŋkia tunaanum sumamacharaayi. Antsu ujakma ásar “Nékachkun túraitjai” tíchamin ániawai. ²³Winia nakitruinia nuka winia Aparnasha nakitiainiawai. ²⁴Aents penké túrachman túrachuitkiuŋkia tunaanum sumamacharainti. Antsu wi túramun wáinkiaru ániayat Winiasha tura winia Aparnasha nakitiainiawai. ²⁵Yaunchu Yus akupkamunam áarmaiti: “Penké ántar nakitrurarmai.” Nu chicham uminkiatu tusa túrunaiti’ tmiyai.

²⁶“Tura atsantamprattsá yáinmana nuna winia Aparuıya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekamtikramprattarme. ²⁷Atumsha yaunchu Wijjai pujusu asarum nekamtikiattarme’ tmiyai.

16

¹“Átum kanartukajrum tusan júnaka tájarme. ²Israer-shuar iruntainiumia jjiiki akup-tamkattarme. Nu arantcha mantamainiaksha “Yúsan shiir awajsattsan túrajai” tíartatui. ³Nu shuar Winiasha tura winia Aparnasha nékachu ásar túrutmawartatui. “Núnaka yamá tájame. Tura túrunamtai “núnisaj átiniaiti” timiaj nu nekaarum itiurchat enentáim-prairap’ tmiyai.

Yusa Wakanı túrana nu

“Atumjai tuke puja asan núnaka yaunchu ujakchamajrumé. ⁵Antsu yamaikia wáketjai winia Akuptukmia nujai pujustaj tusan. Tuma áin wéajna nu inintratsrumé. ⁶Antsu nuna takui ti kuntuts enentáimprarme. ⁷Tura Wi wématai atumjaiŋkia nuna nankaamas péŋker átatui. Iis, Wi wéaknaka atumin yainmaktinia nuna akupkattajai tura wéachkuinŋkia táchattawai. Nuka ti nekasaiti. ⁸Yusa Wakanı taa ashí jú nuŋkanmaya aentsun ju menaintiun nekamtikiattawai. Ni tunaari aan nekamtikiattawai. Péŋker tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai. ⁹Winia enentáimturainiachu tunáarintin ániawai. ¹⁰Winia Aparuı wáketkui wáitkiashtatrumé. Tuma asamtai ashí shuar wi péŋker tunaajainchu wekaamun nekaawartatui. ¹¹Tura ju nuŋkanam akupniunŋka Yus tunaanum súmamtikia asa shuarnasha súmamtikiamnaiiti. Nuna paant nekaawartatui’ tmiyai.

¹²“Nu arantcha núkap tíntjarme túrasha átumka nekaachaintrume. ¹³Yusa Wakanı ashí nekas tiniu asa ashí nekasa nuna unuitiamprattarme. Ni enentáimijai tíchattawai antsu winia Aparuı antukma nuna ujatmaktatui. Ukunam átatna nunasha ujatmaktatui. ¹⁴Ashí Wínian ujatmak Winia shiir awajustatui. ¹⁵Ashí winia Apar takakna nusha Wíniaiti. Nu asamtai “ashí Wínian ujatmaktatui” taji’ tmiyai.

Kúntuts pujuniayat ukunam warasartatui

¹⁶‘Ishichik pujusrum Winia wáitkiashtatrome. Nuyá ataksha ishichik pujusrum ataksha wáitkiattarme. Wisha winia Aparuí wéajai’ tímiayi.

¹⁷Nuyá ni unuiniamurí nuamtak aniniiasarmiayi “¿Jú chichamsha warimpait? “Ishichik pujusrum wáitkiashtatrome tura ataksha ishichik pujusrum wáitkiattarme tura Aparuí wéajai” tátsuk. ¹⁸“Ishichik pujusrum” tana nusha ¿warimpait? Nii tana nu ántatsji” tiarmiayi.

¹⁹Jesussha nin aniaštai táman nekáa tímiayi “Ishichik pujusrum wáitkiashtatrome nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu? ²⁰Ti nekas tájarne: Átumka kúntuts pujusrum úttiatrume tura Yusshuarcha warásartatui. Tuma aínkí átum kúntuts pujayatrume ukunam warasartatrome. ²¹Iis, nuwásha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. ²²Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warasartatrome. Nu warastinian jurutramkichminia ániawai.’

²³‘Nu tsawantinkia penké ininsashtatrome. Ti nekas tájarne Winia enentáimtursarum winia Apar searum nuna ashí amastatui. ²⁴Yamaisha Winia enentáimtursarum winia Apar seachurme. Seakrumniñkia amastatui ti shiir warasaruk tusa’ tímiayi.

Jesus jú nuñkanmayan nupetkaiti

²⁵‘Métek-taku chichamjái nakumkan nuna tímiajai. Tura ukunmanka nujái chichatsuk winia Aparnan paant ujaktatjarne. ²⁶⁻²⁷Nu tsawantái átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatín atumashatratrome. Winia anentu asarum tura winia Aparuíya taman enentáimtakrumin Niisha anenmawai. ²⁸Winia Aparuíya jíinkin jú nuñkanam táwitjai. Yamaikia jú nuñkanmaya jíinkin ataksha Aparuí wáketjai” tímiayi.

²⁹Nuyá ni unuiniamurí tiarmiayi “Yamaikia métek-taku chichamjainchu chichaame. ³⁰Mash nékaitme. Shuar Ámin ininmatsáin penker áimkiatin nékame. Nu nekaar Ame nekas Yúsnuniamtme tu enentáimtai” tiarmiayi.

³¹Tura Jesus tímiayi “¿Nekasash enentáimtarum? ³²Ti warik átumka ashamkarum niisháa tsakinmaktatrome tura Winiak ikiurkittiarne. Antsu winia Apar pujakui Wiki pujatsjai. ³³Winia enentáimturkum imiatkinchanum pujusarat tusan tájarne. Jú nuñkanam ti wáitsattarme. Tura Wi jú nuñkanmayan nupetka asamtai warastarum” tímiayi Jesus.

17

Jesus ni unuiniamurín Yúsan áujtawai

¹Nuna tí Jesus nayaimpinmaaní ímias tímiayi “Aparu, yamá jeayi ame Uchiram shiir awajsatín. Núnisan ame Uchirmisha penker awajtsattawai. ²Ashí shuara Akupniurí najataitme. Nujáinkia Winia surusumna nú shuaran yamaram iwiakman tuke amuukash-tinian súsaitjai. ³Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiakman tuke amuukash-tinian takakui.’

⁴‘Ashí túratniun akuptukmamna nuna amukuitjai. Túran jú nuñkanam shiir awaj-saitjame. ⁵Nuna túramtai, Aparu, ti yaunchu jú nuñka atsaisha Ámijíai pujakui shiir awajtusmamna núnismek yamaisha shiir awajtusta.’

⁶‘Ashí jú nuñkanmaya surusmamna nú shuaran Ámin nekamtikiamjai. Áminiu ániakui surusmame. Niisha ame chichammin umirtámkaruiti. ⁷Ashí Wi takaajna nu Amek surusuitme. Niisha nuna nékainiawai. ⁸Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuini-awai.’

⁹‘Nin yáinikiarta tusan seajme. Jú nuñkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yáinikiarta tusan

seajme. ¹⁰ Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia pēnkerusha ni túramunam paant awajsaiti.’

¹¹ ‘Wikia yamaikia jú nuṅkanam pujuschattajai. Tura nu shuarka juṅ pujuartatui. Antsu Ámijjajai pujustajtsan winiakui ashí surusumna nuka, Aparu, ti shiir asam ame kakarmarmijjajai wáinkiaata. Wisha Ámijjajai chikichik ájinia núnisanṅ niisha ashí iruntrar chikichik ajasarti. ¹² Juṅ niijjajai pujakun ame kakarmarmijjajai ti pēnker wáinkiamjai. Antsu Yus-Chichamnum aarma uminkiaati tusa aya chikichik menkakaiti. Niisha tuke emesnartinia núiti.’

¹³ ‘Yamaikia Amiini winiajai. Tura juṅ tuke pujakun juna tájame. Niisha Wi waraajna núnisar ti shiir warasarat tusan tajai. ¹⁴ Wi jú nuṅkanmayanchuitjai. Niisha núnisanṅ jú nuṅkanmayanchu áiniawai. Tuma asamtai ame chichammin Wi susamtai jú nuṅkanmaya shuarka nin nakitiainiawai. ¹⁵ Jú nuṅkanmaya júki tusan seatsjame. Antsu íwianch nin nupekaiṅ tusan seajme. ¹⁶ Wi juyanchuitaj áintsanṅ niisha juyanchu áiniawai. ¹⁷ Ame chichammin ti nekasa nuna ántuiniakui pēnker awajsata. ¹⁸ Juyaj shuarnum akuptukmam áintsan Wisha nin chikich shuarnum akupeajai. ¹⁹ Aya Áminiunak takastaj tusan enentáim-timjai. Túra asamtai niisha aya Áminiunak takastinian enentáimpratin áiniawai’ áujtak tímiayi.

²⁰ ‘Aya níniunkeka seatsjame antsu ashí ni chichamen antukar Winia enentáimtursartatna nusha ame yáinkiaarta tusan seajme. ²¹ Ashí niisha chikichkiniak enentáimtusarti tusan seajme. Wisha Amesha, Aparu, chikichik ájinia núnisanṅ niisha Iijjajai iruntrar chikichik ajastai tusar seajme. Wíi shuar chikichik najanata tusan seajme. Nuyá juṅ nuṅkanmaya shuar akuptukuitmena nuna nekaawartatui. ²² Ame shiir awajtursamna núnisnak Wisha nin shiir awajsaitjai. Iikia chikichik ájinia núnisanṅ niisha chikichik ajasarti tusan túraitjai. ²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar juna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajajai ashí shuar nuna nekaawartatui.’

²⁴ ‘Aparu, shuar surusmam nu, Wi pujustatjana nuṅ pujusarti tusan seajme. Tura ti shiir awajtusmamna nuna ísarti tusan nuna seajme. Juṅ nuṅka najanchamunmanṅ tuke anentin asam ti shiir awajtusuitme. ²⁵ Aparu, ti pēnker ámininṅ juṅ nuṅkanmaya shuar nekarmaini-atsui. Antsu Wi nékajme. Juṅ shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiatatjai. Nújainkia Wisha ni enentáin pujurkui Winia anenmena áintsanṅ niisha anenkratin ajasartatui” áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jesussha nuna tinia amuk ni unuiniamurijjajai Setrunṅ entsá katinṅ numi arakmanum wémiayi. ² Jútassha Nin suruktajtsa pujumia nuka nu ajan nekaamiayi. Untsuríṅ tsawant Jesus ni unuiniamurijjajai nuṅ iruntramtai Jútas Jesusan nuṅ wáinkiatniun enentáimpramiayi. ³ Tura untsuríṅ suntarjajishsha Jesusan tariarmiayi. Pariséusha Israer-shuar Patri uuntriṅsha suntarnasha Yusa Jēen wáiniuncha Jesusan achikiarat tusa akupkarmiayi. Niisha machitniasha nanṅkincha rámparancha jiniasha júkiar weriarmiayi. ⁴ Jesussha ashí átinia nuna neka asa jiintiuki “¿Ya eḡarum?” tímiayi.

⁵ Niisha “Nasarétnumiḡ Jesus” tiarmiayi.

Jesussha “Witjai” tímiayi.

Jútassha Jesusan surukua nu niijjajai pujuarmiayi. ⁶ Tura Jesus “Witjai” takui ti ashamkar úkumur waketainiak iniaarmiai.

⁷ Ataksha Jesus “¿Ya eḡarum?” tímiayi.

Niisha “Nasarétnumiḡ Jesus” tiarmiayi.

⁸ Nuiñkia Jesus tímiayi “Wíitjai, tájarme. Winia eątkurmeka Wíi shuar ainia júka waketkiarti” tímiayi. ⁹ Jesus nuik aujuk “Winia Apar surusma nu menkakachari” timia nu uminkiat tusa Jesus “waketkiarti” tímiayi. ¹⁰ Nuyá Semuñ Pítiur machitian jusa Marku kuishjñ untsuurnumaanĭ tsupirkamiayi. Markusha Israer-patri uuntriĭ takarniurĭyayi. ¹¹ Túramtai Jesus Pítrun tímiayi “Machitrumka awainĭki ikiusta. Winia Apar waĭtsatniun surakuñkia ¿waĭtsashtinkaitĭaj?”

Israer-patri úuntriñiam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuiñkia apach suntarsha ni kapitántrisha Yusa Jeen wainniusha Jesusan achikiar jinkiawarmiayi. ¹³ Nuyá Anasa jeen júkiarmiayi. Anassha Kaipiasa wearĭyayi. Tura Kaipias nu uwitin Israer-patri uuntriĭyayi. ¹⁴ Kaipiasa nuik “¿Ashĭ Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semuñ Pítiur chíkich unuiniamujai Jesusa uku weriarmiayi. Israer-patri uuntriĭ nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. ¹⁶ Tura Pítiur aa waĭtiniam wajaamiayi. Túramtai chíkich unuiniamu jiinki waĭtin wáinia nú nuwajai chichas Pítrun awayamiayi. Nuĭ nékanu asa yúpichuch awayamiayi. ¹⁷ Waiti wáinniusha Pítrun aniasmiayi “¿Amesha nuna unuiniamurĭnchukaitĭam?”

Pítrusha “Atsá, núchaitjai” tímiayi. ¹⁸ Tsetsek asamtai suntarsha tura nuĭ takarniusha jinia ikiaparar ni nawen anaak pujuarmiayi. Pítrusha nuĭ pachiiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntriĭ Jesusan aniasmiayi “Ame unuiniamurmesha ¿ya ainia. Tura warĭ nin jintintiaitĭam?”

²⁰ Jesussha tímiayi “Ashĭ ímiainiaĭñ tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuĭ arantutsuk tuke etserkaitjai. ²¹ ¿Urukamtai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniu nu nuĭ pujá Jesusan yapiniam awati tímiayi “¿Núnisanĭ nekas úuntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu péñkeraitkiuñkia ¿urukamtai awattiniam?” ²⁴ Nuyá Anas Jesusan jinkiá Kaipias takaamunam akupkamiayi Kaipias Patri uuntriĭ asamtai.

Pítiur ataksha Jesusan natsantramiania nu

(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiaĭ Pítiur jinia anamuk puján shuar aniak “¿Amesha Jesusa unuiniamurĭnchukaitĭam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari, nuĭ pujumiayi. Pítiur Marku kuishjñ tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

²⁷ Pítrusha ataksha “atsá” taiñ atash shiniukmiayi.

Piratu Jesusan aniasmiania nu

(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasaiya Jesusan júkiar tsawant tsawaamunam apach kapitán Piratu takatai jeenam ejeniarmiayi. Israer-shuarsha ni uuntriĭ akupkamia nunisar wapik ajasajĭ tusar nu jeenam wayacharmiayi. Wayawarka paskua nampernum yurumáchmin ármiayi. ²⁹ Nu asamtai Piratu nijjai chichastaj tusa jíinki tímiayi “¿Jĭ áishmanĭsha warĭ tunáa túrait?”

³⁰ Niisha “Tunaarinchaitkiuñkia amiñi itiachaajĭ” tiarmiayi.

³¹ Tutai Piratu tímiayi “Atumek júkirum atumĭ akuptammarijjai ni tunaarĭ nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachmini-aitji.”³² Yaunchu Jesus ni jákatniurin enentáimtus “Wi awajnitniuitjai” tímiayi. Niisha krúsnum awajnin asantai apach máataijiai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeka Israera Uunt Akupniurinkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Amee shuarak Israer-patri uuntrijiai winin itiarmarai. ¿Wari tunáa túraitiam?”

³⁶ Nuiñkia Jesus tímiayi “Wi jú nunkanam akupniuchuitjai. Juyaitkiuñkia Winia nemartuiniana nu máanaikiaraayi. Túrawarmatai Israer-shuarum surutkachaaraayi. Antsu juyan akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)*

Piratusha nuna ti, atak Israer-shuarjai chichastajtsa jiinki tímiayi “Jú aishmanka tunaarin penké wáittsujai. ³⁹ Tura ashí uwitin paskua nampernum sepunmaya shuar ankant akupkatniuiti. Núnisrum tuke searme. Tuma asantai, ¿yamaikia Israera Uunt Akupniurin ankant akupkattajak?” tímiayi.

⁴⁰ Nuiñkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyai.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap janke najanamun etsenkrumtikiarmiayi. Yamakai pushincha uunt akupniua áintsan áentsarmiayi. ³ Nuyá “Israera Uuntria, kakaram ajasta” tiar yapiniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jikiatjai. Wikia tunaarinkia penké wáittsujai.” ⁵ Tímiatai Jesussha janke etsenkruku tura pushin yamakairman entsaru júinkimiayi. Tura Piratu nuí káunkarun tiarmiayi “Pai juiti, ístarum.”

⁶ Israer-patri uuntrisha suntarsha Jesusan ísar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarin penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. ⁸ Nuna antuk Piratusha nu nankaamas ashankamiayi. ⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi. ¹⁰ Nuyá Piratu tímiayi “¿Urukamtia winia áirtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuñkia penké tujinkiaintme. Nu asantai amin surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuitjai” taku atumí uunt akupniurí nemasrinti” tu untsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nuí kaya ukatkamu asantai Israer-shuara chichamen Kapata anaikiarmiayi. ¹⁴ Paskua jisat jeatsain nantu tutupin ajatsain Piratu Israer-shuaran tímiayi “Uunt akupniuram ístarum.”

¹⁵ Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurin krúsnum máattajak?” tímiayi.

Tura Israer-patri uuntri tiarmiayi “Atumí uunt kapitiántrumek in akuptamji. Chíkíchka atsawai.”

¹⁶Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusa krúsnum máawarmiania nu
(Mateu 27.32-34; Márkus 15.21-32; Rúkas 23.26-43)

¹⁷Jesusha ni krusri yanaki Kúrkuta náinnium wémiayi. Kúrkuta naarísha Israer-shuara chichamen “muuka ukunch” tawai. ¹⁸Nuí krúsnum ajintrurar awajainiarmiayi. Tura mai pae jimiara shuara chikichik chikichik awajainiarmiayi. Tura Jesus ajapén ámiayi.

¹⁹Piratusha Jesusa krúsriñ uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi. ²⁰Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusaréñ pepru tjiyuch asamtai Israer-shuar ti untsurí áujiarmiayi. ²¹Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

²²Tura Piratu nincha ákiar “Wi áaraj nuke átatui” tímiayi.

²³Suntarsha Jesusan krúsnum awajainiar ni entsarmarín kuátru akankar ankant ankant júkiarmiayi. Tura ni pushirín apatsuk najanamu asamtai jááktinian nakitrarmiayi. Kame yakíya nunkaani apaiyiachma takamtsukuyi. ²⁴Tuma asamtai suntar tiarmiayi “Juka jáákhatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi!” áarmaiti.

²⁵Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. ²⁶Jesus ni nukuríncha tura ni ti aneamu unuiniamuríncha nuí wajan wániak ni nukurín tímiayi “Nukuru, ju ame uchirnea áintsan atí.” ²⁷Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamuri ni jeeñ jukí awayámiayi.

Jesusa jakamuri
(Mateu 27.45-56; Márkus 15.33-41; Rúkas 23.44-49)

²⁸Nuyá ashí uminkiamtai Jesus nuna nekáa yaunchu Yus-Papinium aarma uminkiatu tusa “kitiamajai” tímiayi. ²⁹Nuisha piniñnum churuín ámiayi. Tura shuar nuna uruchjai ejampar sapapjai iju mukunaati tusa susamiayi. ³⁰Jesusha churuínian najekaa “ashí túrunatniua nu mash uminkiai” tímiayi. Nuna tí, muuken nená jakamiayi.

Suntar Jesusan paenam nanjikijai ijiuimiania nu

³¹Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant ajñ tusa nakitrarmiayi. Nu asamtai Piratun seainiak “Krúsnum ajintrurma ainia nuna kankejain suntar kupirkarti. Nuyá wari jákarmatai krúsnumia júkiarti” tiarmiayi. ³²Nuyá suntarsha weriar emka krúsnum amia nuna kankejain kupirkarmiayi. Nuyá chikichnasha Jesusjai atsankiar ajintrurma nuna kankejaincha kupirkarmiayi. ³³Tura Jesusan weantuk yaunchu jákaiti tusa kankejain kupirtsuk ³⁴suntar aya paenam ijiumiayi. Ijiuntaisha nu chichamtaik numpa yumijiai puarmiayi. ³⁵Wi, Juag, nuna wainkia asan nekas tajai. Atumsha Yus enentámtustarum tusan tí nekas tajai. Wi áarajna nu nekasaiti nékajai. ³⁶Yaunchu Yus-Chichamnum aarma uminkiatu tusa túrunaiti:

“Ni ukunchin kupirkachartatui” tu áarmaiti.

³⁷Tura chikichcha:

“Ijiuarmiania nuna wáinkiertatui” tu áarmaiti.

Jesus iwiansamu amiania nu
(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaya Jusé Jesusa ayashín jukitiaj tusa Piratun seamiaiyi. Nu Jusé Jesusan enentáimtaiat Israer-shuara úuntrin ashamak paant nemarsachmiaiyi. Niisha seamtai Piratu “Jukitia” tmiyai. Tutai Jusé Jesusa ayashín jukimiyai. ³⁹ Nikiutémusha Jesusajai chichastaj tusa kashi tarimia nu jimiara kunkuin pachimpramun ti nukap sumak itiamiyai. Mira kunkuinniasha arú kunkuinniasha sumakmiyai. ⁴⁰ Nuyá Jusé Nikiutémujai Jesusa ayashín júkiar kunkuinian kuéar jaanch esarmajai penuararmiayi. Israer-shuar tuke nunisar ikiúu ármiyai. ⁴¹ Jesus krúsnum maamua nuí aja tjiyuch ámiyai. Nu ajanmasha waa náinnium paka taurma ámiyai. Nusha yama taurma asamtai jaka nuí ikiuschamuyayi. ⁴² Nu waasha tjiyuch asamtai tura Israer-shuara ayampratin tsawantri jeatemantai Jesusa ayashín nuí iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit aín Máktaranmaya Marí Jesus iwiarsamunam úistajtsa wémiyai. Jesusan iwiarsar kaya uuntjai waan atutkarmiayi. Tura Marí nuí jeá nu kaya uraimiun wáinkiamiyai. ² Nuna wáiniak Semun Pítiur pujamunam tsékenki wémiyai. Chíkich unuiniamurí Jesus ti anemia nusha nuísha pujumiyai. Tura Marí tmiyai “Iwiarsamunmaya ii Úuntrin júkiarai. Tura ¿tuínsuk ikiusara?” ³ Pítrusha chíkich unuiniamuríjajai jínkiar iwiarsamunam iyuwarmiayi. ⁴ Mai métek tsékenkiar Pítiur jeatsain chíkich unuiniamurí iwiarsamunam emka jeamiyai. ⁵ Niisha wayatsuk tsuntsumá iis penuarmarinikia nuí tepan wáinkiamiyai. ⁶ Nuyá Semun Pítiur ukunam jeá iwiarsamunam wayá penuarmari nuí tepan wáinkiamiyai. ⁷ Chíkich jaanchcha Jesusa muuken penuarma nusha nanerma niisháa tepan wáinkiamiyai. ⁸ Nuyá chíkich unuiniamurí emka tamia nusha iwiarsamunam wayamiyai. Niisha túruna wáiniak “Jesus nekas nantakni” tu enentáimpramiyai. ⁹ Nuna wáínsuk Yus-Chichamnum “Jesus jakamunmaya nantaktiniaiti” áarman áusariat nekaacharmiayi. ¹⁰ Nuyá mai ni jeen waketkiarmiayi.

Máktaranmaya Maríncha Jesus wantintiukmiania nu

(Márkus 16.9-11)

¹¹ Tura Marikia iwiarsamunam juak útu pujumiyai. Niisha útitan tsuntsumá iwiarsamunam ímsamiyai. ¹² Tura Jesusa ayashí nuik tepesmanum nayaimpinmaya suntar puju entsaru jímjar pujan wáinkiamiyai. Chikichik múuknumaaní tura chíkichka nawenmaaní pujumiyai. ¹³ Nayaimpinmaya suntarsha “¿Urukamtai úutam?” tiarmiayi.

Marísha tmiyai “Winia Úuntrin jurutkiarai tura ¿tuínsuk ikiusara?” ¹⁴ Nuna ti ayanmar Jesusan wáiniak Nin nekaachmiyai.

¹⁵ Jesus aniak “¿Urukamtai úutam. Ya eeam?” tmiyai.

Marísha ajan wáinnua nuiti tusa tmiyai “Uunta, ame ni ayashí jukimkia, tui ikiusmam ujakata wi jurumkitiaj” tmiyai.

¹⁶ Nuyá Jesus “Mariya” tmiyai.

Tutai niisha ayanmar “Rapuni” tmiyai. Nusha Israer-chichamnum “Uuntá” tawai.

¹⁷ Jesussha tmiyai “Emetruawaip. Winia Aparuí wáatsjai. Antsu weme Wí shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tmiyai.

¹⁸ Nuyá Máktaranmaya Marísha Jesusa unuiniamurín wáiniak “Wi Úuntran wáinkiajai, tmiyai. Niisha juna mash túrutui” tu ujakarmiayi.

Jesus ni unuiniamurín wantintiukmiania nu

(Mateu 28.16-20; Márkus 16.14-18; Rúkas 24.36-49)

¹⁹ Nu tsawantaj, tumintin, ni unuiniamurí Israer-shuara úuntrin ashamainiak kashi iruntrar waiti epeni pujuarmiayi. Túrusha Jesus áyatik wayamiyai. Tura ajapén wajas “shiiir pujustarum” tmiyai. ²⁰ Nuna ti, nuyá ni uwejen ajintruamuncha ni paen ijiumuncha iniakmasmiyai. Ni unuiniamurísha Úuntrin wáinkiar shiir warasarmiayi. ²¹ Ataksha Jesus

“Shiir pujustarum, tímiayi. Winia Apar akatar akuptukma núnisnak Wisha akatran aku-peajrume” tímiayi. ²²Nuyá ni matsatmanumaanĭ umpuĭ tímiayi “Yusa Shiir Wakanĭ atumĭ enentáĭn wayati. ²³Shuara tunaarĭnkia átum “asakárti” tákurminkia tsanĭkurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴Tura chikichik unuiniamurĭ ujainiak “li Uuntrĭ wáinkiaji” tiarmiayi. ²⁵Tura ukunam chikich unuiniamurĭ ujainiak “li Uuntrĭ wáinkiaji” tiarmiayi.

Tura Tumas tímiayi “Ajĭntruamurĭ wáinkian uwejrĭn awáĭntiatniuitĭjai. Tura paenumsha awáĭntiatniuitĭjai. Penĭké jaka asamtai aya nujai iniantkimium enentáĭmtus-tatĭjai” tímiayi.

²⁶Chĭkich tumĭntin ataksha Jesusa unuiniamurĭ iruntrarĭmiayi. Nuiĭnkia Tumassha niĭĭĭjai pujuarmiayi. Tura waiti epenmianumanĭ Jesus wayá ajapén wajas “Shiir pujustarum” tímiayi. ²⁷Nuyá Tumasán tímiayi “Winia uwejrĭ ísam ame uwejrĭm awáĭntiuata. Núnismek winia paeruĭ uwejrĭm awáĭntiuam ístá. Tura arantutsuk nekas enentáĭmtursata.”

²⁸Nuyá Tumas “Winia Úuntruá, nekas winia Yúsruitme” tímiayi.

²⁹Jessusha tímiayi “Winia wáĭtkiam nuĭn enentáĭmtursame. Antsu Winia wáĭttsuk enentáĭmturaru nekas shiir ániawai” tímiayi.

Shuar Yusa Uchirĭn enentáĭmtusarti tusa ju papĭ áarmaiti

³⁰Aentsti tujĭntiamuncha Jesus túramu ti untsurĭ ju papĭnium áarchamu ániawai. Tura ni unuiniamurĭ mash wáinkiarĭmai. ³¹Antsu Jesuska Kristu asa Yusa Uchirĭnti tu enentáĭmtustarum tusan júnaka áarmajai. Tura enentáĭmtakmin Jesus ni iwiaakmarĭn yamarma nuna amastatui.

21

Entsá yantannum Jesus siati (7) unuiniamurĭn wantintiukmiania nu

¹Tipirias antumiaĭnka káanmatkarĭĭn Jesus ni unuiniamurĭn wantintiukmiayi. Júnisan ámiayi. ²Semuĭ Pĭtrusha Jĭmĭampramu Tumassha Kananmaya Natanaérsha Sepetéu uchirĭsha tura chĭkich jĭmiar unuiniamurĭsha métek iruntrar pujuarmiayi. ³Semuĭ Pĭtrusha “Namakan nekajai nanĭkiattsan wéajai” tímiayi.

Chĭkich mash “iisha winĭttĭjai” tiarmiayi.

Wéar uunt kanunam enĭkemprar nu kashi achitsuk tsawararmiayi. ⁴Káshik aiĭn Jesus entsá káanmatkarĭĭn wantinkiamiaiyi tura ni unuiniamurĭsha Jesusan nekaacharmiayi. ⁵Jessusha tímiayi “Uchiru, ĭnamak achikiurmek?”

Niisha “Atsá” tiarmiayi.

⁶Tutai Jesus tímiayi “Neka untsuurnumaanĭ ajunkatarum. Nuj achiktatrumé.”

Nii timia núnisan túrawar namakan ti achikiar nekan júsatniun tujĭnkiamiaiyi. ⁷Nújaiĭnkia Jesusa unuiniamurĭ Jesus ti aneemia nu Pĭtrun tímiayi “li Úuntrĭnti.” Takui Pĭtrusha ámiaku asa ni pushirĭn entsar entsá iniaĭmiayi yukuak jeataj tusa. ⁸Chĭkich unuiniamurĭsha jeachat pujuĭniachuk nekan japiki kanujai káanmatkanam jeawarmiayi. ⁹Káanmatkanam jeawar ji kaiĭr ámanum namakan jiámun wáinkiarĭmiayi. Tantancha wáinkiarĭmiayi. ¹⁰Jessusha “Átum achikiurmeha nuyá jiátin itiatarum” tímiayi. ¹¹Tutai Semuĭ Pĭtiur kanunam we nekan nekartiuk káanmatak japiki itiamiaiyi. Itiar namak-nasha siaĭtu senĭkuenta nuyá tres (153) nekapmaramiaiyi. Ti untsurĭ áyat nekasha jáankachmiayi. ¹²Nuyá Jessussha “Yurumáĭtiarum” tímiayi. Ni unuiniamurĭsha “aya ii Uuntrĭ áminiaiti” tusar inintrustinian natsantiarmiayi. ¹³Nuyá Jesus wajakĭ tantan jukĭ súsarmiayi. Núnisanĭ namaknasha súsarmiayi.

¹⁴Jesus jakamunmaya nantaki jujai menaintui ni unuiniamurĭn wantintiukarmiayi.

Jesus Semuĭ Pĭtrujai chichasmiania nu

¹⁵Nuyá yurumáwar Jesus Semuĭ Pĭtrun aniasmiayi “Junasa uchirĭ Semuĭnka, ĭju shuar nanĭkaamas anentmek?”

Pĭtrusha tímiayi “Ee, Uunta, wi wakerajam nu Ame nékame.”

Jesussha “Nuinkia winia murikiur ayuratniua áintsam Winia enentáimturainia nu yaintá” tímiayi. ¹⁶ Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu infam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamp Prattawai tura ame wétin nakitiam nui juramkiartatui.”

¹⁹ Jesus nújainkia Pítiur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítiur Jesusan aniasmiania nu

²⁰ Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. ²¹ Nincha Pítiur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tminiaitjai. Nuna tákuisha ¿warí itiurtama? Ámeka nemartusta” tímiayi. ²³ Nújainkia “Nu unuiniamurí jákashtatui’ tusa Yus-shuarnum áujmatiarimiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. ²⁴ Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisaran tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nunkanam ikuschamnia ainti. Nuke atí.

Jesusa Akatramurí Yusa Wakaníjiaí

TÚRAMU

Yusa Wakanín nákasarmiania nu

¹Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuiti-ampramij nunasha áatramiajme. Yámankamtaiknumia, ²nayaimpiniam wétsuk, ashí Nii túramia nuna tímiajme. Jesuska, nayaimpiniam wakétsuk Yusa Wakaní kakarmarijiaí túratnia nuna ni akatramurín jintintiawarmiaí. ³Tura jaka nantaki, Jesus tímiajajik wantintiuarmiayi ni akatramurín. Tura kuarenta (40) tsawant nin wantintiuarmiayi. Nuna tura nekas iwiaakjai tusa iniakmasmiaí, nekaawarat tusa. Tura Yusa akupeamurí urukukit nuna mash ujakmiaí.

⁴Jesuska ni akatramuríjiaí tuke pujus, nin chicharuk “Jerusarénumia wéerap, tímiaí. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaí. ⁵Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniaasha tarutmar, atumí enentáin ekemprutmattarme. Nusha enentái imiantin áintsankete” tímiaí.

Jesus nayaimpiniam wakamiania nu

⁶Tura Jesusjai irunar matsamas anintriarmiayi “Uunta, Israer-shuar ájinia nu, aḡkant ajasakrin iiniuk Akupin atak naamkatin yamaí jeayash” tiarmiayi. ⁷Jesus áimiuk tímiaí “Winia Apar túratana nu warí tsawantinik túrunatí nu nekaatniusha atumniachuiti. Apar Niḡki neka asa ni kakarmarijiaí túratawai. ⁸Tura atumsha Yusa Wakaní kakarmarín sunastarume. Nii taa ekemprutmamtaí kakaram ajasrum, Wíi túramu etserkattarme. Emka juí Jerusaréḡ péprunam etserkattarme. Nuyá ashí Jutía núḡkanam, tura arant Samaria nuḡkanmasha, tura nú arant ashí núḡkanam werum, Wíi túramu etserkattarme” tímiaí Jesus.

⁹Nuyá chichas amir, ashí ni akatramurí ii wajainiaí, Jesus nayaimpinmaani junakmiaí. Wéa-wéakui yurankim mash Nin amúámiaí. Tuma asamtaí ni akatramurí Nin wáinkia-acharmiaí. ¹⁰Tura Jesus waakkui ni akatramurísha yakí ii wajainiaí, jimiaí áishman puju entsaru nuí wantintiuarmiayi. Tura ayamach wajattsarmiaí. ¹¹Nu áishmansha Jesusa akatramurín tiarmiayi “Kariréanmaya áishmanka, ḡrukamtaí nayaimpinmaani imiaí fimprum? Ju Jesusak atumiyá nayaimpiniam wea wáinkiarumna núnisaḡ ataksha winittiwai” tiarmiayi.

Matíasan anaikiarmiania nu

¹²Tuasua amikmataí Jesusa akatramurí Uriwiu náinniumia akaikiar Jerusarénum wakétkarmiayi. Uriwiu naincha Jerusarénumsha tíjiuchiiti, chikichik kirumitrua núnisaḡ. ¹³Tura Jerusarénum jeawarmiaí. Nuí jeawar, jeá wayawar yakí wákararmi-ayi. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiaí. ¹⁴Jusha mash tuke iruniarmiayi Jesusa yachíjiaí. Tura Jesusa nukurí Maríjiaí, nuyá chikich nuwajajsha tuke iruniarmiayi, Yus áujsataí tusar. ¹⁵Nuí siántu painti (120) aents iruntrarmia nuí Pítur chichastaj tusa wajakmiaí.

¹⁶Pítur juna tímiaí “Yatsurtírmesha, umarutírmesha antuktarum. Yuska yaunchu ni Papiríin Jutasnan áamtikramiaí. Jútas akiintsajin Tawitkia, Yusa Wakaní jintintiam Jutasnan áarmiaí. Jesusan achik surukarmia nú shuaran nekapruamia núiti. Kame Tawitia áarmarí Yus-Chicham asa tímianak uminkiatniuyi. ¹⁷Nú Jutaska ii írutramuitiat, ii takaamurín páchitkaiat, ¹⁸tunáa tura nujaí kuftian achik nuḡkan sumakmiaí. Tura piniakum iniaaḡ tantanḡ páttimiai. ¹⁹Tuma asamtaí ashí Jerusarénum pujuarmia nu, nuna nekaawar nú nuḡkan “Numpa Nuḡka” anaikiarmiayi. ²⁰Kame Sarmu papinium Tawitkia juna áarchamkia:

“Ni jeesha itiarak atí.
Nu jeanmanka penké pujuschartí.” Tura
“Ni takatrí chíkich atankiti.”
Tu aarmaiti’ tímiayi.

²¹ “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijiai pujumia nú tuke Nin nemarsamia nu atí. ²² Juan Jesusan imiaimiania nú tsawantnumia júkí, Jesus nayaimpiniam wémiania nú tsawantan tmiianu ejé tuke Niijiai wekaimia nu atí. Nu shuar enentámtusar, chikichik achiktai. Iisha iruntrar Jesusa nantakmiarí etserkamí tusar túramí” tímiayi Pítiur.

²³ Tura nuyá jimiara’ shuaran anaikiarmiayi. Matíasan anaikiarmiayi. Tura chikichnasha Jusén, ni chíkich naari Parsapas, tura apach náarinikia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsán áujainiak juna tiarmiayi “Ii Uuntri, Amesha ashí shuara enentáí nekame. Juí awai jimiara’ áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatrí achikiat tusam, ¿tuá achikium, Uunta? Paant iniakmasta.” Tu aujsarmiayi.

²⁶ Tura Israer-shuara túrutairí núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakaní taramiania nu

¹ Pintikiustís náartin jisat jeamtai, chikichík jeanman nuin Yus-shuar tuakarmiayi.

² Tumai aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. ³ Tura nuí pujuiniái ji wajaí kea áaniun wáinkarmiayi. Túruna ankant ankant puunak tarurarmiayi. ⁴ Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi súsararmiayi. Tuma asamtai nujai niisha chíkich chichaman chichasararmiayi.

⁵ Nuí Jerusarénnun Yus táman umirin Israer-aents ármiayi. Ashí nunkanmaya Jerusarénnun taar matsamarmiayi. ⁶ Tura túrunamia nuna antukar káunkarmiayi. Tura ashí shuar ni chichamejai chichaamun antukarmiayi. Tuma ásar, warinkit, tu enentáimsarmiayi. ⁷ Nekaachar ashamkarmiayi. “Warinkit, tunaim ajarmiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi. ⁸ Tura iisha ankant ankant ii chichamejka ántatsjik. Ausha urukainiakua, nunak chichainiawa, tiarmiayi. ⁹ Juí ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, ¹⁰ Prjíanmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar juí matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai. ¹¹ Kritianmayasha Arapiánmaya pujuiniaji. Tura ashí mash ii chichamejasha Yusa pénker túramuri ántaji” tiarmiayi.

¹² Ashí aents nuna nekachu ásar ashamkarmiayi. Tura nuámtak aniniaisarmiayi “¿Warinminiait ju?” ¹³ Tura chikichcha wishikiarmiayi. “Nampeku ániatsush” tiarmiayi.

Pítiur ujakmia nu

¹⁴ Nuinikia Pítiur, chíkich áuntse Jesusa akatramurijiai wajakí, kakantar chichasmiayi. Chichaak tímiayi “Jutíanmaya shuartiram, Jerusarénnumiátirmesha antuktarum. Wi títiatjana nu antukrum pénker enentáimpratarum. ¹⁵ Ju áishman, nampekarai, tárumna nu, nampekcharai. Warí, nantu imiá ishichik takuni. ¿Aísha itiarak? ¹⁶ Antsu Yúsnan etserin, ni naari Juér, yaunchu áarmia nu, yamáí túrunayi, tímiayi.

¹⁷ Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariatatui. Tura nátsaka ímiliaratatui. Tura uuntka mesekramiariatatui. ¹⁸ Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíí túramun áujmariatatui.

¹⁹ Yaki nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yurapmia áintsan akupkattajai. ²⁰ Tura tsawai nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. ²¹ Nuiñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

²² Tuke chichaak: ‘Israernumia shuartiram, wi títiatjana nu antuktarum. Nasarénumia Jesusnan tajai. Nú Jesusan Yus shiir enentáimtwawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakármiayi. Tura Jesusajai aentsti túrachminian Yuska túramiayi, átum ímmianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimtia nujai métek túrawarmiyai. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmantik iniantkimiayi, tuke jákachmin asamtai. ²⁵ Íimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtaku awajkamú áhattajai.

²⁶ Tuma asamtai winia enentáirjajisha Nin shiir enentáimtusmiyajai. Tura wenurjajisha shiir chichaman chichamijai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatruckhattame.

²⁸ Tura iwiaaku átin jintia jintinrutamame. Tura tuke pujurtakum waramtikrustatme. Tu áarmiayi Tawit’ tímiayi.

²⁹ Pítiur tuke chichaak: ‘Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iini pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi “Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin ananiaktatui, aema áintsan.” Nuna Yus táman Tawit nekaamiayi. ³¹ Neka asa, túruntsain Tawit, wankia nútiksaj, Kristu nantaktintriin áarmiayi. Kristu túrunatniuriin chicharuk tímiayi “ni wakaníncha jákatniunam ikiukchatniuyi. Ayashíncha káurtinian tsankatkashtiniuyi.” ³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étereajai. ³³ Yuska, Jesus nankaamantuiti tusa ni untsuuriin apujasaiti. Tura ni Wakanín Jesusan súsaiti, Nii yaunchu tímia nútiksaj. Tuma asamtai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wáachmiayi. Tura nú Tawitiak juna áarmiayi:

“Uunt Yus winia Úuntrun tímiayi “akupin pujutainium, winia untsuuriin pujustá.

³⁵ Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjiniá nuna Yuska Uunt Akupin anaikiamiyai. Túrasha Jessussha in uwentikkiartin Krístuiti. Ashí áentstfram nu péñker nekaatarum” tímiayi Pítiur.

³⁷ Nuna antukar wake mesekarmiyai. Tura Pitruncha chíkich akatramuncha aniasarmiyai “Yatsuru, ¿nuiñkia itirikatjik?” tiarmiayi. ³⁸ Tutai Pítrusha chichaak “Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukristu naarj pachisrum imiantiarum. Nuiñkia atumí tunaariin Yus tsankurtamprattarme. Túrunawakrumin Yuska ni Wakanín suramsattarme, tímiayi. ³⁹ Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentusun untsuktaj tusa wakerana nuna tawai” tímiayi.

⁴⁰ Nú chichamjai tura nuyasha Pítiur tuke jintintiuk tímiayi “Yajauch shuara asutiátniuri átatna nuyá uwempratarum” tímiayi. ⁴¹ Tuma asamtai nuna antukarmia nuka imianiararmiyai. Nú tsawantaj menaintiú mir (3000) aents Yus-shuar ajasarmiyai. ⁴² Ashí nu shuar Jesusa akatramuri jintintiarminia nuna tímiatrusaj antukarmiyai. Tura irunar shiir

enentáimtunaisar yurumin ármiai. Túrawar, Kristu enentáimtustin namperin najanin ármiai. Túrawar Yúsán áujiarmiayi.

Yus-shuar pamparamiania nu

⁴³ Tura Yuska aentsti túrachminian Jesusa akatramurijjai túramiayi ni kakarmarin iniakmastaj tusa. Tuma asantai ashí aents nuna wáinkiar ashamkarmiayi. ⁴⁴ Yúsán umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarincha surukar, atsumainia nuna súarmiayi. ⁴⁶ Tuke tsawantak Yusa Uunt Jéen káuniarmiayi. Tura ni jeencha iruntrar warainiak Kristu enentáimtustin námper najanin ármiai. Tura nankaamantu enentáimtumsuk, yurumkan ajamnainiarmiayi. ⁴⁷ Túrawar, Yuska ti úntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar irunmanum íkiauniki wémiayi.

3

Wekaicha wekasamiania nu

¹ Chíkich tsawantaj, nantu nunkaach ajasmatai, Pítiur Juanjai, Yusa Uunt Jéen Yus áujstatai tusar wearmiayi, Israer-shuar tuke turin armia nútiksaran. ² Tura áishman, ni akiiniamuriniá wekaicha amia nu, nuí aa wáitiniam tuke tsawant pujumiayi. Nu áishmanasha ni shuari entsakí júkiar nú wáitiniam apujin ármiai, nuí shuar wayan kuftian seat tusar. Nú wáitisha, Shiir Waiti, tutajyayi. ³ Tura nú shutuapsha Pitrun Juanjai wayan wáinkiamiayi. Wáiniak kuftian seamiayi. ⁴ Tura Pítiur Juanjai apajas ísarmiayi. Tura nú áishmanasha chicharuk “íirsata” tímiayi. ⁵ Aishmansha, surustatuapi, tu enentáimias, ímsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuftjai nankaamas takakjana nuna amastajai. Wats, Nasarénumiá Jesukrístu kakarmarijjai wajakim wekasata” tfmiai.

⁷ Tinia iniais, Pítiur ni untsuurini achik awajkimiai. Túram ni nawesha, wanusesha kakaram ajasmiai. ⁸ Tura niisha wajaki nantent ajakmiayi. Nuyasha wekasamiayi. Tura Píturujajsha Juánjajsha Yusa Uunt Jéen wayawarmiayi. Nuik shutuapka wayá nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkiarimiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jéen wáitirin, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurin nekaawar, ti ashamkar nushaa enentáimsarmiayi.

Pítiur ujakmiania nu

¹¹ Shutuapka péñker ajasu asa Píturujai Juánjajsha penké tsurachmiayi. Tura aents nuí pujuarmia nu, warinkit tusar, jeáshkirí tsékenki wearmiayi. Nuka Sarumúnna tiniu ármiai. ¹² Aents káunkarun Pítiur wáiniak, chicharuk “Israer-shuurtiram, ¿urukamtaí winiasha imiá írum? tiarmiayi. ¿Ilisha péñker asarikí tsuarmají? ¿Ii kakarmarijjaiñkikí ewekamsamají? ¹³ Atsá. Antsu Yuska ni Uchirin Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitían Piratuí surukmarme. Tura Piratu akupkataj tau atumsha suritkiarmarme. ¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maamarme. Tuma ain Yuska Nin jakamunmaya iniantkimiayi. Nuka iisha neka asar étsereaji. ¹⁶ Tura ju aishman juí wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtusua asa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úntrijjai Jesusan túramarmena nu nékatsuk túramarme. ¹⁸ Tura nu túramurmijjai Yus yaunchu tímia nu tímianak umikiurme. Ni Krísturí wáitsatniuyana nuna Yuska ashí ni etserniurin áamtikramiai. ¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaaní ayantárarum, tunaarun asakárat tusarum. Túrunawakrumniakia, atumin uwentikramprarat tusa

Yus yaunchu anaikiamia nuna akupturmaktatrumē. Nusha Jesukristuiti. Tura Niijiaí enentáimin ayampratin átatai. ²¹Tura yamaikía Jesukrístu nayaimpiniam pujustiniaíiti, ashí iwiarnatsaín. Yuska ukunam ataksha nuñkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi. ²²Tuma asa Muisais ii aparín tímiayi:

“Atumi Uunt Yusrí ukunam etserniun akupturmaktatrumē, winia akuptukmia núnisan. Nuámtaktirminia achik akupturmaktatrumē. Tura nii títiatna nu umirkatarum” tímiayi. ²³Náñkamas aents nu etserniun chichamen umiáchkunka emesnartatui. Tura Israer-shuarum páchitkia áhattawai.

Núnisan áarmiayi Muisaissha’ tímiayi.

²⁴Pítiur tuke chichaak ‘íimiata, Yúsnan etserin Samuer jú tsawantin túratniurí etserkamiayi. Nuyá ashí Yúsnan etserniusha tuke nuna etseriarmiayi. ²⁵Etseriarmia nuka atumin túramprume. Tuma asa átum péñker pujustinian Yuska ii uuntri Apraáman jú chichaman susamiayi. “Nekas tájame, ame shuarum akiiniattana nujáí ashí áentsnasha shiir awajstatai’ tímiayi. Tura ii úuntriñ tímia núnaka incha túramji, tímiayi. ²⁶Íimiata, Yus ni Uchirín iniantkimia nuí, atumin emka akupturmaktarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítiur.

4

Pitruncha Juánnasha kajerkarmiania nu

¹²Pítrusha Juanjáí Yusa chichamen áentsun jintintiainiak pujuarmiayi. Jesus nantakin asamtai aencha nantaktin ániawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntriñsha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiarí chichaman jintintinia asamtai. ³Yamaikía kíawai, kashin iismí tusar achik sepunam enkea iniaisarmiayi. ⁴Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áarmiayi.

⁵Kashin tsawarmatai Israer-shuara akupniurí, ni úuntriñsha, tura ni jintinniurísha Jerusarénum iruntrararmiayi. ⁶Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitíantri shuarísha tímian iruntrararmiayi. ⁷Iruntrar Pitruncha Juánnasha utitiarum tusar akupkarmiayi. Tura itiarmatai, ajapén awajsarmiayi. Tura aniasarmiayi “Kame ¿yana kakarmarijiaí, yana chichamejaí túrarum?” tiarmiayi. ⁸Tutai nuyá Pítiur, ni enentáin Yusa Wakaní pimiutkamú asa tímiayi “Akupniutiram, tura úuntirmesha antuktaram. ⁹Jú áishman nuik shutuap amia nu péñker ajasmarí anintrame. Kame itiurak péñker ajasut tát-surmek. ¹⁰Urukamtia úuktataj. Anintrakrumin iisha paant títiatji, Israernumia shuar ashí nekaawarat tusar. Jú áishman Jesukrístu kakarmarijiaí péñker ajasuiti. Nasarénumia Jesukristun, átum máamurmena nuna, tura Yus jakamunmaya iniantkimiania nuna tajai, tímiayi. ¹¹Nú Jesuska kayaa áintsanquete. Atumsha jeamniutiram, nú kaya yajauchiiti, tímiarme Jesusna. Túrasa túramaitatan Niisha jeanam emka apujsamua núnisan ajasuiti, tímiayi. ¹²Tura chíkichjáí uwempratin penké atsawai. Jú nuñkanam ii chikicha naarí pachisar uwempratin atsaji. Jesuskete ii uwemtikrampratniun Yus suramsamiaj nu” tímiayi Pítiur.

¹³Pítrusha Juansha náñkamas shuara áintsan áarmiayi. Núkap unuimiarcharu áarmiayi. Tura unuimiarchaitai, arantutsuk etseriarmiayi. Aentsu uuntri núnaka nekaawar “Nékachuitai, itiuira sapijmiatskesha chichainia” tiarmiayi. Tura, júsha Jesusa namarin ármia núiti tiar nekaawarmiayi. ¹⁴Nuyasha áishman péñker ajasmia nu niijiaí nuí wajamiayi. Tuma asamtai, niisha áí wajakui, Israer-shuara úuntriñkia, péñker ajaschaiti títiái tukamá tujinkiararmiayi. ¹⁵Tuma ásar, iik nuamtak áujmatsatai tusar, Pítrusha Juansha shutuapsha áá awemartai, tiarmiayi. ¹⁶Tura áujmatainiak tiarmiayi “Jú Pítrusha jú

Juansha ititurkatjik. Ju uunt túrunamun Jerusarénum matsatania nu ashí nékainiatsuk. Wáitiatiti titin tujintiaji, tiarmiayi. ¹⁷Tura, ashí aents nekaawarain tusar yamaik jiaktai. “Ju Jesusa naari pachisrum penké jintintiawarairap,” titiai” tiarmiayi.

¹⁸Tura árusan Pitruncha Juánnasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiarap” tiarmiayi. ¹⁹Tutai Pítur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji? tiarmiayi. ²⁰Nekaatarum. Ilisha ísjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

²¹⁻²²Shutuáp penker ajasmia nu kuarenta (40) uwí nankaamas takakuyayi. Ni penker ajasmarin aents nekaawar, “juka aentsti túrachminiatiji” tusar Yusa naarin uunt awajarmiayi. Tuma asamtai aentsu uuntri Pitruncha, Juannasha asutiatai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarin seawarmiania nu

²³Pítur Juanjai ankant ajarar ni írutramuriin wakеткиarmiayi. Tura jeawar Israer-patri uuntri tura aentsu úuntriasha nin tiarmia nuna mash etserkarmiayi. ²⁴Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkaasha najanaitme. Nayaantsasha tura juu írunna nusha najanamiamme, tiarmiayi. ²⁵Tura Tawit ámin umirtamin amia nu ju áamtikramiamme:

“¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimainia?

²⁶Uunt kapitán ármia nuka chichaman jurusarmiayi Uunt Yúsan.

Tura pepru úuntriasha iruntrar Uunt Yúsan kajerarmiayi. Ni anaikiamurin Krístun nútiksán kajerarmiayi.”

²⁷Tu áarmaiti, Uunta, tura nekasaiti. Erutis apachi kapitántri Punsiu Piratujai jú péprunam iruntrararmiayi. Niisha yajaya shuarjai tura Israernumiá shuaraim nuim iruntrararmiayi. Ame Uchirmin Jesusan tunaarinchan kajerarmiayi. Jesuska Ame anaikiamiamme, winia takatrun túrat tusam. ²⁸Tura ame enentáimjai iwiamamna nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi. ²⁹Uunta, iisia kajertamainiaj nu. Jes, Áminiu asakrin áujmatramtsujik. Túmaikkuisha ame chichamen ii ashamsuk etserkatin ame kakarmaram amasta. ³⁰Tura ame kakarmarmijai jaasha tsuártin amasta. Ame Uchiram Jesus tunaarincha nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

³¹Tura Yúsan tú áujas umikmatai nuin irunar pujuiniajn úurkarmiayi. Túrunamtai ashí shuara enentájn Yusa Wakaní pimiutkarmiayi. Túmaitkiui ashamsuk Yusa chichamen etserkarmiayi.

Winiakete, tícharmiania nu

³²Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wniakete tútsuk, jusha ashí iiniu ainiawai, tiarmiayi.

³³Tura Jesusa akatramurisha, Yus ti yayamu ásar, Yusa kakarmarijiai Uunt Jesusa nantakmiarín tuke etseras pujuarmiayi. ³⁴Tura ashí Yus-shuarka nunkan takakusha jean takaku armia nusha, núnaka surukar kuítian itiararmiayi. ³⁵Tura itiaar Jesusa akatramurin súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶Chikichík shuar, ni naari Jusé, nunkan takakuyayi. Jesusa akatramurisha Jusen chikich náarín apujtusarmiayi, Pirnapín. Nu náarjsha, shiir enentáimtikkiartin tawai. Tura Pirnapísha Riwi áentsuyayi. Tura ni akiiniamuri núnkenka Chípriiyayi. ³⁷Niisha ni nunken surukmiayi. Tura nu kuítian itia Jesusa akatramurin súarmiayi.

¹ Tura chíkich áishman, ni naari Ananías, ni nuwe Sapirjai ni nunken surukarmiayi. ² Niisha nunkan suruk kuítian emeenak akanak júki Jesusa akatramurin weri takamtsukea nútíkias susamiayi. Ni nuwēsha, Sapir, nuna túran nekaamiayi. ³ Túramtai Pítiur chichaak “Ananías, ¿urukamtai uunt iwianch enentáimin enkemturmatai, Yusa Wakanin anankataj tusam nunka surukam kuit achikumna nu akankam íkiurmasam? tímiayi. ⁴ Entá, nuinkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amēsha aya áentsnum wáitruachume. Antsu Yusnumsha wáitruame” tímiayi Pítiur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman tarian Ananías jakan penuararmiayi. Túrawar iwiansatai tusar júkiarmiayi. ⁷ Tura Ananías nuwe arur, menaintiú ura nankaamasaj tímiayi. Túrasa ni áishri jakana nekaachmiayi. ⁸ Támatai Pítiur nuwan tímiayi “Turuttia. Átum nunka surukurmena nu, ¿kuit itiarumna núnik surukuram?” tímiayi. Tutai nuwá tímiayi “Ee, núnik surukji.” ⁹ Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimpram? Pai, iisiá. Ame áishrumin iwiansatai tusar júkaria nu wininiawai. Tura yamaikia amincha juramkiartatui” tímiayi. ¹⁰ Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkiararmiayi. Túramtai júkiar ni áishrinin ayamach iwiansarmiayi. ¹¹ Tura ashí Yusshuar armia nu tura ashí aencha nuna antukarmia nu ti ashamkarmiayi.

Yusa kakarmarijai túrawarmiana nu

¹²⁻¹⁴ Tura ashí Yus-shuar Yusa Uunt Jēen shikirin irunin árimiayi. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun ashiamarmiayi. Túmainiyatan, ti péñker ániawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsurí aents Yus-shuar ajasarmiayi. ¹⁵ Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakaninsha enkemprutmwawainti tusar nu shuar túrawarmiayi. ¹⁶ Núnisar arantiá shuarsha ti untsurí ni shuari jáinian tura iwianchrukuncha nu Jerusarénum itiararmiayi. Tura ashí nu táaruka tsuámararmiayi.

¹⁷ Israer-patri uuntri, tura Satuséu aencha nijjai pujuarmia nu suir iiniak ¹⁸ Jesusa akatramurin achikiar enkeawarmiayi. ¹⁹ Túrasa kashi Uunt Yusa suntari nayaimpinmaya tara sepú wáitirin uraimiayi. Tura Jesusa akatramurin aa júkiarmiayi. ²⁰ Tura tímiayi “Wetarum. Tura Yusa Uunt Jēen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jēen wayawar jintintiwarmiayi.

Nu túmainiai Israer-patri uuntri, tura nijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurj sepunmaya itiatarum tusar.

²² Tura suntarsha sepunam jeariar Jesusa akatramurin wáinkiacharmiai. Atsawai tukam táarmiayi. ²³ Taar chichainiak “Sepú waiti asakamua tímianisar aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsa wáinkiaji” tiarmiayi.

²⁴ Israer-patri uuntri, tura Yusa Uunt Jēen wainniu úntrisha, nu chichaman antukar, “tsej ausha ¿urutiak nunasha iniaisar?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jēen wajasar áentsun jintintiu pujuiniawai” tímiayi.

²⁶ Túrunamtai Yusa Uunt Jēen wainniu uuntri ni suntarjiai wear achik itiararmiayi. Túrasa penké aents kayajai tukurmaraj tusar, yajauch awajtsuk itiararmiayi. ²⁷ Tura achik itiar Israer-shuar naamka pujamunam naka awajsarmiayi. ²⁸ Tura Israer-patri uuntri tímiayi “Isha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasa, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurijjaj chichainiak “iikia aentsjainkia ini-
an̄kasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna
ii iwiaaku Yusrj̄ Nin iniantkimiayi. ³¹ Yus ni kakarmarjijaj Nin nan̄kaamantu awajsamiai.
Tura nekas Akupniuiti tusa ni untsuurj̄ni apusamiayi. Tura áentsun Uwentkniuiti.
Israer-shuar enentái yapajjáwar tunaarj̄niá uwemprarat tusa Yus túraiti. ³² Nu tuma
asantai iisha nu nekaar étsereaji. Tura Yusa Wakanj̄sha nuna étsereawai. Túrasa aya
Yusa umirkarua nunak ni Wakanj̄n súsaruiti” tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wakeriarmiayi. ³⁴ Tura
nuj̄ Israer-shuara uuntrī pujumiayi, ni naarī Kamarír. Niisha Pariséunam páchitkiauyayi.
Tura akupeamun jintinniuriyayi. Túmakui ashí aents nin shiir enentáimtin ármiai.
Tura niisha wajaki tímiayi “Ju áishman̄ aá ishichik wajasari” tímiayi. ³⁵ Nuyásha irunar
matsarmia nuna chicharuk “Israer shuairam, ju áishman̄ tú túratai tu enentáim-
sarumna nu aneartarum. ³⁶ Enentáimsatarum. Nuik áishman̄ Tiútas wantinkiachmaka.
Niisha kapitániitjai takui, kuatru siántu (400) shuar nemarkarmiayi. Tura ukunam
nin maawarmatai, ni némarkamurj̄sha pisararmiayi. Túrunawar nuní amuukamiayi.
³⁷ Ukunmasha, iruntrar nekapmartin tsawantincha Kariréanmaya Jútas wantinkiachmaka.
Tura nincha nútiksaj̄ ti untsurj̄ nemarkarmiayi. Túman máawarmiayi. Nu túrunamtai
nútiksan̄ ni némarkamurj̄sha pisararmiayi. ³⁸ Jes, tuma asantai nu áishman̄ aá wajainia
nu iniaisatarum. Auka pachisairap. Au tumainia nu aya áentsnaketkuinj̄kia amuukattawai.
³⁹ Tura antsu Yúsnaikkuinj̄kia atumsha amuktai tukamarum tujinkiatarme. Aneartarum.
Iniaiyachkurmeka nu tumá pujusrum Yusjaj̄ máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasa Jesusa akatramurj̄n untsukar asutiáwarmi-
ayi. Tura chicharuk “Jesusa naarī pachisrum pen̄ké ishichkisha etserkairap” tiarmi-
ayi. Tú tiar akupkarmiayi. ⁴¹ Jesusa akatramurj̄sha Israer-shuara uuntrī pujamunmaya
j̄jinkarmiayi. Tura wáitsamniaitrum tusa Yuska Jesusa naarī pachia asakrin ii natsantin
wáitsatniun tsanj̄katramkaitji tusar ti shiir enentáimsar wearmiayi. ⁴² Tura Jesukrístunun
ájumatsatniun pen̄ké iniaisacharmiayi. Antsu tuke tsawant Yusa Uunt J̄encha tura
chíkich j̄eanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawen̄kar ármiai. Tura tuke tsawant yurumak
súsatin ámiayi. Túmakui Yus-shuar Kriaku chichaman chicharmia nu, Israer-shuaran
kajeriarmiayi. “Tuke tsawantin yurumak súarmena nuj̄ atumj̄ wajē ti nukap súarme.
Tura íniuka ishichik súarme” tiarmiayi. ² Túruinia Jesusa tuse akatramurj̄ ashí Yus-
shuaran irurar tiarmiayi “Ilisha Yus-Chicham etserkatin iniaisar yurumak súsachmini-
aitji. ³ Tuma asantai yatsurtiram, atumj̄niá siati áishman̄ eáktárum yurumkan súsarat
tusarum. Péñker wekainia nu, tura neka shuar, Yusa Wakanj̄ pimiutkamu ainia nu
achiktarum. ⁴ Iikia antsu Yus áujkir unuiniakratkir Yusa chichamē etserkir wétatji”
tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak
Estepañkan anaikiarmiayi. Estepañsha Yúsán tuke enentáimtinuiyayi. Tura Yusa
Wakanj̄sha pimiutkamuyayi. Chíkich áishman̄kan anaikiarmiayi, niisha Jiripi, tura nuyá
Purukuru, Nikianúrsha, nuyá Temun̄, Parmenassha, Nikiurásshá. Nikiurásshá Antiukía
nuñkanmayaitiat Israernancha ashí umirniuyayi.

⁶ Tura nu siati áishman̄kan Jesusa akatramurj̄n itiariarmiayi. Táarmatai, akatramusha,
Yus áujtusar, anaikajji tusar múuknumsha ni uwejen̄ awantsarmiayi. ⁷ Túrasa Yusa
chichamen̄ka tuke pampan̄ki wémiayi. Nuj̄ Jerusarénnumsha Yus-shuar ti kawen̄karmi-
ayi. Tura imia Israer-patrisha untsurj̄ Yus-Chichaman umiriarmiayi.

Estepañkan Israer-shuara uuntrīn júkiarmiania nu

⁸ Estepañsha Yusa waitnenkartutairī pimiutkamuyayi. Tura Yusa kakarmarj̄sha pim-
iutkamuyayi. Tuma asa aentsti túrachminian shuar írunmanum túramiayi. Nu shuar
Yusa kakarmarj̄n nekaawarat tusa túramiayi. ⁹ Israer-shuar iruntai j̄eá, ni naarī An̄kantin,

ámiayi. Nuyá áishmansha tura Serini nunkanmaya áishmansha, tura chíkich nunka Arijiantrianmayasha, Serisianmayasha, Ásianmayasha, tímian Estepanjai áujmatsatai tusar káutkarmiayi. ¹⁰ Estepañ Yusa Wakaní nekatairijiai tímianak chicháa asamtai, nu áishman Estepanjai inkiunaikiar nupetkataj tukamá tujinkarmiayi. ¹¹ Tuma asamtai suuir enentáimtuiniak chíkich áentsun Estepañkan tsanumprurarar tusar éakarmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. ¹² Penké áentsun, tura uunt ainia nunasha, jintintin ármia nujajsha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsarmia nui júkarmiayi. ¹³ Tura wait chichamtinian itirmiayi. Niisha taar chicharainiak “Yusa Uunt Jeeñ ti penker ana nu, tura Yusa akupkamuríncha ju Estepañ tuke yajauch chicharui, tiarmiayi. ¹⁴ Nú arantcha ju Estepañ tímia nu antukji, tiarmiayi. Estepañ chichaak “Nasarénumia Jesuska Yusa Uunt Jeeñ sáaktiatui, tura nuyá Muisais in ikiurtamkimiaj nunasha yapajiáttawai” tímiaiyi. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

¹⁵ Nuyasha ashí Israer-shuar naamka iruntramunam pujuarmia nu Estepañkan iijaj tukamá ni yapin nayaimpinmaya suntara yapiya nuní íran wáinkarmiayi.

7

Estepañ etserkamiania nu

¹ Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiaiyi. ² Tutai niisha áimkiarmiayi “Winia úuntrutirmesha, yatsurtirmesha anturtukturum. Ii Waantu Yusrj ii úuntrin Apraáman wantintiuukiarmiayi. Apraámka Misiuputámia-Kartea nunkanam pujai, Aran nunkanam wéatsain, nuñ wantintiuukiarmiayi. ³ Tura wantintiuuk tímiaiyi “Ame nunkemsha áminiumesha ikiukim nunka Wi iniaktustatjamena nuñ wetá” tímiaiyi Yus. ⁴ Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiaiyi Yus. Nuna taku juñ nunkan ii pujajnia juñ pujsamiayi. ⁵ Túrayat nunkan ishichkisha súsachmiayi juñ nunkanam. Antsu “Ukunam amastatjai. Ame jakakmin ame uchirmin susattajai” tímiaiyi. Tura Apraama uchirí penké atsan nuní tímiaiyi Yus. ⁶ Nuyasha Yus tímiaiyi “Ame uchirmesha íraa núnisarañ chíkich nunkanam pujusartatui. Nujsa emetamu itit awajtai pujuartatui. Kuaru siáñtu (400) uwí, tímianu uwí wáitsartatui, tímiaiyi. ⁷ Túrasa, Wi asutiáttajai ame shuarumin wáitkia núnaka, tímiaiyi. Túram nuyá nú nunkanmaya shiákartatui. Tura Winia enentáimtusartatui júñ nunkanam’ tímiaiyi. ⁸ Yus tuke Apraámnasha chicharuk “Yamaikia Wíi-shuar asarum tsupirnaktiniaitrum. Tuma asam amesha uchiram áishmankach akiiniamtai, Wí tímiajna núnismek, sirkunsisiññ tutai, shunichirí nuape tsupirkata, tímiaiyi. Tura chícham Wi yamaikia ámijiai najanaj nu nekas uminkatniuiti tusam nusha túrata” tímiaiyi Yus. Tuma asamtai ni uchirí Isak akiiniamtai, uchu tsawant nankaamasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksañ túramiaiyi. ⁹ Tura niisha ni yachín Jusén suuir íyarmiayi. Túmainiak Ejiptu nunkanam júkiarar tusar surukarmiayi. Túrasa Yus némarkauyayi. ¹⁰ Tuma asa, ashí ni iturchatriniañ uwemtikramiaiyi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Parañ Ejiptu nunkaa akupniurí ajasat tura ni jeeñ wáinniurj ajasat tusa anaikiarmiayi.”

¹¹ “Tímiatam tsuka tura iturchatcha ámiayi Ejiptu núnkanam. Tura juñ Kanaan nunkanmasha núnisarañ ámiayi. Tuma asamtai ii uuntri yurumkan penké wáincharmiaiyi. ¹² Tura Jakup, Ejiptunam yurumak ikusma awai taman antuk ni uchirín akupkarmiayi. Túrasa wekaicha wearmiayi. Wats, ii úuntrinun ujaajrume. ¹³ Tura ii uuntri atak Ejiptunam wéenak Jusesha, wítjai takui ni yachí Jusén nekaawarmiayi. Tura Jusé “Yatsur ániawai” takui Parañ, antuk “au shuarapitia” tímiaiyi. ¹⁴ Nuyañka Jusé ni yachín chicharuk “Apar itiatarum uchirtuk” tímiaiyi. Nu shuarsha untsurí, setenta señku (75) matsarmiaiyi. ¹⁵ Nuní tutai Jakupsha ni shuarijiai Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntri ainia nu, núnisarañ

nú nuḡkanmaḡ jákarmiayi. ¹⁶Tura atak ukunam ni shuari Sikiam nuḡkanam ni ukunchin júkiar iwiarsarmiayi. Kame Sikiam nuḡkanam Apraámka yaunchu játsuk Amura uchirí nuḡken sumakmiayi. Túramtai nuḡ iwiarsarmiayi' tímiayi.

¹⁷Yus, Apraáman chicharuk “Nekas wi susattajme” tímania nú tsawant jeatemamtai, Ejiptu nuḡkanam Israer-aents pampanki ti kawenkarumiayi. ¹⁸Nu tsawantincha Ejiptunam chíkich akupin naamka ámiayi, tura Jusen nekaachmiayi nii. ¹⁹Nu akupin ii yaunchu úuntrin ananḡkawar yajauch awajarmiayi. “Atumí uchirí kufrchich ana nu ajapa ikiuktiarum” tu wémiayi. Pampankarain tusa tímiayi. ²⁰Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. ²¹Tura nuyá ajapa ikiuktin jeamtai entsá apujsamiayi. Uunt Parauḡka nawantri Muisaisan wainiak júkimiayi. Achik, ni uchirínia tímiatrusan júkí tsakatmarmiayi. ²²Tuma asa Muisais unuimiátrauyayi ashí Ejiptu aents nékarmia nuna. Túramurísha chichameḡsha kakarmauyayi.'

²³Estepaḡ tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ní shuari asamtai. ²⁴Nuyá we Ejiptunmaya áishman ní shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishmanḡkan máamiayi. ²⁵Wí turamujai Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran nékaniawai tu enentáimsamiayi. Túrasa niḡkia nekaacharmiayi. ²⁶Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajniarum?” tímiayi. ²⁷Tutai emka nanḡkaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?” ²⁸¿Winiasha maantuátaj tusam wakeramek, yaḡ Ejiptunmaya áishman máamamna nútiksamkea?” tímiayi. ²⁹Nuna antuk Muisaiska Matian nuḡkanam pisar, nú nuḡkanam kuarenta (40) uwí yajaya áintsan pujumiayi. Nú nuḡkanam pujus, nuatak, jímiará uchin yajutmarmiayi.'

³⁰‘Kuarenta uwí nanḡkaamas, nu atsamu nuḡkanam Senai náinnium tjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. ³²Yus tímiayi “Wiitjai Yus. Ame úuntrumí Apraáma Isaka, Jakupa Yúsrintjai” tímiayi. Tutai antuk Muisaiska ti kuramiayi sapijin. Tura ístinian tujinmiayi. ³³Nuyá Uunt Yus tímiayi “Úuntrum shiir awajataj tusam, ame sapatrum ukuḡkiam ikiuktia, wajamna nuḡ Wí pujakui. ³⁴Nuyá nekaata, tímiayi. Wí-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwentikratraj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.'

³⁵Estepaḡ tuke étseruk: ‘Jú Muisaisan ni shuari “¿Ya amincha ii akuptamin tura ii chichartamin áinniasha anaitiamkamam?” tiarmia nuna Yuska akupniun anaik uwentikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. ³⁶Muisaisaiti Israer-aentsun Ejiptunmayan uwentikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nuḡkanam. Nuyá Kapaantin Nayaantsanmasha, tura nuyá kuarenta (40) uwifin atsamunam pujuiniaisha ti kakarman iniaktusmiayi. ³⁷Jú Muisaisak Israer-shuaran chicharuk “Atumíniḡnak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸Jú Muisais Israer-aentsjai atsamunam pujumiayi. Senái nainnium Yusa suntari níjjaisha pujumiayi. Tura Muisaiska ii úuntrijjai pujumiayi. Níyaiti iwiaaku pujustin chichaman sunasmia nu. In ujatmaktinian sunasmiaayi.'

³⁹‘Túrasa ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. ⁴⁰Túmainiak Muisais Yusjai chichastajtsa murá wématai nu shuar Muisaisa yachin Aruḡkan tiarmiayi “Ii yusri najanata, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. ⁴¹Nuyá wáakachia áaniun najanawarmiayi. Túrawar, júiti ii yusri

tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi. ⁴²Nuna túruinian wáiniak Yus, iniaisajai taku, niija kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurí juní áarmiayi:

“‘Israer-aentsu, kuarenta (40) uwitin atsamunam wekaimiarmena nuí, ¿Winiak kuntin maanturtuamarum? Winia surustai tusarum penké túrachurme, tímiayi Yus. ⁴³Antsu, Muruk naartin ántar-yusa pujamurín jukimiarme. Tura chíkich ántar-yussha, ni naari Rempan, yaa ánin najanarum nusha jukimiarme. Júkin asakrumin atumí nunkeya jukin, tímiayi Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

⁴⁴Estepañ tuke éteruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutai Muisais Yus tímianak umikmiayi. Nu jean ii uuntri yaunchu takaku árimiayi. ⁴⁵Nu jean ni uchirí akintkiar akintkiar wearmiayi. Ukunam, jú nunka achiktin jeamtai, Yuska kapitíán Jusuejai jú nunkanmaya aentsun jiki akupkarmiayi. Tura ii uuntri kapitíán Jusuejai winiarmia nu, nu jeancha jú nunkanam itiarimiayi. Tura Tawit uunt akupin náamtsain, ii úuntri sha nu jean takaku árimiayi. ⁴⁶Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi. ⁴⁷Túrasha antsu Tawitia uchirí Sarumún Yusa jeen jeammiai. ⁴⁸Túrasha aents jeammanuman Uunt Yus pujuschamniati. Jes, yaunchu Yusa etserniurí Yus tímia nuna áarchamkia. ⁴⁹Juná áarmiayi:

“Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusar mea tarum? tímiayi Uunt Yus.

Tura Wi ayampratniusha, ¿tuí aa?

⁵⁰Wiki winia uwejruijain ashí najanachmakiaj” tímiayi.’

⁵¹Estepañ tuke éteruk: “Tura átumka Israer-shuarmeka atumí enentáijjai tuke umichuitrume. Atumí kuishjsha weaktsui tura Yus nékachua núniniatrumé. Yusa Wakaníjjai sha tuke nemasnaikaitrumé. Tura atumí yaunchu úuntri jiai métek túarme’ tímiayi.

⁵²Íisia, atumí úuntri sha Yusa etserniurín tuke kajerin árimiayi, tímiayi. Tura nú arant atumí úuntri sha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anan karum máachmakuram, tímiayi.

⁵³Tura Yusa suntari nayaimpinmaya Yusa chichamen susamuitatrum atumsha penké umikchamarne” tímiayi Estepañ.

Estepañka jakamuri

⁵⁴Israer-aencha Estepañ tu chichaamu antukar imiá kajerkar nain kátetete awajiarimiayi. ⁵⁵Tura Estepañ sha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharín, tura Yusa untsuuríniní Jesusan wajan wáinkiamiayi. ⁵⁶Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuuríniní wajan wáinjai” tímiayi. ⁵⁷Támaitait niisha kuishin akiriarmiayi, tura achiktai tusar charáa tiar ashí wajatkiarmiayi. ⁵⁸Túrawar, péprunmaya arant júkiarmiayi. Tura antuk etserkarmia nu pushirín áikiar, natsa Sauru wajamunam au iisti tusar áepusarmiayi. Tura máawartai tusar kayajai tukurarmiayi Estepañkan.

⁵⁹Tura Estepañka tukamaitait Yúsan áujisamiayi. Tura áujuk “Uuntru Jesúsá, winia wakantrusha jurutkia” tímiayi. ⁶⁰Tura tikishmar áujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

^{1,2} Estepañkan máawarmatai Sauru, péñkeraiti, tímiayi. Tura áishman Yúsán péñker enentáimta armiania nu, Estepañka ayashincha iwiarsarmiayi, tura aneenak ti uutiarmiayi. Tura nú tsawantai Yus-shuaran Jerusaréñnum pujuarmia nuna ti kajerkatín nañkamnamiayi. ³ Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmanasha nuwancha wáinkianka japiki jukí sepunam enkeatai tusa túrimiayi. Tumakui Yus-shuar Jerusaréñnumiá pisarar Jutía nuñkanam, tura Samaria nuñkanmasha jeawarmiayi. Jesusa akatramurínkia antsu Jerusaréñnuman juakarmiayi.

Samaria nunkanam etserkarmiania nu

⁴ Túrusha Jerusaréñnumiá aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusaréñnumiá we tura chikich péprunam Samaria nuñkanam ámiania nuí jeá, chichaak “Yus anaikiamu ana nu Jesusaiti” tu etserkamiayi. ⁶ Túrakui aents iruntrar chikichik enentáijjai Jiripi étseamun titiú pisarar antukarmiayi. Yusa kakarmarín nekaawarat tusa aentsti túrachminian túrimia nunasha wániarmiayi. ⁷ Ti untsurí aents iwianchruku ármia nuna Jiripi nu iwianchin jjiirki akuptiarmiayi. Tura íwianch jiniainiak kakantar charáa tiar jiniarmiayi. Tura ti untsurí emearusha shutuapsha péñker ajasarmiayi. ⁸ Tuma asamtai nú péprunmayanaka ashí shuar ti warasar pujuarmiayi.

⁹ Tura nú nuñkanam uwishin Semuñ pujumiayi. Nuikkia wi ímianaitjai tusa Samarianmaya aentsun anañniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuñsha Yusa kakarmaríjiai áitkiawai.”

¹¹ Tura ti untsurí uwí wawekratmaríjiai anañkarta asamtai, umirkarmiayi nu aents. ¹² Túrusha Jiripi Yusa akupeamurín, tura Jesukrístununcha shiir chichaman etserkamiayi. Tura, nuna antukar wáshasha áishmanasha umikiar imian wearmiayi. ¹³ Semuñsha imia uwishniuitiat Yus-Chichaman enentáimtus imianmiayi. Tura Jiripíjiai tsaniñ wekaimiayi. Yusa kakarmarín shuar nekaawarat tusa Jiripikia aentsti túrachminian túrimiayi. Nuna wániak Semuñ ti enentáimsamiayi.

¹⁴ Tura Jesusa akatramurísha Jerusaréñnum pujuarmia nuí Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juáñnasha nekáa ikiuutarum tusa akupkarmiayi. ¹⁵⁻¹⁶ Tura Samarianmaya Yus-shuarsha aya Uunt Jesusa náariñ imianarmiayi. Yusa Wakaníñkia tárachmiayi. Tuma asamtai Pítrusha Juanjai nuí jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujtua umikiar Pítiur Juanjai ni uwejeñ nú Yus-shuaran awantsarmiayi. Nuñkia Yusa Wakaní taramiayi.

¹⁸ Jesusa akatramurí uweje awasmanum Yusa Wakaní taramtai, Semuñsha nuna wániak, kuitjai nu kakarman numaktaj, tímiayi. ¹⁹ Tura Jesusa akatramurín chicharuk tímiayi “Winiasha kuitjai surustarum nu kakaram. Wisha nútiksanak náñkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítiur tímiayi Semuñkan “Ámeka kuítrumjai métek menkakatniuitme. Warí, Yus amaana nu ¿kuitjai sumaktinkiait? ²¹ Yus esetram enentáimtachu asam nu túramu pachistincha penké tujinkiamte, tímiayi. ²² Enentáimprata. Túram Yus seata. Enentáimtamna nuna Yus tsanjurtampashtimpiahi. ²³ Néekajme, tsaanke aínsan yapá enentáimin pimiutramkaiti. Tura tunaarmíñ jinkíamua núniniaitme” tímiayi.

²⁴ Tutai Semuñ áimkiamiayi “Uunt Yus aujtursatarum. Túrutrumna nuna túrunawajj tusan tajai” tímiayi. ²⁵ Nuyasha Jesusa akatramurí Jesusa túramurín nú áentsun ujakarmiayi. Tura wésar Samaria nuñkanam pepru ámunmanka Yus-Chichaman nuí etserkiar, nuí etserkiar Jerusaréñnum waketiarmiayi.

Jiripi Yus-Chichaman etserkarmiania nu

²⁶ Tura Yus ni suntarín nayaimpinmayan Jiripincha akuptukmiayi. Niisha chicharuk tímiayi “Wátskea. Juya jiinkim Jerusaréñnumiá jintia Enkasa péprunam wea nuni weme, anaraaní wetá. Nú jintiaka atsamu nuñkanam nañkaamawai” tímiayi. ²⁷ Tutai Jiripisha wémiayi. Jintiá wesa ltiupianmaya áishmankan wáinkiamiayi. Nú áishmansha ltiupia nuñka akupniurín, ni naarí Kantasen takarniuyayi. Kantaseka núwauyayi. Tura

nu áishmaṅ ti neka asa nuna kuṭriṅ firniuyayi. Nú áishmaṅsha Yúsán áujstataj tusa Jerusaréṅnum wéu wáketmiayi. ²⁸ Karetanam eṅkemar wesa, Yusa etserniurí Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakaní nin tímiayi “Nú kareta amayáṅta.” ³⁰ Tura Jiripisha amayáṅ, Yusa etserniurí Isayasa áarmanṅ áujun antuk, chicharuk “¿Ujeamna nu nékamek?” tímiayi.

³¹ Tutai nú áishmaṅ tímiayi “¿Iṭiurak nekaataj? ¿Yaki jintintruat?” tímiayi. Tura antsu iijíai wetái tusa, Jiripincha eṅker jukimiayi karetanam.

³² Nu papí áarman áujmia nu júuyayi: “Murikiua áitkiasaṅ jákatniunam júkiarmiayi. Tura uchich murik, ure tsúpiram chichaatsna núnisaṅ niisha chichakchamiayi. ³³ Nincha iniatsáarmiayi. Túrasha penké chichamnaka tútsuk tsanṅkamakmiayi. Niisha nunṅkanam iwiaku pujá maamu asamtai, ¿yaki nuna áujmatkat’?” Nuní arma ámiayi.

³⁴ Kantase takarniurí Jiripin aniasmiayi “Waitneasam turuttia, tu arma nusha, ¿yana ta? ¿Yusa etserniurí níṅkik túmama? ¿Chikichnash ta?” tímiayi. ³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nanṅkaamak áishmaṅ Jiripin chicharuk “Jui entsá jeaji. Wikia jui imianchamniakaitiaj” tímiayi.

³⁷ Tutai Jiripisha tímiayi “Tuke enentáimjái Jesus nekas enentáimtakminkia túramniaitjame.”

Tutai áishmaṅ chichaak “Ee nekasaiti, Jesukrístuka Yusa Uchirínti taji” tímiayi. ³⁸ Tura, karetan awajas mai jíinkiar entsá wearmiayi. Nui Jiripikia Kantase takarniuríṅ imiaimiayi.

³⁹ Tura kukar jíinkiar matai Uunt Yusa Wakaní Jiripinka jukimiayi. Tuma asamtai Kantase takarniurísha Jiripin wáinkiachmiayi. Túrasha níṅkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nú wayá, nú wayá Yus-Chichaman etserki we, Sesaria péprunam jeamiayi.

9

Sauru Jesusan umirkamiayi

(Túramurí 22.6-16; 26.12-18)

¹ Nuna tumái, Jerusaréṅnum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi.

² Tura jeari tímiayi “Papí ame naarmijíai áaram surusta. Wi nuna papí jukin timiaí Tamasku péprunam jean, Israer-shuar iruntainiam wayattajai. Túran nú papijíai Jesusan umirkaru ainia nuna, nanṅkansan achikiartatjai. Túran áishmaṅnasha nuwanṅcha achikian jinkian, jui Jerusaréṅnum eṅkeataj tusan ikiaankattajai” tímiayi. ³ Tura papí susam Sauru jintíá wéai, Tamasku péprunam nuntumsai nui aya aneachma nayaimpinmaya tsáapin jíitsumir téntakmiayi nin. ⁴ Túrunamtai Sauru nunṅká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wí aents pataatamna nu, amek enentáimin yajauch awajmamsame, waaka sanṅkanmiak numin ijiuna núnismek” tímiayi.

⁶ Nuyánka Sauru sapijin kuranṅki tímiayi “Nuiṅkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

⁷ Tura Sáurujaí irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi. ⁸ Nuyá Sauru nunṅká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnem eṅkekiar júkiarmiayi Tamaskunam. ⁹ Nui jeá menaintiu tsawant ímṭsuk tura yurumtsuk penké úmutsuk pujumiayi.

¹⁰ Nuj Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nuj wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsán áujuk pujawai. ¹² Tura juna mesekranam ipiatkamjai Sáurun. Aishman wayá ni uwejejái ántiawai, ataksha ímit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitij tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishman kan winia etserniun atí tusan achikjai Wi. Niisha Israer-shuarchancha tura kapitíanniasha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantasa tímiayi “Yatsuru Sauru, Uunt Jesus jintiá wantintiumakmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha ímimiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiai. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairín wayá Jesusa túramurín etserkamiayi. Eteruk tímiayi “Nekasaiti, ju Jesus Yusa Uchirínti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuríin jukitij tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titij tukamá tujinkiarimiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha nu chicham jurusman nekamamiayi. Israer-aents pepru jínmanum tuke tsawajsha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chíikniun kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjai iruntrattsá wakerimiayi túrasha níikia ashamiarmiayi. Sáurusha nekas Yus-shuar ajaschaiti tusar ashamiarmiayi. ²⁷ Túmainiajn Pirnapí Jesusa akatramurí matsatmanum jukimiayi Sáurun. Tura nuj ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjai irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuj pujuarmiayi. Sáurusha nu shuarjai áujmatsarmiayi. Túrasha nu shuar Sáurun itiur máatjik tusar chichaman juriarimiayi. ³⁰ Tura Yusaí yachi ármia nu, chicham jurusman nekaawarmiayi. Neka ásar Sáurun Sesaria péprunam júkiarmiayi. Tura nuyasha Tarsu péprunam akupkarmiayi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsán ashamainia ásar, tura Yusa Wakaní yayamu ásar kawenki kawenki wearmiayi.

Pítiur Eneasan yáinmiania nu

³² Tura Pítiur Yusaj̄ yachi armiania nūj iráa wekaimiayi. Wekaak Yus-shuar Rítianam matsamarmia nūjsha irauimiayi. ³³ Nūjsha Rítianam jeá áishman̄kan Eneas náartinian wáinkiamiayi. Niisha emearu asa wekaicha uchu uwí aya tépenuyayi. ³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. ³⁵ Nuna túnam wáinkiar Rítianmaya aents tura Sarūmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nussha Kriaku chichamjain̄kia Túrkas tuiniawai. Nu nuwasha nūj pujus tuke pen̄ker túriniuyayi. Tura niisha nútiksan̄ yāj wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashin̄ nijiarar yakí tesaamunam áepsarmiayi. ³⁸ Jupe péprusha Rítianmaya tíj̄uch ámiayi. Júpenmaya Yus-shuar Rítianam Pítiur pujan nekaawar jimiará áishman̄kan akatrar akupkarmiayi, Júpenam wari winití tusar. ³⁹ Nūj tutai Pítiur niij̄iāj wémiayi. Tura támatai jaka tepemia nūj awayáwarmiayi. Nūj wayam̄tai wajē pujuarmia nu úutkiar Pítrun téntakarmiayi. Túrawar pushir̄in, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítiur āa akupkarmiayi ashí. Tura niisha nīnki tikishmar Yúsan áuj̄samiayi. Nuyasha nuwan̄ jaka tepaan iis tímiayi “Tapitia nantaktia.” Tutai niisha ími Pítiur wajaan wáiniak nantaki pujusmiayi. ⁴¹ Tura Pítrusha nuwan̄ uwejunum achik awaj̄kimiayi. Tura ini-ais Yus-shuar ármiá nuna tura wajencha utsukar Túrkas iwiaaku ajasun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsur̄j aents Uunt Jesusan umirkarmiayi. ⁴³ Tura Pítruka Jupe péprunam untsur̄j tsawant nuapen-iwiarin Semun̄ka jeen pujusmiayi.

10

Pítiur Kurniriuaj̄i

¹ Sesaria péprunam Kurniriu naartin suntara kapitántr̄j pujumiayi. Ni suntari Itiaria nūnkanmaya ármiayi. ² Nu kapitán̄ Kurniriu ni shuarij̄iāj, Yuska nan̄kaamantuiti, tu enentáimtiarmiayi. Tuma ásar Yúsan enentáimtin ármiayi. Tura nútiksan̄ kūt̄niasha takakchan yāintaj̄ tusa Israer-shuaran súuyayi. Tura tuke tsawant Yúsan áuj̄t̄iniuyayi. ³ Chíkich tsawant̄aj̄, nantu āan̄ku ajasaj̄ Kurniriu ímiarmiayi. Yusa suntari Yus nayaimp-inmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarīn ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntarī tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai” tímiayi. ⁵ Tura Yusa suntarī Kurniriun tuke chicharuk “Wats, ámiuniam Júpenam akupkata. Semūn, chíkich naari Pítiur, tatí tusam akuptukta, tímiayi. ⁶ Nu Semun̄sha chíkich Semun̄j̄aj̄ pujawai. Nuka nuapen-iwiarin Semun̄kaiti. Tura ni jēesha nayaantsanam ayaamach pujawai, tímiayi. Nūj̄ jeawakmin, ame túratamna nuna Semūn Pítiur turamtatui” tinia ikiukmiayi. ⁷ Tura Yusa suntarī waketkintai, Kurniriuka ni takarniur̄in j̄imiaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriusha ni túrunamur̄in ashí ujáa-já awajas Jupe péprunam akupkarmiayi.

⁹ Kashin tsawant̄aj̄ Kurniriu suntarī Júpenam nuntumsar̄aj̄, tutupin̄ āj̄ Pítiur jēa yakí wáakunam Yúsan áuj̄sataj̄tsa wakamiayi. ¹⁰ Pítrusha ti tsukamak yurumátaj̄ tusa wakerimi-ayi. Túrasha yurumkan iniarain̄iāj̄ Pítiur íkiajtusmak, ¹¹ nayaimp uranmianum wan̄karam tarachia áanin̄ tura nuna tsakar̄in̄ jin̄kiakman tár̄un wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha en̄kemiarmiayi. ¹³ Tumaj̄ Yus Pítrun chicharuk “Pítru, wajakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen̄ké yúchait̄ji. Tuma asamtai júnaka wikia yuashtaj̄i” tímiayi.

¹⁵ Túrasha Pitrun atak Yus chicharuk “Wi, péñkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi. ¹⁷ Nuna túrunan wáiniak Pítiur wariniak ániuncha wáinkiaj tusa enentáimia pujaj kapitíán Kurniriu ayakma armia nu, anintruiniak jeawariayi. ¹⁸ Tura jeawar kakantar untsummiar “¿Semuñ, Pítiur, juññ pujá?” tiarmiayi.

¹⁹ Tura Pítruka íimiarmarjñ tuke enentáimia pujaj Yusa Wakaní chichaak “Menaintiu áishman untsurmainiawai, tímiayi. ²⁰ Wajakim akaikim arantutsuk au nemariarta, Wi akupkamu asantai” tímiayi.

²¹ Nuna antuk Pítiur taramiayi. Tura áishmanñan Kurniriu akupkamia nuna wajainian wáiniak “Wiitjai Pítiur. Átum eátrumna núitjai. ¿Warí kapintrum?” tímiayi.

²² Tutai niisha tiarmiayi “Iisha kapitíán Kurniriu akupkamu taji. Kurniriuka áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Níyya winiaji, tiarmiayi. Kame nuik, Yusa suntari, nayaimpinmaya akupkamu, ii kapitíán-trjñ tímiayi “Pitrun untsukát akupkata. Nii tatí. Tura nii títiatna nu péñker anturkata” tímiayi. Nuna ii kapitíán-trjñ takui iisha winiji” tiarmiayi.

²³ Tutai Pítiur jeá awayámiayi. Tura nu kashi nuñ kanararmiayi.

Kashin tsawarar Pítiur niijaj wearmiayi. Túrasha Júpenmaya Yus-shuarsha nin nemariarmiayi. ²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarjñ tura ni nekas amikrjñ, nekaatarum tusa untsuk ikiaankamiayi.

²⁵ Tura Pítrusha jeamtaí Kurniriu aá jiintiuki Pitrun tikishmatramiayi. ²⁶ Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. ²⁷ Tura chichasar jeá wayawarmiayi. Tura wayá, untsurj aents matsatun wáinkiamiayi. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjaj pachiniarchatniutrume, tura ni jeencha wayashntiniaitrume in jintintramin turamainiaji, tímiayi. Túrasha Yuska ni enentáimsamurjñ wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi. ²⁹ Tuma asantai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtaí untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasaj tura nantusha juní aj, wikia yurumtsuk Yúsan ájnsamjai, kjaraj ájnsatin ana nuna. Túran chichaj, áishman, ni entsatairj wincharpatniun, naka wajatran wáinkiamjai, tímiayi. ³¹ Niisha chichartak turutmiaiyi “Kurniriu, Yus ame ájzman anturtamkayi. Tura shuar atsumainia yáñmamna nunasha nekarmayi, turutmiai, tímiayi. ³² Tuma asantai, Jupe péprunam akatramuram akupkata. Semuñ Pítrun itiatí. Nu Semuñ Pítrusha, chíkich Semuñjaj pujawai. Nuapeni-wiarin Semuñkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asantai iisha juí Yus íimmianum pujuiniayi. Tuma asantai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeñ Pítiur etserkamia nu

³⁴ Nuyá Pítiur chichaak “Ayu. Yus íimmianum ashí aents métekrak ániawai nekas nékajai, tímiayi. ³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtwai, tímiayi. ³⁶ Yuska shiir chichaman Israer-aentsun akuptukmiayi. Nuñ chichaak “shuar Jesukrístu naarjñ páchiakka, Yusjaj nawamnaikiatin átiniaiti, tímiayi. Nú Jesukristu ashí shuara Úuntrjñti’ tímiayi Yus. ³⁷ Túrasha Kariréa nunkanam nanmakam ashí Israer nunkanam túrunamia nu paant nékarme. Imiakratin Juañ imiaak etserak amukmia nú tsawantin nankamamiayi. ³⁸ Tura jusha nékatsrumek, tímiayi. Nasarénumia Jesús, Yus Anaikiamu asa, Yusa Wakaní kakarmarjijaj péñker túrinuuyayi. Iwianchruku wáitias pujuarmia nuna péñker awajsamiayi. Yus Niññ pujurma asa ashí nuna túrinuuyayi. ³⁹ Tura Israer-aents matsatkamunam tura imia Jerusarén péprunmasha Jesús túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtaí Yus Nin iniantkimiayi. Tura

ataksha iwiaintiurtamkachmakaji, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nù áentstiniak wantinturmakmijai, tímiayi. Au nekas jakamunmaya nantakmiatai iisha Nijijai tsaninkiar yurumámji, tímiayi. ⁴² Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wikiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. ⁴³ Ya shuarak Jesusa náarjin pachia nú shuarnaka tunaarjin tsankurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujai, tura chikichcha antúu pujuiniyai Yusa Wakaní tarurarmiayi. ⁴⁵⁻⁴⁶ Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi ⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi. ⁴⁸ Nuyá Pítiur, Jesukrístu náarjin imiantiarum tusa akupkarmiayi. Tura nuyasha Pitrunka, nijijai ishichik tsawant pujustinian seawarmiayi.

11

Ni túrunamurjin Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurjisha tura Jufianmaya Yus-shuarsha antukarmiayi. ² Túmainiak Pítiur Jerusarénum jeamtai, Israer-shuar Yus-shuar ármia nu chichainiak ³ “¿Urukamtia Israer-aents áiniachusha iyumam? ¿Tura aujai tsaninkiam urukamtai yurumámum?” tiarmiayi.

⁴ Tutai Pítiur ashí yámankamtaiknumiá túrunamun ujakmiayi. ⁵ Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wan̄karam tarachia áanin kuaru tsakarjin jin̄kiakma, nayaimpinmaya táarun wáinkiamjai. Tura wi pujamunam jeartimiai, tímiayi. ⁶ Tura nuí iyaj tukaman in̄it yajasmañ, napincha, nanamtinniaasha en̄ketainian wáinkiamjai, tímiayi. ⁷ Tura chichaman antukmajai “Pítru wajikim maam yuata” túrutun antukmajai, tímiayi. ⁸ Túrutkui “Átsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiyai, tímiayi. ⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutimiai, tímiayi. ¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nuí túruna pujai menaintiú áishman̄ Sesarianmaya akupkamu, winia ēataniak wi pujamunam tarutiarmiiai, tímiayi. ¹² Tura nuí Yusa Wakaní chichartak “Arantutsuk aujai wetá” túrutkui, wémajai. Tura jū sais Yus-shuarjai wi wémajai. Túrunar ashinkiar Kurniriu jeen wayamji, tímiayi. ¹³ Niisha chichaak “Jearūi Yusa santarī nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun̄ Pítiur tatí tusam áishman̄ akatram akupkata. ¹⁴ Pítrusha taa, itiura amesha tura áminiurmesha tunaarminiá uwemprattam nuna turamtatui.” Yusa santarī nuní turutmiayi” tu ujtakmiayi Kurniriu’ tímiayi.

¹⁵ “Wi chichastasan júarai, Yusa Wakaní tarurarmiayi, yámankamtaik in tarutrampramijai nútiksā, tímiayi. ¹⁶ Nuīnkia Uunt Jesus timian enentáimpramjai. Niisha tíchamka “Juan̄ entsajain̄ imiokratmiayi. Tura antsu Yusa Wakanínkia imiantinia áintsan̄ atumí enentáin̄ en̄kemprutmattarme.” Nu timian enentáimpramjai, tímiayi. ¹⁷ Atumsha enentáimpratarum. Uunt Jesukrístu umirkamijai nuí, incha Yuska ni Wakanín suramsamijai. Tura in suramsamijai núnisan̄ Yus nincha ni Wakanín súsarmiayi. Nuna tura asamtai, wikia, túrashitiniati, Yúsān tftinkiaitjai” tímiayi Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchan̄cha ni enentáin̄ yapajíawarmatai tuke iwiaaku átinian Yuska nin súsaruiti” tiarmiayi. Tusar Yusa náarjin ti shiir awajarmiayi.

Yus-Shuar Antiukía péprunam wearmiania nu

¹⁹ Estepañkan máawarmia nuí, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nuñkanam, Chipri nuñkanmasha, tura Antiukía péprunmasha wearmiayi. Tura nuí jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura niijjají Chipri nuñkanmayá pisararmia nu Serini nuñkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurín ujakarmiayi. ²¹ Tura Uunt Jesus ikiakárma ásar, nú nuñkanmayá aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumiá Yus-shuar, ame iyutá tusar, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha péñker áishmankauyayi. Yusa Wakanísha pimiutkamuyayi. Tura Yúsán nekas umirkauyayi. Tuma asantai nu shuaran mash jintintiiniak chicharuk “Tu ke enentáimjají umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiatj tusa. Tura wáiniak Antiukía péprunam jukimiayi. ²⁶ Tura nuí jeawar, nú péprunmayá Yus-shuarjají iruntrar chikichik uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmanka Yus-shuaran émkaka, Kristu shuari, tiarmiayi. ²⁷ Nuyá Yusnan etserin Jerusarénumiá táarmiayi Antiukíanam. ²⁸⁻³⁰ Túmainiá chikichik etserin, ní naari Akaapu, Yus-shuar matsatmanum ajapén wajakí chichasmiayi. Tura Yusa Wakaní nekatairijjají chichaak “Ti tsuka ashí núñkanam átatui” tmiayi. Tuma asantai Antiukíanmayá Yus-shuar chichainiak “Jutía nuñkanmayá Yus-shuar ainia nu yáintai” tiarmiayi. Ankant ankant ni wakermia núnik súsarmiayi. Tura nú kuítniasha Jutíanmayá Yus-shuara úuntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tía núnisañ túrunamiayi, akupin Krautiu pujaí.

12

Pitrun sepunam enkeawarmiania nu

¹ Nu tsawantají akupin Erutis Yus-shuaran máataj tusa chichaman jurus áentsrín ishiakmiayi. ² Tura Juangka yachín Jakupun suen tsupirkar máawarmiai. ³ Nuna tura máawarmatai Israer-aents wáinkiar “juka péñkeraiti” tiarmiayi. Erutissha nuna antuk, Pitrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi. ⁴ Pítruncha achik itiarматаi, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáís (16) irunar Pitrun téntakarmiayi. Tura, ju jísat nankaasmatai, mantamnatí tusan jiiktiatjají aents iruntramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha mijjatrusuk iiyarmiayi. Túramunak Yus-shuarka, Pitrun yáinkiat tusar iniaitsuk Yúsán ti áujiarmiayi.

Yusa suntarij Pitrun uwemtikramiania nu

⁶ Wats, Erutis, kashin jiiktiatjají takui, nú kashi Pítruka jimiará suntar wajamunam etema tepes kanarmiayi. Tura jimiará jirujají jiníamuyayi. Tura chíkich suntarka jinmanum ii wajarmiayi. ⁷ Tumají aya aneachma Yusa suntarij nayaimpinmayá taa ajapén wajasmiayi. Túrunamtai jeanmanka tsáapin ajasmiayi. Tura Yusa suntarijsha Pitrun páenum antiñ ishintiarmiayi. Tura jirusha Pitru uwejeýa sayat atiniamiayi. ⁸ Tura Yusa suntarij tmiayi “Kaki emenmamata. Túram sapatrumsha aweekata” tmiayi. Tutai Pítiur túramiayi. Nuyá chichaak “Pushiram entsarta. Túram nemartusta” tmiayi. ⁹ Tutai Pítiur nemarsamiayi. Túrusha Pítruka, mesekranmaapi júniája, tu enentáimsamiayi. ¹⁰ Túrusha emka suntar ímia wajan nankaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-niní kuat uranmiayi. Túrunamtai jiiñkiarmiayi. Tura jintiá ishichik wésan, Yusa suntarij Pitrun níniak ikiukmiayi.

¹¹Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarín nekas akupturkayi. Erutis mantuataj tusan pujurtana nuyá Yusa suntarí winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tímiayi. ¹²Nuna tu enentáimias nekáa, Marí jeen wémiayi. Nú Marisha Juan Márkusan nukuriyayi. Nú jeanam untsurí aents irunar Yúsan auju matsatainiái Pítiur jeamiayi. ¹³Tura jeá aa wáitin tuntuimiayi, wayataj tusa. Túmakui nuwa uchich, ni naarí Ruti, yákit tusa iyumiayi. ¹⁴Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi. ¹⁵Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶Tu chichainiain Pítruka tuke tuntuí wajamiayi. Tura wáitin uraj tukamá Pitrun wáinkiar ashankarmiayi. ¹⁷Ashamak chichainiakui Pítiur, uweje takuí itiatmantikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna tí iniaís jiinki arant wémiayi.

¹⁸Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. ¹⁹⁻²⁰Túrunamtaí Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtaí Erutis suntaran untsukar, Pítrun ísarmia nuna aniasarmiayi “¿Pítiur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjajsha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiayi. Tuma asamtaí métekrak enentáimsar, Erutisa takarniurj penkeri, ni naarí Parastu, niijjai emka amikmawar nuyá Erutisan weriar shiir matsamsatniun seawarmiayi. ²¹Tuma asamtaí tsawant jeamtaí Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi. ²²Nuj pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. ²³Tumaj nuyajk Yusa suntarí nayaimpinmaya tarí Erutisan jaa awajsamiayi. Tuma asamtaí nusha aka yuam jakamiayi. Erutissha Yusan waantu awajtsuk niiki waantu enentáimtuma asa túruna jakamiayi. ²⁴Túrunamtaisha Yusa chichamenka nú arant pampañki wémiayi. Túmakí ashí núñkanam anturamiayi.

²⁵Tura Pirnapísha Sáurusha ni takatrín amukar Jerusaréñnumiá Antiúkianam wake-tainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹Antiúkianmaya Yus-shuarnum Yusnan etserin páchitra ármiai. Nútiksán Yus-Chichaman jintinniurísha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatgesha, ni naarí Manaen, Sáurusha tímianu ármiai. ²Tura chíkich tsawantaj niisha yurumtsuk Yúsan áujeak pujuiniái Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túrarum” tímiayi. ³Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiúkianmaya akupkarmiayi.

Chipri nunkanam jeawarmiayi

⁴Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi.

⁵Juaṅsha yáintaj tusa némarkauyayi. Nuḷ Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. ⁶Tura Chipri nuṅkanam pepru ainia nuḷ wáirkutak Papus péprunam jeawarmiayi. Nuḷ jeawar Israer-aents uwishin ni naari Parjesúsán wáinkiararmiayi. Ni chíkich náariṅkia Erimiasauyayi. Niisha uwishniuitiat, Yúsán étsereajai, tíniuyayi. ⁷Akupin Serjiu Párujai pujuyayi. Nu akupniusha ti péṅker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. ⁸Tura uwishin Erimias nuna nakitiak “Auka péṅkerchaiti” tímiayi. Akupniusha Yúsán umirkajin tusa nuna tímiayi. ⁹Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi ¹⁰“Ámeka wáitaitme. Anañkartiniaitme. Yajauchiitme. Maaj, iwianchiitme. Tura ashí péṅker ana nuka imiá nakitniuitme. Tsej, ʒurukamtaí Yusa jintí naka ana nu emeskim weam? ¹¹Paij, yamaikia Uunt Yus asutiámattawai. Yamaikia amesha jijiimi kusurmatai untsurí tsawant ysaápnin penké fischattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa. ¹²Nu túrunamtaí akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³Nuyá Juan wakетки Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiár Pirji péprunam jeawarmiayi. Nusha amaini Pampiria nuṅkanam pujawai. ¹⁴Nuyá Pirji péprun naṅkaikiar Antiukía péprunam jeawarmiayi. Nú Antiukíasha Pisitia nuṅkanam pujawai. Nuḷ jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. ¹⁵Tura nuḷ Yus-Papiniun yaunchu áarman ájas aminkiamtaí, Israer-shuar iruntai jeanam írniuri Páprun tiarmiayi “Yatsuru, jintíatin chicham takakkurmeka yamaik titiarum. Antukarmi” tiarmiayi.

¹⁶Tutai Papru wajaki uweje takuimiayi. Tura chichaak “Israer-shuartiram, tura Yúsán umirkataj tusa wakerarmena nu antuktaram, tímiayi. ¹⁷Ii Yusrí ii yaunchu uuntrin Israer-shuartiran achikmiayi. Tura niisha írara núnik Ejiptunam matsatainiaí Yuska nin páchiniak uunt awajarmiayi. Yus ni kakarmarijiai nú nuṅkanmaya ii yaunchu uuntrin uwentikrarmiayi. ¹⁸Túrasha atsamu nuṅkanam ii uuntrin kuarenta (40) uwitin Yuska aya kátsuntramiayi. ¹⁹Tura nuyanka siati áentsun mátsatkainian, Kanaan nuṅkanam matsamarmia nuna amukarmiayi. Nú nuṅkan ii yaunchu úuntrin susataj tusa Yus túramiayi. ²⁰Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru síantu senkuenta (450) uwí ejemiayi. Samuersha Yúsán etserin náamtsáin nuna túrimiayi Yus. ²¹Tura nuyanka áencha juísán nakitiainiak, uunt akupin náamkat tusar Yúsán seawarmiayi. Tuíniakui Yuska Sesa uchirin Sáuran anaikiamiayi. Nú Sáura úuntrinikia Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsanatkamiayi. ²²Tura Saúr náamkan ataksha Yus awainkimiayi. Tura nuyá iksan nú nuṅkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirin Tawitian winia enentáir jeamtaí achirmakjai. Tura Winia umirtin átatui” tímiayi. ²³Wats, Tawit weeanmaya Jesusaiti. Tura Yuska Israer-aentsun Uwentikrartinian Jesusan anaitiukmiayi, yaunchu timiarin uminkiat tusa. ²⁴Jesuska táatsain Juan ashí Israer-shuaran tunaarjiniá enentáimtumar imiantinian ujakmiayi. ²⁵Tura Juaṅsha ni jákatniuri jeatemamtaí, chichaak “Átum enentáimtarmena núchaitjai. Wikia Yusa anaikiamuri, Kristu tutai, náarmena núchaitjai. Antsu Niṅkia winia ukunmaruj winittiawai. Tura Niisha wíjainkia ti naṅkaamantu asamtaí wikia sapatrincha atitratáí tichammnaitjai” tímiayi.’

²⁶Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiayi. ²⁷Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénumiá shuar ni akupniurijiai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti ticharmiayi. Tura, jakatí, tiarmia nuḷ, Jesusa túrunatniurin, Yus yaunchu

chichakmia nuna, t́míatrusaran umikiarmiayi, t́míayi. ²⁸Jesuska penké tunaamkachunak yamaikia mantamnat́ tusar Piratun seawarmiayi, t́míayi. ²⁹Tura Yusa Papiŕin ash́ Jesusnan t́mia nuna t́miannak umikiarmiayi. Tura nuyá krúsumiá itiarar iwíarsarmiayi. ³⁰Túramunak Yus jakamunmayan iniantkimiayi. ³¹Jesuska jakamunmaya nantak, yaunchu Kariréanmaya Jerusarénnum Niijíai irutka wéarmia nuna núkap tsawantin pujus wantintuikmiayi. Nú shuaraiti yamaikia Jesusa túrunamurín etserainia nu' t́míayi.

³²“Iisha núnisrik shiir chichaman Yus yaunchu ii apachrín tiarmia nu étsereaji. ³³Iisha Israer-weeá asakrin, Yuska Jesusan iniantkimia nujai ii apachrín anajmatramia nuna yamá uminkiaiti. Kame Sarmu J́míar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴Tura Yuska Jesusa nantakmiarín jintintiak, tura ni ayash́ káurchatniun jintintiak, chíkich Sarmu papinium juna áamtikramiayi:

“Nekas péńkeran Tawitian anajmatramaj nuna atumin amastatjai.”

³⁵Tura nú arant, nú paant at́ tusa, chíkich Sarmu papinium ju aarma awai:

“Yusa, ame Uchiram aneamna nuna ayash́ káurтинcha tsankatkashtatme.”

³⁶Nekaatarum, yatsurtiram, Yuska Tawitia ayash́n t́chamiayi nuna. Tawitkia Yus t́mian amuk jakamiayi. Túrasha ni ayash́kia káurmiayi. ³⁷Tura antsu Yus iniantkimia nuna ayash́kia penké káurchamiayi. ³⁸Tuma asantai, yatsurtiram nekaatarum. Jesusjainkete tunáa asakártin. ³⁹Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. ⁴⁰⁻⁴¹Yúsnan etserin juna áarmiayi:

“Enentáimpratarum wishikíartintiram. Ashamkatarum. Túrarum menkatumpratarum.

Wí Yus asan, átum pujarmena nuí, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asantai yatsurtiram, aneatarum atumin nuna túrutmawáurum, Yusnan etserin aarma tana nútiksañ.” Nuna chichaak amukmiayi Papru.

⁴²Tura nuyá Papru Pirnapíjiaí jiinki wéenakuí aents chichainiak “Chíkich sáwartincha jútkisarmek etserkatarum” tiarmiayi. ⁴³Tura nuyá iruntsua tseńkeenan Israer-shuarsha, tura chíkichkia Israer ajasarusha, Yúsán umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa aneńkrattairí enentáimtusum kakartarum” tiarmiayi.

⁴⁴Tura chíkich sáwartinchia nu péprunmaya ti untsurí aents Yus-Chicham antuktai tusar tuakarumiayi. ⁴⁵Tura Israer-shuarka ti untsurí áentsun tuakarun wáinkiar, suir iiniak, ti kajerarmiayi. Tuma asantai Páprun katsekkar “Ju chichaana júka ántar tawai” tiarmiayi.

⁴⁶Támaitiat Pápruka Pirnapíjiaí arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, t́míayi. Tuma asantai iikia yamaikia Israer-aencha ujaktai tusar weraji, tiarmiayi. ⁴⁷Nu túratarum tusa, Uunt Yus akuptamtsujik. Jes, ni Papiŕin juna tawai:

“Israer-shuarcha Winia nekarawarat tusan anaitiukjame. Tura ash́ nunkanmaya aents uwemprarat tusan akuptajme.”

Tu áarmaiti” t́míayi. ⁴⁸Nú chichaman antukar Israer-shuarcha ti wararsar “Uunt Yus tana nuka imía péńkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. ⁴⁹Tú tumakí Yus-Chicham nú nunkanam ash́ jamarmiayi. ⁵⁰Túrasha nuwan, Yúsán péńker enentáimtuinian tura péńker wekainian, Israer-shuarka yajauch enentáimtikrarmiayi. Áishman penkerí armia nunasha, yajauch enentáimtikrarmiayi. Túram Páprun Pirnapíncha katsekkar, chichaman iruntur najatawarmiayi. Tú-turukiar ni nunkeya jiiki awemarmiayi. ⁵¹Túram Papru Pirnapíjiaí, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar ikiuniu péprunam wearumiayi.

⁵²Yusa Wakanísha pimiútkamu ásar Yus-shuarka ti warasarmiayi.

Ikiuniu Péprunam túrunamia nu

¹Ikiuniu péprunam Papru Pirnapjijai jeawar Israer-shuar iruntai jeanam wayawarmi-ayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsán umirkarmiayi. ²Tura chíkích Israer-shuar, Yúsán umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi. ³Tuma asamtai Papru Pirnapjijai nú nunkanam ti nukap tsawant pujusarmiayi. Tura Uunt Yúsán enentáimtuinia ásar, arantutsuk Yusa waitnenkratairín etserkarmiayi. Tura, etserinia nu winia kakarmarjainti tusa, Yuska aents túrachminian najanmamtikiawarmiayi. ⁴Tura Ikiuniunmaya aentska jímiar kanakarmiayi. Chíkíchkia Israer-shuar tuinia nu nekasaiti, tiarmiayi tura chíkíchkia Jesusa akatramurí tuinia nu nekasaiti, tiarmiayi. ⁵Tura nuyá Israer-shuarchajai Israer-shuarka chichasar pepru uuntrijijai chichasarmiayi. Tura Papru Pirnapjijai katsekkar tura kayajai tukurar, yajauch awajsatniun naŋkamawarmiayi. ⁶Túrasha Papru Pirnapjijai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai. ⁷Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸Ristra péprunam tunamaru áishman pujumiayi. Ni akiiniamuriya tuke wekaichauyayi. ⁹Nú áishman Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmarjijai tsumartatjai, tu enentáimiuun Papru nekaamiayi. ¹⁰Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi. ¹¹Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi. ¹²Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³Nú pepru jeamunam Júpitir náartin yusa jeen pujumiayi. Tura Júpitir náartin yusa pátrirí kukujín iwiarkamun, wákajai itiamiayi. Tura niisha ni áentsrjijai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴Tura Jesusa akatramurí Pirnapísha Páprusha nuna nekaawar, auka nakitijai tusar, ni pushirín jaararmiayi. Túrawar aents írunmanum pachiniawarmiayi. ¹⁵Tura tiarmiayi “Shuara, ¿urukamtaí áitkiarum? Iisha yúschaitji. Atumea áankitji, tiarmiayi. Peŋké ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nuí írunna nunasha najanaiti, tiarmiayi. ¹⁶Jes, aents ni enentáimmiarjijain wekasarat tusa Yuska yaunchu tsanŋkatkamiayi. ¹⁷Tuma ain shuaran peŋker awajsamujai Wiitjai Nekas Yus tusa paant awajmamsamiayi. Kame yumí yutuktinian nayaimpinmaya akupturmaji. Tura ejemamar warasarmí tusa yurumak nerektinniasha súrarnji” tímiayi.

¹⁸Túrasha Pápruka tímanu támaiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tui Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi. ²⁰Túrasha Yus-shuar Páprun tariar téntakarmiayi. Túram nuínkia Papru wajaki wé ataksha péprunam wayamiayi. Tura kashin tsawarar Papru Pirnapjijai Tirpi péprunam wearmiayi.

²¹Tírpinium pujusar uwempratin chichaman etserkarmatai untsurí shuar Yúsán umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha wakеткиarmiayi. ²²Waketainiak “ashí Yus tana nu tímiatrusumek tuke umirkatarum” tuíniak Yus-shuaran ikiakáarmiayi. Tura nin tiarmiayi, “Yusa akupeamuriin pachiinkiataj tákurkia ti wáitsatniuitji.” ²³Tura Yus-shuar írunmanum Yus-shuaran wáinniun anaikiarmiayi. Yurumsuk Yúsán áusjar chicharainiak, “umirkarumna nú Yus iirmasarti” tiar ikiukiarmiayi.

Yaunchu júinkiarinia nú Antiukíanam wakеткиarmiayi

²⁴ Nuyá Pisitia nuṅkanam naṅkaamakiar Pampiria nuṅkanam jeawarmiayi. ²⁵ Nui jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nui kanunam epkemprar, yaunchu jiiṅkiarmia nú Antiukía péprunam waketkiarmiayi. Páprusha Pirnapísha tuke jiiṅtsajin nú Antiukíanmaya Yus-shuar chichainiak, Yusa takatři túrattarmena nuna Yus waitnentramak yáinmakarti, tiar akupkarmiayi nuikⁱ. ²⁷ Nú Antiukíanam jeawar, Yus-shuaran irurar, ashí Yus nin yáinṅkiarmia nuna ujakarmiayi. Tura nútiksaj Israeler-shuarchan Uunt Yus uwentkratataj tusa untsukmia nunasha ujakarmiayi. ²⁸ Tura nuyá Yus-shuarajai Papru Pirnapíjajai núkap tsawant pujusarmiayi.

15

Jerusarénum Yus-shuara úuntrijajai iruntrarmiania nu

¹ Nu tsawantin áishman Israeler nuṅkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwem-prashtarume” tiarmiayi. ² Tuma asamtai Papru Pirnapíjajai, núchaiti tusar, nú áishmanjajai ti kakaram chicharnaikiarmiayi. Túrashana nu enentáiniak enentáimsatniun tujjinkiarmi-ayi. Tuma asamtai Antiukíanmaya Yus-shuar Páprun Pirnapíncha, atumsha chikich áentsajai Jerusarénum wétarum tusar akupkarmiayi. “Tura nui Jesusa akatramurisha Yus-shuaran wáinniusa iniasrum itiumainkit tusarum péṅker nekaatarum” tiarmiayi. ³ Papru Pirnapísha akupkama ásar wéenak Pinisia nuṅkanam, Samaria nuṅkanmasha naṅkaamainiak Israeler-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura peṅké Yus-shuarsha itiawarmiayi. Tura niisha túrunamia nuna mash etserkarmiayi. ⁵ Túrashana Pariséu aencha, Yus-shuar ajasarmiania nu, wajakar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israeler-shuarchasha umirkatin áiniawai” tiarmiayi. ⁶ Nuyasha Jesusa akatramurisha Yus-shuaran wáinniusa nu chichaman nekaatai tusar iruntrarmiayi. ⁷ Chichasua umikiarmatai Pítiur wajaki tímia, “Yatsurtiram, Yus nuik winia chichartak “Israeler-shuarchasha winia chichamprun antukar umikiarat ujakarta” tu anatiukmia nu nékarme. ⁸ Tura Yus Niṅki ashí aentsu enentáin neka asa, Wíi shuar ajasmin áiniawai tusa, ni Wakaniṅ Israeler-shuarchana susamiayi, in suramsamij nútiksaj. ⁹ Yus incha aushatka awajtamsachmajai, tímia. Antsu métekraketji. Tuma asamtai niisha Yúsan enentáimtuiniakui, Yuska enentáiyen ni tunaarjin japirarmai, tímia. ¹⁰⁻¹¹ Tura iikia nékajai niya áantsarik Jesukristu waitnenkartutairijajai uwempraitji. Nuṅkia ḡurukam-tia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsajchakait. Warí, ii úuntrisha tura iisha ashí Muisais tímia nu umiktin tujjinkiamji. Tuma asamtai, ḡurukamtaí nú káarkasha Israeler-shuarchasha áentskatín wakerarum?” tímia Pítiur.

¹² Pítiur nuna tutai Pirnapísha Páprusha chichainiak, “Israeler-shuarchasha ni kakar-marin nekaawarat tusa aentsti túrachminian túratniun Yuska ti yáinmakmajai” tú ujuam mitiat wáinkiar antúu pujurarmiayi. ¹³ Nuna ujasua amikmatai, Jakupusha tímia “Yatsurú, antuktarum. ¹⁴ Nuik túrachman Yus túramia nuna ii yachi Semuṅ Pítiur ujatmakji. Júiti: Yuska Israeler-shuarcha waitnentak Winia ajasarat tusa chikishtarchiniak achikiuiti” tímia. ¹⁵ Juska Yúsnan etserin yaunchu áarmia nu tímia trusaṅ túrunayi. Júiti arma:

¹⁶ “Israeler-aents meserer, jeṅ sáanakniua áintsaj áiniawai. Tura ukunam ataksha tana, Tawitia jeṅ sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nuṅkanmaya aents, Israeler-shuarcha ainia nu, winia náarun pachinia nu, Winia eṅtkarat tusan túrattajai. ¹⁸ Uunt Yus nuna yaunchu ujakmiayi.” Tu áarmaiti’ tímia.

¹⁹ “Tuma asamtai, yatsurtiram, wi tájarne: Israeler-shuarcha Yus-shuar ajasaru áini-ana nu, imiatik awajsachmi. ²⁰⁻²¹ Iimiatarum, ashí péprunam Israeler-shuar iruntainiam

yáunchuyan tuke sáwartin Muisaisa áarmarin jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuwairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakuí, shuar níijiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar árimiayi. ²³ Tura níijiaí ju papin áarman akupkarmiayi:

“iisha Jesusa akatramurí tura Yus-shuara wainniurí tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka ititurkatjik” tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachí Páprujai Pirnapíjiaísha atumin írmasarat tusar akupeaji. ²⁶ Papru tura Pirnapísha ii Uuntiri Jesukrístunam surumakarmiayi, ni takatrisha tsumai ain túrami tusar. ²⁷ Níijiaí Jútassha tura Sérassha akupeaji. Ii chichajnia nuna niisha ni wenejai atumin ujatmakartatui. ²⁸⁻²⁹ Kame túratin asamtai iisha Yusa Wakanjiaí ju áartin enentáimsaji. Naman ántar-yus susamu ana nu yuwairap. Tura numpasha umarairap. Kajemtikramu ana nusha yuwairap. Tura penké tsanirmawairap. Nuyasha chíkichkia nú nankaamas tíhattaji. Tura antsu nu iniaisarmeka, penker átrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nuí jeawar Yus-shuaran irurar, papin súarmiayi. ³¹ Tura Antiukíanmaya Yus-shuarsha nu papin áusjar, penker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakármiai. ³³ Tura nuí ishichik tsawant pujusarmatai, Yus-shuarka, penker waketi-tiarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjiaí juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuí Yusáí ii yachí ainia nusha urukák pujuinia iyutai” tímiayi.

³⁷ Pirnapíkia Juan Márkusan iijiaí winitit tusa wakerimiayi. ³⁸ Tura Pampiria nunkanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi. ³⁹ Papru Pirnapíjiaí ti kakannairar kanakarmiayi. Tura Pirnapíkia Márkusan ayáki Chípriniam wémiayi. ⁴⁰ Pápruka Sérasan ayáki wéakuí Yús-shuar Yus yáinmakarti tinia akupkarmiayi. ⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepuru írkutak Ristra péprunam jeawarmiayi. Tura nuí Rís-tranam Yus-shuaran wáinkiarimiayi, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. ² Tura Ristra péprunmaya lkiuniu péprunmayasha Yus-shuar ármia nu, Timiutéu penker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimprarain tusa tsupir-mantikiamiayi. ⁴ Tura nuyá Papru Timiutéujai ashí péprunam nuí sétur nuí sétur wéanak Jesusa akatramurisha Yus-shuaran wáinniusha Jerusarénum nuik jintintian umiktarum tusa ujarkutak wearmiayi. ⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenki wearmiayi.

Papru iimiarmia nu

⁶Tura Yusa Wakaníkia Páprun Yus-Chichaman Asia nuṅkanam ujaktinian tsan̄katakch-miayi. Tuma asamtai Pirijia nuṅkanam tura Karasea nuṅkanam aj̄rkutak, ⁷Misia nuṅka jeatniunam jeawarmiayi. Túrunawar “Pitinia nuṅkanam wetai” tiarmiayi. Túrashá Yusa Wakaní nuṅsha wétinian suritkiarmiayi. ⁸Tuma asamtai Misia nuṅkanam menantki Truas péprunam pachiniawarmiayi. ⁹Nuṅ jeawar Papru kashi iimiarmiayi. Masetúnia nuṅkanmaya áishman̄kan wajan wáinmiayi. Nu áishman̄ Páprun chicharuk “Winitritia. Yáin̄tkiamnium” tímiayi. ¹⁰Nuyanka tu iimiarmatai, wisha Páprujai wetai tusar iwiarm-armiayi. Tura Yus incha nú nuṅkanam ni chichamē etserkat tusa ti nekas untsurmakrin wéaji, tímiayi.

Jiripius Péprunam túrunamia nu

¹¹Tura nuyanka kanunam en̄kemprar Truas péprunmayā j̄finkir Samutrásia nuṅkanam jeamiayi. Tura kashin tsawar nuyanka katjarar Niápuris péprunam jeamiayi. ¹²Tura Niápurisnumiá náwek Jiripiusnum jeamiayi. Nuṅ Jiripius péprunmanka Rúmanmayā aents matsamsa ármiayi. Tura nú péprusha Masetúnia nuṅkanam nekas uunt pepruyayi. Tura nuṅsha seturmaji. ¹³Nuyá sáwartin tsawarmatai pepru ikiukir entsá supichik wémiayi. Yus áujsatniun iruntrarmia nuṅ pujusar, nuwá iruntrarmia nu Yus-Chicham ujakarmiayi. ¹⁴Nuṅ Tiatira péprunmayā nuwá, ni naari Ritia wáinkiamiayi. Niisha tarach yamakain péṅkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha péṅker anturkamiayi. Túman, Uunt Yus Papru chichaamun umirkat tusa ni enentáin takasmiai. ¹⁵Túruna nú nuwá níiniurijjai imianmiayi. Tura nuyasha chichaak “Yus-shuar nekas ajasai túrutkurmeka winia jearuṅ winitiarum” tímiayi. Tura nuṅ jeawakrin setumtikrampramiayi.

¹⁶Tura nuyá ukunam Yus aujsatai tusar wekaamar nuwách nekaamin-iwianch en̄kem-tuamu in̄kniunmakmiayi. Nu nuwáchikia misatkauyayi. Niisha nékamkui nérenniurisha ti kuitriniawarmiayi. ¹⁷Tura nú nuwách incha Pápruncha pataaturmamiayi. Tura kakantar untsumuk “Ju áishman̄sha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi. ¹⁸Tura nú nuwáchisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijjai tájame: j̄inkitiá ni enentáiyá” tímiayi. Tutai iwianchikia nú chichamaik j̄iinkimiayi.

¹⁹Tura nuwáchi nérenniurisha, íwianch j̄iiki awematniun nekaawar, Páprun Sérasnasha kajerak achikar pepru uuntri ísarat tusar ajapén júkiarmiayi. ²⁰Tura pepru úntrijn ejeniar tiarmiayi “Ju áishman̄ Israer-shuar áiniawai. Tura in páchim enentáimtikramainiayi. ²¹Tura iisha Rúmanmayā aents árin, ii túrachminian, iikia asumprachman jintintramainiayi” tiarmiayi. ²²Tura nuyanka ashí aents Páprun Sérasnasha kajerarmiayi. Túramtai pepru uuntri chichainiak “Pushiri áitkiarum numijjai asutiátarum” tiarmiayi. ²³Tura nuyá ti asutsua amikiar sepunam en̄keawarmiayi. Tura sepú-iinian chicharuk “Ti péṅker iistá pisararain̄” tiarmiayi. ²⁴Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. ²⁵Tura kashi ajapén Papru Sérasjai Yusan áujainiak kantampriarmiayi. Tura ch̄kich en̄keamusha nuna antúu pujuarmiayi. ²⁶Tu pujuiniái aya aneachma ti kakantar uuṅkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai en̄kekar j̄in̄kiamusha mash atiniakarmiayi. ²⁷Túrunamtai sepú-iin shintiarmiayi. Tura wáitisha mash uranar aan wáiniak, en̄keamusha jiiniar shiákchariash tusa ni puniariniak ukuiniak máamattsa pujumiayi. ²⁸Tura Papru untsuak “Amek yajauch awajmamsaip. Ashí pujuiniayi” tímiayi.

²⁹Tutai sepú-iincha jinia ekeemak tsékeṅki wayamiayi. Tura Papru Sérasjai pujamunam kuran̄ki jearmiayi. ³⁰Tura aā j̄iiki aniasmiai “Uunta, ¿warí itiuṅkattaj uwemprataj tusana?” tímiayi. ³¹Tutai niisha tiarmiayi “Uunt Jesukristu nekas enentáimtustá. Túrákmeka amesha, tura áminiurmesha uwemprattarme” tiarmiayi. ³²Tura nuyá ashí ni j̄een pujuarmia nunasha Yus-Chichaman ujakarmiayi. ³³Tura tsawant irankai sepú-iincha Páprun Sérasjai numpamnamur̄in nijiararmiayi. Túramtai nuyasha sepú-iincha

nuarjijai uchirjijai imianiarmiayi. ³⁴Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

³⁵Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia penkerak jínki-tiarum” tímiayi. ³⁷Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar ímiainiaín asutiámamji. Túrawar sepunam enketmamji. Tura ¿urukamtai yamaikia uk akuptamkataj tusa wakeruinia? Atsá. Antsu uuntcha niniki taar jiiirmaktiai” tímiayi.

³⁸Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. ³⁹Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmayá jíkíar “Yamaikia wáitneasum wetarum” tiarmiayi. ⁴⁰Papru Sérasjai nuyá jínkiar Ritia jeen weararmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuí Israer-shuara iruntai jeé ámiayi. ²Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi. ³Tura Páprusha Yus-Chicham tana tímiatrusan jintintiararmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

⁴Nuna takui Israer-aents chikishtarchik umikiarmiayi. Túrawar Paprujai Sérasjaisha tsanínkiarmiayi. Tura Kriaku aencha ti untsurí Yúsan umirkarmiayi. Tura nuwá penkeri armia nusha nútikisanan umikiarmiayi. ⁵Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkích yajauch áishman naki yujáu armia nujai chichasar nu peprunam charáa charáa ajarmiai. Tura Páprun Sérasnasha achikiar aentsu úuntrin suruktai tusar Jasunka jeen árenkarmiayi. ⁶Túrasha Páprun Sérasnasha awetrar, Jasunkan tura chíkích Yus-shuarnasha achikiar japirkutak júkiarmiayi. Tura pepru úuntrin juíniak tiarmiayi “Ju áishmansha ashí nunkan charaatum ajá wekarmia nu yamaikia tímiajai tarutramarji. ⁷Tura ju Jasun ni jeen itiaarmiayi. Tura niisha ashí mash Rúmanmayá uunt akupniu chichamen nakitiainiawai, tiarmiayi. Tura jes, chíkích akupin awai, tuiniawai. Niisha Jesusaiti, turamainiaji” tiarmiayi. ⁸Nu chichaman antukar, aents nuí pujuarmia nu, úuntrimiak charaatum ajarmiai. ⁹Tura Jasun chíkích Yus-shuarjai Papru nekas awemattaji tusar, pajj, kuit ikuuaji, tiarmiayi. Nuna takui pepru uuntri nin akupkarmiayi.

Piríanam

¹⁰Nuínkia nú kashi Yus-shuar Páprun Sérasnasha Piría péprunam akupkarmiayi. Tura nuí jeawar Israer-shuar iruntai jeenam weararmiayi. ¹¹Piríanmayá aentska Tisarúnikianmayá áentsjainkia nankaamas penker enentáimkia ármiai. Tuke enentáijiai Yus-Chichaman ántiararmiayi. Túrawar tuke tsawant imia ninikisha Papru tana nuna nekasashit tusar Yusa papirín ii weararmiayi. ¹²Tuma ásar untsurí shuar Yus-shuar ajasarmiayi. Tura Kriaku aents nuwá penkeri armia nusha áishmansha umikiarmiayi. ¹³Túrasha Tisarúnikianmayá Israer-shuarka Papru Yus-Chichaman Piría péprunam étseserun antukar nuí weriar charaatum awajiararmiayi. ¹⁴Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nuín Piríanam juakarmiayi. ¹⁵Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nuí nú péprunam ántar-yus ti írunkui Páprusha kúntuts enentáimmiayi. ¹⁷ Tuma asa Israer-shuar iruntai jeanam Israer-shuarjaj tura chíkich aents Yúsan enentáimtiarmia nujaj chichasmiayi. Tura tuke tsawant pepru ajapén aentsjaj inkiunaikiar chichasarmiayi. ¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurj tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nujsa tuke irunin ármiai. Nuí Páprun aniasarmiayi “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintinaiatme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumiá aencha tura chíkich nuñkanmaya shuar nuí pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.) ²² Nuyanka Papru Ariupakunam ajapén wajaki tímiayi “Atenasnumiá áishmantiram, wi nékajaj, atumsha atumi yusrí ainia nuyá tsurakchamniaitrumé, tímiayi. ²³ Kame wi nuik atumí yusrí enentáimtutainiam iístaj tukaman nuí jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiattrum tikishmatrumna nuna ujaktajrumé’ tímiayi.

²⁴ “Nekaatarum, nu Uunt Yuska ashí nuñkan tura nuí írúnna nuna najanaiti. Tura Niisha nayaimpin nuñkancha nérenniurinti. Tura aents najanamu jeanam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-niñki Niisha ii iwiaakmarj, ii mayattairincha tura ashí írúnna nunasha súramtsujik, tímiayi. ²⁶ Nekaatarum. Nuu nupnamayanak ashí áentsun najanamiayi ashí nuñkanam matsamsarat tusa. Tura Yuska ii tsawantrj nekapmaiti; ii pujustinniasha nútiksaj nakakmiayi. ²⁷ Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi. ²⁸ Jes, iisha Yusjaj iwiaakji. Yusjaj muchitiaji. Tura Yusjaj ii kakarmarj takakji. Nútiksaj atumí papí-aintrj tchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsashtinaiatji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtinaiatji, tímiayi. ³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishman kan anaikiati. Nú áishman ashí aentsti, yáki péñkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiati. Tura tsawant nú túrunatin átatna nuna Yus Niñki achikiuiti. Túrasha nekas anaikajaj tusa, tura ashí áentstiram nekaatarum tusa nú áishman kan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nujsa Tiunseu páchitkiauayai. Niisha Ariupaku áentsuyayi. Tura nuyasha nuwá, ni naari Támaris, tura chíkich aencha nútiksaran nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nuí Israer-shuaran ni naari Akiran wáinkiamiayi. Akiraka Puntu nuñkanam akiiniauyayi. Tura ukunan Itiaria nuñkanam pujaj uunt akupin Krautiu ashí Israer-shuaran Ruma péprun-maya awemarmiayi. Rúmaka Itiaria nuñkanmaiti. Nuí awemamu ásar Akira Kurintianam nuik támiayi nuwe Pisisrajaj. Tura Pápruka Akiran chichastaj tusa werimiayi. ³ Akirasha Páprusha mai juna takau ármiai, tarach ti núparman jea najantain najanin ármiai. Tuma asantai Papru Akiraj seturmiayi nu takat túrawartai tusa. ⁴ Tura tuke sáwartin

Papru Israer-shuar iruntai jean wéuyayi. Nuisha Israer-aentsun Kriaku-aentsnasha nútiksaran Yus-Chichaman ujakar enentáimtikrarmiayi.

⁵Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman éteruk “Yusa anaikiamurj Kristu, atum nákarmena nu Jesusaiti” tímiayi.

⁶Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuinkia ikuiajrume tusa, ni pushirjn pear tímiayi “Atumek makuumarme. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

⁷Tura nuyanka Israer-shuar iruntai jeanmaya jiinki, Yúsán enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. ⁸Israer-shuar iruntai jea chicharniurj, Krispu, Uunt Jesusan nekas enentáimturmiayi. Túruna nuarjijai uchririjiaisha Yúsán umirkamiayi. Tura chikich aencha Kurintiumaya armia nu nútiksaran Yus-Chichaman antukar, Jesusan enentáimtusar imianiarmiayi.

⁹⁻¹⁰Nuyá Uunt Yus Páprun mesekran ipiatkamiayi. Chicharuk “Penké ímiatik awajtam-sachartatui Wi ámijjai pujaku. Ju péprunmasha untsurj aents Winia ajasartin írunui. Tuma asamtai ashamsuk winia chichamur tuke etserkata” tímiayi Yus.

¹¹Tura nuj Kurintiu peprunam jimiará uwí ejesattuk Yus-Chichaman éteruk pujumiayi.

¹²Tura Kariun, Akaya nunka akupniurj anaikiamu aj, Israer-aents Páprun kajerarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³Tu túrawar akupniun chicharainiak “Ju áishman Yúsán umirkatniun Muisais akupkamia núnaka íkias ausháa jintíawai” tiarmiayi. ¹⁴Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárumna nuna anturkaintjarne. ¹⁵Túrasha aya chichamnak tura aya náarjniak atumí uuntri akupkamia nunak tau asamtai, atumek nuámtak íistarum tájarne. Wikia nu chichamnum pachinkiatniun nakitijai” tímiayi. ¹⁶Taku aa júkmiayi. ¹⁷Tura nuyanka Kriaku aents Israer-shuar iruntai jea úntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸Tura ni jeen waketkiarmatai, Papru nu péprunam untsurj tsawant pujusmiayi. Tura nu yasha ukunam Yusaj yachi ármiania nuna áujas ikuiak Pirisírajai ni aishri Akirajai Senkrea péprunam wearmiayi. Nu Israer-shuar túrutain umiak Papru ni intiashin awampremiayi, nuik Yúsán tímiay nuna yamá umíajai tusa. Nuinkia kanunam enkemprarmiayi Siria nunkanam waketkitiai tusar. ¹⁹Tura nuyá Ipiisu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. ²⁰Tura niisha Páprun jujn pujustá tusar seawarmiayi. Túrasha támaitiat, tujintiajai, tímiayi. ²¹Nuyanka áujas ikuiak “Wisha Jerusarénum námper átatna nuna pachiintiuktiniaitjai. Tura Yus akuptakuinkia atak tatajai atumin ístaj tusan” tímiayi. Tura kanunam enkemar Ipiisiumaya júnkimiayi.

²²Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuj áujasataj tusa. Tura nuyá Antiukíanam wémiayi. ²³Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar matsarmia nuna chicharak ikiakármiai.

²⁴Tumáa pujai Arijiántria péprunmaya Israer-aents Apurus Ipiisu péprunam jeamiayi. Niisha Yusa yaunchu papirin ti penker nekaamiayi. Etserkatniuncha ti nékauyayi.

²⁵Uunt Yus tímia nunasha unuimítrauyayi. Tura tuke enentáijjai chichasmiayi. Jesusa túramurjn penker jintinniuyayi. Túrasha aya Juan imiakratmanak nekaamiayi. ²⁶Ju Apurus arantutsuk Israer-shuar iruntai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintinrarmiayi.

²⁷Nuyá ukunam Apurus, Akaya nunkanam wétaj takui, Ipiisiumaya Yus-shuar yáinkiar papí árar atakas akupkarmiayi. Nú áentsnum penkerak jeat tusar túrawarmiayi. Tura

Akayanam jeá, nú áentsun Yusa waitnenkratairijíai uwempraru ármia nuna ti yáinkiarmai-
ayi. ²⁸Tura Apurus Israer-aentsjai paant chichasmiayi. Túrasha Yusa Papirijíai, Jesussha
nekas Yusa anaikiamurínti tusa paant jintfak nincha nupetkamiayi.

19

Papru Ipisiunam jeamiayi

¹Tura Apuruska Kurintiunam pujái Pápruka náinniumaaní wekaráktak, Ipisiunam
jeamiayi. Tura nujsa Yus-shuaran wáinkiamiayi. ²Tura aniasmiayi “Atumsha Yus-shuar
ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai
támaka” tiarmiayi.

³Tutai Papru aniasmiayi “Entá, ¿nuikia atumsha warí enentáimsarme imianmiarum?”
tímiayi.

Tutai niisha tiarmiayi “Juan jintinramamíaj nu iisha enentáimsar imianmíaji” tiarmi-
ayi.

⁴Tutai Papru tímiayi “Juansha, tunaarminí enentáimprarum imiantiarum, tíchamka.
Nuyá tíchamka, winia ukurúí winittiana nu nekas enentáimtustarum. Niisha Jesus Yusa
anaikiamurínti, tu ujatmakchamka” tímiayi Papru.

⁵Nuna antukar niisha Uunt Jesusa náarín enentáimtusar ataksháa imianiarmaiayi. ⁶Tura
Papru ni uwejejai nin antiñmatai Yusa Wakaní tarurarmiayi. Túram chíkich chichamjai
chichasarmiayi. Túrunawar Yus-Chichaman etseriarmaiayi. ⁷Nusha tuse (12) áishman
ármiai.

⁸Tura nujsa menaintiu nantutin Papru Israer-shuar iruntai jeanam werí Yusa akupea-
murín pachis arantutsuk etsermaiayi. Túrak nú áentsun ujaak Yúsnan nekasaiti tu enen-
táimtikrarmiayi. ⁹Tura chíkichka ni enentáin ti ikiatsuárarmiayi. Túrunawar umiktinían
penké nakitiainia ásar aents ántamunam Yusa jintín penké yajauch chicharkarmiayi.
Tuma asamtai Papru Yus-shuarnaka akanki yaruak Tiranu iskuiraríin tuke tsawant Yus-
Chichaman ujaarmiayi. ¹⁰Nuna túruki jimíará uwí etserkamiayi. Túramu asamtai ashí Asia
nunñkanmayá aents Israer-shuar tura Israer-shuarcha Uunt Jesusa túramurín antukarmi-
ayi. ¹¹Tura aentsti túrachminían túrat tusa Yuska ni kakarmarín Páprun susamiayi.
¹²Jáanchniasha pushincha Papru antiñman júkiar, náñkamas jaa shuaran ejetim, nú jaa
shuarsha nuna antiñkiar penker ajaarmiayi. Iwianchrusha nuna antiñkiar, íwianch
jíinkimtai ankant ajaarmiayi.

¹³Tura chíkich Israer-aents uwishin ármiai. Tura niisha chíkich chíkich péprunam
wear iwianchrुकun iwianchrín jíirki akuptin ármiai. Tuma asa niisha Jesusa náaríjái
iwianchin jíiktai tusar, iwianchin chichartuiniak “Nu Jesus Papru ujaana nuna náaríjái
jíinkitiarum tájarne” tiarmiayi. ¹⁴Tura Israer Patri uuntri Esewia náartin, siati uchíri
ármia nu, nuna túriarmiayi. ¹⁵Túrasha Jesusa náaríjái jíinkitia, tuiniakui, iwianchcha
tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?”
tímiayi. ¹⁶Nuna tinia iwianchruku áishman tsékenki nú áishman kan kakaram katsumak
nupetkarmiayi. Túram ti katsumam niisha misú tura numpamnawar jíinkiar pisararmi-
ayi. ¹⁷Nusha Ipiisu péprunam túrunamiayi. Túrunamtai Ipiisu péprunmayá Israer-
shuarsha tura Israer-shuarchasha nuna túrunamun nekaawar ti ashamkarmiayi. Tura
Uunt Jesusa náarín shiir awajarmiayi.

¹⁸Túmainiai untsurí shuar Yúsán umirkaru Yus-shuar ajatsuk tunáa túrawarmia nuna
paant ujakarmiayi. ¹⁹Tura untsurí uwishniunawarmia nu, wawekratai papí ármia nuna
itiarmai. Itiar, júka iniaiyaji tusar, ashí ímiainiaín áesawarmiayi. Nú papí áesawarmia
nuna kuftrísha senkuenta mir (50.000) nankaamasauyai. ²⁰Tu túrunamtai Uunt Yusa
chichame pampanki tura nupetmaki wémiayi.

²¹Tuma asamtai nuyasha Pápruka Masetúnia nunñkanam Akaya nunñkanmasha irautjai tu
enentáimsamiayi. Tura nuyasha Jerusarénum waketkitjai, tímiayi. Tura nuyá ukunam

Ruma péprunmasha wetajai, tu enentáimsamiayi. ²²Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninikia Asia nunkanam seturmiayi.

Ipisiunam ti charaatum ámiania nu

²³Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴Iis, nuí Ipisiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuayayi kuitjai. Tura niisha nú takatjai ti kufrintin ajasmiai. Tura chíkich áishman nú takatan takarmia nunasha ti kufrintin awajsarmiayi. ²⁵Timitriusha nijijai takarmia nuna ikiaanak, chikichnasha nijijai métek-taku takarmia nunasha ikiaanak nijijai charaatum ajarmiayi. Timitriusha tímiayi “Winia irutramutiram antuktaram. Iisha ju takat takaajnia jujai ti kuit achíatsjik. ²⁶Tura atumsha ju Papru wáintrumna nu tura ántarmena nu chichaak “Ashí aents najanamu yuska ántar ániawai” tatsuk. Nuna tau asa, juí Ipisiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. ²⁷Papru tu étserkui, iisha ititurchat pujuschattajik. Kuit ii achiaj nuka menkakashatuak. Tura nú arantcha ii yusrí Tiana jee shuar iniaisachartatuak. Tura nuyá Asia nunkanmayasha tura ashí nunkanmayá aencha, ii yusrí Tiana shiir awajainia nuna yapajíáwar aun nakitrachartatuak” tímiayi Timitriu.

²⁸Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu unsummiarmiayi.

²⁹Nuinikia aents páchim enentáimprarmiayi. Túmainiak Masetúniannmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi. ³⁰Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹Tura Asia nunkanmayá uuntri, Páprun amikri ásar, ainikia wayawain tusar chichaman akuptukarmiayi. ³²Túrasha irunar pujuarmia nu, páchim enentáimprar, chíkichka nusháa unsummiarmiayi. Tura chikichcha nútiksaran ausháa unsummiarmiayi. Tura chíkichka ti untsurí, nekaachar “wariniak irunturara” tiarmiayi. ³³Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejeñ takuimiayi. ³⁴Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵Ipisiu pepuru papí-aintrusha áentsun itiatmantik tímiayi “Ipisiu shuartirah antuktaram. Ii uunt yusrí Tiana jee ístinia íchukaitiaji. Tura ni nakumkamurísha nayaimpinmayá iniarmiania nusha íschatniukaitiaji. Tura nunasha ashí aents paant nékainiatsuk, tímiayi. ³⁶Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. ³⁷Ímiatarum. Ju áishman átum itiarumna nu, ii yúsrin yajauch chicharkacharai. Tura ni jee yajauch awajsacharai. ³⁸Wats, Timitriu tura nijijai takainiana nu tunáa túramun ujaktai tusar wakeruiniakka pepuru penkerin werishtinkiait. Nuinikia máimtek iwiainiakartí. ³⁹Tura chíkich chicham ákuinikia penker iruntrarum iwaratarum. ⁴⁰Kame ju yamáí túrunamun nekaawar Rúmanmayá kapitíán “Ii uunt kapitíántri yajauch awajatai tusarum túrachurmeash” turamchatjash. Warí, niisha “¿Urukamtai charaatum ajarum?” takuisha, áimkiatin penké tujinkiatiaji” tímiayi. ⁴¹Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹Charaatum ajasua amikiarmatai Papru Yus-shuaran untsuk Yusnan jintintrataj tusa ikiaanarmiai. Tura áujas ikiuki Masetúniann wémiayi. ²Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi. ³Nuí menaintiu nántuk pujusmiayi. Tura nuyanka kanujai Siria nunkanam wétasa pujus

Israer-shuar chícham jurusman anturmamak “antsu nunkan Masetúnianmaani wetajai” tímiayi. ⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpinmaya Kayusha Timiutéusha Asianmaya Tíkikiusha, Trújimiusha ashí nu shuar Jirípius peprunam Páprun atampriarmiayi. ⁵ Túrawar niisha emki wear Trúas péprunam jeawarmiayi. ⁶ Tura iisha wakapruachu tanta yutai jisat amuukantai, iisha Jirípius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuísha siati tsawant pujusarmiaji.

Trúas péprunam túrunamia nu

⁷ Tura tumíntin kíarai Jesukrístu enentáimtusar yurumátaí tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. ⁸ Tura yakí menaintiu pátaranam, tesaamu ámia nuí iruntrarmiaji. Nuísha ji ekemarma untsurí irunmiayi. ⁹ Tura nuísha natsa Eutikiu, áankamunam ayamas pujusmiayi. Tura Papru ti esaram chichaakui nu nátsasha karí pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi. ¹⁰ Tura Papru akaatuki tsunsumprua miniakkamiayi. Tura Yus-shuaran chicharainiak “Ashamkairap. Ataksha iwiakui” tímiayi. ¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. ¹² Eutikiuncha iwiakuan ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wéтарum, turamkurin, ikia emkir wémaji Asunnum. ¹⁴ Nuí Asunnum inkiunaikiar, Páprusha kanunam enkemprantai, Mitiríniniam jeamji. ¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusarénum wari wéтайtsa wakerimiayi, pintikiustís naartin jístatin pachiiinkiataj tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímai.

Papru Ipisiunmaya úuntrin áújsamiania nu

¹⁷ Túrusha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi. ¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarme. ¹⁹ Atumjai tuke tsawant pujumaj nuí, nankaamantuchu enentáimtumasan, úutchim winia Úuntrin takatrin takasmiajai. Tura Israer-shuar yajauch awajtustinian wakerutainiajn tuke takasmiajai. ²⁰ Ashí pénger ana nu nekaatarum tusan mijjatratsuk jintintiamjarme. Iruntramarmena nuí tura ankant ankant atumí jeen puju-marmena nuísha Yus-Chichaman ujakmajrume, tímiayi. ²¹ Tura Israer-shuarnasha Israer-shuararchacha nútiksanak, enentai yapajjárúum Uunt Jesukrístu umirkatarum, tímiajrume. ²² Tura yamáí Jerusarénum wéajai, Yusa Wakaní túrutkui. Nuísha túrunatana nunasha nekamatsuk wéajai. ²³ Tura Yusa Wakaní iniakturkui júna nékajai, ashí pepru wi jeattajna nuí enketátaí tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrusha warí winia itirtawa. Wikia Yusa jintiin warasan wekasataj tusan wakerajai. Yusají wea-wéakuan jáakun iniaisataj tajai. Tura nuyá takatan Uunt Jesus surumia nuna pénger amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrume. ²⁶⁻²⁷ Nekaatarum, ashí Yusa wakeramurjn wisha penké úurtsuk ujakjarme. Tuma asamtai atumin títaijtsan wakerajrume, chikichik shuara wakaní jiniun wéakuisha wikia penké makuumashtajai. ²⁸ Tuma asamtai emka atumek ímiastarum. Túrarum nuyá chikich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukar-tajtsa wakeriartatui, uunt yawasha murikiun amuinia áintsan. ³⁰ Túrusha nemartusarat

tusar wakeruiniak atumiñian wait chichaman unuikiartin wantinkartatui. ³¹ Tuma asantai yatsurtiram, aneartarum. Wisha menaintiú uwitin tsawaisha káshisha úutchim ankant ankant unuiniamajrumna nu kajinmatkiirap' tímiayi.

³² 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuagar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nu pachiinkiatarme. ³³ Wats, wisha chikichkí shuara kuítrin wariríncha wakerutkachuitjai. ³⁴ Antsu winia uwejrui takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. ³⁵ Kame átum takasum, atsumainia nusha yáintarum tusan jintintiajrum. Wats, Uunt Jesusa chichame enentáimsami. "Achiana nujáinkia nankaamas, súana nuka shiir waraawai" tíchamka" tímiayi.

³⁶ Nuna tuasua amik Papru tikisharmiaiyi. Tura ashí niijiaj iruntrarmia nú shuar Yúsán áujarmiayi. ³⁷⁻³⁸ Tura Papru nuik chichaak "Atakka wáitkiashtatrum" tiniu asantai, ti kúntuts pujuiniak, úutchim Páprun miniaksarmiaiyi. Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiusmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. ² Tura nuí Pataranam pujusar, chikich kanu Pinisia péprunam wea wáinkiamji. Túmakui nuí enkemprar wémaji. ³ Nuí wésar Chipri nunaka wáinkiamji. Chíprika menanmaaní aa ikiukur Sírianam jeamji. Kánuka Tiru péprunam jeá pujus-tiniuyi, káarak núkap ikiuktin akui. Tuma asantai iisha Tírunam jear kanunmaya jfinkir péprunam wayamji. ⁴ Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak "Jerusarénumka wéchatniuitme" tiarmiayi. ⁵ Tura siati tsawant nankaamasmatai jfinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji. ⁶ Tura nu amikiar nuínkia áujnaisar ikiukiarmaji. Tura iikia kanunam enkemprakrin niñkia ni jeen waketkiarmiayi.

⁷ Iisha Tirunmaya entsak wea-wéakuar Turumáitianam nuín jíntramji. Tura nuí jearsha Yusaj yachí ármia nu chichasar nuín chikichkí tsawant pujusmaji. ⁸ Kashin tsawarar nuyá jfinkir nunkan weri Sesaria péprunam jeamji. Nuí Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrin wáinkiarat tusar anaikiarmia nú Jiripiiti. ⁹ Jiripisha kuaru nawantrin yarumkauyayi nuatnakchan. Niisha Yusa chichamen etserin ármiaiyi. ¹⁰ Tura iisha Jiripi jeen wárum tsawantak pujarin Jutía nunkanmaya aents Yusa etserniuri, Akapu náartin támiayi. ¹¹ Niisha taa Papru emenmamkarin achikmiayi. Tura achik niñki ni nawen tura uwejeñcha jinjamamiayi. Nuna tura tímiayi "Yusa Wakaní tawai, juna emenmamka nérenniurin Israer-aents jútikia jinjiáwar Israer-shuarchanum surukartatui, tawai" tímiayi. ¹² Iisha nu antukar Papru tímiayi "Jerusarénumka weep." Sesarianmaya Yus-shuarsha núnisar Páprun tiarmiayi. ¹³ Tutai Papru tímiayi "¿Urukamtaí úutkuram winia enentáiruí kúntuts awajtarum? tímiayi. Wi Jesusna asantai Jerusarénum jinkiataniakuisha mántuiniakuisha ashamatsjai" tímiayi. ¹⁴ Tura iisha Papru emetatai tukamar tujinkiar "wats, nuínkia Uunt Yus wakera nu tímianak atí" tiarmaji.

¹⁵ Nu tiri iniaisar iwiarnarar Jerusarénum wémaji. ¹⁶ Chípriinmaya yaunchu Yus-shuar Manasun ni jeen Jerusarénum takakuya nuna ikiatmastinian wakerimiayi. Tuma asantai Sesarianmaya ishichik Yus-shuar nemartamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarénum jeawakrin, nuí warasar Yus-shuar ti shiir áujtamsarmiaji. ¹⁸ Tura kashin tsawar Papru ímiak Jakupu jeen wémiaji. Nuisha Yus-shuara uuntri matsarmiaji. ¹⁹ Páprusha áujas amik, Israer-shuarchanum ni étsermajai Yus túramia

nuna yámankamtaikniumiá júkí chikichkímias ujakar ujakar awajsamiayi. ²⁰ Papru taman antukar “Yus ti péñkerchakait” tiarmiayi. Tura Páprun jú chíchaman tiarmiayi “Táména nu péñkeraiti, yatsurú, túrasha Israer-shuar timiá untsurí Yus-shuar ajasu áiniayat, “ashí Muisais akupkamia nu umiktiniaitji” tuiniawai. ²¹ Nú arant yajaya aents taar, chichartamainiak “Pápruka nusháa jintintuii, turamainiawai. Israer-shuar chíkich nuñkanam pujuinia nuna Muisaisa akupkamurj umirkashtin Pápruka jintintuii, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintuii, turamainiawai.” ²² Wátsek, yatsuru, nuñkia itiurmainkit. Ame tátintrumin aents nekaawarka júi kajertamainiak káutramkachartatuak. ²³ Wats, antsu nuñkia, jú túrata yatsuru. Júi kuaru áishman Yúsán yaunchu tiarmia nuna umiktasa pujuiniawai. ²⁴ Nii júkiarta. Túram niisha Muisais akupkamia nuna umikar nijiamainiakui, amesha nijiamarta. Núnismek kuftniasha ni susatin ana nu amesha akikmatkarta. Niisha ashí umikiarmatai, ni intiashin awampratin áchattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui. ²⁵ Túrasha yatsuru, nekaata, Israer-shuaracha Yus-shuaraka papí yaunchu akuptukmijai. Israer-shuarti túratin ana nu ashí mash túratarum tátsuji, tu áatramji. Tura antsu namáñken máawar ántar-yusan susamu yúashtiniaitrume, tímiaji. Tura numpasha umarchatniutrume, kajentikramusha yúashtiniaitrume. Tura tsanirmashtiniaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksaran. Tura Yúsán tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jéen wayamiayi. ²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jéen pujan wáinkiararmiayi. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nuñkanam Muisais akupkamuríncha Israer-shuarti túrutairíncha, jú Yusa Uunt Jééncha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá jú Jééncha yajauch awajturmají” tiarmiayi.

²⁹ Jes, nuik Ipišunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jéen wayayi, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jéeya júkiarmiayi. Túrawar wáitíncha nú chichamaik epentrararmiayi. ³¹ Tura maatai tusar matsamtuiniájí suntara kapitántrj Jerusaréñnumiá aents ashí charaatum ajainian antukmiayi. ³² Kapitáncha ni suntarin tura sarjentuncha irur tseke weriarmiayi aents pujuarmia nu. Aéncha suntaran tura kapitánin wáinkiar, Páprun asutíniayat iniaisarmiayi. ³³ Kapitánka Páprun jeari achikmiayi. Tura jimiará jirujai jinikiarmiayi. Nuyasha aniasmiayi “¿Niisha yait? ¿Warinia túrait?” tímiaji. ³⁴ Túrasha aéncha untsurj chichaman untsummiarmiayi. Túmainiakui kapitáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai. ³⁶ Tura aéncha ukunmaaní pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitánin Kriaku chichamjai chichaak “Wi ishichik chichasaintjame” tímiaji.

Tutai kapitán chichaak “Warí, ¿amesha Kriaku chicham chichastin nékamek? tímiaji. ³⁸ Nuñkia amesha ¿Ejipunmaya shuárchakaitiam? ¿Nuik kuaru mir (4000) aents, mankartin tutai atsamunam yaruakchamkam? ¿Kapitánjai meset najanataj tusa túrachmakum?” tímiaji.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nuṅkanam uunt pepru Tarsu náartin ana nuṅ akiiniaitjai. Tura waitneasam ju aents chichastin tsanṅkatrukta” tímiayi.

⁴⁰ Tura kapitián, ayu, tutai, Papru watainiam wajas, mitiat pujustarum tusa uwején takuimiayi. Tura aents itiatkarmatai Israer-chichamjai chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úuntur árumna nu antukturum. Wikia Pápruitjai. Kíishtumaktaj tusan títiatjana nu waitneasrum anturtukturum” tímiayi. ² Tura Papru Israer chichaman chichaakui, aents nuna antukar nú nanṅkaamas itiatkarmiai. ³ Nuṅ Papru chichaak “Wikia Israer-shuaraitjai. Tarsu pepru Sirisia nuṅkanam ana nuṅ akiiniaitjai. Túmaitiatnak juṅ Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijjai wakerukuitjai. ⁴ Tura Jesusan umirkaru ármia nuna máataj tusan pataatukni wekaimiajai. Túran áishmanṅkan nuwanṅcha achikian sepunam enkeataj tusan túrimiajai. ⁵ Israer-patri uuntriṅsha Israer-shuara uuntriṅsha Tamaskunam íi-shuar susatá tusar papin ataktusar akuptukarmia nuna niṅkia nékainiawai. Jesusan umirkarun achikia ikiaankan juṅ Jerusarénum asutniáwarat tusan werimjai’ tímiayi.

(Túramuri 9.1-19; 26.12-18)

⁶ “Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmayá newaat wajantruntmiayi. ⁷ Túrunamtai wisha nuṅká iniaarmajai. Nuyanka chichaamun antukmajai. Chichartak “Sauru, Sauru, ḡurukamtia imiá pataaturam?” turutmiayi.

⁸ Takui wi aniasmajai “ḡAmesha yáitiam, Uunta?”

Tutai “Wikia Nasarénumia Jesusaitjai. Ame pataaturmena núitjai” turutmiayi.

⁹ Wijjai pujuarmia nu, newaat wajantun wáinkiar tí ashamkarmai. Túrasa niṅkia túrutun antukcharmai. ¹⁰ Tura wi tímiajai “ḡNuiṅkia, Uunta, warí itiuṅkattaj?” tímiajai.

Tutai Uunt chichartak “Wajakim Tamaskunam wetá. Nuṅsha ame túrattamna nuna ujatmakartatui” turutmiayi, tímiayi. ¹¹ Kame wikia nú newaat ajakun íisan jiiṅku kusurmai. Tuma asantai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. “Tura nuṅ Tamaskunam áishman Ananías pujumai. Niisha Yúsan aneak, Muisais akupkarmia nuna umirkauyi. Tura nú péprunmayá Israer-shuar ármia nu nin péṅker enentáimtiarmiai. ¹³ Nú Ananías winia írsataj tusa támai. Taa turutmai “Yatsuru Sauru, péṅker iimtia.” Túrutkui nú chichamaik péṅker íimmiyai. Túrunan Ananíasnasha wáinkiamjai. ¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu ísumna nusha antukumna nusha ashí aents ujakartatme. ¹⁶ Tuma asantai yamaisha ḡwarí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusarénum waketkin Yusa Uunt Jeeṅ wémajai Yúsan áujsataj tusan. Nuṅ ímiarmajai. ¹⁸ Nuṅ Jesus chichartak “Juṅ Jerusarénum Wí túramur etserkattamna nuna antukchartatui. Tuma asantai wari jíinkim wetá” turutmiayi.’

¹⁹ “Túrutkui wi tímiajai “Túrasa Uunta, juyá aents wi Israer-shuara iruntai jeeṅ wayan Ámin umirtamkarmia nuna nuṅ matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun Estepankan máiniakuisha wisha wajamjai. Túruiniaku, “péṅkeraiti” tímiajai. Nú arantcha ní pushirín írsamjai” tímiajai.’

²¹ “Túrasa Uunt Jesus winia turutmai “Wetá. Israer-shuarcha matsatania nuṅ akupkatjame” turutmai” tímiayi Papru.

Suntara kapitíántrĭn túrunamia nu

²² Nuj matsamarmia nu, núnaka antukarka untsuntan juáriarmiayi. “Juka mantamnatí. ĵUrukamtaik iwiakusha pujusat?” tiarmiayi. ²³ Tura aentska Paprun kajerainiak, ti untsumainiak pushirĭn tujaat ajapawar nunĵancha nanĵimkiamaiĵa ajarmiayi. ²⁴ Tura kapitíán nuna wániak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ĵUrukamtaik aents nin kajerainiak imiá untsumainia? Nekaatarum” tímiayi. ²⁵ Tura Páprun asutiátaĵi tusar jinĵiárar awajsam Pápruka kapitíánin chicharuk “ĵRúmanmaya aents áyatik asutiámniakait, ni túramurĭ nekartsuk?” tímiayi.

²⁶ Nuna táman antuk kapitíáncha uunt kapitíánin ujaktaj tusa werĭ chichaak “Maaj, túrataj tamena nu anearta. Ju áishman Rúmanam pachitkaitĭ” tímiayi.

²⁷ Nuna antuk uunt kapitíán Páprun werĭ aniasmiayi “ĵAmesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akimĵimĵajai Rúmanam pachĭinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asantai, wisha Rúmanam pachĭinkian akiiniaitĵai” tímiayi.

²⁹ Nuna takui Páprun asutiátaĵi tiarmia nuna wárik iniaĵsar jĵiniar wearmiayi. Tura imia uunt kapitíáncha Rúmanam pachitkian jinĵiá asa ashamkiamiayi.

³⁰ Tuma asa kashin tsawar uunt kapitíán, urukamtaik Páprun imiá kajerainia, nekaataĵ tusa wakerak Paprun werĭ jinĵiámun atirmiayi. Tura Israer-patrĭ uuntrĭn chĭkich naamka armia núĵaĵsha ĵiaankiamiayi. Tura nuĵkia ni matsatmanum Páprun itiar ajapĵn awajsamiayi.

23

Israer-aentsu Úuntrĭn Papru timiania nu

¹ Papru Israer-patrĭ naamkarĭn úmamkes iis “Wĭi shuartiram antuktarum. Úchichik tuke yamaĵsha Yus úmmianum penĵker wekainuitĵai” tímiayi.

² Papru nuna takui Israer-patrĭ uuntrĭ Ananías, ni suntarĭn Papruĵ ayamas puĵuarmia nuna “Wenunam awatiarum” tímiayi.

³ Tutai Papru tímiayi “Tsej, jĵimiará chichamtinia úmiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ĵnuĵkia urukamtia Muisais tímia nuka iniaĵsam ame suntarum winia asutiátarum tame?” tímiayi.

⁴ Tura nuna takui nuĵ wajarmia nu Páprun tiarmiayi “ĵMaaj, amesha Patri uuntrĭ imiá yajauchisha chichaream?”

⁵ Tutai Papru tímiayi “Yatsuru, wisha Patri uuntrĭ áutskaitia tíchamĵai. Nékaitkiunka núnaka tíchajĵai. Kame wisha nékajĵai, Yus-Chichamnum tawai “Atumĭ uuntrĭ yajauch chicharkairap” tawai” tímiayi.

⁶⁻⁸ Israer-aentsu úuntrĭya jĵimiará írutka ármiayi. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, ĵakamunmaya nantaktincha Yusa suntarĵsha aentsu wakanĵsha tura iwianchcha atsawai, tiniu ármiayi. Antsu Pariséu aentska, nuka ashĭ awai, tiniu ármiayi. Nuna nekáa Papru kakantar chichaak “Wikia Pariséu áentsuitĵai. Wĭi shuarsha Pariséu áiniawai. Wikia ashĭ shuar ĵakamunmaya ukunam nantaktin átatui tu jintiamun, nekaataĵi tusar itiararmiayi” tímiayi. Tura Papru nuna takui Pariséu aents tura Satuséu aencha nuámĵak kajernaĵiarmiayi. Túrunawar kánasaran nusháa nusháa enentáimprarmiayi. ⁹ Nuĵkia ashĭ aents charaatum ajarmiayi. Tura Israer-shuara jintinniurĭ Pariséunam írutka armia nu wajakar tiarmiayi “Ju áishman tunaan penĵe túrichuiti. Yusa suntarĭ chĭkich wakancha nin nekas chichaschamashi. ĵYa neka?” tiarmiayi. ¹⁰ Ti charaatum ajainiakui suntara kapitíántrĭ Páprun achiar-chartimpiash tusa suntaran untsuk, “Jĵiktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntrĭ mesekra ipiatuk “Kakaram ajasta, Papru. Juĵi Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹²Nuyá kashin tsawar matai Israer-aents Páprun maatai tusar chichaman jurusarmiayi. “Papru máachkurkia yurumsuk tura penké úmutsuk matsamsattaji. Máachrikia yajau-chiniam yumiŋkramu atai” tiarmiayi. ¹³Nuna tiarmia nuka kuarenta (40) nankaamas ármiai. ¹⁴Tura Israer-patri úuntrin tura Israer-aentsu úuntrincha weriar “Papru máachkurkia penké yurumsuk pujustatji. Máachrikia yajauchiniam yumiŋkramu atai” taji. ¹⁵Tuma asamtai ashí Israer-patriŋ naamkarjijai sutara kapitíántri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niŋkia táatsaiŋ náakattaji” tiarmiayi.

¹⁶Tura Papru awē nú chichaman antuk suntar pujamunam taa Páprun ujakmiayi. ¹⁷Tuma asamtai Pápruka sutara kapitíántriŋ untusuk “Ju uchi uunt kapitíánium jukitia. Niisha chichaman takaku” tímiayi.

¹⁸Kapitíáncha uchin uunt kapitíánium ejé tímiayi “Papru enkeamu pujana nu winia unturak “Ju uchi uunt kapitíánium jukitia. Chichaman takaku” túrutui” tímiayi.

¹⁹Uunt kapitíáncha nú uchin enkeki arantach jukí chicharuk “¿Warí turuttiaj tame?” tímiayi.

²⁰Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntriŋ ejetarum” turamartatui. ²¹Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarmainiawai” tímiayi uchi.

²²Tura uunt kapitíáncha uchin chicharuk “Ame túrutmena nu chíkich aents penké ujakarup’ tímiayi. Nuna ti, uchin akupkamiayi.

Akupin Píriksai ejetiarmiania nu

²³Nuyanka uunt kapitíáncha chíkich kapitíánin jímiaran itia chichaak “Urum, kashi ajapén ajastatuk ai, untсурí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) náŋkijiaiŋ Sesaria nunkanam wétin iwiarata. ²⁴Páprusha kawainium ekemkatin iwiarturta. Túrarum penkerak ejetarum akupin Píriksai” tímiayi. ²⁵Tura niijjai ju chichaman átrar akuptukmiayi:

²⁶“Ti penker akupin Píriks, wikia Krautiu Rísias ju papin áatjame. ²⁷Israer-aents ju áishmankan maatai tusar wakeruiniak achikiarmiayi. Tura niisha Rúmanmaya áentsuítkuí wikia tusa nekaan suntarjai werin jukimjai. ²⁸Wikia ¿urukamtaik achikiaruit? tusan Israer-patriŋ naamkarin jukimjai nin. ²⁹Páprunka ii uuntri akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. ³⁰Tura wisha Israer-aents nin máatniun chichaman jurusman nekaan amiŋ akuptajme. Nuyasha nin kajerainia nunasha tajai “Atumsha Píriksai werum átum warinma kajerum nu titiarum” tajai. Ayu. Júchiniak tájame.” Nuna tu átar akuptukmiayi.

³¹Tura suntarsha ni uunt kapitíántriŋ tímia nútiksaran Páprun kashi júkiarmiayi Antiparis péprunam. ³²Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. ³³Sesaria péprunam jeawar papin Píriksan súsarmiayi. Tura Pápruncha nuí ejeniarmiayi.

³⁴Akupniusha papí aujsua amik Páprun aniasmiayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

³⁵Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

Papru Píriksai áujmatsamiania nu

¹Tura senku tsawant nankaamasai Israer-patri uuntri, ni naarí Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naarí Térturu

nujai táarmiayi. Ju aents Páprun kajerainia ásar akupniunam wearmiayi. ²Nui Páprun itiarmatai Térturu chichatan juáirmiayi. “Uunt akupin Píriks, amesha yaimiu asakmin iisha shiir matsatainiaji. Tura imiá neka asakmin ashí aents tímiatrusrik matsatainiaji. ³Tuma asakmin iisha ashí matsatmanum tuke tsawant ti shiir yuminsamajme, uunta. ⁴Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵Ju áishman Papru, suḡkura utsukratniua núniniati. Niisha ashí nuḡkanam mesetan najanatniun Israer áentsun ikiakáiniati. Tura Jesusa aentsri, Nasarénu tuinia nuna úuntriḡnti. ⁶Nú arantcha Yusa Uunt Jeeḡn yajauch awajsataj tusa pujuru wáinkiar achikmaji. Ii uuntri tana nujai métek asutiátaí tusar wakerimji. ⁷Túrarin nuyḡnka kapitíán Rísias taa tapit achik jurutramkimiaji. ⁸Tura atumek akupin Píríksai werum nui aujmatkatarum, turamaji, tímiayi. Tuma asamtai amesha Píríks, Papru aniasta. Nuiḡkia ii tájiniia nu nekasaiti, nu nekaattame” tímiayi Térturu.

⁹Tura Israer-aents pujuarmia nu “Nekasaiti ashí ni tana nu” tiarmiayi.

¹⁰Nuyá Píríks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtai nuikia shiir enentáimsan páchitsuk chichastatjai. ¹¹Wats, wi túramur nekartuata. Yúsan áujsataj tusan Jerusarénum wi wémajna nu tuse (12) tsawant nanḡkaamasai. ¹²Nuiḡsha yajauch áujmatki weai wáitkiacharmai. Yusa Uunt Jeeḡncha tura Israer-shuara aujtai jeeḡncha tura pepu jántinmasha áentsnum charáa charáa ajá wekaai penḡké wáitkiacharmai, tímiayi. ¹³Ju aents juí matsatainiia nu wíniaka penḡké turutḡhannia áiniawai. ¹⁴Túrasha juna paant ujaajme. Jesus yamarman jintána nuna umíajai. Kame Israer-aentska wáitaiiti tuinia nuna wikia umíajai. Túrasha nuna túran ii uuntri Yusri akupkama nuinak umiktasan pujajai. Jes, ashí Muisais aar akupkama nuna tura ashí Yúsnan yaunchu etserin aar akupkarmia nunasha uminiatjai. ¹⁵Tura jakaasha nantaktin átatui, tajai. Warí, péḡker aents nútíksan yajauch aencha nantakiartatui imia Israer-shuar tuiniatsuk. Tura wisha nútíksanak túrunatniuiti tajai. ¹⁶Tura wisha tiniu asan, wikia winia enentáiruí Yus íimmiianum makuumatsuk wekasataj tajai. Tura áentsnumsha nútíksanak penḡké makuumatsuk wekaajai’ tímiayi.

¹⁷“Tura, uunta, untsurí uwitin chíkich chíkich nuḡkanam wekaasuan amikian winia shuarui támajai. Kuítrinchan kuítian susataj tusan tura Yusa kuítrincha nin susataj tusan támajai. ¹⁸Túran wisha, Muisais jintinnia nútíksanak níjiaamaran, Yusa Uunt Jeeḡn pujumiajai. Untsurí aents charaatum ajainiasha atsumiayi. Nui wiki pujai Ásianmaya Israer-aents wáitkiarmiayi. ¹⁹Tura wi yajauch túraitkuḡkia winia wáitkiarainia nu táchatniukait ámin ujatmaktasa. ²⁰Túrachkuḡkia juí pujuinia nu, Israer-patri naamkari matsatmanum wi pujumajna nui yajauch túramun nékainiakka turutiarti. ²¹Kame, “jakamunmaya nantakminiati” tau asamtai makuurtiajtsarum pujarme” matsatmanum tímiaj nujai turutchartimpiash. Nú arantka yajauch túramun penḡké nekartuacharmai” tímiayi Papru.

²²Táman antuk Píríks, Kristu shuari túramun paant nekáa, áanik iniaisamiayi. “Antsu kapitíán Rísias támatai nuḡkia nu chichaman nekaatjai” tímiayi. ²³Tura nuyá suntara kapitíántriḡn chichaak “Ju Pápruka tuke emetnati. Tura ishichkikia anḡkant apujtsatarum. Tura nuyá ni amikri taa yáinḡtaj takui suritkiairap” tímiayi.

²⁴Tura nuyá chíkich tsawantai ataksha Píríks ni nuwejai Tursirajai támiayi. Núwenka Israer-shuarauyayi. Píríkska “Papru itiatarum’ tímiayi. Papru Jesukristunun étserkui antimiayi. ²⁵Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Píríkska ashamak tímiayi “Antsu ya-maikia máakete. Tura ataksha wi anḡkant pujakun untsukmijiam” tímiayi. ²⁶Tura, anḡkant ajastaj tusa Papru kuítian akirkashtimpiash, tu enentáimias, Píríks tuke untsúu wémiayi, chichastai tusa. ²⁷Tura nuyḡnka jimiará uwí nanḡkaasmatai Píríks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Píríkska, Israer-aents péḡker enentáimtursarat tusa wakerak, Páprun sepunam tuke ikiukmiayi.

25

Papru Jístujaj áujmatsamiania nu

¹Jístusha akupkatin takatan nankaamataj tusa Sesaria péprunam tímiayi. Tura menain-tiú tsawant nankaamasmatai nuyá we Jerusarénnunum jeamiayi. ²Nujsha Israer-patri uuntri tura Israer-aentsu penkerisha Páprun tsanumpurtaí tusar Jístun weriarmiayi. ³Tura tiarmiayi “Waitneasam Páprusha Jerusarénnunum akupkata” tiarmiayi. Jintiá maatai tusar wakeruiniak nuna tiarmiayi.

⁴Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuí wárik waketkittijai” tímiayi. ⁵Nuyá nin tímiayi “Atumsha penkeri árumna nu, wíjjaj Sesarianam wétiniaitrume. Tura nú áishmanka tunaari ákuinikia nuisha tftiniaitrume” tímiayi.

⁶Jístuka Jerusarénnunum ishichik tsawant pujusmiayi. Kame uchu tsawant tura tias tsawantcha pujuschawash. Nuyá ataksha Sesarianam waketkimiayi. Tura nuí jeá kashin tsawar, akupin pujutainium pujus “Papru itiataram” tímiayi. ⁷Tura Papru wayamtaí, Israer-aents Jerusarénnunumia taarmia nu káunkarmiayi. Túrawar ti nukap chichainiak “Tunáa túraití Pápruka” tu tiarmiayi. Túrusha penké uyumantikiacharmiayi.

⁸Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeecha yajauch awajsachuitjai. Tura uunt kapitíánniasha yajauch penké chicharkachuitjai” tímiayi.

⁹Jístuka Israer-aents penker enentáimtursarat tusa wakerak, Páprun tímiayi “Wakerakmiñkia Jerusarénnunum wemí. Wisha nuí ame túramurmin nekaatjai” tímiayi.

¹⁰Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtaí Rúmanmaya uunt akupniun wisha winia túramurun ujaktiniatjai, nekartuati tusan. ¹¹Wisha jakamnia tímanu tunáa túranka, jákatniuncha ashamsatsjai. Tura antsu turutainia nu nekaschaitkiuinikia wíniaka Israer-shuarnum surunkachminiatjai tajai. Tuma asamtaí seajme, wí túramun uunt akupin Sésar nekartuati” tímiayi.

¹²Tutai, nuyá ni írutramurijjaj chichasua amik, Jistu Páprun tímiayi “Uunt akupniui wétaj tusam seame. Tuma asamtaí nuí wétatme” tímiayi.

Papru uunt akupniujaj áujmatsamiania nu

¹³Tura ishichik tsawant nankaamasmatai akupin Akripia ni nuwejaj Pirinisejaj Jístun áujsatat tusa Sesarianam wearmiayi. ¹⁴Tura untsurí tsawant pujusarmiayi. Tura nuí pujuiniáj Jístuka Papru túrunamun akupniun ujaak tímiayi “Juí áishman pujawai. Píríks nin achik enkea ikiukmiayi, tftímiayi. ¹⁵Kame wikia Jerusarénnunum pujaj Israer-patri uuntri tura Israer-aentsu úuntrisha, Papru yajauchin túraití tusar káutrukarmiayi, tímiayi. Mantamnati tusam akupkata, tu seattiararmiayi. ¹⁶Takui wi tímiyajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpuiniia nu, emka táartin áiniawai. Tura nuyá chichamprumatsajin mantamnati tusar akupeatsji iisha” tímiyajai. ¹⁷Tiniu asan, táarmatai, wikia nákatsuk kashin tsawaran akupin pujutainium pujusan, Papru itiataram tusan akupkamjai. ¹⁸Tura Páprun tsanumpurtaí tusar taar chichainiaksha, wi enentáimmiajna núnaka tícharmiayi. ¹⁹Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi. ²⁰Tura wikia nú chichaman túratniun nékachu asan, Páprun aniasmajai “¿Amesha Jerusarénnunum wétaj tusam wakeramek? Nuí nu chichaman nekartamawarti” tímiyajai. ²¹Túrusha “Atsá. Juin pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinikia tuke sepunam pujustá. Tura wi ukunam uunt akupniun akuptuktatjame” tímiyajai” tímiayi Jistu.

²²Nuyá Akripia chichaak “Wisha itiuksanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”. ²³Tura kashin tsawar Akripia Pirinisejaj taar, iwiaa-iwiarmamu ajas wayawarmiayi. Suntara úuntrijjaj tura nú péprun-maya úuntrijjaj wayawarmiayi. Tura nuí Jistu, “Papru itiataram” tímiayi. ²⁴Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman ístarum. Ti untsurí Israer-aents Jerusarénnunumsha tura juí Sesarianmasha ju áishmankan

Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. ²⁵Túrasha wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. ²⁶Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. ²⁷Warí wisha, ni yajauch túramurín áattsuk, uunt akupniunam akupkashintiaitjai” tímiayi.

26

Papru Akripiaj chichamprumakmiania nu

¹Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ^{2,3}Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairín ujakmiania nu

⁴“Wí úchichik winia nuñkarui tura Jerusarénumsha pujusan wi túramajna nuna ashí wí aents Israer ainia nu nékainiawai. ⁵Pariséu ajasan, ni akupeamurín itiurchat ajin ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrín yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkur’, tsawajsha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. ⁸Warí, atumsha “Yus jakancha iniantkimniaiti” tátsurmek’ tímiayi.

⁹“Tura wisha yáunchuka Nasarénumia Jesusnan umirkaruka kajerkatniuiti, tu enentáimniuyajai. ¹⁰Tura Jerusarénum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamajai. Tura nú shuaran máiniakuisha wikia péñkeraiti tu wémiajai. ¹¹Tura Israer-shuara iruntai jeen wayan ti asutiármiajai, Jesusnan umirkatniun iniaisarar tusan. Tura imiá kajerkaran chíkich nuñkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramurj 9,1-19; 22,6-16)

¹²“Tura Israer-patri uuntri tsankatrukmetai, papin ni surusarmia nujai, Tamasku péprunam wétaj tusan jíinkimijai. ¹³Tura, uunta, nantu tutupin ai, jintiá wéaj newaat ajaki ti tsáapin, tsawái nantujai nankaamas etsantrutramiayi. Tura wijiaj wearmia nunasha núnisaran etsantrurarmiayi. ¹⁴Tura túrunamtai ashí nuñká tepetar wáinkiarmitaji. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wí aents kajera asam túruname” turutmai.”

¹⁵“Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna núitjai. ¹⁶Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸Péñker jintintiatata tusan akupeajme. Kame aencha kiritniumia jíinkiar tsáapninium wekasarat tusan, tura iwianchin umirtsuk Yúsán umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasarú áiniana nujai apusattajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹Tuma asamtai, uunt Akripia, Uunt Jesus nayaimpinmaya wantinturak turutmia nuna umirkataj tusan pujajai. ²⁰Enentai yapajíawar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénnumian, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarun paant ajasat tusarum, péñker túratarum” tímiyai ashí shuaran. ²¹Tura wi Yusa Uunt Jegen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²²Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura pééjchach ainia nunasha ujainiajai. Tura Muisaissha, Yúsnan etserniusha tiarmia nunak étsereajai. Nú arantka tátsujai. ²³Krístuka wáitsatni-uyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen í áentsun tura Israer-shuarchancha nútiksán ujaktiniuyayi. Nuna tu tiarmiayi. Tura núnaka wisha tu ujainiajai” tímiyai Papru.

Papru Akripian Yus-shuar awajsataj tusa wakerimia nu

²⁴Tura nuna takui Jistu kakantar tímiyai “Maaj, Papru, wáurme. Imiá unuimiatu asam wáurkame” tímiyai.

²⁵Tutai Papru tímiyai “Atsá uunt Jistu, wáurtsujai. Antsu wi tájana nuka ti nekasaiti.

²⁶Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajaí” tímiyai.

²⁷Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiyai.

²⁸Takui Akripia chichaak “Maaj, ishichik awajtame Papru, Yus-shuar ajastin” tímiyai.

²⁹Tutai Papru tímiyai “Tura ishichik chichamjaísha untsurí chichamjaísha, amesha uunt Akripia, tura ashí winia anturtukurmena nu, wijíai métek ajasúk tusan wakerajai. Tura antsu wia núnisan jiníkiámua núnaka wakeratsjai” tímiyai.

³⁰Papru nuna tuasua amikmatai akupniusha, uunt kapitíancha, Pirinísesha, tura nuí ashí pujuarmia nu wajakiarmiayi. ³¹Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuít tura penkesha sepunmasha enkeachminiati” tiarmiayi.

³²Tura Akripia Jístun tímiyai “Ju áishman “uunt akupin nekarati” tíchaitkuinkia akupmai makuitji” tímiyai.

27

Páprun Rúmanam akupkarmiania nu

¹Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitíantríjiaí nenakar akupkarmiayi. Nú kapitíani naari Júriuíti. ²Tura Atramitiunmaya kanu Asia nunkanam pepru ármia nuí wétasa pujumia nu enkemprarmiayi. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³Nuí enkemprar kashin tsawarar Sitiun péprunam jeamiajai. Nuí jeawakrin kapitíán Juriu, Páprun waitnentak tímiyai “Ame amikrumiín wetá. Au firmasarti” tímiyai. ⁴Tura Sitiunnumiaí jíinkir, kanujai wesar nase tukumpramprakrin Chipri núnkaka menanmaani aa ikiukmiajai. ⁵Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiajai. Nuka Risia nunkanmaiti. ⁶Nuí jear nú kanu ikiukmiajai tura chikich kanu Arijántrianmaya taa Itiaria nunkanam wétasa pujumiayi. Nú kanunam suntara kapitíantri, enkempratarum, turammiajai. ⁷Tura untsurí tsawant yáitmataik we-wémiajai tura ti wiántkar Nítiunam jeastatuk ajasmiajai. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiajai. ⁸Tura Kritia nunkanam ayamchik wesar ititurchat akui wáitsar wea-wéakuar “Shiir Pujutai” tutainium jeamiajai. Nusha Rasea péprunam tíjiuchiiti. ⁹Yáitmataik wea asar ti táasmajai. Tura yumi yututai jeatema asa ti tsúumainiuyayi nayaantsanam wétin. ¹⁰Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak

kanunam enketainia nusha menkarattawai. Tura iisha núnisrik kajinchatjash” tímiayi. ¹¹Suntara kapitíántrínkia Páprunka anturtsuk, kanú wianniurjín kapitíántríncha tura kanú kapitíántríncha chichamen anturkarmiayi. ¹²Tura nuí Shiir Pujutai tutainium yumitín pujustin péñkerchaitkui “Nuínkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitín pujustinian wakerarmiayi, arakia nunkaani kakaram nase nú péprunam jeachú asamtai.

Tsúumainium wekasarmiania nu

¹³Tuma asamtai ukunam nase nunkaaniá tápiriri ajakui, ii wétin yamaikia péñkeraiti, tu enentáimsarmiayi. Túmakui kanu emetai jiru júusar jíinkir Kritianam ayamchik wearmiayi. ¹⁴Túrasha árusañ arakiá kakaram nase, Nuristi tuinia nu tukumpramiayi. ¹⁵Nase kanun tukumpra asamtai iisha atsantratin penké tujinkiamiayi. Túmakui, áankisha juramkitiai tusar iniaisamiayi. ¹⁶Tura Kritia nunkanam ágwinini nankaamakur nuínkia nase ishichik mijiantmatai, uchich kanu japikir wémiay nu ti takasar uunt kanunam enkermiayi. ¹⁷Tura enkerar chapikjai uunt kanun jíinkíáarmiayi wewe najanatai tusar. Tura náikim muktuniam, Serti tutainium nase juramkishtajash tusar, kanunam yakí tarach aan itiararmiayi. Nu tarach nase útsuktin tusar nenarma áarmiayi. Túrawar áyatik nase juramkitiai, tiarmiayi. ¹⁸Tura kashin tsawarmatai nasesha chíchimisha tímiatrusañ kakaram aa asamtai kanunmayan káarak irunmia nuna nayaantsanam ajapawarmiayi. ¹⁹Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsankarmiayi. ²⁰Tura untsurí tsawant tsawajsha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi. ²¹Tura iisha ti untsurí tsawant yurumsuk matsatu asakrin, Papru ajapén wajaki tímiayi “Amikru winia nuik Kritianmayanka jíintsuk anturtukuitk-iurmínkia yamá ju itichatnum pujutsuk tura emenkatmatsuk pujuajai” tímiayi.

²²⁻²⁴ ‘Yamá kashi winia Yusru suntarí nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámiijiai kanunam enketainia ásmartai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. ²⁵Wisha winia Yúsrún nekas enentáimtajai. Yusa suntarí turutainia nuna nekas tu túrunattawai, tajai. Tuma asamtai kakartarum. ²⁶Tura chíchimisha nunka uchich pújakmanum nuí patatmittijai” tímiayi.

²⁷Ayu, katurse (14) tsawant nankaamasmatai nú kashi Atria nayaantsanam jeamiayi. Nuí nase nánkamas juram wémiayi. Nuyanka kashi ajapén wiantin armia nu nunka ámunam jeateman nekaawarmiayi. ²⁸Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemsañ ataksha nekapmamiayi. Nuínkia painti siati (27) mítru nekapmamiayi. Tuma asa nunká anumsatuk ajasun nekaawarmiayi. ²⁹Tura kayanam ijiukají tusar ashamainiak kuaru jirun kijinian chapikjai kanú senkarin jíinkíáwar entsá ajunkarmiayi. Kijin asamtai, inít tepeámtai nase juramkíchmi tusar túrawarmiayi. Tura wake mesekar, tsawarti tusar matsamarmiayi.

³⁰Tura matsatainiay wiantin armia nu, iikia uchich kanunam enkemprar pisarchatjash tu enentáimsarmiayi. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiayi. ³¹Tura tuma wáiniak Papru suntara kapitíántrín tura ni suntaríncha ujakmiayi. “Ausha uunt kanunman enketainiachkuínkia atumsha uwemprashatrumé” tímiayi. ³²Tutai suntarsha uchich kanú chapikrjín tsupirkar entsá ajunkarmiayi.

³³Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumsuk pujarme. ³⁴Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yumı̄nsamiayi ashí ímmianumañ. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmaka jimiara síañ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsaṅkarmiayi, uunt kanu wampú ajasat tsar.

Kanu peṅké mesermania nu

³⁹ Tura tsawarṁatai wiantin armia nu, nuṅkan nekaacharmiayi. Túrasha éṅken-tamunam káanmataṅ aan wáinkiar “Ái kanu anuṅtai” tiarmiayi. ⁴⁰ Nuyá jiru entsá ajuṅman chapikrın̄ tsupirkar entsá ikiukiarmiayi. Tura kanait jı̄nkiárma ármia nuna chapikrın̄ tsupirkarmiayi. Tura tarach kanú nujiin amia nuna nenakarmiayi. Túram kanu káanmatkanam anumsatuk ajasmiayi. ⁴¹ Tura wainchi jímiar ámunam jeá kanu entsá wayá tepeamiayi. Tura kanú seṅkarı̄n̄kia chíchimi yakı̄ takuir ajáamu asa kupintramiayi. ⁴² Sutarsha, achik júamu armia nú shuaran máataj tusa wakeriarmiayi, yukuak pisararain̄ tsar. ⁴³ Tura kapitı̄an̄cha Páprun uwentikrataj tau asa nuna túratniun tsan̄katkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíkichkia kanunmayá numi, kame náṅkamas numi achikrum awamkarum péemkatarum” tímiayi. Tu túrawar ashí iwiaakuk jíin̄trarmiayi.

28

Marta nuṅkanam túrunamia nu

¹ Tura ashí iwiaakuk jíin̄tr, nu nuṅka Marta naartin nekaamiayi. ² Tura nuı̄ matsamin armia nu, shiir awajtamsarmiayi. Tuma asamtai iisha tsetsema asakrin, tura yumisha yútakuı̄, uunt jinia ikiapáramiayi. Tura “anamaitiarum” turammaji. ³ Pápruka jinia kukarun ikiaan̄ak jinium pataamiayi. Túmawaj napi tsuérán ashamak jíinki, Papru uwejeñ nemaramiayi. ⁴ Tura nú nuṅkanmayá aents, Papru uwejeñ napi nemaran wáinkiar “Jı̄ áishmaṅsha shuáran majchuashit, tiarmiayi. Nayaantsanmayá uwempraitiatan̄ ni yusrı̄ iwiaaku átinian suritiawai” tiarmiayi. ⁵ Páprusha ni uwejeñ pear napin jinium awanmiayi. Tura peṅkesha yajauch ajaschamiayi. ⁶ Tura niisha eárchatpiash tsar ii pujuarmiayi. “Túmatkesha jaka inianchatpiash” tiarmiayi. Túrasha ti núkap pujussha peṅké najawęachmiayi. Túrunamtai, nuı̄n̄kia nusháa enentáimprar “Pápruka yúschashit” tiarmiayi.

⁷ Nú nuṅkanam aentsu peṅkerı̄ ámiayi ni naarı̄ Pupriu. Nú Pupriu ni jeen in itiaarmamiayi. Tura menaintiú tsawant yurumkan̄cha suramsarmiayi. ⁸ Tura nuı̄ pujarin Pupriu aparı̄ tsuér, numpajajı̄ ijiarki jáamiayi. Túmakui Papru werı̄ iyumiayi. Tura Yúsan áujtus amik uwejeñ nin awantkamiayi. Túram peṅker ajasmiayi. ⁹ Nu túramun nekaawar, nú nuṅkanmayá aents jaa armia nu tariar, niisha peṅker ajasarmiayi. ¹⁰ Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wétsuk nú nuṅkanam menaintiú nantu pujusmiayi. Tura nuyá chíkich kanunam eṅkempramiayi. Nu kanusha Arijián̄trianmayá yaunchu tau menaintiú nantu yumi yútakuı̄ nuı̄ pujumiayi. Nú kanu nujiin̄ numi-yus najankamu jímiar ekemiarmiayi, ni náarı̄n̄kia Kástur tura Púruks. ¹² Iisha nuı̄ eṅkemprar weri Serakúsa péprunam jeamiayi. Nuı̄ menaintiú tsawant pujusarmiayi. ¹³ Tura jíinkir nuyan̄ka nayaantsa ayamach weri Rijiu péprunam jeamiayi. Nuı̄ kanarmiayi. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiayi. ¹⁴ Nuı̄ jeawakrin Yus-shuar pujuarmia nu, ni jeen jurankimiayi. Tuma asamtai nuı̄n̄ chíkichkı̄ tumı̄n̄ pujusmiayi. Tura nuyan̄ka nuṅkan̄ Rúmanmaani wémiayi. ¹⁵ Tura Rúmanmayá Yus-shuar, ii jeatniurın̄ neka ásar jintiá in̄kiunmaktai tsar winiarmiayi. Chíkichkia Apiu pepru támanum táarmiayi, tura chíkichkia, Menaintiú Jeá tutainium táarmiayi. Nuna káunkan wáiniak Papru shiir enentáimias Yúsan yumı̄nsamiayi.

¹⁶ Tura ii Rúmanam jeawakrin kapitíán Juriu achikia yarumman Rúmanmaya uunt kapitíánin ejetimiayi. Túrasha, Pápruka jea ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nankaasmatai Pápruka Rúmanmaya Israer-aentsu penkérin untsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntrj akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarín kapitíánin ujaktinian táchaitjai. ²⁰ Tuma asamtai, yatsurtirmin, atumin untsukjarme chichastaj tusan. Yusa anaikiamurj, Israer-shuarti nákJania nu táwiti wi tu étserkui, juí achikiar jinjíamu pujajai” tímiaiji Papru.

²¹ Tutai niisha tiarmiayi “Iisha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji. ²² Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untsurj aents Papru pujamunam iruntrarmiayi. Papru jintintiainiak Muisais yaunchu aar akupkamia nujai tura chíkích Yúsnan etserniu aarmaríjiaisha, Jesus nekas Yusa Anaikiamurínti tusa paant jintintiawarmiayi. Nuna tura káshik nankaama Yus akupeamunam pachiinkiatniun étsé-étserkua kjaraj iniaisamiayi. ²⁴ Tura Papru táman antukarmia nu, chíkíchkia, nekasaiti tusar umikiarmiayi. Tura antsu chíkíchkia, nekaschaiti tusar umikcharmiai. ²⁵ Chikichkí enentaikⁱ enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen Yusa Wakaní yaunchu Yúsnan etserniu, Isayas naartin áarmaríjiaí ii úuntrin chicharuk juna tímiaiji:

²⁶ “Ame weme au aents ju titia:

“Ántutka ántakrumsha nekaashtatrome,
ítkia iyakrumsha wáinkiashtatrome.

²⁷ Warí, au shuara enentái katsuarai;
Kuishíjiaí ántaksha ántichua núnin áiniawai,
Jíisha epetkamua áanin áiniawai,
Iyaksha wáinkiaín tusa, ántaksha antukain tusa
Enentáimkiusha nekaawain tusa,
Winí uwemprain tusa, tura Winí tsuamarain tusa túrunayi”.

Nuní áarmaiti. ²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura niníka nekas umikiartatui” tímiaiji. ²⁹ Tura Papru nuna ti iniaisamtai Israer-shuar nuamtak núkap chicharnaiyasua wearmiayi.

³⁰ Tura Pápruka nuín jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itaamiayi. ³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiai. Nútíksan etserkatniuncha Páprun penké suritkiacharmiayi.

Papru
RÚMANMAYA SHUARAN
papi akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi. ³ Nu Chichamnum Yus ni Uchirín áujmatui. Ayashijiañkia Tawit weeanum akiiniamiayi. ⁴ Tura ni tishiir wakanjiañkia Yusa Uchirínti. Tura ti kakarmaiti. Jakamunmaya nantakmiajají nekas Yusa Uchiría nu, paant nekanamiayi. Niisha ii Uuntri Jesukristuiti. ⁵ Ni túramujají Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuaraitrume. Tura Jesukristunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukristusha waitmentramania ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukristun pachisan Yúsán ti shiir yuminsajai. ⁹ Tuke enentáirjají Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuñkia íttjarum tusan Yúsán seajai. ¹¹ Nekas íttniun wakerajrume. Nui jean wakanmin yainkian Yusjají kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íttjarum tusan wakerimjiarme. Túrashá iyatsjarne. Kame Yus-Chichaman ujaakun chíkich shuarnuma áintsañ atumjíncha Yus kakaram takasman wáinkiatniun wakerajai. ¹⁴ Wikia Yus akuptuku asantai ashí shuaran ujákártiniaitjai. Unuimiaruncha tura unuimiarancha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujointjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarjijají ti kakaram asa ashí shuaran uwentikramni-aiti. Tuma asantai natsantatsjai. Nekas Israer-shuarnasha tura chíkich shuarnasha núnisañ uwentikramniaiti. ¹⁷ Nu chichamnum Yus enentáimsamia nu páantaiti. Júiti: Áyatik Yúsán nekas enentáimtuiniakui Yuska “péñkeraitme” tímíniaiti. Yus-Papiniumsha núnisañ tawai: “Yúsán nekas enentáimta nuna Yus “péñkeraitme” tutai tuke Yusjají shiir wekasattawai.” Tu áarmaiti.

Aentsu tunaarí

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin ániawai. Nu shuaran Yus ti kajerkar ti asutiátniun nayaimpinmaya paant awajsaiti. ¹⁹ Tura nu shuarka ashí Yusna nekaamnia nuna Yus paant awajsa asantai péñker nékainiawai. ²⁰ Kame yámankamtaikniumia Yus wáinchataitiat ni najanamurijijají juka paant nekaamniaiti: Nekas Yus asa tuke kakarmaiti. Nusha ti paant asantai nu shuar tsañkurnarchartatui. ²¹ Yúsán nékainiyat shiir awajsacharmiayi tura yuminsacharmiayi. Tuma ásar aya ánta nunak enentáimtuiniak ni enentáí tunaajají piakai. ²² Tura ti nekajai túniyat enentáimcha núnin ajasarai. ²³ Túmaniak jákachmin Yus imiá shiira nuna

iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmancha nakumkar nuna shiir awajenawai.

²⁴ Nu asantai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. ²⁵ Yusna imiá nekasa nuna nakitrar antsu wait-chichaman anturkar nuna túrin ániawai. Tuke Yúsak shiir awajatsniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasti” tajai.

²⁶ Nuna túrin ásar matai Yus natsanmainia nuna wakeruktinian tsan̄katkarmiayi. Túramtai nuwasha áishman̄jai tsaniñtinian nakitrar nuamtak yajauch awajainiawai. ²⁷ Núnisan̄ áishmansha nuwajai tsaniñtinian iniaisar nuamtak áishman̄kak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayash̄j wáitsatniunak sumamawarmiayi.

²⁸ Tura tuke Yúsán nakitiainia asantai ti yajauch enentáimiainiak pen̄ké túrachminia nuna túrawarti tusa Yus tsan̄katkarmiayi. ²⁹ Nu shuar ti tunaajai piaku ániawai. Tsanir-mausha aya kuñniak wakerincha tura yajauch awajin ániawai. Nu arantcha awakmakun kajerniusha man̄kartincha tuke máanaincha anan̄kartincha pen̄kercha awajkartincha, tsanumniusha ániawai. ³⁰ Nu arantcha chikichnasha yajauch áujmatin ániawai. Yús-nasha nakitiainiawai. Áimniusha ániawai. Tura “pen̄keraitjai” tiar nan̄kaamantu enentáimtumainiawai. Tunáa túratniun eainiawai. Aparin̄cha nukurin̄cha umirainiatsui. ³¹ Enentáincha ániawai. Tana nuna umichu ániawai. Anen̄kartichu ásar waitnen̄kartichu ániawai. Tsan̄kurcha ániawai. ³² Yuska “Shuar nuna túrinkia jakatniuiti” taman nekainiayat tuke túrukin wénawai. Tura nu arantcha chikich yajauch túramtai ti shiir wararenawai.

2

Shuar tunáa túramun Yus paant nekawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. ² Yuska nu tunaan túrin ainia nuna súmamtkiashtinkiait. ³ Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá çitiurak uwemprattam? ⁴ Yus ti waitnentrana asa nu tunáa ikiikum Nin enentáimtustinian katsuntramuk nákarmawai. Tura pen̄ker asa wárik asutiámchakui sumamashtiniaitjai çtu enentáimtumamek? Tu enentáimkium ni waitnentramar̄j ántar awajsaitme. ⁵ Tura tunaarum enentáimtutsuk tuke túrakmeka súmamtkiatiñ tsawantaj̄ ti tunáa irutmampramujaj̄ ti asutniáttame. ⁶ Nu tsawantaj̄ ni túramujaj̄ métek Yus ashí shuaran akirartatui. ⁷ Shuar tuke pen̄ker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niijjaj̄ shiir pujustinian sústartatui. ⁸ Antsu pen̄kera nuna wakerutsuk antsu aya yajauchin wakeruiniak Yúsán nakitiainia nuna Yus ti kajerak asutiáwartatui. ⁹ Nekas Israer-shuarsha tura núnisan̄ Israer-shuarshasha tunaan túrin ániakka ti wáitsartatui. ¹⁰ Antsu nekas Israer-shuarshasha tura núnisan̄ Israer-shuarshancha pen̄ker túrin ánia núnaka Yus ti shiir imiatkinchanum apujstartatui. ¹¹ Yus ashí shuaran akantsuk mai metek iyawai. ¹² Shuar Muisais akupkamun nékatsuk tunaan túraka aya júnisan̄ sumamawartatui. Tura shuar Muisais akupkamun nékayat tunaan túran̄ka nu akupkamujaj̄ sumamawartatui. ¹³ Akupkamun aya antukarua nuka Yusaj̄ pen̄ker ániatsui antsu antukar umirainia nuna Yuska “pen̄keraiti” tawai. ¹⁴ Israer-shuarshaka Muisais akupkamun takakainiachkusha aya ni enentáijjaj̄ ni akupkamun umirainiak ¹⁵ nu umireamujaj̄ Yus nu akupkamun ni enentáin̄ ikiursarua nuka paant nekaamniaiti. Nujaj̄ métek túruiniak shiir enentáimiainiawai. Tura métek túruiniachkun̄ka pen̄kercha enentáimiainiawai. ¹⁶ Wi Uwempratin Chichaman étsereaj̄ nu ashí shuar uukrish̄a túramun ashí paant awajstartatui. Tura nuna etserkatniun Jesukristun anaitiukmiayi. Nu tsawantaj̄ tunaan túrin sumamawartatui.

Israer-shuarsha Muisais akupkamun umircha ániawai

¹⁷ Ámeka “Tura Israer-shuaraitjai. Muisais akupkamun takakui winia Yúsruka ti shiir enentáimturui, tátsumeash. ¹⁸ Yus wakeramuncha nékajai. Tura akupkamun nekaan pen̄kera nuna wakerajai, tátsumeash. ¹⁹ Wakannium kusuraru ánia nunasha

jintintiamniatjaj. Tura tsáapninin nekamtikiawarminiatjaj, tátsumeash. ²⁰ Akupkamu ti penker neka asan nekasa nuna unuimiaruitjaj. Tuma asan nékachuncha ántuiniachuncha jintintiamniatjaj” tátsumeash. ²¹ Pai, chíkichka unuiniatmesha zurukamtaí imia ámeka unuimiatsum? “Kasamkashtiniati” tu étsereatsmek. Táyatmesha zurukamtaí ámeka kasamam? ²² “Tsanirmashtiniati” tátsumek. Enta, zurukamtaí ámeka tsanir-mam? “Ántar-yusan nakitijaj” tátsumek. ¿Urukamtaí ámeka nu yusa jeeniá kasamam? ²³ Akupkamun takakjai tusam shiir enentámtumayatam nu akupkamu umireachkum Yus yajauch awajeatsmek. ²⁴ Yus-Papiniumsha núnis áarmaiti: “Átum penker umirchamujaj Israer-shuarcha Yúsán yajauch chicharainiawai.”

²⁵ Muisais akupkamia nu ashí umireakmeke nii timia núnismek tsupirnaktin penkeraiti. Tura takamtsuk umireachkumka tsupirnakcha núnisketme. ²⁶ Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsanquete. ²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. ²⁸⁻²⁹ Kame nekas Israer-shuarka aya pátatkechu antsu tuke enentájjaj Yúsán wakera núiti. Núnisan nekas tsupirnaktinkia aya ayashjjainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentájjaj umirkamua núiti. Nekas tú tura núnaka aents shiir enentámtuiniachkuisha Yus shiir enentámtawai.

3

¹ Núnis ajsa Israer-shuar ainia nu ¿warí penkernak takakainia? Tura tsupirnaktincha ¿wariniak yayá? ² Ti penkeraiti. Warí, émkaka, Yus ni chichamen Israer-shuaran súsacharmakia. ³ Kame chíkich chíkich umichu ániakui Yus tsanatkamia nuna nú shuaran súsachmatainkia nuikia “Yus umichuiti” ¿títinkiait? ⁴ Penkea. Antsu Yuska nekas túratniua nujjaj métek ashí túriniaiti. Shuar umichu ániakuisha ni támarin mash umiktatui. Ni tamajaj shuáran wáitrin awajeakka nusha penkeraiti. Núnisan atí. Yus-Papisha métek tawai: “Támena nuna “imíá nekasaiti” tiartatui, tura súmamtikramataj tuíniakuisha nupetmak-tatme” tawai.

⁵ Nu arantcha, “Wi tunaan túramujaj Yus imíá penkera nuna paant awajeakka ¿urukam-tai winia asutiua? ¿Nuka penkerkait?” tíchatapash. (Kame aents chichainia núnisnak tajai.) ⁶ Warí, Yus penkerchaitkiunka ¿itiurak ashí shuara tunaarin súmamtikiawarat? Kame imíá penkeraiti.

⁷ Núnisan, “Wi umirkachmajaj Yus tuke umiiniana nuna paant awajeaknaka nuikia nujjaj in shiir awajamtaí zurukamtaí “tunaitme” túruta?” tíchatapash. ⁸ Warí, “tunáa túramujaj Yúsán penker awajeajaj,” tú nekas enentáimpramniatkiuinkia shuar nuikia “Wats, ashí penker áti tusar tunáa túratai” tómin ainti. Kame chíkich shuar in kajertamainiak “nuna jintintiniawai” túramji. Nu shuar sumamawartin ániawai.

Ashí shuar tunáa túraitji

⁹ Nuikia Israer-shuartikia chikichjaj nankaamas ¿penkerkaitiaj? Penkesha. Warí, Israer-shuartisha Israer-shuarchajajisha ashí métekrak tunaan túrin ániawai. Núnaka jú áarmajaj paant awajaitjaj. ¹⁰ Yus-Papisha núnisan tawai:

“Penkeran túrin chikichkisha atsawai.

¹¹ Yúsán nekaatniun nakitiniawai. Yusnasha eainiatsui.

¹² Yusnumiá kanakiar menkakatniunam wénawai. Chikichkisha penkeran túrin penke atsawai.

¹³ Ashí yajauch chichainiak iwiersamu yama urainia núnisan ániawai. Ni chichamejjaj tuke anankartin ániawai. Chichame napía áintsan najamin ániawai.

¹⁴ Aya yajauchin kakaram áujmatin ániawai.

¹⁵ Máataj tusa wárik yujarin ániawai.

¹⁶ Aya ti itiurchat ti yajauch awajin ániawai.

¹⁷ Shiir pujustinian nékainiatsui.

¹⁸ Ishichkisha Yúsán ashamenatsui.”

¹⁹Yaunchu akupkamun umirkatin ainia nú shuar aya tákamtak umirkatin áiniawai. Tuma asantai ashí shuar umirkachu ásarmatai Yus nujají súmamtikiawartatui. Túrakui niisha pachischamin áiniawai. ²⁰Akupkamuka aya ii tunaarín paant awajturmají. Tuma asantai akupkamu péñker umirkatnuijají Yus “péñkeraitme” turamchamniaitji.

Aya Yus shiir enentáimtusar uwempramniaitji

²¹Yus-Chicham yaunchu áarmanum itiura Yus in “péñkeraitme” túramminiaitjaj nuna paant tawai. Kame akupkamujajinchuiti. ²²Antsu iisha ashí shuarsha núnisan aya Jesukrístu shiir enentáimtakrin Yus “péñkeraitme” túramminiaitji. ²³Kame ashí shuarti tunáa túraitji. Tuma asar Yusjají métek péñker ajastin péñké jeatsji. ²⁴Tura Yus in waitnen-trama asa kuítchajají “péñkeraitme” túramji. Jesukrístujají uwentikrampra asa túramji. ²⁵Tura Krístun akupkamiayi ni jakamujají ashí tunaan asakátratniun. Túramtai shuar Nin nekas enentáimtuiniakui Yus tsañkuramniai. Yaunchu tunáa túramun katsunteak enentáimtuschemiayi. Yamái tsañkuramnia nuna yaunchu nekáa, nuna túramniuyayi. ²⁶Tura yamayi tunaancha tsañkureak ashí shuar Jesusan nekas enentáimtuinia nuna “péñkeraitme” tuke tímíniai. Kristu jakamujají nuka paant ajasají.

²⁷Nújajínkia ii péñker ajasjinia nu “winia kakarmarjají túrunajají” tíchamnia asar ñanñkaamantu enentáimtumarminkaitjají? Péñkesha. Warí, akupkamu umitsuk aya Kristu nekas enentáimtakrin Yus “péñkeraitme” túramji. ²⁸Nujají páantaiti. Akupkamu umirtsuk aya Jesukrístu shiir enentáimtakrin Yus “péñkeraitme” túramminiaitji.

²⁹Warí, Yuska Israer-shuarnasha tura núnisan Israer-shuarchancha mai ni Yús-rinchukait. ³⁰Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “péñkeraitme” tímíniai. ³¹Shuar Yúsán shiir enentáimtamujají péñker ajastin áiniakui nujají ñakupkamu ántar awajsamukait? Átsá. Antsu nuna nanñkaamas umirkatin awajsamuiti.

4

Apraámsha Yúsán shiir enentáimtamujají péñker ajasmania nu

¹Ashí Israer-shuara uuntrí Apraám enentáimtusai. Niisha ñitiurak Yusjají péñker ajasma? ^{2,3}Ni péñker takasmajají Yusjají péñker ajasuitkiunñka nanñkaamantu enentáimtumarantai. Antsu Yus-Papí tawai: “Apraám Yúsán shiir enentáimtakui Yus “péñkeraitme” tímíyai” tawai. Nu túramu asa Apraámsha Yus ímmianum nanñkaamantu enentáimprachminiaitji. ⁴Shuar íniamna nu takasmatai ñaya tsañka asam akiktatmek? Warí, ni takasmanum páchitsuk akikchatniukait. ⁵Antsu shuar ni péñker turamurí enentáimtusuk áyatik “Yus tunáa shuaran péñker awajniuiti” tu enentáimtakui Yuska tsañka asa “péñkeraitme” tawai. ⁶Tura péñker túrachunak Yus “péñkeraitme” takui nu shuar shiir warasminiaitji. Núnisan tawai uunt akupin Tawit: ⁷“Shuar ashí ni tunaarín Yus asakátar tsañkuramu ana nuka shiir enentáimpramniaitji. ⁸Uunt Yus ni tunaarín enentáimtachma asa ti warasminiaitji.” Tu tímíyai Tawit.

⁹¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsán shiir enentáimtakui Yus “péñkeraitme” tímíyai. ¹⁰Tura Apraám tuke tsupirnatñají Yus nuna tímíyai. Emka Yus “péñkeraitme” timia nú ukunam Apraám tsupirnakmiayi. ¹¹Apraám tsupirnatñak Yúsán shiir enentáimtusmatai Yus “péñkeraitme” tusa “tsupirnaktniaitme” tímíyai. Nújajínkia ashí Yúsán shiir enentáimtuinia nú shuar tsupirnatñakesha Apraám weeá áiniawai. Tura nu shuaran Yus “péñkeraitme” tawai. ¹²Tsupirnakusha aya tsupirnakusa asa Apraám weeá áiniatsui antsu nu arant Apraámjají métek Yúsán shiir enentáimtuinia nuka Apraám weeá áiniawai. Kame Apraám tuke tsupirnatñak Yúsán shiir enentáimtusmiayi.

Yus shiir enentáimtamujají Nii timia nu uminkiattawai

¹³Yaunchu Apraáman Yus chicharuk “Amincha amée weeá shuarnasha jú nunñkan susat-tajají” tímíyai. Nunasha Apraám Yus akupkamun umireakui tíchamiayi. Antsu Apraám Yúsán nekas enentáimtakui Yus “péñkeraitme” taku nuna tsañkatkamiai. ¹⁴Kame aya

akupkamun umirniun súsatniuitkiuñkia nuikia Yus enentáimtustin ántrai. Tura Yus Apraáman timia nusha ántrai. ¹⁵ Akupkamu akui shuar umirkachka ti asutniáshtatuak. Tura atsakuñkia ¿asutniátniukait? ¿Itiurak umirtsuk ikiuktiñ?

¹⁶ Tuma asamtai Yus ti anenkartin asa Nin nekas enentáimtuinian ashí tsankatkaiti. Nújajñkia Apraám weeasha Yus Apraáman timia nuna páchitsuk wáinkiártatui. Iisha Apraámjaj métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsankatramkattaji. ¹⁷ Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjaj métek Yus shiir enentáimtakrinkia Yus incha Apraám weeá áintsan írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksaj nájaniu.

¹⁸ Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsan. ¹⁹⁻²⁰ Apraámsha sian (100) uwí takakuiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiayi. Nujajsha nuna nankaamas kakaram ajasmiai. ²¹ Tuma asa “nekas Yus tana nuna páchitsuk umiktatui” tu enentáimpramiayi. ²² Nu asamtai Yus “pénkeraitme” tímiayi.

²³ Tura Yus nekas enentáimtamunam Yus “pénkeraitme” tana nu aya Apraámnak áatrahchamaiti. ²⁴⁻²⁵ Antsu incha túramji. Iisha núnisrik ii Uuntri Jesús nekas enentáimtakrinkia Yus incha “pénkeraitme” turamtatji. Jesuska ii tunaarín jarutramkatniun surunkamiayi. Tura nujaj Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shúiraiti

¹ Tuma asamtai Yus nekas enentáimtakrin Yus “pénkeraitme” túramji. Nujaj iisha Yus-jaj shiir nawamnaikar pujaji. Núnaka ii Uuntri Jesukrístu ni jakamujaj sumartamkamiaji. ² Tura Nii shiir enentáimtakur Yusaj weankaitji. Tura Kristu jarutramkakin Yus ti anenmaji. Tura tuke anenma asakrin Nijijaj métek shiir ajastin nákakur waraaji. ³ Nu arantcha yamá ititurchat pujayatrik nu ititurchatjaj unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijaj nákastatji. ⁵ Nu ti shiir enentáimsar nákamujaj ananmamsuji. Yuska ni Shiir Wakanin ii enentáin pujurtamuk ni anenkartutairin ti paant awajturmaji. Tuma asamtai Yus túratin nákaajnia nu imiá nekas wainkiattaji.

⁶ Iikka penké uwemprachmin asakrin tsawant jeamtai Kristu ashí shuara tunaarín jarukmiayi. ⁷ Shuar chikich shuaran uwemtikratniun ¿jaruktatuak? Pénker shuar aijn jarukchattawai. Kame ti penkeraitkiuñkia jarukchaintiash. ⁸ Antsu ii tuke tunáa árinin Kristu jarutramkamiaji. Nujaj in ti anenmajnia nuna ti paant iniakturmaji. ⁹ Tura ni numpejaj tunaaríncha awajsamu asar imiá nekas Yus asutiámatniua nuyá uwempraitji. ¹⁰ Yusa nemasrj áyatar Yusa Uchirí jakamujaj yamaikia Yusjaj shiir nawamnaikar pujaji. Nu arant nuikia Kristu tuke iwiaaku asa iijaj tsaninriu asa ashí yajauchinmayá uwemtikram tuke shiir awajtamsattaji. ¹¹ Ii Uuntri Jesukrístu jakamujaj Yusaj shiir nawamnaikia asar ti waraaji.

Atajsha tura Krístusha túrawarma

¹² Ayu. Yámankamtaik emka áishman Atan niñki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin ániawai. ¹³ Akupkamu atsakuñkia umirkachma nekaachminiaiti. Tuma aijn Muisais akupkamu atsaisha tuke tunaan túrin ármiai. ¹⁴ Atan pujumia nuyá Muisais tuke akupeatsain shuara tunaari paantcha aijn ashí shuar tunaan túrawar jákarmiayi. Kame ni tunaari Atanna áintsachauyayi. Atanika Yus akupkamu paant ujakman umirkachmiayi. Antsu nu shuar Yus akupkamu paant nekainiachiatan tunaan túrin ániak jákarmiayi. Tura Atanika Krístujaj apatkar enentáimpratai.

¹⁵ Atan tunáa túramia nujai apatka iisam, Yus in tsankatramaj nuka nankaamas péñkeraiti. Kame Atan ninki tunaan túramujai ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjai nuna nankaamas tí shiiran tsankatramaji. Jesukristujainkia untsurí shuaran uwemtikrar ti shiiran tsankateawai. ¹⁶ Atanka tunaari imiá yajauch aijn nuna nankaamas péñkeran Yus tsankatramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsankatramaj nujainkia ti untsurí tunaan asakáruiti, tura “péñkeraitme” túramji. ¹⁷ Chikichik áishman tunaan túramujai aents jákatin ániawai. Tura nuna nankaamas chikichik áishman Jesukristu túramujai ti shiir pujostatji. Kame Yus ti anenma asa ii péñker túratsrinin “péñkeraitrume” túramji. Nu asamtai yamaram iwiakmanum kakaram ajaji.

¹⁸ Atan tunaan túramujai ashí tunaarintin asar jákarmiayi. Núnisan Jesukristu péñker túramujai ashí shuar Yus “péñkeraitme” timia nuka yamaram iwiakmajai tuke pujusaratui. ¹⁹ Núnisan chikichik áishman umirkachmajai untsurí tunaarintin ajasarmiayi. Tura chikichik áishman umirkamujai untsurí shuar péñker awajnasarmiayi.

²⁰ Wats, tunáa ti paant atí tusa Yus ni akupkamurin susamiayi. Túrasha ti tunáa pampaakui Yus nuna nankaamas waitnentramak nu tunaan asakátramji. ²¹ Shuar tunaan túrin ásar jákatin ármiai. Tura núnisan ii Uuntri Jesukristu túramujai Yus in “péñkeraitrume” túramkurin iisha tuke iwiaku pujustiniatji.

6

Kristujai jaka asar tunáa túrachminiatji tura Kristujai tsaninkiu asar iwiakuitji

¹ Núnisaitkiunkia Yus nankaamas waitnentrampratai tusar ¿tunáa túrattajik? ² Péñkea. Warí, iikia tunáa túrashitin jákaitji. Jáka ¿itiurak tunaan túramnait? ³ Imianniutikia Kristujai tsaninkiu asar imianir Niiijai métek jaka áintsar aji. ⁴ Tura imianir Kristujai jaka áintsar métek iwiarnasuitji. Tura Yus ti kakaram asa Kristun jakan iniantkimia núnisan incha nu kakarmajai yamaram enentáijiai péñker wekasatniun iniantkimiaiji.

⁵ Kristujai tsaninkiu asar Niiijai métek jaka áintsanjetji. Tura núnisan Niiijai métek nantaktiniatji. ⁶ Yaunchu enentáimtainkia Kristujai métek jaka asamtai ii yajauch wakerutain emekátrutmakuitji. Tuma asamtai yamaikia penké umirkashtiniatji. ⁷ Kame ¿jáka itiuurak tunaan túrat? Yamaikia ankant ajasuitji. ⁸ Iisha nekas Kristujai jákaitkiurkia Niiijai métek tuke iwiaku pujustin enentáimji. ⁹ Kame Kristuka chikichí jaka nantakin asa atakka jákashatui. Túmaitkiui atakka ajakrachminiati. ¹⁰ Kristu chikichí jaka asa ashí tunaajai itit awajsachmin ajasuíti. Tura yamaikia iwiaku pujá asa Yúsán shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukristujai tsaninkiu asarum iwiaku pujakrum Yus shiir awajsatarum.

¹² Nu asamtai tunaaka ayashmijn akuptamkashtiniatrum. Ayashí wakeramuri umirkashtiniatrum. Ankantaitrum. ¹³ Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum. ¹⁴ Akupkamu umirkatniujai iwiaku pujatsrum. Antsu atumin Yus ti anenma asa yamaram iwiakman suramsaitrum. Tuma asamtai yamaikia tunaaka nupettamkachminiati.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaku pujakur ¿“Páchitsuk tunaan túramnaitjai” títiatjik? Péñkea. ¹⁶ Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji. ¹⁷ Atumsha yaunchuka tunáa umirniutiatrum ikiukrum yamaikia nekas chicham antukurmena nu nekas atumí enentáijiai umirkaitrum. Tuma asamtai Yus ti yumisatniuiti. ¹⁸ Yamaikia tunaanumiá ankant ajasu asarum ti péñker wekasatniunam pachinikaitrum. ¹⁹ Paant nekaak tusan takarniun pachisan tájarne. Wats, yaunchu atumí ayashí mujmiainian

tura ashí yajauchin túrat tusarum tsan̄kamakmarme. Núnisrumek yamaikia atumí ayashí péñkeran túrat tusarum tura tuke Yusjái shiir wekasat tusarum tsan̄kamaktarum.
²⁰ Atumsha tunáa umirniuyarme nuikia péñker wekaichauyarme. ²¹ Tura nújajisha ¿warí péñkerna yáinmakmarum? lista, yamá natsanmainchakait. Nusha jákatniunam júawai.
²² Antsu yamaikia, tunaanumiá uwempra asarum Yus umirniuitrume. Antsu júka Yusjái shiir wekasatniunam júawai tura nuyá tuke iwiaaku pujustatrume. ²³ Tunáa takarkumka tuke jákatniun akirmaktatui. Antsu Yuska iikia takaatsrinin péñké ántar tuke iwiaaku pujustinian suramsattaji. Ii Uuntri Jesukrístujái tsaniñkia pujá asakrin nuna túrutmattaji.

7

Akupkamujái an̄kantaitji

¹ Enentáimpratarum yatsuru. Jáka akupkachminiati. Aya iwiaakna nu akupkamni-aiti. Nu paant nékatsrumek. ² Wats, nuwá nuátkamu ni aishri iwiaakkuu nijjái tsanin̄ pujustiniati. Tura aishri jakamtaí an̄kant ajawai. ³ Tuma asamtaí aishri iwiaakain̄ chíkich áishmanjái tsaniñkia tsanirmawai. Tura ni aishri jakamtaí chíkich áishmanjái páchitsuk nuatnakminiati tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin̄ jaka áintsarum ajasuitrume. Túrakrum Krístujái nuatnaikiatin̄ áintsarum an̄kantaitrume. Niisha jakamunmaya nantakniuiti. Yamaikia Krístunu ajasu asar Nijjái tsaniñkiar Yus wakeramu péñker túratniuitji. ⁵ Yaunchu wakerutai umirniuyaj nuí akupkamu enentáimtusar nuna nan̄kaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin̄ jaka asar an̄kant ajasuitji. Túrunar akupkamu yaunchu áarma nu iniaisar yamaikia Yusa Wakanjái tsaniñkiar yamaram iwiaakmajái péñker wekasamniati.

Winia enentáiruí tunáa ana nu

⁷ Núnisaitkiuñkia “Akupkamu yajauchiiti” ¿titiyajash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchajjai. ⁸ Tura nu akupkamun enentáimtakui winia enentáiruí tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. ⁹ Yaunchu akupkamun nékachkun̄ nan̄kamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. ¹⁰ Tuma asamtaí akupkamujái péñker wekasatniuitiatan̄ umirkatniun̄ tujintiakuí aya jákatniunam jurukni. ¹¹ Kame tunáa wakerutain̄kia nu akupkamujái anañkrau péñker iwiaaku pujustinian surutsuk nu akupkamujái jákatniunam jurukmiayi.

¹² Tuma asamtaí akupkamuka Yusna asa ti pen̄keraiti. Yajauchichuiti. ¹³ Nuikia ¿pénkera nu jákatniunam júrawak? Atsá. Antsu tunáa wakeruktin̄ jákatniunam jurukmiayi. Nuna tura asa tunáa imiá yajauchia nu nekaamniati. Tura tunáa wakerutai péñker akupkamujái jákatniunam jurukmiatai, nujái Yus “tunáa wakerutai imiá yajauchiiti” tusa paant awajsamiayi. ¹⁴ Akupkamuka Yúsnaiti. Nu paant nékajai. Antsu wikia ayashna nuna wakerakun̄ tunaan umireajai. ¹⁵ Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitij nuna nekaska túriniaitjai. ¹⁶ Akupkamu péñkeran nekaan umirkatniun wakerajai. Túrayatnak umirchaitjai. ¹⁷ Tuma asamtaí wíchaitjai tunaan wakerakun̄ túrajna nuka. Antsu winia enentáiruí tunáa wakerutai pujá asa nu túrumtikriniaiti. ¹⁸ Yaunchu enentáimtai winia enentáiruí pujana nu pen̄ké yajauchiiti. Nuna ti paant nékajai. Tuma asamtaí péñker túratniun wakerayatnak pen̄ké tujintiajai. ¹⁹ Péñker túratniun wakerayatnak túratsjai. Antsu tunaan nakitij nuna túrajai. ²⁰ Nu asamtaí nakitij nuna túrakun̄ wíchaitjai antsu winia enentáiruí tunáa wakerutai pujana nu túriniaiti.

²¹ Júnisaiti. Péñker túratniun wakerakun̄ aya tunaan ín̄kiuajai. ²² Nekas enentáijjai Yusa akupkamurin̄ wakerajai. ²³ Tumai yaunchu enentáimtai winia enentáiruí pujurtak nupettawai tura nekas wakeraj nuna akirturui.

²⁴Maa, ti waitiajai. Jú ayash wakeramujai jákatniunmaya ¿yaki uwemtikrurat? ²⁵Yuska ii Uuntri Jesukristujai túrutmamniaitji. Tuma asamtai Yúsan ti yuminkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakaníjai péñker wekasatin

¹Jesukristujai tsaninkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai. ²Jesukristujai tsaninkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji. ³Ayash wakerutainkia, wi akupkamun enentáimtakuí, nuna nankaamas tunaan wakerumtikrimiaiyi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. ⁴Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji. ⁵Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. ⁶Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui. ⁷Aya ayash wakeramun enentáimtuinia nú shuar Yusa nemasri áiniawai. Yus akupeamun nakitiainia ásar ni taman umirkatniun peñké jeainiatsui. ⁸Tuma asamtai shuar ni ayashí wakeramuri warareakka Yúsan shiir awajsachminiaiti.

⁹Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitruime. Ashí shuar Krísturtin ainia nu ni Wakanín takaku áiniawai. Takakchaitkiungka nuikia Krístunuchuiti. ¹⁰Tura Kristu atumin pujurtamkurminkia atumí ayashí tunaajai jakamnia ain Yus “péñkeraitme” túramu asamtai atumí wakanínkia nekas tuke iwiaakuiti. ¹¹Yus Jesukristun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisan nu Wakanjai yamaram iwiaakmajai iniantamkittiarne.

¹²Tuma asamtai, yatsuru, ayash wakeramu peñké umirkashtiniaitji. ¹³Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka péñker wekasarum nekas iwiaaku átatruime.

¹⁴Ashí shuar Yusa Wakaní timiajai métek wekainia nu, nu shuar nekas Yusa uchirínti. ¹⁵Yusa Wakaní in pujurtamkurin Yusa uchirí ajasar sapijmiatsuk Yusaj weamkar “Aparú” tímimniaitji. ¹⁶Nu Wakan “nekas Yusa uchirínme” ii enentáin túramji. ¹⁷Tura ni uchirí ajasu asakrin Yus tímia núnisan ashí Níiniun suramsattaji. Krístun ashí susattana núnisan incha suramsattaji. Yamái Krístunu takaakur wáitiakrikia ukunam Krístujai métek ti shiir awajnastatji.

¹⁸Maa, yamá ti wáitiakrishna ukunmanka nayaimpiniam ti shiir pujakur nu wáitsamu kajinmatkittiaji. ¹⁹Tsawant jeamtai Yus ashí ni shuarin Nijijai métek ti shiir awajsartatui. Nuiñ nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írunka nu ti nákaniaiwai. ²⁰Ashí Yus najanamia nuna yámankamtaik ti péñker najanamiayi. Túrusha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsanatkamiayi. Tuma asamtai iwiarnartin tsawantan nákawai. ²¹Nu tsawantai ashí Yus najanamu emesnartinniumia uwemprartatui. Tura ashí Yus najanamuka shuar Yusa uchirí ajasarua nujai métek shiir awajnasar ankant ajasartatui. ²²Yamaisha ashí Yus najanamu ainia nu, nuwá jatema wáitia nunis ti wáitiainiawai. ²³Yus najanamuka ashí wáitiainiawai. Iisha Yusa Wakaní takakiatar ti wáitijai. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákaji. Nuiña ii ayashísha ankant awajnastatui. ²⁴Nu tuke enentáimtuki wéakur takamtsuk uwemprattaji. Yamái nu wáinchiatar tuke nákaji. Warí, ¿wáinjinia nu nákajik?

²⁵Tuma asar tuke waincha asar katsuntrar nákaji.

²⁶ Nu arantcha ii kakarmachu nekeapeakrin Yusa Wakaní yáinmaji. Kame Yus áusats-niusha nékachkurin in yáinmaji. ¿Warí seattají tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmají. ²⁷ Tura Yus ii enentáin enentáimtaj nuna nékaiti. Tuma asa ni shuarí asakrin ni Wakaní ni wakeramujáí métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujáí Yus pujurtamji. Tura nujáí péñker awajtamji. Nu paant nékaji. Tura Ni wakerimia núnisaní Ní shuar awajtamaitji.

²⁹ Yámankamtaiknumiá in nekarmak ni Uchirí Jesukristujáí métek ajasat tusa achirmakmiaji. Nujáí Yusa uchirí untsurí ajasji. Tura Kristu ii iwiaírinti. ³⁰ Tura Yus achikmia nuna Niiniu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattají? ³² Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjái métek ti shiira nuna ashí suramsashtatjik. ³³ Yus achikmia nú shuaran ¿yaki sumamtikiat? Yus Ápaka “péñkeraitrume” tiniu asa péñké túrashtatui. ³⁴ Tura ¿yaki “jiniun apenáti” titi? Warí, Kristu péñké túrashtatui. Antsu nu shuaran jarukmiayi. Tura nantaki Yusa untsuuriní ekemas in áujturmají. ³⁵ Kristu ti anenma asakrin in akantamkitin atsawai. Wáitiakrishá, itiurchat ínkiuakrishá, shuar áintramkurnishá, tsukamakrishá, entsatai atsakuishá, tsúumainjajishá, tura mantamnakrishá, nujáí “Kristu anentsui” tíchamniatji. Nuka Kristu anenkrattairiyá akantamkitin jeatsui. ³⁶ Yus-Papniumshá júnis áarmaiti: “Amée-shuar asar tuke mantamnatin pujaji. Murik máatniua áintsan enentáimturmají.” Tu áarmaiti.

³⁷ Tuma aín Kristu in anenma asakrin Nijjái ti nupetmakuitji. ³⁸ Kristu anenkrattairiyá akantamkitin péñké atsawai. Nuna ti paant nékajai. Jákatniushá, iwiaakmashá, nayaimpinmayá suntarshá, ashí nayaimpinmashá tura nunkanmashá akupin ainia nushá, yamáí írúnna nushá, ukunam átatna nushá, ³⁹ yakí írúnna nushá, nunká írúnna nushá, kame ashí Yus najanmu írúnna nushá Yusa anenkrattairiyá péñké akantamkichiniatji. Yusa anenkrattajishá ii Uuntri Jesukristu túrunamujáí paant wainji.

9

Yus Israer-shuaran ni shuarí arti tusa achikiarmiania nu

¹ Yamái tájana nu Kristu shuarí asan imiá nekasan wáitruksuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíishuar ániakui Kástunmayá kanakin yumignaraintjai nujáí wíishuaran yáinminiatkiunka. ⁴ Israer weeá shuar ániawai. Tura ni uchirí áinis Yus achikiaruiti. Yusa wincharísha nijjái pujumiayi. Yaunchu Chicham ni weatrijjái iwiaramuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsanatkattana nunasha ujakmiayi. ⁵ Ni weatrin Yúsán ti péñker enentáimtin irunmiayi. Kástusha aents ajas nú shuarum akiiniamiayi. Kástuka Uunt Yus asa tura ashí akupin asa Niñki tuke shiir awájnastí. Núnisaní atí.

⁶ Kame Yus ashí Nii timia nuna Israer-shuaran súsachmataisha nujáí “Yus timia nu uminkiachuiti” tíchamniati. Antsu júnis enentáimpratuuti: ashí Israer weeá áiniayatan Yusjái íismaka ashí nekas Israer-shuar áiniatsui. ⁷ Núnisaní Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampañma amee shuarum ártatui.” ⁸ Nujáí páantaiti. Shuar aya Apraam weeá akiinia asa Yus timian wáinkiashtiniati. Antsu Yus timiajái métek akiinia nu nekas Apraám weeá shuar ániak Yus timian wáinkiatawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrí Isaka nuwem Ripikia jimiampramiayi. ¹¹⁻¹³ Nu uchisha akiini-ainiatsain péñkernasha tura yajauchincha túruiniatsain Yus Ripikian tímiayi: “Iwiajria nu ni patain umirkattawai.” Ataksha núnisaní Yus ni Papirijn chichak “Jakupan aneakun

Esau nakitramjai” tímiayi. Nujajnia páantaiti. Yus wakerak aya ni enentájjiajn shuaran achikminiaiti. Nu shuar túrunamu enentámtutsuk túramniaiti.

¹⁴Túriniatkiui “Yus péñkerchaiti” ¿títiajiash? Atsá. ¹⁵Yus Muisaisan júnis tímiayi: “Wi wakerajna nunak waitnentratatai.”

¹⁶Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentájjiajn wakerak waitnentawai. ¹⁷Ataksha Yus-Papiniun tawai “Yus Ejiptu nunka akupniurin tímiayi

“Ámijjai ashí nunkanam winia kakarmarun nekaawarat tusan uunt akupniun awajsam-jame” tímiayi” tawai.

¹⁸Tuma asamtai Yus Nii wakera nuna waitnentawai. Túrasa Ejiptu akupniurin túramia núnisan Nii wakera ní shuaran enentáin kátsuram awajtawai.

¹⁹Tura “Núnisaitkiuinikia ¿urukamtaí shuaran Yus súmamtikia? turutchatapash. Nii wakerakuinikia ¿itiurkattajik?” turutchatapash. ²⁰Warí, aents asam Yusjaj ¿tunaiminkia-aitiam? Nuwá pininikian nájankui núweka “¿urukamtaí júnis najatam?” tíminkiait.

²¹Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

²²Yajauch shuar ti asutiátin ániak emesnartinnium wétin ániawai. Yus nu shuaran asutiá ní kakarmarín iniaktustaj tayat ti katsuñramiayi. ²³Tura katsunteak ni anenkrattairin iniakmasmiayi. Nú arant nuikia in waitnentramak shíir enentajijai péñker awajtamkur ni anenkrattairi ti paantchakait. Nekas shíir enentajijai péñker ajasat tusa yaunchu iwiartampromiayi. ²⁴Tura incha, Israer-shuarnumiasha Israer-shuarchanumiasha, ni shuarí ajasat tusa achirmakmiayi. ²⁵Núnisan yaunchu Yúsnan etserin Useas Yus-Papiniun tawai:

“Wíshuarchan Wíshuar awajsattajai. Aneachmancha aneamu awajsattajai.

²⁶Tura Yus “Wíshuarchaitrume” tímia nú shuaran “Nekas iwiaku Yusa uchirínuiutrume” ukunam títiatui.”

Tu áarmaiti. ²⁷Antsu Isayas Israer-shuaran páchis tímiayi:

“Israer weeá ti nankaamas untsurí ániayat péñké ishichik uwemprartatui. ²⁸Kame Yus yajauchin akupkataj timia nuna takamtsuk wárik umiktatui.”

²⁹Núnisan Isayas ataksha tawai:

“Ashí akupeana nú Yus in waitnentramachkurninikia Sutuma péprusha Kumura péprusha takamtsuk jákarmia núnisan jákajai.”

Israer-shuar uwempratin chichamjai tujinkiarmania nu

³⁰Wátsek, Israer-shuarcha, Yus iisam ní túramurijjai “péñkeraitji” tu enentáimtumainiachunak, Yuska, Nii enentáimtusam, “péñkeraitrume” tímiayi. ³¹Antsu Israer-shuarka péñker akupkamun umiktinian wakeruiniayatan tujintiainiakui nujaj péñker ajastinian tujinkiarmai. ³²¿Urukamtaí tujinkiarma? Yúsán enentáimtusuk aya ní péñker túramujaj péñker ajastinian enentáimtuiniak tujinkiarmai. Krístun enentáimtustinian nakitiainiak shuar kanKapen awankemtuktinia núnisan iniararmai. ³³Tura kaya tukumkar iniarchamniakait. Nu asamtai Yus-Papiniun Krístun pachis tímiayi:

““Seun péprunam kayan ikuiawai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

10

¹Yatsuru, Israer-shuar uwemprarat tusan ti wakerakun Yúsán áujtajai. ²Maa, uwempratniun nékachiatan Yúsán shiir awajsatniun ti wakeruiniawai. ³Túmaitiat shuáran Yus péñker awajsatniun nékachu ásar aya ní péñker túramujaj péñker ajastinian wakeruiniawai. Tuma ásar Yus péñker enentáimtamujaj péñker ajastinian jeacharai. ⁴Aya Krístu enentáimtamujaj péñker ajastin asamtai akupkamu umirkatniujaj péñker ajastin ántraiti.

⁵Akupkamujaj péñker ajastinian pachis Muisais tímiayi: “Nuna takamtsuk umirniuka nujaj péñker pujustatui.” Tu áarmaiti. ⁶Antsu Krístun enentáimtus péñker pujustinian

pachis shuar juna tíminiati: “Ti itirchata áinis “¿Yaki nayaimpiniam waka Krístun itiaratí?” tiirap,” tawai. ⁷Tura ¿Yaki jakamunam we Krístun iniantkit?” tiirap” tawai. ⁸Tura junasha tawai: “Yus-Chicham yúpichuch umirkamniati. Aya enentáimjái enentáimtakum wenumjái ujaktiniatme.” Nu Chicham “Yus enentáimtustiniati” tawai. Nu Chicham tuke étsereaj núiti. ⁹Yus Jesusan jakan iniantkimia nu enentáimtakum tura wenumjái “Jesus winia Úuntruiti” takum uwemprattame. ¹⁰Kame Krístu enentáimtakmin Yus “pénkeraitme” turamtatui nuyá wenumjái “Jesukrístun enentáimtajai” tákum uwemprattame.

¹¹Ataksha Yus-Papinium tawai: “Nin shiir enentáimtuinia nú shuar natsaarchartatui.”

¹²Tuma asantai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí pénkeran súawai. Tura ashí métek ni Úuntrinti. ¹³Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti.

¹⁴Tura Krístun enentáimtuiniachusha ¿itiurak Nin áújsarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniati. ¹⁵Tura akupkachmasha ¿itiurak Yus-Chichaman ujakarar? Tura shuar Yus-Chichaman etserkataj tusa wéana nuna Yus-Papinium tawai: “Shuar Yusa Shiir Chichamen etserki weana nu ti shírchakait.”

¹⁶Tura ashí shuar uwempratin chichaman ántuiniayatan umirainiatsui. Isayassha yaunchu aak tímiayi:

“Uuntá, ¿yaki ii étserman antukaruit?”

¹⁷Paantchakáit. Krístu túramu jakam antuktiniati. Tura antukar Krístun shiir enentáim-tustiniati.

¹⁸Tura ¿Israer-shuar Yus-Chichaman antukharu ásarar Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

¹⁹Tura “Israer-shuar nu chichaman antukariat ¿paant nekaawarmaashi?” inintrusminiati. Tura nekas nekaawarmai. Tuma asantai Muisais tawai:

“Israer-shuar nekachu ainiana nuna shiir awajeakun akajkatajrumé.”

²⁰Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsain wantintuikmiajai.”

²¹Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

¹Tura Israer-shuar Yúsan umiiniachkui ¿Yus nin iniaisaashit? Pénkea. Warí, wi Israer-shuarchakaitiaj. Wi Apraámsha tura Pinjamiñ weeá akiiniachukaitiaj. ²Yámankamtaikniumiã Yus Israer-shuaran ni shuar arti tusa achikiu asa yamaikia iniaisashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi: ³“Uuntrú, namañ awasar Yus sútincha mash saákiarai. Áminiuñ etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áújsamiayi.

⁴Tura Yus ayak tímiayi “Siati mir (7000) áishmankan Israer-shuarnumiã apujtumsaruittjai. Nu shuar ántar-yus Páaran tikishmatrachu áiniawai” tímiayi Yus.

⁵Núnisan yamaisha Yus ti waitnentainia asa ashí Israer-shuarnumiã ni shuarin achik-iuiti. ⁶Yus ni enentáijjain waitnentak túraiti. Nú shuar pénker tura asantai waitnentatsui. Yus aya pénkernak waitnentakka nuikia waitnenkratchainti.

⁷Ayu. Nuikia ashí Israer-shuar pénkeran eákaru ain aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajasar kusurua núnin awajnasarmiayi. ⁸Yus-Chichamsha núnisan tawai: “Yus enentáimchatai enentáin súsararmiayi. Wáinmashtai jijncha tura ántushtai kuíshniasha súsararmiayi. Yamaisha núniskete.” ⁹Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarsha uwempramin áiniawai

¹¹ Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarsha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui. ¹² Israer-shuar umirkachmajai ashí shuar, Israercha ainia nusha, uwemprammia ajasarmiyai. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti penker ajasartatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. ¹⁴ Nuna túrakun átum uwemprarmena núnisan niisha, wiishuar ainia nu, nuna ísar uwemprarat tusan wakerajai. ¹⁵ Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmaya nantaktinia áintsan ti shiir átatui. ¹⁶ Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé penkeraitkiunka numi takamtsuk penkeraiti.

¹⁷ Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumniñ nu numiniam anujtamkamarme. Nujai penker numijiai tsaninkrum nu kakarmajai iwiaakrume. ¹⁸ Tura kanawé tsupikmajai nankaamantu enentáimtumasaip. Warí, ame kakarmarmijiai numi wajatsui antsu ni kakarmarjijai iwiaakme.

¹⁹ “Túrasha wi anujnaktinian kanawen tsupikchamka” tíchainmeash. ²⁰ Nekasaiti, túmaitiat niisha Yúsan enentáimtuiniachu ásar tsupinkarmiyai. Atumsha aya Yus nekas enentáimta asam anujnakuítme. Tuma asamtai nankaamantu enentáimtumatsuk aya anearta. ²¹ Yus nekas kanawé penkercha túrawarun tsupikkia páchitsuk amincha tsupirmakchamniakait. ²² Iista, Yus atumjai ti tsánkai ti tura Israer-shuar umichua nuna ti wari asutiaiti. Tura penker wáinmamkata. Yus tuke nekas enentáimtachkurminkia atumniasha páchitsuk tsupirmaktatume. ²³ Núnisan Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. ²⁴ Túram Israer-shuarsha asam niisháa numinmaya tsupikiar penké numiniam anujnakuítume. Nuna tura asa nekas ni kanawé tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nankaamantu enentáimtumarárum tusan yaunchu nekaachman ujaajrume. Júiti: Israer-shuarshuaniak chíkich chíkich Yúsan nekas enentáimtustinian nakitiainiawai. Tura aya Israer-shuarsha Yus-shuar ajasarat tusa túrunamiayi. ²⁶ Tura Israer-shuarsha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikkiartin tátatui. Israernumiá tunaan asakátrattawai.

²⁷ Jú Chichamnasha nijijai najanattajai: ni tunaarín asakturtatjai.”

²⁸ Uwempratin chicham atumsha nekaatarum tusa Israer-shuaran Yus ni nemasri awajsaruiti. Tura yaunchu ni weátrin achikiu asa nincha tuke anenawai. ²⁹ Kame Yus amáa nuna ataksha ataátsui. Shuáran achiksha atak iniayatsui. ³⁰ Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme. ³¹ Núnisan nii yamaikia Yúsan umirainiatsui. Tura atumin waitnentrarmarum núnisan nincha waitnentrattawai. ³² Nujai ashí métek sumamtkiak métek waitnentrar uwemtikrattawai.

³³ Maa, Yus imiá shiirchakait. Tí nekachukait. Ni túramu penké nekaachminiaitji.

³⁴ “Uunt Yus enentáimmin ¿yaki neka? Tura ¿ya Nin unuinaruit. ³⁵ Yaki Nin penkeran susa shiira nujai yapajniuit?” Tu áarmaiti.

³⁶ Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisan atí.

12

Yusaj surumaktarum

¹ Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsán suu ármiai. Atumsha núnisrumek iwiaaku árumna nuñ Nii túrutataj taku túrutati tusarum tuke enentájjaj Yusaj tsan̄kamaktarum. Yusaj ísam ti shiir atí tusarum túratarum. Nu túrakrumka pátatkechu antsu ti nekas enentáimjaj Yus shiir awajin átatrume.

² Chíkich shuar aya jú nuñkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsan̄katkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai juna tájarne. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata. ⁴ Ii ayashí chikichkiitiat ii muchitmarí untsurjinti. Tura métekrak muchitiániatsui. ⁵ Núnisrik iisha, Yus-shuarti, ayashí muchitmaríya áintsarik untsurjitiatar chikichik ayashtinia áintsar takaaji. Nusha Krístujaj tsan̄ñkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súrampi Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáimtakum unuimiarmam nujaj métek etserkata. ⁷ Chíkich shuar yáñtinian Yus suramsaitkiuñkia nekas enentáimjaj yáñtá. Unuiniartiniaitkiumka yawetsuk unuiniarta. ⁸ Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentájjaj ementutsuk súsarta. Shuaran wáinin atí tusa Yus apujtamsaitkiuñkia ti enentáimsam túratá. Tura shuar itiurchat pujuinia nu yáñtinian Yus suramsaitkiuñkia shiir enentáimsam túratá.

Yus-shuar túratniua nu

⁹ Nekas enentájjaj mai anenai ajatarum. Yajauch nakitrarum péñkera nu túratarum. ¹⁰ Nuamtak yachi asarum núnisrum mai anenai ajatarum. Chíkich wíjjaj nan̄kaamas úuntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntrj wakera nu túratarum.

¹² Ukunam Yus tsan̄katramkattajnia nu enentáimtusurum warastarum. Wáitiakrumsha katsunratarum. Tuke iniaitsuk ashí túrunamujaj Yus ájusatarum.

¹³ Yus-shuar atsumainia nujaj yáñtarum. Írarsha péñker itiaatarum. ¹⁴ Yajauch awajtamainia nu shiir awajsatarum. Yus yajauch yumíntasuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajsha úuttiarum.

¹⁶ Chikichik enentájjaj métekrak shiir enentáimtunaitiarum. Nan̄kaamantu enentáim-tumasairap. Antsu péejchach ajastarum. “Ti nekajai” tu enentáimtumasaairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papirjín juna áamtikramiayi: “Wíitjai tunaan asutiátniun. Wisha yapajkiattajaj” tawai Uunt Yus. Tuma asamtai yatsuru, kajertamkuisha atumsha yapajki-airap. Antsu yajauch awajtamkana nuna Yus ístí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu túrakum péñker ajachua nu iniaitsartatme.” ²¹ Yajauch nupettamkajin. Antsu péñker túrakum yajauchia nu nupetkata.

13

¹ Akupniunka ashí shuar umirkatniuiti. Akupniuka Yus apujsamuiti. Yus apujsamcha akupin atsawai. ² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. ³ Kame akupniuka péñker shuar sapijmiakarat tusar apujsamcha áiniawai. Antsu yajauch shuar ashamkarat tusar apujsamu áiniawai. Nii ashamtsuk pujustin wakerakmeke péñker túratá. Túrakminkia akupin shiir enentáimturmartatui.

⁴Yainmakat tusa Yus apujsamuiti. Antsu yajauch túrakmekka akupin nekas ashamakatiuitme. Warí, Yus ántar apujsachmaiti. Tunáa shuaran asutiátniun Yus apujsaiti. ⁵Nu asamtai akupin tuke umirkatniuiti. Aya asutiúwajin tusar umirkashtiniaitji. Antsu shiir enentáijjai wekasatin umirkatniuiti. ⁶Tuma asamtai núnisan akupniun kuit súsatniua nu páchitsuk susatarum. Nu takatan pujarsarat tusa Yus apujsaruuti.

⁷Ashí túratniua nu túratarum. Akiktiniaitkiunka páchitsuk akikta. Akupniusha uuntcha ashí núnisan írunna nusha shiir enentáimtikratarum. ⁸Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. ⁹Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chíkichna wakerutkaip” tawai. Tura nusha ashí chíkichik chichamjain tímíniaiti: “Ame ayashim aneam núnismek ashí shuar aneata.” ¹⁰Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

¹¹Ii yámankamtaik Yus nekas enentáimtusmij nuí “Ii ti shiir ajar tuke uwempratin ukunam átatuí” tu enentáimprachmashiaji. Antsu yamaikia nu tsawant yuntumsamtai ashí túrajnia nujai shintiarar enentáimpratniuitji. ¹²Tuke káshiiat tsawaatemprai. Ii Uuntri Kristu jú tunáa nunkanam tátin ishichik ajasai. Tuma asamtai ii túrutairi kiritniua núnisan yajauch túrutai ana nuka túrutsuk tsáapniniun péñker wekasatin kakaram ajastai. ¹³Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratui. ¹⁴Ii Uuntri Jesukrístu túramia núnisrik túratui. Tura ii ayashí wakeramu umikiat tusar tsankatkashtiniaitji.

14

Ame yatsum kakantraip

¹Shuar Yúsán ishichik enentáimtana nu itiaatarum tura kakantrairap. ²Iis, chíkichka ashí yuamniaiti tuiniawai. Tura chikichcha, Yúsán awajirar, namañ yúashtiniaiti tuiniawai. ³Tura ashí yúa nuka namañken yúatsna nuna wishikrashtiniaiti. Núnisan ashí yucha nu ashí yuun kakantrashtiniaiti. Warí, núnaka Yus ni shuarin awajsachukait. ⁴¿Ámekka timiataash péñkeraitim chíkich shuar kakantinia? Antsu ni únuntriñ ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵Chíkichcha enentáimpratai. Chíkich shuar tsawantan achikiar “Jú tsawantai Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsán shiir awajsatat tusa túrawai. Yurumkajaisha ashí yúana nu Yúsán yumiñkias shiir awajsatat tusa túrawai. Núnisan ashí yúatsna nusha Yúsán yumiñkias shiir awajsatat tusa túrawai.

⁷Iikkia ii enentáijjain iwiaaktsuji. Tura jáakrishha ii enentáijjain jaatsji. ⁸Kame iwiaaku pujakrishha ii Uuntri Kristu shiir awajsatat tusar pujurji. Tura jáakrishha tuke Níniuitji. Nu asamtai iwiaaku pujakrishha tura jakarshha tuke Krístunuitji. ⁹Kame jakancha iwiaakuncha ashí ni Uuntri ajastat tusa Kristu jaka nantakmiayi.

¹⁰Tura ¿urukamtai ame yatsum “yajauchiiti” tame. Urukamtai nakitiam? Warí, ashí iikia ii túramu paant awajnasat tusar Kristui naka wajastatji. ¹¹Nu asamtai Yus-Papiniun tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutartatui” tawai.” Tu áarmaiti.

¹²Tuma asamtai iisha chikichik chikichik ashí ii túramu Yus paant ujakartatji.

Ame yatsum tunaanum ajurairap

¹³Nu asamtai “yajauch túriniaiti” tu áujmatnaisashtiniaitji. Antsu ii yachí tunaanum ajurarchatin ti enentáimturtniuitji. ¹⁴Jesukrístu jintintiamu asan juna nékajai: Yus

najanamuka péñkerchaka atsawai. Ashí túramniaitjai. Túrassha shuar chichaak “Nu túrushtainti” táyat nuna túrakka niijjajai tunaiti. ¹⁵ Tuma asamtai shuar chichartamuk “Nu yúakminkia Yusjajai péñkerchaiti” taj, ame yúakminkia nu shuar itiurchat enentáimsashtatuak. Tura niisha tunaanum iniaar meñkakamniaiti. Nu shuar aneakum túratsme. Enentáimpratá. Aya ame yuamna nujajai ame yatsum Kristu Jarukmia nu emenákaiap. ¹⁶ Tura “yuamniaitjai” táyatam wi yúakui yajauch áujmatrusarajin tusam iniaisata. ¹⁷ Kame Yus umirkatin yurumatniujajisha umartinjajisha enentáimtuschatniuiti. Antsu Yusa Wakanjijajai shiir wekasar Yusjajai tura shuarjajai nawamnaikiar ti péñker wekasatniuitji. ¹⁸ Ashí shuar Krístun núnis umireakui Yussha tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusjajai kakaram ajastin yáiniaiktai. ²⁰ Yus iisam ashí yuamniaitji. Antsu ame yuamna nujajai chíkich shuar tunaanum ajuartin tunaiti. Tuma asamtai ame yuam nujajai Yus nu shuara enentáin takarsamu emesraip. ²¹ Nu túrashtin nuikia namañ yúashtincha karía umarchatniusha péñkeraiti. Warí, túrushtajijajai ame yátsum itiurchat enentáimtikram tunaanum ajuarchatapash. Tura nu shuar Yúsán nekas enentáimtuschania ajastatui. Nuka atsutí. ²² Ame Yus nekas enentáimtakum ashí túramniaitkiunka Yúsak wararsata. Shuar Yus ímmianum shiir enentáijijajai mash túramnia nu nekas shíiraiti. ²³ Tura araantushim yua nuka Yúsán shiir enentáimtusuk yua asa sumamattawai. Kame ashí Yus shiir enentáimtusuk túramu tunaiti.

15

Chíkich shuar wakeramuk enentáimtustiniaiti

¹ Yusjajai katsugru ájinia nu iik enentáimtumatsuk kakarmachu ainia nu yáintiniaitji. ² Chíkich shuar wakeramu enentáimtustiniaitji. Tura Yusjajai nu nankaamas shiir wekasatniun yáinniniaitkiui túratniuitji. ³ Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yúsán umirin asa wáitiak timia nu áarmaiti: “Ámin katsekramainiak Winiaja katsekrukarmiayi.” ⁴ Núnisan ashí yaunchu Yus-Papinium aarma in jintintramatniun áararmiayi. Nujajai atsantamkurin shiir wáinkiaitajnia nuka katsuntrar nákastatji. ⁵ Yus atsantamar katsuntratniun jintintramji. Tuma asa Jesukrístu túramia ántsaj atumniasha chikichik enentáijijajai enentáimtusaisar pujustinian yáinmakartí. ⁶ Nujajai ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjajisha shiir awajnisatarum. Kristu núnisan Yúsán shiir awajsat tusa incha shiir awajtamsamijai. ⁸ Juna tajai. Kristu Israer-shuarchan yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujajai Yus timia nuna umikmia nu nekaamniaiti. ⁹ Tura nu arantcha Israer-shuarchasha Yus waitnentartin áarmatai nin shiir awajsarat tusa támiayi. Tura Yus-Papisha tawai: “Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nunkanmaya shuartiram ashí Israer-shuar Yúsna ainia nujajai warastarum.”

¹¹ Tura ataksha tawai: “Ashí aents ii Uuntrin shiir awajsarti. Tura ashí shuarsha Nin “Ti úuntaiti” tiarti” tawai.

¹² Isayasha áarmiyai: “Tawitia aparí Isai weatriya akupin akiinkiaitawai. Niisha ashí nunkan akupeakui ashí shuar niiniak shiir enentáimtusarataui.” Tu áarmaiti.

¹³ Yus ashí shíiran suramsattakrin nu shiir náakaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakanjijajai kakarmarrijijajai ti shiir enentáijijajai katsuntrarum, nu nákastarum.

¹⁴ Yatsurú, atumsha anenainiaitume. Tura ashí Yusna nekaarum nuamtak chichar-naikiatin nékarme. ¹⁵ Tuma aijn kajinmatkijirum tusan ataksha ti paant áakun jú enentáimtikeyrume. Yus winia waitnentrak ni Chichamen etserkat tusa akuptakui nuna áatjarme. ¹⁶ Kame Jesukrístu Israer-shuarchanum Yusa shiir chichamen etserkat tusa

akuptukuiti. Nuna túrakun Israer-shuarchan Yusa Wakaníjijai shiir awajsamu ásar matai Yusai juiniyajai. Tura Yussha shiir enentáijijai itianiawai.

¹⁷ Jesukristu yaintiu asantai Yusna takarsamaj nuna wararsammiaitjai. ¹⁸ Tura chíkich shuarjaj Kristu túramun pachischattajai. Aya wi chichasmajaisha tura wi túramujaisha Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakaní kakar-marijijai aents tujintiamun túran ashí shuaran Jerusaréñ péprunam nanakan etserkin Iririkiu nunkanam ejekamjai. Kristu-chichaman ashí nu nunkanam etserkaitjai. ²⁰ Nuna túrakun chíkich shuar etserkachmanum Krístunun ántichu ániamunam Uwempratin Chichaman etserkaitjai. Nujaj chíkich takasmanum takarsachuitjai. ²¹ Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan íttjarum táyatan íchmajrume. ²³ Tura yamaikia juyá takatrun umikian tura yáunchusha tuke íttjarum tiniu asan ²⁴ Ispania nukanam wéakun ístatjarme. Tura atumíjn shiir irasan Ispanianam wéakui atumsha yaintkiarum shiir akuptukchat-tarpash. ²⁵ Tura yamaikia kuitjai Jerusaréñnumia Yus-shuaran yáintaj tusan wéajai. ²⁶ Masetúniamaya shuarsha tura Akayanmaya shuarsha kuftian irurar Jerusaréñnumia Yus-shuaran atsumainia nuna akuptuktai tuiniawai. ²⁷ Ti wakeruiniak túrawarmiayi. Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuftirijaj páchtsuk yáinchatniukait. ²⁸ Tuma asantai jú kuitian súsan umiran nuikia Ispanianam wéakun íktiatjarme. ²⁹ Tura nuí winiakun Kristu Shiir Chichamen nujaj shiir yáintajrum tusan ejeetitiajrum.

³⁰ Yatsurú, ii Uuntrj Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wijijai métek Yusna takastin yaintkiattarme. ³¹ Jutia nunkanmaya Israer-shuarnumia uwemtikrat tusarum Yus áujtursatarum. Tura jú kuitian júajna nunasha Jerusaréñnumia Yus-shuar shiir achikiartí tusarum Yus áujtursatarum. ³² Nujaj, Yus wakerakuñkia, péñker wampú enentáimsan warasan íttiajrum. ³³ Yus ti shiir pujustinian súana nu atumjaj tsaniñ pujurtamsati. Núnisan atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniati. Ti penker Yus-shuaraiti. ² Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asantai atumsha ni atumamusha yáintarum.

³ Pirisirasha Akirasha wijijai métek Jesukristunun takasaru ásar amikmaatainijai. ⁴ Niisha winia uwemtikurrtai tusar jániñkiarmiayi. Tuma asantai yumíñkiniyajai. Tura aya wikichu antsu ashí Israer-shuarchanumia Yus-shuar áinia nusha yumíñkiniawai. ⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. ⁶ Marisha, atumjaj ti takasua nu amikmaatruatarum. ⁷ Tura wí shuarsha Antrunikiusha Júniassha amikmaatruatarum. Niisha wijijai sepunam pujusarmai. Wijijai emka Krístun shiir enentáimtusar chíkich akatramujaj nankaamas takasaru áiniawai.

⁸ Ámpriassha Krístunam winia aneamu amikiur asantai amikmaatruatarum. ⁹ Urpanujajsha Jesukristu takatrí tsaniñniuitji. Niisha tura aneamu Estakissha amikmaatruatarum. ¹⁰ Apirissaha amikmaatruatarum. Niisha Krístun ti shiir enentáimtam ti páantaiti. Núnisan Aristúpuru shuarsha amikmaatruatarum. ¹¹ Wíshuar Erutiúnsha tura Narsisu shuarsha Kristu shuarj ásar matai amikmaatruawarta. ¹² Tripiniasha tura Tripiusasha Yúsnan takainia ásar matai amikmaatruatarum. Núnisan ii umai Pírsitia Yúsnan ti takasu asantai amikmaatruatarum. ¹³ Rúpusha, nusha ti penker Yus-shuar, tura nukurjsha amikmaatruatarum. Niisha wijijai nekas winia nukurua

núnisaiti. ¹⁴ Asin̄kritiusha, Pirikiuntisha, Érmassha, Patrupassha, Érmessha, tura ashí niijjaj̄ Yús-shuar ainia nu amikmaatruatarum. ¹⁵ Núnisan̄ Jirurukusha, Júriasha, Néreusha, ni unaijjaj̄sha, Urimpiassha, tura ashí Yus-shuar niijjaj̄ pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuari amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiar-mena núnischaiti. ¹⁸ Nu shuar ii Uuntri Jesukristunun takainiatsui. Antsu ni wakeramun uminiawai. Tura ti shiir chichasar nékachun anan̄kenawai. ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum. ²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukristu shiir yainmakarti.

²¹ Timiutéusha, wíjjaj̄ takau, amikmaatmarme. Núnisan̄ Rúsiusha, Jasun̄sha, Susipatre-sha, mash wíshuar ainia nu amikmaatmarme. ²² Wi, Tersiu asan, Papru chichamen̄ ju papinium áateakun Kristu náarijn̄ amikmaajrume.

²³ Káyusha amikmaatmarme. Ni jéen pujaji tura juj̄sha ashí Yus-shuar irunainiawai. Erastusha ju pepru kuítrjn̄ wáinniuiti. Niisha ii yach̄i Kuártujaj̄ amikmaatmarme.

²⁴ Ii Uuntri Jesukristu ti shiir yainmakarti. Núnisan̄ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukristunun étsereaj nujaj̄ ikiantamprattawai. Nu chicham yámankam-taiknumiá nekaachmanak Yus yamaikia paant awajsaiti. ²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nun̄kanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷ Yúsak Niñki ti neka asa tura Jesukristu ti péñker tura asamtai Niñki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmayá Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachí Sústinisjai, ju papí akupeaji. ² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsanínkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrínti. ³ Yus ii Aparí tura ii Úuntrí Jesukrístusha waitnentrainia ásar yainmakarti imiatkinchanum tuke shiir pujustinian.

Ii Uuntri Jesukrístujai tsanínkia pujustin

⁴ Yusan áujkun yumiñsan atumin shiir enentáimtajrume. Jesukrístujai tsanínkia pujakrumin Yus shiir enentáimturmawai. ⁵ Jesukrístujai tsanínkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. ⁶ Kristu juna túramniaiti tíchamkají. Ashí yamaikia uminkiaiyi. ⁷ Tuma asamtai ashí Yus súramna nu atsumatsrume. Nu túrakrum ii Uuntrí Jesukrístu tatin tuke nákarne. ⁸ Tura iniaitsuk tuke emettamattawai ii Uuntrí Jesukrístu támatai atumi tunaarín pachischatin. ⁹ Jesukrístu ii Uuntrínti. Nijjai tsanínkia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntrí Jesukrístu naarí pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjai métek enentáimsa pujustarum. ¹¹ Átum yajauch chicharnaisarum pujarme. Kruí shuari tu ujatkarmatai tájarme. ¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. ¹³ ¿Warí, nuínkia, Kristu akantramukait. Páprusha krúsnum jarutramkamaashi. Tura Papru naarí pachisa imiaimiukaitrum? ¹⁴ Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. ¹⁵ Nújainkia shuar “Papru náarín imiaimiuitjai” tíchamniaiti. ¹⁶ Maa, nekas, Estepanasa shuaríncha imiaimjai tura chíkich wi imiaimiun nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimpraráin tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmaríncha ni nekatairíncha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántrai tu chicham” tu enentáimainiawai. Antsu Yus-shuarti, uwempratni-unam wéakur, “nu chichamjai Yusa kakarmarí takusminiaiti” tu enentáimji. ¹⁹ Núnisan tawai Yus-Chicham yaunchu aarma: “Ju nuñkanmayan ti neka áiniana nuna chichamen emesrattajai; ti unuimiararu áinianak ántar awajstatajai” tawai Yus ni chichamen. ²⁰ Iis, ju nuñkanam uwempratin chicham íruntsuk. Nu chichaman ashí mash Yus ántar awajsaíti. Ti neka áiniana nusha, jintinkiaitin áiniana nusha, ashí ju nuñkanmayan unuimiar ti chichastinian nékana nusha, nu shuar mash “wi tájana nujai penker pujusam uwemprat-tame” tu enentáimainiawai. Tura núnaka mash Yus penké ántar najanaiiti. ²¹ Aya ni nékamujai aents Yúsan nekaacharmiayi. Núnisan atí tusa Yus túramiaiyi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántrai” tuiniana nu chichamjainkí Yus Nin enentáimtuinia núnaka uwemtikratniun wakerak

túramiayi. ²²Israer-shuar “aentsti túrachminian iniakmasta, wi nekaataj” tuiniawai. Kri-aku shuarsha “ti enentáimsam, mash péñker júkim turuttia wisha métek enentáimprataj” tuiniawai. ²³Iikia antsu Kristu krúsnum jarutramkamuk étseraj. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham áñtraiti” tu enentáimiainiawai. ²⁴Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji. ²⁵“Yusa nekatairín áñtraiti” tuiniawai aents, túrasha imiá nekas péñkeraiti. “Yusa kakarmarísha jeatsui” tuiniawai aents, túrasha imiá nekas kakarmaiti. ²⁶Enentáimtumastarum yatsuru. Yus achirmakmarne Niiniu ajastinian, tura ju nuñkanam ti neka áinia núnisan atumíjn ti neka íruntsui. Ti akupniusha ti nankaamakusha atumíjn íruntsui. ²⁷Antsu ju nuñkanam nékachua núnis ana nuna Yus achikiuiti ti neka nuna iniatsáartinian. Tura ju nuñkanam kakarmachua núnis ana nunasha Yus achikiuiti kakarma nuna iniatsáartinian. ²⁸Péechachincha, nakitsamuncha, áñtrachincha, Yus achikiuiti ashí nankaamantu írunka nuna amuktinian. ²⁹Nújainkia chikichkisha Yusjai waantu enentáimprachminiaiti. ³⁰Tura Yus atumin Kristujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmaj, péñker awajtamji, tura uwemtikramji. ³¹Yus-Papinium yaunchu arma núniskete: “Shuar nankaamantu enentáimprataj tákunka ii Uuntri Yus túramun wararsati.”

2

Kristu krúsnum jakamu etserkamu

¹Wisha, yatsuru, atumíjn jeamaj nuj Yus-chichaman ti neka chichainia áintsan tura íwiasanak ujakchamajrume. ²Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³Nékayatan kakarmachua sapjmiashím jearmiajrume. ⁴Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵Aentsu nekatairíjiai Yus enentáimtuschatniuiti antsu Yusa kakarmari paant nekaarum Yus enentáimtustiniaitru. Nuní asantai Yus-Chichaman tu ujakmajrume.

Aya Yusa Wakaníjiai Yúsnan nekaamniaiti

⁶Túmaiatit Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuuti. Ju nuñkanam akupin ainia nuna nekatairínchuiti Yúsna. Ju nuñkanam akupniuka ishichik pujus amuukachartatuak. ⁷Yaunchu ju nuñka atsaín Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. ⁸Ju nuñkanam akupniuka nuna penké nekaacharmiayi. Nékainiakka ii Uuntri timiá shiira nuna, krúsnum máacharu aayi. ⁹Yaunchu Yus-Papinium árchamukait: “Shuar Yúsán aneana nuna Yus ti shíran susattawai. Susattana nuka timiá péñker asantai shuar wáinkichman, antukchamuncha, enentáimtachmancha Yus susattawai” tu áarmaiti. ¹⁰Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimmiiancha mash nékawai.

¹¹Shuar enentáimna nuna chíkich shuar nekaamniakait. Antsu aya ní enentáijiaín nékatsuk. Núnisan aya Yusa Wakaní Yúsnan paant nékawai. ¹²Ju nuñkanmayá aents enentáimiainia nujai Yusna nekaachminiaiti. Antsu Yusa Wakanín in súramaj nujai Yus shiir tsankatramajnia nu nekaamniatji. ¹³Yusa Wakaní jintinramji Yúsnan chichastinian Nii wakera áintsan. Ni chichamen súramji. Túramtai ii nékamujai Yúsna étsertsuj. Tuma asantai imia Yusna nuka Yusjai péñker wekainia nu jintíaj.

¹⁴Yus-shuarcha Yusa Wakaníniun ántatsui áñtraiti tusa. Aya Yusa Wakaní jintintiamniatkiui Yus-shuarcha nuna penké nekaachmin ániawai. ¹⁵Antsu Yusa Wakanín takaku ashí mash iis, péñkera nuna nekaamniatji. Nii túrana nunasha chíkich shuar súmamtikiachminiaiti. ¹⁶Yus-Papinium yaunchu áarmaiti: “¿Yusa enentáimmiari ya neka.

Tura Yúsan ya jintintiamniait?” tu áarmaiti. Tuma ain iikia Yus-shuar ájiniia nu, Kristu enentáimna núnisrik enentáimji.

3

Páprusha Apurussha Yusa takatrj̄n mai tsan̄nkiar takainiawai

¹Tura wikia, yatsuru, nuik ai atumj̄ai pujakun Yusa Wakanín umirniun chichastinia áintsanak atumj̄ai chichastinian tujinkiamjai. Antsu ayash wakeramu umirin asakrumin Krístunam katsuarcharuj̄ai chichastinia áintsanak atumj̄ai chichasmajai. ²Uchi kuírach naman ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarme. ³Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akanramuitrume. Nuj̄ai páantaiti átum ayash wakeramu umirniuitrume. Yúsnan enentáimticharuj̄ai métek wekainiaitrume. ⁴Atumj̄inkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. ⁵Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniur̄ntji. Yus-Chicham étserkurin ii Uuntrj̄ enentáimtushamkuram. Ii Uuntrj̄ takatan chíkich chíkich suramsamajnia nuke takasmaji. ⁶Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. ⁷Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. ⁸Arakan araana nusha, entsan ukatna nusha métek áiniawai. Túmaitkiusha takasmajai métek Yus akiktatui. Péñker takasmataĩnkia péñker akiktatui. ⁹Wisha Apurussha Yusa takatrj̄ mai tsan̄nkiar takaaji. Tura Yus atumí enentáin takaakui atumsha Yusa núñka áintsaitrume.

Jeasha enentáimpramniaiti. Yus atumj̄ai takaak jeá jeamtinia áintsan takaawai. ¹⁰⁻¹¹Jeá jeamainiak, emka uunt kaya nuñká inít ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nuñká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Níñkiti nuj̄ jeá ekenkatin. Iis, ashí enentáimtustinia nan̄kaamas Jesukrístu enentáimtustiniaiti. Nu asamtai Jesukrístunun emka ujakmajrume. Yus nuna etserkatniun tsan̄katrukuiti. Wi emka, uunt kaya ikiursatniua áintsan, Jesukrístunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian. ¹²Tura jeá jeamainiak nii wakerak péñker ana nuj̄ai jeamminiaiti. Nii péñker jeamtinian wakerak kurij̄jaisha, kuftjaisha, shúirmach kayajaisha jeamminiaiti. Chíkich jeamkuka numj̄jaisha, ken̄kuj̄jaisha, nukajaisha jeamminiaiti. Núnisan shuar Yúsnan takaak péñker takasminiaiti túrasha nan̄kamas takasminiaiti. ¹³Tura amuukatin tsawant jeakui ashí ni takatrj̄ paant átatui. Nu tsawantjaisha Yúsajya ji átatui tura nu jisha ni takatrj̄ péñkera nunasha tura yajauchia nunasha nekapsattawai. ¹⁴Tura shiir jeamuka tura nu jeasha esaachmataĩnkia shiir akinkiattawai. ¹⁵Antsu nan̄kamas jeamuka imianin̄ki jiniumiã uwemprattawai, tura ni jeamma esaa pen̄ké atsuttawai.

¹⁶Enentáimpratarum. Yusa Wakaní atumj̄in pujá asamtai Yusa Jee ajasuram nu nékatsrumek. ¹⁷Shuar Yusa Jee emeseakuĩnkia Yus nu shuaran emesrattawai. Yusa Jeeñka timiá shiir asamtai túrattawai. Nu Jeá atumketrume.

¹⁸Ju nuñkanmayan unuimiarua núnisrum “ti nekaitjai” tu enentáimtusarum anan̄mamawairap. Antsu ju nuñkanmayan nékachu áinis ajas Yúsnan ti shiir unuimiar̄tiniaiti. ¹⁹Ju nuñkanmaya aents nékainia nuna Yus “ántraiti” tawai. Yus-Papinium áarmaiti:

“Ju nuñkanmayan unuimiarun ni enentáimmiájain Yus sumamtiattawai.”

²⁰Tura nu arantcha áarmaiti:

“Uunt Yuska “unuimiaru enentáimmiancha pen̄ké ántraiti” tawai.”

²¹Tuma asamtai “Páprunuitjai tárumna nusha, “Aporusnaitjai”, tura “Pítrunuitjai” tárumna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írúnna nu atumin yainmaktiniaiti. ²²Páprusha, Apurussha, Pítrusha, ju nuñkanmayasha, iwiakmasha, jákatniusha, yamá írúnna nusha,

ukunam átatna nusha, mash atumniaiti shiir yainmaktin. ²³ Atumsha Krístunuitrume, tura Krístusha Yúsnaiti.

4

Yus akatramu takatři

¹ Júnisañ ashí shuar enentáimturmastiniaitji. Iikia aya Krístu yáinřrintji. Krístu akatramurıntji Yusna yaunchu nekaachma ana nu yamá etserkatin. ² Wátsek, akatramuka tána nujai métek umiktiniaiti. ³⁻⁴ Wi umikmancha umikchamuncha ii Uuntrı Krístu nékawai. Átum enentáimturarmena nusha tura chíkich aents enentáimturainia nusha wíjiainkia ántraiti. Imia wíkisha nekamatsjai. Kame winia tunaarun penké wáintsujai tura aya nujai “pénkeraitjai” tíchamniaitjai. Niñki Yus iirui. ⁵ Tsawant jeamtai ii Uuntrı Krístu atak tátatui. Tura ashí yamá kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsajin shuar umikiuashit tusarum enentáimtusairap. Tura nu tsawantai Yus ashí pénker umikiarun shiir awajsattawai. Pénker umikiuncha ishichik umikiuncha takasmajai métek Yus shiir awajsattawai.

⁶ Átum “Ju shuar pénkeraiti tura chíkich pénkerchaiti” tu akannáirarun penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. ⁷ Ámeka chíkich shuarjai méteketme. Tura ashí takakmena nusha Yus amasmaiti. Tura Yus amasamtaı jıtiurak áminiukea áintsam nujai nankaamantu ajai tu enentáimtumam?

⁸ ¿Ti kuřrinnia áintsañ tura ashí takakua áintsañ enentáimtsurmek. In nankaakarum uunt kapitıán ajasua áintsañ enentáimtsurmek? Nekas uunt kapitıán ajasrumka maak. Nuñkia iisha atumjai akupkaintji. ⁹ Chíkich shuar mash nankaamantu áinis ániakuisha Yus in ni akatramurın ashí amúamunam apujtamsaitji. Tu enentáimprammniaiti. “Yajauch ániawai, máatái” tu pujurtamji shuar. Tura Yusa suntarısha ashí juyá shuarsha in fıstai tusar káutramkaitji. ¹⁰ Iikia atumjai jeatsji. Krístu shuarı asakrin nékachua áinis enentáimturmajı shuar. Átum antsu Krístunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muřjtiantji. ¹¹ Tuke yamaisha tsukamajı, kitiamajı, entsartin atsumajı. Katsumpramji. Jeasha atsumajı. ¹² İi ewejéjai takaaakur ti pımpıajı. Shuar katsekramainiaji túrasha iikia shiir chichamjai aiyaji. İtiurchat awajtamainiakuisha katsunteaji. ¹³ Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisañ ajapramatniun enentáimturmainiaji.

¹⁴ Atumin aya iniatsaartajtsan junı áattsujrume. Antsu winia aneamu uchirua áintsan jintintjarme. ¹⁵ Atumin Yus-Chichaman ujaakun Yus-shuar ajastinian unuiniamjarme. Nujai Jesukrístu enentáimtakrumin atumı aparıa áintsan ajasmajı. Chíkich shuar Krístunun jintinřramatin timiá untsurı ákuisha aya wiki atumı aparıntjai. ¹⁶ Tuma asamtaı wi wekaajna áintsañ wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntrı Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujai wekaamun ataksha enentáimtikramprattawai. Núiti ashí Yus-shuarum wena jintıajna nuka. ¹⁸ Papru yamaikia irashtatui enentáimturainiak chíkich chíkich nankaamantuitjai tu enentáimtumainiawai. ¹⁹ Antsu Yus wakerakuñkia wárik fıtjam tusan wakerajai. Nuñkia nankaamantu chichameñ antukchattajai antsu wátskea, ni túramurısha fıstái. ²⁰ Yus akupeana nú shuar aya chíchainiatsui antsu Yusa kakarmarın iniaktuiniawai. ²¹ Wátsek, ¿warı enentáimprum? Átum tuke núnisañ enentáimkiurminkia wi winin asutiátniuitjarme. Tura pénker enentáimkiurminkia, aneakun shiir chichasminiaitjarme. ¿Atumsha túa wakerarum?

5

Tsanirmamu ti tunaiti

¹ Atumın shuar ti tunáa tura awai. Ju yamá ashí nekanaiti. Nu shuar ni aparı nuwé achikiuiti. Timia tunaaka nu tsanirmamu Yus-shuarchanumsha atswai. ² ¿Nu tunaajajsha

tuke nan^{ka}amantu enentáimprumek? Antsu úttiniaitrume. Nu shuar tunáa túraka atumíniá akankatniuiti. ³ Ayashur pujachkuisha wi nuí pujáa áintsan nuna tunaarín paant nekaamjai, tura asutiátniuiti tajai. ⁴ Tuma asamtai átum káunkakrumin ii Uuntri Jesukrístu kakarmarijiaí tura wi nuí pujáa áintsanak, ii Uuntri Jesukrístu kakarmarijiaí ⁵ nu shuar uunt iwanchnum surunkatniuiti ni ayashi wakeramuri amukati tusa. Nujai ni wakaní uwemprattawai ii Uuntri Jesukrístu támatai.

⁶ “Íikia péñkeraitji” tárumna nu ánrtrai, tunáa atumín tuke akui. Iis, “Karía ishichik yuminnium enketam mash karimtiktsuk” tiniu ániawai. Núnis átatui ju tunaajai. ⁷ Tuma asamtai nu karía ukartarum yajauch awajturmasaij tusarum. Núnisrum ju tunaanumiá kanakrum péñker átatrume. Yaunchu enentái karía núnis amuukatniuiti. Ashí yamarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu ániawai. Atumí tunaari atsakui atumsha nu námper-tantaa áintsar péñker ajasuitrume. Paskua nampertincha Israer-shuar murikiun main ániawai. Núnisan Kristu jaka ii murikrja áinis ajasuiti. ⁸ Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írúnna nuka karía yaunchu nawamua áintsankete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

⁹ Nuik papin áatramajrumna nuí “Tsanirma shuarjainkia íschatniuitrume” tímiajrumé. ¹⁰ Ju nuñkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin ániatsuk. Nú shuarjainkia penké íschatniuitkiurmeka ju nuñkanmaya jíinkintrume. Núnaka tátsujai. ¹¹ Antsu wi tájana nu júiti, Shuar “Yus-shuaraitjai” tákuñka tura tunáa túriniaitkuñkia niijjai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuñkia íschatniuitrume. Penké niijjai yurumáshtiniaitrume. ¹²⁻¹³ Yus-shuarcha tunaari pachischatniuitjai. Yus núnaka ístatui. Átumka antsu atumín Yus-shuar ainia nuna tunaari ístiniaitrume. Tuma asamtai nu shuar tunaarintin atumíyia akankatarum.

6

Yus-shuar nuámtak itiurchat awajnisarka Yus-shuarchajai nuna iwiarashtin ániawai

¹ Yus-shuarka chíkich Yus-shuarjai itiurchat pujakka kapitánjai chichas iwiarashtiniaiti Yus-shuarcha asamtai. Antsu Yus-shuar írúnna nujai iwiarati. ² Enentáimpratarum. Amuukatin tsawantai Yus-shuarka ashí ju nuñkanmaya shuara tunaari mash nekaawartatui. Tura ashí tunáa nekaatniuitkiurmeka itiuur yúpichuchia nu nekaashtatrum. ³ Nu arantcha Yusa suntari túramurísha nekaattaji péñkerashit tusarí. Nayaimpiniam túrawarma nekaatniuitkiurkia itiuura ju nuñkanmaya nu tujinkiattaji. ⁴ Pai, itiurchat ákuñkia Yus-shuar penké tujintiainiana nujai iwiaratarum antsu. ⁵ Natsaruk tusan nuna tájarne. Warí, zatumíni chikichkisha atsawak ni yachi itiuurchatri péñker iwiamarnia? ⁶ ¿Urukamtai Yus-shuar ni yachijjai itiuurchat pujakka Yus-shuarchanum wea iwiaratniun? ⁷ Atumí itiuurchatri kapitannium jukirmeka nujainkia átum tujinkiamu páantaiti. Nat-santchakait. Itiuurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum? ⁸ Antsu átumka nuámtak yachijjai itiuurchat awajniayarme tura kasárnaiyarme.

⁹ Tunáa túrinkia Yus akupeemunam pachiinkiachmin ainia nu nékatsrumek. Anan-nawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha, ¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anankawar atantin ainia nusha Yus akupeemunna nuí penké wayashtin ániawai. ¹¹ Atumíyasha chíkich chíkich nuna túrin armai. Tura yamaikia ii Uuntri Jesusa kakarmarijiaísha tura ii Yusri Wakani kakarmarijiaí atumi enentái shiir ajasuiti, atumsha Yusna ajasurme, tura tuke péñker ajasurme.

Ii ayashi yajauch áchatniuiti

¹² “Ashí túramniaitjai” tiniu ániawai tura nekasaiti. Tuma aijn mash yáinkiashtatui péñker wekasatniun. Nekas ashí túramniaitjai tura nánkamas túratniujai nupetnakchat-tajai. ¹³ Junasha tiniu ániawai: “Apatuk wakejainchu tura wake apatkujainchu mai ántrai.” Apatkujai wakesha nekas mai metek enentáimpratin ániawai tura Yus mai metek amuktatui. Núnisan ii ayashí ii Uuntri Krístunuiti tura Kristu ii ayashi nérenniuiti. Tuma asantai ii ayashíjiai tsanirmashtiniaiti. ¹⁴ Tura Yus ii Uuntri Jesusan iniantkimiá núnisan ii ayashíncha nu kakarmarijiai iniantkittiwai.

¹⁵ Ashí ii ayashíin Kristu ayashímkiati. ¿Nu átumka nékatsrumek? Winia ayashrusha Kristu ayashíiya asantai ¿itiurak nuna tsaniri ayashín najanattaj? Penké túrachminiaitjai.

¹⁶ Kame ¿jusha nékatsrumek? Áishman tsanirijiai tsaninkiar chikichik ayashtinia áinis ajaniawai. Núnisan Yus-Papiniun áarmaiti: Mai chikichik ayashtinia áinis ajasartatui. ¹⁷ Tura shuar ii Uuntri Krístujai tsaninkia mai chikichik wakantin ajaniawai.

¹⁸ Tuma asantai tsanirmatniunmaya yájayan wainkiarum tsékeñtiarum. Chíkich tunáa írrunna nu ii ayashínkia ti yajauch awajeatsui. Túrusha shuar tsanirmakka ní ayashiniak yajauch awajeawai. ¹⁹ Yusa Wakaní ame enentáimin pujurtamu asantai, ame ayashim ní jeente. Nu Wakanínia Yus amasuiti. ¿Nuka nékatsrumek? Tuma asantai ame ayashmi nérenchaitme. ²⁰ Kristu numpejai sumakma asantai, ayashmisha wakanmisha Yusna ániawai. Yusna asantai ayashmijiai péñker túratniuitme, Yus shiir awájnásti tusam.

7

Nuatkatniusha péñkeraiti, nuatkashtincha péñkeraiti

¹ Ayu. Átum áatrurmarmena nuna yamaikia ujaktajrume. Shuar nuatteachkusha péñkeraiti. ² Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrínin iniumkati. ³ Áishmansha ní áishrj asa nuwen túratniua nuna umiktiniaiti. Núnisan nuwasha ní nuwé asa ní áishrjn túratniua nuna umiktiniaiti. ⁴ Núwaka niñki ní ayashí nérenniuchuiti, antsu ní áishrjniuiti. Núnisan áishmansha niñki ní ayashí nérenniuchuiti, antsu ní nuwénuiti. ⁵ Ni ayashí suritnaikiashtin ániawai. Tura mai itit awajnaitsuk Yus áujsatin wakeruiniak ishichik tsawant kanakmin ániawai. Tura nuñkia atak tsanin pujustin ániawai. Túracharmatainikia uunt iwianch, Satanás, tunaanun iniertinian útsutkattawai katsuntratniun tujintiaku.

⁶ Ayu. Tura nuna áarayanat nújainkia “ashí shuar páchitsuk nuatkatiuiti” tátsujai. Nuatkatiuitkiunma péñkeraiti. ⁷ Túramtai “ashí wijiai métek nuatkachuitkiunkia maak ainti” tajai. Tura Yus ashí shuaran imiá métek najanachuiti. Chikichan nuatkatiun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wijiai métek nuattsuk pujusrumka péñkeraiti.”

⁹ Tura katsuntratniun tujinkiarka nuatkarti. Ti katsuntrachmin nekapeakum nuatkatin péñkeraiti.

¹⁰ Nuatnaikiarun antsu tájai, “Nuwá nuatkamuka ní áishrjn ikiukchatniuiti” tajai. Núnaka ii Uuntri Kristu akupkaiti aya winia chichampruchuiti. ¹¹ Túramtai ní áishrjn ikiukkia niñki atak nuatnatsuk pujustí tura tsanin pujustinian wakerakka ataksha ní áishrjn wakетки. Núnisan áishmansha ní nuwen ajapashhtiniaiti.

¹² Chíkich shuaran juna tájai wikia, ii Uuntri Kristu juna akupkachuiti. Yus-shuara nuwéñka Yus-shuarchaitkiunka tura ní áishrjiai pujustinian wakerakka péñkeraiti; ajapashhtiniaiti, tájai. ¹³ Núnisan Yus-shuara aishrj Yus-shuarchaitkiunka tura ní nuwejai pujustinian wakerakka péñkeraiti; ikiukchatniuiti. ¹⁴ Nu nuwáka “Yus-shuarchajai tsanin pujakun Yusjai yajauch ajastatjai” tu enentáimprashtiniaiti. Antsu ní Yus-shuar asantai ní aishrj niijiai pujá asa péñker ajasminiaiti Yusjai. Núnisan núwáka Yus-shuarchaitiat ní aishrj Yus-shuarchaitkiunkia niijiai tsanin pujá asa péñker ajasminiaiti Yusjai. Núnisan ní uchirísha péñker ajasmin ániawai Yusjai. Núnischaitkiunkia ní uchirí Yus-shuarcha uchiría áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisan asati. Tuke máaniaktinian Yus nakitramaji. ¹⁶ ¿Núwáka ní aishrj Yus-shuar ajastatna nuna nekas nékawak. Tura

áishmansha ni nuwə Yus-shuar ajastatna nuna nekas nékawai? Yus-shuarcha nuka wétinia wakerakka wetí.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuar num akupejai. ¹⁸ Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuaraitkiunka Israer-shuar ajastin enentáimprashstiniiaiti. ¹⁹ Israer-shuaraitkiunsha tura Israer-shuaraitkiunsha nuka enentáimtuschatniuiti. Aya Yus tana nu umirkatin nekas enentáimtustiniiaiti. ²⁰ Yus-shuar ajasuka nuik pujumia áintsan pujusminiaiti. ²¹ Chíkich shuara takarniurí asam ti itiurchat pujakmesha itiurchat enentáimpráip. Tura ankant jínkimniaitkiunka jínkitiá. ²² Ankantchaitkiunka ankantaitkiunsha ju enentáimpratá. Takarniuka Yus-shuar ajas tuke chíkich shuara takarniuríkiunsha shiir enentáimpratniuiti Kristu nin tunaanumiá ankant awajsamtaí. Tura shuar takarniuchua nu, Yus-shuar ajas Kristu takarin ajasuiti. ²³ Ti wáitsamiayi Kristu in ankant awajtamsatniun. Ni numpejai sumakma asarum shuar emetamu áirap. ²⁴ Tuma asamtaí shuar Yus-shuar ajas nuik pujumia áintsan yamaisha pujústí tura Yusan enentáimtus wekasati.

²⁵ Nuwə natsa túratniua nuna yamaikia áujmatjai. Kristu juna akupkachmai tura Kristu anekratmarí ti nekapsa asamtaí wi tájana nu antukminiaiti. ²⁶ Tuma asamtaí juna tájai. Ti iturchatnum pujá asakrin shuar aya júnisan nuattsuk pujustin péñkeraiti. ²⁷ Nuatkaitkiunka núwem ikiukip. Nátsaitkiunka nuwə eakap. ²⁸ Tura nuatkumka tunáa túratsme. Nuwəsha iniurtukka niisha tunáa túrachuiti. Túrasa nuatnaikiaru itiurchatan ti wáinkiatatui ju nunkanam. Nú itiurchatnumiá wi uwentikraintjai.

²⁹ Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashstiniiaiti antsu Yúsna enentáimtustiniiaiti. ³⁰ Núnisan tuke Yúsnan enentáimsar úutainia nusha uutcha áintsar pujustin ániawai. Warainia nusha warascharua áintsar pujustin ániawai. Súmainia nusha sumakcharua áintsar pujustin ániawai. Ju nunkanmayajainkia itit awajmamsashstiniiaitji. ³¹ Núnisan aya jú nunkanam péñker pujustin ti takaschatniuiti. Ashí jú nunkanmayanka amuukatniuiti.

³² Jú nunkanmayajain itit ajaschak tusan wakerajrume. Nátsaka Yúsnan enentáimtawai ni wakera nuna umiktinian. ³³ Túrasa nuatkaka ju nunkanmən enentáimtawai ni nuarin shiir enentáimtiktsatts. ³⁴ Núnisan nuwə nátsasha nuatkamusha niisháa enentáimiainiawai. Nuwə natsa Yúsnan enentáimtawai ni ayashísha ni wakanísha tuke Yúsjai shiir atí tusa. Tura nuátkamuka ju nunkanmayan enentáimtawai ni áishrin shiir enentáimtiktsatts.

³⁵ Atumin yáintajtsan juna tájarme. Itiurchat awajtsatsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

³⁶ Tura shuar ni nawantrí natsan nuatnaikiati tákunka péñkeraiti. Nawantrin natsa tuke apujtsatniun nakitiakka surukminiaiti. Nusha tunaachuiti. ³⁷ Tura chíkichka tuke natsan apujtsataj tákunka nekas péñkeraiti. Apujtsatin itiurchatchaitkiunkia tura ni nawantrí nuatnakchatniuitkiunkia apujtsatniuiti. Apujsanka nekas péñker túraiti. ³⁸ Tuma asamtaí nuatnantikiunka péñker túrayi tura apujsanka nu nankaamas péñker túrayi.

³⁹ Nuwə aishri iwiaaku pujakuinikia tuke niijjai tsanin pujustiniiaiti. Tura ni aishri jakamtaí ankant ajas ni wakera nujai Yus-shuaran iis nuatnaikiamniaiti, ⁴⁰ tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanísha métek tátsuash.

8

Yurumkasha namansha ántar-yusnum susamu

¹ Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunka nujainkia “neka asan nankaamantuitjai” tu enentáimiui. Antsu shuar chíkich shuaran aneakka nin péñker atí tusa yayawai. ² Shuar “ti nékaitjai” tákunka nekas nekaatniua núnaka unuimiarchaiti.

³ Tura Yúsna aneana núnaka Yus péñker nékawai.

⁴Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chíkich Yus atsakui, ⁵aentsu yusrí nayaimpinmasha nunḡkasha írunna nuka penḡé ántar ániawai. Kame aentsu yúsrísha tura úuntrísha ti írunui. ⁶Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntrísha chikichkiiti, Jesukrístu. Niijiaínkia ashí najanamuiti. Tura iisha ni kakarmarijiaí iwiaaku pujaji.

⁷Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiuurchat enentáimprar “enentáiruḡ yajauch ajasjai” tiartatui. ⁸Watsek, yuamujai Yus in shiir enentáimtikrampratniun jeatsui. Yuarkia nujai penḡer áhattaji tura yúachriḡia yajauch áhattaji. ⁹Anḡkantaitme yúatin wakerakmeka. Tura anearta. Ame yúakmin chíkich shuar itiuurchat enentáimna nusha ámin wáitmak yúanḡa ni enentáin tunáa ajastatui. ¹⁰Ístá. Ámeka neka asam ántar-yusa jeen wayam tura nuí yúakminka ame yatsum nuí wáitmakchanpiash. Tura niisha itiuurchat enentáimiat ántar-yus susamun yúashtimpiash. ¹¹Nújiaínkia ame nékamujai ame yatsum Kristu jaka uwentikramia nu yajauch ajastatui. ¹²Túramtai ame yatsum itiuurchat enentáimna nu yajauch awajeakum Krístunmasha tunáa túraitme. ¹³Nu asamtai winia yatsurun wi yúajna nujai yajauch awajeaknaka namannaka penḡé yuashtatjai nii tunáa ajasain tusan.

9

Kristu akatramu túramnia nu

¹Ashí Kristu akatramurí túratniua nuna wisha túramniaitjai ni akatramurí asan. Iis, wisha ii Uuntri Jesusan wáinkiaitjai tura wisha Jesukrístu takatrin takaajai. Winia takatrujain átumka Yus-shuar ajasuitrume. ²Chíkich shuar “Kristu akatramurinchuiti” túrutainiakusha átumka winia takatrujaj Yus-shuar ajasu asakrumin nujai wi nekas Kristu akatramurintiaj nu paant nekaamniaiti. Tura tu enentáimtursatniuitrume.

³Ashí shuar “Kristu akatramurinchuiti” túrutainia nuna juna tájai. ⁴Wisha Yus-Chichaman etserkataj tusan shuárnum irakun ashí ajampruinia nuna yuamniaitjai tura umarminiaitjai. ⁵Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai. ⁶Chíkich akatramuka kuit susamujai Yus-Chichaman etserainiawai. Wisha Pirnapísha núnisrik túramniaitjai. Kame ¿aya íchikik takastiniaitjai? ⁷Suntarka ¿ní kufríjiaimpish takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasmanumia yurumánniaiti. ⁸Aya aents enentáimnian chichaatsjai. Muisais akupkamunmasha métek tawai. ⁹Muisais akupkamunam áarmaiti:

“Turu takaak jinḡkiaia saepen pakartaj tusa nájakui ni nují jinḡkiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujai. ¹⁰Antsu in jujai nekaawarat tusa tímiayi. Jinḡkian araana nusha tura júukmatai saepen pakaana nusha nuna jinḡkian mai yurumátin ániawai. Paant atí tusa Yus nuna áarmiaiy. ¹¹Tuma asamtai Yus-Chicham atumjin etserakrin nuyá átum takakrumna nujai in ajamsatniuitrume. ¿Nusha itiuurchatkai? ¹²Chíkich akatramu atumjin irutainiak ajamsamun yuamniaitkuínkia iikia nekas túramniaitjai ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiuurchat ana nuna katsuntramjai Kristu shiir chichamen étserkui shuar itiuurchat enentáimturarain tusan. ¹³Ashí shuar ni yúsríniun tuke pujurin ainia nu, ni yusrí jeen írunna nuyan yurumániawai. Tura yus-sutai namanḡen maawar nuyá yurumániawai. ¹⁴Núnisan Yus-Chichaman etsernia nuka Yúsnan takasu asamtai penḡer ajamsatniuiti. Nuna Kristu akupkamiayi. ¹⁵Tura wisha ajamsamun yuamniaitiatan tuke winia kufrujai yurumámjai. Tura yamaisha surúsuk tusan áattsujrume. Antsu nuna túrutsuk jakaḡka maak aintjai.

¹⁶ Uwempratin chichaman wi étserkun aya nújajin “ti penkeraitjai” enentáimtumats-jai. Kame Yus nuna túratniun surusuncha ititurkatjak. Nuna túrachkunka ti ititurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jújaj antsu nekas warasminiaitjai: Wi túramnian iniaisan chikichnan takatsuk aya winia kufrujajin uwempratin chichaman étserjai. Nujaj waraakun akikma áintsankete.

¹⁹ Chíkich shuara takarniuchuitiatan ashí shuara takarniuriya áintsanketjai Kristu shuarj untsurj ajasarat tusan. ²⁰ Israer-shuarjaj pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkashtiniaitiatnak umirniuitjai. ²¹ Tura Israer-shuarchasha Yus-shuar ajasarti tusan, nu shuar Muisaisa akupkamurj in umirkashtin áiniakui, wisha nuna umirkashtin áintsan ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjaj katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjaj métek ajajai ishichkisha Yus-shuar ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chichamjaj wisha atsumtsuk shiir wekaajai.

²⁴ Shuar nekapnaisatniusha untsurj tsékeñtin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktin áintsarum Yusna takastarum. ²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuiniawai. Iisha núnisrik nu enentáijaj Yusna nu takastiniaitjai. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjina nú tawasap tuke amuukashtatui. ²⁶ Wikia aya nánkamsan tsékeatsjai. Nasejai maania áintsan máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakiturrainiti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úuntrin ashí métek yáinmiyai. Nushaa yuranmijaj jintian nekapuramiyai. Tura ashí ii uuntri nu yuranmin apapekar wearmiyai. Ashí núnisar Kapaaku Nayaantsan Yus akankamunam wekasar katitkiarmiyai. ² Tura Muisaisan umirkar yuranminiam tura nayaantsanam ashí imiaimiu áintsan ajasarmiyai. ³ Núnisan ashí mash Yusnumia yurumkan yuawarmiyai. ⁴ Entsanha ashí mash Yus susamunak umararmiyai. Kame Yus kayanmaya entsan akupkamtai ashí umararmiyai. Krístusha, nú kaya áintsan, niijaj tuke weakui ni wakaní atsumamurj in Krístunmayan takusarmiyai. ⁵ Tuma ain Yus ti yáinmaitiat ni wakeramun umikcharmiyai. Tura ásar ni nunkeñ jeatsuk atsamu nunkanam ti untsurj jákarmiyai.

⁶ Iisha nujaj unuimiartiniaitjai. Iikia ni wakeriarmia áintsar¹ yajauchia nu wakerukchatniuitjai. ⁷ Nu asantai ántar-yus ni túrawarmia áintsarum tikishmatrairap. Iis, jiru yusri shiir awajenakui Yus-Papinium áarmaiti,

“Nu shuar yurumáwar nampekar námper ti najanawarmiyai.” Tu áarmaiti.

⁸ Nii túrawarmia núnisrik iikia tsanirmashtiniaitjai. Nuna túrawar paintitres mir (23.000) chikichik tsawantaj jákarmiyai. ⁹ Iisha tunaa túrar “Yus asutiúashtatui” tu enentáimprashhtiniaitjai. Niisha nuna túrawar napijaj esaim untsurj jákarmiyai. ¹⁰ Yussha yajauch áujmatsashtiniaiti. Nuna túrawarmatai Yus ni suntarin akupak untsurj in maawarmiyai.

¹¹ Yaunchu ii úuntriñjaj túrunamu in amúamu tsawantnum pujajnia nuna jintintramat tusa áarmaiti. ¹² Tuma asantai shuar “Tunaanum iniaarchattajai” tákunka anearti. Anearchamka iniaarminiaitme. ¹³ Tura ame ititurchatrumka aya amek nekapeatsme. Chíkich shuarsha nu ititurchatjaj métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas ititurchatan Yuska penker asa tsankatramatsui. Antsu ititurchat tarutrammatai, nu ititurchatnum pujamin Yuska uwempratinun jintintramattawai. Nújajñkia katsuñtrattame.

¹⁴ Nu asamtai aneamu yatsuru penke ishichkisha ántar-yus enentáimtusairap. ¹⁵ Atumsha nékatsrumek. Wi tájana nu nekaschakait. ¹⁶ Kristu jakamu enentáimtustin námpér najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurarⁱ tura métek yuarⁱ nujai Kristu ayashí in jarutrakamu métek enentáimtaji taji. ¹⁷ Apatkusha chikichíitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk. ¹⁹⁻²⁰ Núnisan Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namansa sutai namañketiat péñker namañkete, yajauchihuiti. Aya junak tajai. Yus-shuarcha ántar-yus sutai namañken suiniakui amesha nijjai métek yuamka yajauch wakanniasha nijjai métek enentáimtaji tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniutrume. Kristu ayashin nakumea nu yúakrumka íwianch susamua nuka yúashtiniaitrume. ²² ¿Warí, Yus akajkatin wakeramek. Iisha nin nupetkamniashitaji?

Aya aneakur takastiniaitji

²³ “Ashí túramniaitjai” tiniu ániawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin. ²⁴ Nú arantcha chíkich yáintincha enentáimpratniuitji. Aya íniuk pachischatniuitji.

²⁵ Namañ súmakan inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. ²⁶ Ashí ju nuñkasha tura ashí írunna nusha Yúsnachuk ainia. Tuma asamtai péñker ániawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Juka ántar-yus susamu namañkete” túramkuinikia nuikia yuawaip. Yúakminkia nu shuar itirchat enentáimprattawai. ²⁹ Ame páchitsuk yuamniaitkiumnisha nii antsu yúachmin asa itirchat enentáimprattawai.

Tura amesha tichatameash “¿Urukamtia nii tujintiakui wi yúachminiaitjai. ³⁰ Wi Yúsan yuminsan yúakuisha urukamtia itirchat enentáimturainia. Yus yuminsachmakait?” tichatameash. ³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. ³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. ³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

² Yatsuru, átum winia tuke enentáimturarum wi tímiajrumna nu umirniutrume. Tuma asakrumin shiir enentáimtajrume. ³ Nu arantcha ujaajrume. Yus Apa Kristun akupea áinsan Kristu ashí áishmanñkan akupeawai. Núnisan áishmansha ni nuwen akupeawai. ⁴⁻⁵ Íjjiañkia shuar Yus áujenak tura núnisan Yus-Chichaman étserrainiak áishman etsenkrakchatniuiti antsu nuwa múuknum nukumaktinaiiti. Tuma asamtai áishman nuj etsenkrakka natsantaiti. Tura nuwa múuknum nukumakchanka natsantaiti. Intiashin tsupimiarua áinsanñkete. ⁶ Nuwa múuknum nukumaktinian nakitiakka intiashin tsupirtí nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia. ⁷ Áishmanñka Yúsan nakumeawai. Yusna shiir ana nuna nakúmáttsa Yus áishmanñkan najanamiayi. Tuma asamtai áishmanñka etsenkrakchatniuiti. Antsu nuwanñka áishmanña shiir ana nuna nakúmáttsa Yus najanamiayi. ⁸ Iis, Yus áentsun najaneak nuwanmayñ áishmanñkan najanachmiayi

antsu áishman̄ka ukunch̄j̄iāi nuw̄an najanam̄iaiyi. ⁹ Nuw̄an yáin̄kiát tusa áishman̄kan najanachmiayi antsu áishman̄kan yáin̄kiát tusa nuw̄an najanam̄iaiyi. ¹⁰ Tuma asamtai núw̄aka múuknum nukumaktinīiaiti, nayaimpinmaya aencha ísarti tusa. ¹¹ Ayu, tura áishman̄ nuw̄aj̄ain̄chu atsuinti tura nuw̄asha núnisan̄ áishman̄j̄ain̄chu atsuinti. Yus j̄u nuḡkan núnisan̄ atí tusa najanaiti. ¹² Iis, Yus nuw̄an áishman̄numīa najanam̄iaiyi tura áishman̄sha nuw̄anmaya akiinīiaiti. Tura Yus mai najanaiti.

¹³ Enentáimpratarum atumsha. Nuw̄a múuknum nukumatsuk Yus áujsatin ḡpén̄kerkai? ¹⁴ Ii shuurtinkia áishman̄ intiash ajakin natsantchakait. ¹⁵ Antsu núw̄aka intiash ajakin péñkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka j̄una nekaati, iisha tura ashí Yus-shuurtisha aya tu enentáim̄ji.

Kristu jakamu enentaimtustin nampernum yajauch túramu

¹⁷ Yamái áarattajrumna nuj̄ain̄ shiir enentáim̄tatsjarne. Atum irunkuram yáiniaik-tiniaitrum tuke péñker wekasatin. Átum antsu iruntrarum yajauch awajnaiyarme. ¹⁸ Wats, Yusa J̄een irunkuram atumsháa enentáim̄prarum kanakurme. Kame tu ujatkarmai. Nekaschashit. ¹⁹ Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin péñkerchaiti. ²⁰ Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. ²¹ Iis, ashí ní yurumken itiaawai āi yurumáttsa tura chikichan nákatsuk níá níá wari yuattsa wakerawai. Chíkichkia ishichik itiaana nu tsukamawai tura chikichcha nampekarai. ²² Yurumkan ishichik itiaana nu iniatsá̄archamek. Atum áitkiarum núnisan̄ Yusa j̄een yurumáshtinīiaiti. Natsantaiti. Warí, chíkich j̄ea átsuk āi yurumátin. ḡWarimpait. J̄uj̄ai shíirash áujsatjarum? Átsá. J̄uj̄ai shiir áujsachminiaitjarne.

Kristu jakamu enentaimtustin námper

²³ Ii Uuntr̄i Kristu jintintruama núnaka ujakmajrume. Jútas tuke súrats̄ain̄, nu kashi ii Uuntr̄i Jesus apatkun jukí ²⁴ Yusan yumīnsamiayi. Nuyá puur tímiayi “Yuatarum. Jusha winia ayash̄rui; atumin jarutramkatta núiti. J̄u yúakrum Winia enentáim̄tursatarum” tímiayi. ²⁵ Núnisan̄ yurumá umik pinīn̄nasha achik tímiayi “J̄u pinīn̄ Yamaram Chichamaiti. Tura winia numpar puármatai Yamaram Chicham nekas uminkiat̄awai tawai. J̄u tuke úmakrum Winia enentáim̄tursatarum’ tímiayi. ²⁶ Tuma asamtai j̄u apatuk yúakrum tura pinīn̄sha úmakrum ii Uuntr̄i Kristu jakamur̄i enentáim̄tarne. Kristu táats̄ain̄ j̄u tuke túratnuiitrum.

Shiir enentáij̄iāi Kristu jakamu enentaimtustin nampernum yuatniuiti

²⁷ Tuma asamtai shuar Yusan enentáim̄tutsuk j̄u apatkun yuawar tura j̄u pinīn̄numīan̄cha umarar Kristu ayash̄in̄cha ni numpencha yajauch enentáim̄ta asa tunáa túrait. ²⁸ Nu asamtai ashí shuar j̄u apatkun yútsuk tura j̄u pinīn̄numīan̄cha úmutsuk ni enentáin̄ iwiaratniuiti Yusj̄ai. ²⁹ Kristu ayash̄í jakamu enentáim̄tutsuk yúakka tura úmakka nuna tura asa asutniáttawai. ³⁰ Atumsha tura asarum jaarme tura pimpiruitrum. Chikichcha jákaru áiniawai. ³¹ Ímia-iik ímiakrinkia Yus in asutiámachaint̄ji. ³² Tura ii enentáin̄ Yus yajauchia nuna wáiniuk asutiám̄ji. Túrachkun̄ka ashí Yus-shuarchaj̄ai súmamtikramawaint̄ji.

³³ Tuma asamtai, yatsuru, iruntrar yurumáttsa matsatkurmeka nákastarum métek yurumátin. ³⁴ Shuar tsukamakka ni j̄éenīn̄k̄i yurumátin. Núj̄ain̄kia yajauchij̄iāi irunchakrumin Yus asutiám̄shatrum. Ayu, chíkich áatrururmena núnaka wi āi jean iwiarattajai.

12

Yusa Wakaní ni shuarin̄ susamu

¹ Yusa Wakaní ashí ni shuarin̄ súana nuna yamá ujakattjarne. Nekaatarum, yatsuru. Yus-shuar shiir takasarti tusa Yusa Wakaní j̄una súsaiti.

² Yaunchu átum Yus-shuar tuke ajatsuk chíkich shuarj̄ai métek ántar-yus tikishmatramarme. Niisha ántar-yus ásar áujmattamsachmin ármiaiyi. ³ Tura júj̄ain̄ shuar Yusa Wakaní kakarmarj̄iāi chichaana nu nekaamnīiaiti. Yusa Wakaníj̄ain̄kia shuar

“Jesus yajauchiiti” tíchamniati. Núnisan aya Yusa Wakanjijai “Jesus winia Úuntur asa akuptuktiniati” tminiaiiti.

⁴⁵Yusa takatři fruntsuk. Tura Yusa Wakanjnk¹ ashí nuna takastinian súsaiti. Tura shuar Yus-shuara Uuntrı chikichik ain ashí Yusa takatrin métek takaatsui. Antsu chikichkin ashí nankaamas pénger takaawai. Yusa Wakanjšha nuna shiir takasat tusa súawai. Tura Nii wakera nuna Niņki ni shuarın chikichik chikichik niisháa niisháa súawai. ⁶Yúskete ashí ni shuarın niisháa takamtikeana nu. Niņki ashí ni shuarı enentáın takaak takatnasha shiir takamtikeawai. ⁷Yusak túratin súam Yusa Wakanı kakarmari paant átatui nu takasmanum. Tura ashí shuar ní takatrijjai yáiniaiktin áiniawai. ⁸Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakanı kakarmarijai nuna túratniun súsaiti. ⁹Chikichnasha Yúsan áujenak Yúsan ti enentáımtusar nekas itıurchat ana nuna iwiaratniun súawai. Nincha Yusa Wakanı kakarmarijai nuna takastinian súsaiti. Chikichnasha jaan tsuártinian súawai. ¹⁰Chikichnasha aents niņki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia pénger wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintıatniun súawai. ¹¹Tura ashí shuara enentáın nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹²Iikia Kristu ayashía áintsar¹ ayashımkiatji. Kristu ayashı muchitmarjšha írunui. Niisha túmaitiat chikichik ayashtiniati. ¹³Tura imianiakrin Yusa Wakanı chikichik awajtamsamji, Kristu ayashía áintsan. Israer-shuarsha, Israer-shuarchasha, ti itıurchat takana nusha, ankant ainia nusha, ashí yamáı chikichik ajasuitji. Tura Yusa Wakanı pimiutkamuitji Nijjai tsanińkia pujakur.

¹⁴Ayashi muchitmarı aya chikichkichuiti. ¹⁵Tuma asantai, winia nawer uwejruchuitiat tuke winia ayashrunuiti. ¹⁶Winia kuıshrusha jıırchuitiat tuke winia ayashrunuiti. ¹⁷Wátsek winia ayashur aya jııkitkiuńkia ĵıtiurak antukaintiaj? Winia ayashrusha aya kuıshkitkiuńkia ĵwarıııai nekapsaintiaj? ¹⁸Nu asantai Yus winia ayashru muchitmarı ni wakeramunam ikıusuiti. ¹⁹Chikichik muchitmajai ĵayash áminkiait? ²⁰Antsu untsurı muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umıaji.

²¹Winia jııru pénger ain winia uwejrúncha wakerishtatjak. Winia muukarsha pénger ain winia nawernasha wakerishtatjak. Núnisan Yus-shuar shiir enentáımtumak ni yachin “atsumatsjame” tíchamniati. ²²Antsu ii muchitmarı ishichik enentáımtajnia nu atsakuńkia ti atsumawaintji. ²³⁻²⁴Chíkich muchitmasha, ímiancha nu, shiir iwiarmamtaji. Tura nu muchitmaka shiir íisminia nujai nankaamas pénger wainji. Iis, shiırcha nu antsu pénger wainji. Yus ii ayashın núnisan atı tusa najanamiayi. ²⁵Nujaińkia ayashı muchitmarı máanaisuk métek yáiniainiawai. ²⁶Chikichik muchitmaram najaimiakum ashı ayashnium wáıtiatsmek. Núnisan chikichik muchitmaram ayap jakum ashı ayashnium shiir átsumek.

²⁷Núniskete Kristu ayashıııai ayashımkiaj¹ nu. Tura chíkich chíkich ni muchitmarı aji. ²⁸Ayashnium muchitma írunna áintsan Yus ní shuarın untsurı takatan súsaiti. Emka Yus akatramu, nuyá ni chichamen etserin, nuyá jintinkıartin, nuyá aents túrachminian túrin, nuyá tsuákratin, nuyá yáınkratin, nuyá akupin, nuyá niisháa chichamjai chicharin, mash írunui. ²⁹ĴAshı Yus akatramuk ainia. Ashı Yus-Chichaman etserniuk ainia. Ashı jintinkratniuk ainia. Aents túrachminian ashı túriniak ainia. ³⁰Ashı tsuákratniuk ainia. Ashı niisháa chichamjai chichamtiniak ainia. Ashı niisháa chichamjai chichasman jintınkratniuk ainia? Atsá. Túmachuiti. ³¹Túmaitkiuńkia péńkera nu takastin wakeruktarum. Tura imiá péńkera nuna jui jintintiatjarne.

¹Ju nuṅkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichaajai. ²Yus-Chichamnasha ti shiir étsariatnak, túrasha ashí uṅkmancha tura ashí nekaamniancha nékyatnak, túrasha Yúsan ti enentáimtusan murá umuchiayatnak, anenkratchaknaka penké ántraitjai. ³Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

⁴Anenkartaka wari kajeatsui, tsánkaiti, chíkich shuaran shiir awajniuiti, péjchach asa waantu enentáimtumatsui. ⁵Anenkartaka natsanta nuna túrichuiti, níniunak enentáimchaiti, kajechuiti, páchichuiti. ⁶Chíkicha tunaarjín wararchaiti antsu péñker shuaran wararniuiti. ⁷Anenkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸Anenkrattainkia tuke amuukashtiniaiti. Antsu ju nuṅka amuukmataisha Yus-Chicham etserkatin atsuttawai, tura niisháa chichamjai unuimiatsuk chichastincha amuukattawai, tura ashí nekanamtai unuimartincha atsuttawai. ⁹Kame yamaikia aya ishichik nékaji. Yus-Chichamsha amutsuk étsereaji. ¹⁰Túra ukunam mash nekanamtai yámankamtaik nekaamuka ántar átatui.

¹¹Yaunchu wi uchich asan uchichia áintsan enentáimkich chichasmajai. Antsu yamaikia uunt ajasan uchiniun iniaisaitjai. ¹²Núnisrik yamáí ju nuṅkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiat-taji. Yamaikia aya ishichik nékaji. Nuṅ antsu Yus winia nékara áintsanak nekaattajai. ¹³Watek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiumasha anenkrattainkia ashí naṅkaamakuiti.

14

Niisháa chicham unuimiatsuk chichastin

¹Nu asamtai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti. ²Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. ³Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. ⁴Niisháa chichamjai unuimiatsuk chichaana nuka aya niñki katsuartinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

⁵Atumsha ashí mash niisháa chichamjai chichastinian wakerajrume. Túrasha nuna naṅkaamas Yus-Chicham etserkatniun wakerajrume. Aya chichastinjinjainkia ju imiá péñkerchakait. Kame chichasma jintíakmeka maak. Nujai Yus-shuar tsakarartatui. ⁶Enentaimpratarum, yatsuru. Nuṅ irakun aya niisháa chichamjai chichaaknaka žitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsnancha jintinkiuuncha yáintatjarume.

⁷Peemsha tura tumaṅsha wi tájana áintsan áiniawai. Péñker tuntuýamuka paant nekaamniaiti. Tura péñker tuntuýachkuñkia, nu tuntuýamu nekaachmini-aiti. ⁸Suntarsha mesetnum wéenaku ni kapitíántrí ni wakeramun ujaktinian kachun umpuawai. Paant umpuakuñkia suntarsha ni wakeramun nekaawartatui. Tura paant umpuachkuñkia suntarsha žitiurak mesetnum wétinian iwiarat? ⁹Atumjajisha núniskete. Nekaachmin chichamjai chichaakminkia žtámena nuna itiur nekaawartata? Nase chichartsumeash. ¹⁰Ju nuṅkanmaya chichamka ti untsurí írunui. Nu chichaman nékakka ashí antukmin áiniawai. ¹¹Tura chíkich shuara chichamen ántachkunka níjjaínkia yajaya apachia áintsanak ajajai. Niisha wíjainkia yajaya apachia áintsankete. ¹²Tuma asamtai, Yusa takatrí ti wakera asarum ashí Yus-shuaran ikjarartatna nú takat nekas wakeruktarum.

¹³ Nu asamtai niisháa chichamjaj chichaitkiumka chichasumna nu jintiartin Yus seata. ¹⁴ Niisháa chichamjaj Yusan áujeaknaka nekas winia wakantrujaj áujeajai tura áujsajna nuna nékatsjai. ¹⁵ Antsu wikia júnisan enentáimjai. Yúsan áujeakun winia wakantrujajsha áujsattajai tura enentáimtsuk áujsashtatjai. Kantamkuncha kantamaj nuna enentáimkiun winia wakantrujajsha kantamattajai. ¹⁶ Amesha shuar iruntramunam aya wakanmijaj niisháa chichamjaj Yus shiir yuminsakmincha nekaachmin asamtai nékachuka ámjijaj métek áujsatniun jeatsui. ¹⁷ Ti shiir Yus yuminsam áujeatsmeash tura chikichka Yusjaj ikiakáatsme. ¹⁸ Ashí átum nusháa chichamjaj chicharmena nuna nankaamas wikia chichaajai. Nuna Yusan yuminsajai. ¹⁹ Túmaitiatnak untsurí chichamjaj chichasan ántumtikiashtinjajnkia nankaamas Yus-shuar iruntramunamka aya senku chichamchijajni tiintjai, paant jintintiwartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chikich írunna nujaj uunt enentáimpratniua áintsarum enentáimpratarum. ²¹ Yus-Papinium áarmaiti:

““Yajaya shuaran akupkan niisháa chichamjaj chichastatjai. Tura nújajsha anturtukchar-tatui” tawai Yus.” Tu áarmaiti.

²² Nújajnkia páantaiti, nusháa chichamjaj chichastinkia Yus-shuarman ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarman enentáimtiktsuk Yus-shuaran yáintinian súsaiti. ²³ Tuma ajn, nékachusha tura Yus-shuarman Yus-shuar iruntramunam wayanka tura ashí niisháa chichamjaj chichainianak wájnkanka “mash waurka ajasari” enentáimturmarchartatuak. ²⁴ Tura Yus-Chicham etserkurminkia nékachusha tura Yus-shuarman nuj wayanka ashí tárumna nujaj ni tunaarin ímias enentáimturtatui. ²⁵ Nújajnkia ni enentáin úmak ana nuna paant wániak tikishmatar Yusan shiir awajsat-tawai. Tura “nekas Yus atumjaj pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátiniuncha, jintintiatniuncha, Yus iwaiiniakman ujaktinniasha, nusháa chichamjaj chichastinniasha, nusháa chichasman jintiatniuncha, ashí Yus-shuar Yusjaj tsakararti tusar juna mash takasarti. ²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti. ²⁸ Jintiartin atsakuinkia nusháa chichamjaj iruntramunam chichaschatniuiti. Antsu nínki Yusjaj chichasti. ²⁹ Núnisaj jimiarchiksha menaintiuchiksha Yus-Chichaman etserkarti. Tura chikich shuar nuj iruntrar ni etserkamun enentáimprarti péngerashit tusar. ³⁰ Tura chikichik chichaakui Yus chikichan nuj pujana nuna yamaram chichaman súakuinkia emka chichaa nu iniáisatí. ³¹ Núnisrum Yus-Chicham etserkatin wakermana nu chikichik chikichik chichasrum ashí jeattarme. Nújajsha Yus-shuar unuimiarar kakarartatui. ³² Yúsnan étsereinia nuka tuke enentáimprar chichastin ániawai. Enentáimtsuk nánkamsaj chichasmin ániatsui. ³³ Yuska pachimtak chichaman nakitiak shiir chichasmanak wakerawai.

Chikich nunkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisaj núwaka chichatsuk umin átin ániawai. ³⁵ Inintrustininian wakerakka ni jeen waketkin ni aishrin nuj aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjaj nankamnachmai. Núnisaj aya atumjajni Yus-Chicham jeartamchaiti. Chikich nunkanmasha Yus-shuarti túrutai enentáimpratniuitrume atumsha. ³⁷ Atumjaj shuar “Yus-Chichaman tuke etserniuitjai” enentáimtumatsush. Tura chikich shuarsha “Yusa Wakanj tuke winia akuptaiti” enentáimtumatsush. Nu shuarka wi áatjarmena nuna enentáimprar “nekas Yúsnan tíniuiti” tiartí. ³⁸ Tu táchakuinkia niisha ántar ániawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjaj unuimiatsuk chichastincha surimkiarap. ⁴⁰ Túmaitiat antukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

³ Winia ujatkamunmasha ujakmajrume. Nu chichamsha ashí nankaamas úuntaiti. Júiti nu chicham: Ii tunaarín asakártasa Kristu jarutramkamiayi, Yus-Papinium tana núnisan.

⁴ Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan. ⁵ Nantakisha Pítrun wantintiukmiayi, nuyá ni akatramurín wantintiukmiayi. ⁶ Nuyánka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru ániawai tura untsurí tuke pujuiniawai. ⁷ Nuyasha Sántiakun tura nuyá ashí ni akatramurín wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa ajn. ⁹ Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramurínjai tíchamniatjai. ¹⁰ Antsu Yus ti shiir anentak winia enentáiruí pujurtus péñker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáiruí takaakui ashí ni akatramurín nankaamas takasuitjai. ¹¹ Tura wi takaakuisha tura nu takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

Jákaru nantakiartatui

¹² Iisha “Kristu jakamunmaja nantakniuiti” tu étsereaji. ¿Itiur nuikia shuar jakamunmaja nantakchatniuiti tuinia? ¹³ Jakamunmaja nantakchatniuitkiuinikia nuikia Krístusha nantakchaiti. ¹⁴ Tura Kristu nantakchaitkiuinikia ii uajnia nu penké ántraiti, atumsha Kristu enentáimtarmena nusha ántraiti. ¹⁵ Núnisaitkiuinikia iisha “Yus Krístun iniantkimiayi” tákur waitruamji. Iis, nekas jakamunmaja nantakchamniatkiuinikia nuikia nekas Yus Krístun iniantkichiuiti. ¹⁶ Jaka nantakchatniuitkiuinikia imia Krístusha iniantkichmaiti. ¹⁷ Tura Kristu iniantkichmaitkiuinikia átum Kristu enentáimtamusha penké ántraiti. Tunaarmisha asakárchamu ániawai. ¹⁸ Núnisaitkiuinikia Yus-shuar jákaru ainia nu tuke menkakarú ániawai. ¹⁹ Iikia Kristu enentáimtusar tuke Nijijai shiir pujustin nákaji. Tura aya jú nunkanam pujustinaiitkiurkia Kristu ántar enentáimtakrin ashí nankaamas waitnentrampratniuitji.

²⁰ Antsu imiankas Kristu jakamunmaja nantakniuiti. Ashí ukunam jakanmaja tuke jákashtinian nantakiartatna nuna Nii émtukuiti. ²¹⁻²² Yaunchu Atañ tunáa túramtai ashí shuar jákatin ániawai. Núnisan yamaikia Krístujain tuke atakka jákashtinian nantakiartiniat. Iis, chikichik áishmanjain jákatin nankamnamiayi. Nuka Atañkauyayi. Núnisan chikichik áishmanjai nantaktin nankamnamiayi. Nuka Krístuiti. ²³ Yus wakerana nuí Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarín júuktinia áintsan iniantkittiwai. ²⁴ Nuinkia mash amuukattawai. Nuí Kristu ashí kapitániasha, ashí akupniuncha, ashí núnisan jú nunkanam frunna nunasha nupetak emesrattawai. Krístusha ashí mash ni Aparín susattawai. Tura Yus Apa ashí akupin átatui nuikia. ²⁵ Iis, júnisán átatui. Emka Yus Apa ashí ni nemasrín nupetak Krístun susattawai akupin atí tusa. ²⁶ Tura ni nemasrín nupetak ashí amúamunam jákatniuncha nupetakattawai. ²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirín Krístun nekas susamtai Kristu nuikia ashí akupin ajas atak ni Aparín mash awantuki núnisan surumaktatui. Nuinkia Yuska tuke ashí nankaamantu átatui.

²⁹ Ayu. Tura shuar jakan enentáimtusar imiantinnisha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ¿urukamtai tuke jániñkiaruitai? Nantakchatniuitkiuinikia ánta wáitsaintji.

³¹ Atsá, penké áintsachuiti. Nu asamtai átum ii Uuntrí Jesukrístu enentáimtakrumin wi

shiiir enentáimtajrume. Tura wisha tuke tsawantin ti itiuurchat pujakun jákatniua áintsan pujajai. ³² Jakamunmaya nantakchatniuitkiuñkia wi ántranak kajen shuarjaj Ipisiunam máaniakuitjai. Maa, uunt yawáa áinis kajen áрмаi. Wats, núnisaitkiuñkia antsu “yurumar nampektai, kashin jákashtatjik” titiai nuikia.

³³ Ananawairap. “Pénkeraitiam yajauch shuarjaj tsaniñkia wekakmekka yajauch máatrattame” tiniu áiniawai. ³⁴ Tunáa ikuakrum péñker wekasatin shiiir enentáimpratarum. Iis, shuar Yúsán nekainiachu tuke awai. Atumin natsaḡaruk tusan tájarme.

Iniantkimi ayash átatna nu

³⁵ Shuarsha inintruschaimpiash ḡjákarusha itiuurak nantakiarat. Nantakiarsha warí ayashniak takusarat? ³⁶ Enentáimtsuk inintraui. Jínkiaá araamsha jaka áintsan amúatsuk. Túrayat tsapaatsuk. ³⁷ Tsapaitniurjsha araatsme antsu trikiu jínkiaichisha chíkich áraaka jínkiaichirjsha araame. ³⁸ Nuyá tsapaakuisha Yus wakerana núnisan ní tsapaitniurjñcha súawai. Tura anḡkant anḡkant tsapaitniurjñkia súsaiti. ³⁹ Núnisan ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai. ⁴⁰ Nayaimpiniam yaa írunui tura ju nuñkanam írunna nujaj nusháa ímtin áiniawai. Nayaimpinmayasha nunḡkayasha shíirmari nushaiti. ⁴¹ Etsá wincharjsha nantunusha yáanusha mash nushaaiti. Nuamtak yaaksha chikicha wincharjñkia chikich-najajñkia nushaaiti. ⁴² Núniskete jaka nantaktincha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti.

Ukunmanḡka, yaraman Atanḡka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. ⁴⁷ Emka áishman nunḡkajaj najanam asa nunḡkayaiti. Ukunmaya áishmansha ii Uuntri Kristu asa nayaimpinmayaiti. ⁴⁸ Atanḡka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai. ⁴⁹ Yamái juyá áiniakur ukunam nayaimpinmaya ayashtin ajastatji.

⁵⁰ Juna tájarne, yatsuru. Ayash númpentin asa nayaimpiniam, Yus akupeana nu, wayachminiati. Iis, káutañkia káurchatniunam wayachminiati. ⁵¹ Yaunchu uuḡkma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura pusarí muíttsarniñ ti wárik yapajniáttaji. Tura ashí amuukai tusa umpuartatui. Nú umpúamunmasha Yus-shuar jákaru ainia nu atak jákashtinian nantakiatatui. Iisha nuñ jayajniáttaji. ⁵³⁻⁵⁴ Jú kautaiñkia yamá jákatniuitiat káurchamnia ajastiniati. Túrashá jákachmin átatui. Nu túrunamtaisha Yus-Papinium aarma uminkiatawai:

“Jákatniun Yus nupetak amukuiti. ⁵⁵ ḡItiur jákatjik yamaikia. Jákatniusha itiuur nupet-tamkan mantamataj?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti. ⁵⁷ Yamái antsu ii Uuntri Jesukristu túramujaj jákatniunka Yus nupetkaiti. Tura incha nujaj uwempratniun amaaku shiiir yúmiñkajai.

⁵⁸ Nu asamtai, aneamu yatsuru, kakaram ajasrum yawetsuk nanḡkaamas Yusa takatri takastarum. Ii Uuntri Kristujaj tsaniñkia takaarum nuka penḡ ánrachuiti. Nu paant nékarme.

16

Yusa kuitri irurtin

¹ Yusa kuitri irurtinkia, Yus-shuaran Karasea nunḡkanam tímiaj núnisnak atumniasha tájarne. ² Ashí tumiñtin, Yus súramna áintsam akankam ikiusta. Nújajñkia wi jeattaj nuñ yaunchu akankamu mash irurmin átatui. ³ Nuñ jeanča átum anaiyarmena nu shuaran papijaj Jerusarénum akupkattajai. Tura atumí kufrumin aisha ii yachin sústartatui.

⁴ Wishá wéminiatkiuñkia wijaj wéartatui.

Papru irastatna nuĭ

⁵Wi Masetúnia nuṅkanam wétiniaitjai tura nuyá Kurintiunam jeattajai. ⁶Nuiſha untsurĭ tsawant pujuschatjash. Ishichik nantusha wéchanmianum pujuschatjash. Tura wi atak wéakui atumsha yáintkiarum shiir akuptukchattarpash. ⁷Aya wárik nanĕkaamaktinian nakitiajai. Antsu Yus wakerakuṅkia untsurĭ tsawant atumjai pujustaj tajai. ⁸Tura juinĭ lpiſiunam pintikustis nampernum pujustajjai. ⁹Juṅkia Yusa takatrĭ tí shiir takastin awai. Tura untsurĭ shuar wi takaamun nakitiainiawai.

¹⁰Timiutéu nuĭ jeamtaiṅkia, shiir awajsatarum; sapijmiakain. Niisha wijjai métek Yusa takatrĭn takaawiti. ¹¹Nu asamtai nakitrairap. Antsu yáinĕrum winí shiir akupkatarum. Chĭkich yachijjai tatí tusan nákejai.

¹²Apurusnasha chĭkich yachijjai winí írmasartí tusan ti seamjai tura penĕsha nakiar-mai. Kame nii anĕkant aku nuĭ winishtimpiash.

Áujmamsamu

¹³Aneara tariarum Yus nekas enentáimtustarum. Áishmaṅchakaitrum, kakaram ajas-tarum. ¹⁴Aneṅkartamujai mash túratarum.

¹⁵Ayu, yatsuru. Estepanasa shuari ashí emka Akaya nuṅkanam Yus-shuar ajarman nékarme. Niisha Yus-shuaran yáintajtsar tuke takainiawai. ¹⁶Niisha tura ashí niijjai métek yáinĕiar takainia nú shuar seatmana nu tuke túratarum. ¹⁷Estepanassha Jurtunátusha Akaikiusha atumĭya táarmatai shiir waraajai. Átum yajá pujakrum tujintiarmena nuna túrawarmai. ¹⁸Niisha winia shiir enentáimtikrurarai. Núnisaṅ shiir enentáimtikramprat-tarme. Nuní aents tuke shiir enentáimtustiniaiti.

¹⁹Asia nuṅkanmaya Yus-shuar amikmáatmainiawai. Akirasha ni nuwe Prisirajajsha ashí Yus-shuar ni jeen Yus-Chichaman irunturarusha Jesusa náarĭjn amikmáatmainiawai. ²⁰Ashí ii yachisha amikmáatmainiawai. Nuámtaksha shiir awajnaistrum amikmáani-atarum.

²¹Wi Papru asan júchiniak winia uwejrui áaran amikmaajrume.

²²Ii Uuntrĭ Jesukrĭstun aneachuka yajauchiniam yumĭnkramu atí. “Ii Úuntrĭ, wari tatá.”

²³Ii Uuntrĭ Jesukrĭstu yainmakarti. ²⁴Jesukrĭstunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarne. Kame ashí Akaya nunkanam Yusna ajasurmena nunasha áatjarne. ²Apa Yussaha, ii Uuntri Jesukristusha shiir enentáimturma ásar imiatkinchanum tuke shiir pujustinian yáin-makarat tusan wakerajrume.

Papru wáitsamurí

³Ii Uuntri Jesukrístu Aparí, ii Yusrj ana nuna naari uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsañtamji. ⁴Ii wáitajnia nuí Yuska in atsañtamji. Tura in atsañtamjia nútiksarik iisha chíkich shuar wáitainia nuna atsañkrarat tusa túrutmaji. ⁵Warí, Kristu wáitsamurí núkap pachiinkiaitjia núnisrik ni atsañkramurín núkap pachiinkiaitji. ⁶Tuma asamtai, wáitajnia nu, Yusa uwentikrampratniurí tura ni atsañkratniurí atumsha takustarum tusar wáitajai. Tura Yus in atsañtampramjia nu, Yusa uwentikrampratniurí tura ni atsañkratniurí átum takustarum tusar atsañkramuitji. Wats, átum uwentikramu tura atsañkramu asarum, ii wáitsajnia nútiksarmek wáitayatrurum shiir enentáimsarum katsuñtramniaitrum. ⁷Tura “túrattawai” tu enentáimtajrume. Warí, átum iijjai métek wáitsaitrum. Núnisañ iijjai métek Yus atsañtamtsurmek.

⁸Yatsurtiram, iikia Asia nunkanam ti itirchat wáinkiamjia nu nekaatarum tusar wakeraji. Imiá itirchat wáinkiar iikia katsuñtratin jeachmaji. ⁹Nu itirchatnumiá “iwiaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji. ¹⁰⁻¹¹Jakannia itirchatnumiá Yuska uwentikrampramji. Tura yamaisha uwentikrampratajsa pujur-tamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

Kurintiunam wau wéchatniun Papru ujakmiania nu

¹²Yatsurtiram, jú nekaatarum tusar wakeraji. Jú nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairíjjaiñ wekaichamji. Antsu Yus in waitnentra asa péñker wekasatniun yainmakmaji. Nu nekaar shiir enentáimji. ¹³Áatjarmenta nu páantaiti. Átum áujsarum nekaatin jearmenta nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴Ishichik nekayatrume nu núkap tuke nekaki wetarum tusan wakerajrume. Nuñkia Jesukrístu tántia nú tsawantai átum winia shiir enentáimtursattarme. Tura átum péñker wekasa asakrumin shiir enentáimtustatjarne. ¹⁵Tura ii shiir enentáimtunij nuna nékakun ataksha Yusá waitnenkartutairí nekapsak tusan ataksha atumjín irastinian wakerim-jai. ¹⁶Masetúnia nunkanmaani wéakun írkuta nankaikittjarum tusan enentáimmiyajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. ¹⁷Nuñkia zুরুkamtai túrachmaj? ¿Péñker enentáimtsuke “wetajai” tímiaj? ¿Wi Yus-shuarcha nunisañ, jimiara chichamtiníaiti, tú enentáimtursarumek? ¹⁸Núchaiti. Yus tana nuna tímiatrusan umiana nútiksarik iikia ii chichame umiktai tusar wakeraji. Jú chichamaik, “Ee, atsa” tátsuji. ¹⁹Wisha Serpanujai Timiutéujai Yusa Uchirí Jesukristunun ujakmajrume. Niisha jú chichamaik, “Ee, atsa” tíchaiti. Antsu nii tana nuna tuke umíawai. ²⁰Niijjajsha Yus tana nu tímiatrusan uminiui. Tuma asamtai Jesukrístu enentáimtakur “nii tana nuna

nekas túrattawai” tu enentáimji. Tu enentáimsar Yusa naari shiir awajeaji. ²¹ Atumniasha incha ikiakátmajnia nu Yúsaiti. Krístunu ajasu asakrin túrutmajai. Tura anaitiamak Niiniu awajtamji. ²² Tura ukunam ii achiktatjinia nuna, nekas amastatjai tusa Yus ni Wakanin ii enentáin apujturmajai. Nujai Níiniuitji tusar paant nékaji.

²³ Atumín itiruchatan wáinkiajj tusan nakitiakun atumí péprurín Kurintiunam jeachmajai. Wáitrakuin_hka “Yus iirsati” tajai. ²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusmaajai kakaarme. Antsu nekas warastarum tusar wakeraji.

2

¹ Tuma asamtai, atak kúntuts awajsajjrum tusan nakitiakun, “atumí tunaari íwiartsurminin jeashtatjai” tímiajai. ² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume. ³ Wi jeakun atumí tunaari íwiartsurminin kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin. ⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵ Túrasha kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasajj tusan “ishichik” tajai. ⁶ Kame nu áishman_hkan iruntra chicharkarum wáitkiasmarum nuke máakete. ⁷ Antsu yamaikia tsankuratniitume. Shiir enentáimtikratniitume. Niisha imiá kúntuts pujus nú arant ajasáin tusarum túratniitume. ⁸ Túrakrum nii nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átum tsankurearmena nú shuaran wísha núnisnak tsankureajai. Tura tsankuratin ákuin_hka, wi tsankurajna nu ashí atumnian enentáimtusan, Krístu ímmianum túrajai. ¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti pépker takastinian wáinkiamjai. ¹³ Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áujsan ikiukiaran Masetúnia nuñkanam wémiajai.

Krístujai nupetkamniaitji

¹⁴ Krístu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúmin_hsa pujajai. Tura kukuj¹ kuñkúakui, ashí nékainia núnisañ ii etserkamujai Krístu shiir chichamen Yuska ashí aentsun nekamtikiainiawai. ¹⁵ Krístu in pujurtamu asamtai Yusjai nekapsamka iikia kuñkúaji. Ii kuñkúajnia nuna uwemtikramu ainia nusha tura uwemtikrachma ainia nusha nekaprannia ainiawai. ¹⁶ Meñkakatniunam weena nuka ii kuñkúajnia nuna jakamnia mejea nekapramji. Tura iwiaaku átinium weena nuka iwiaaku átin kuñkúa nekapramji. Maa, nu túratniuncha ¿yaki jeá?

¹⁷ Kame untsur² aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus ímmianum anantsuk esetsar étsereaji.

3

Yamaram chícham najanamu

¹ ¿Nu tákurnin_hka, “ataksha niñki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman_h nekas Yus-Chichaman etserin áiniawai” tusa papí aarma atumin iniaktustinkiaitai³? ¿Chíkich iniaktustin nú papí atumin seatniukaitai³? ² Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisañ ashí aents atumí túramurj wáinkiar ii etserkamaj nu, Papru nekas Yusa takatrin takaawai tusa nekaamnia áiniawai. ³ Iis, tátsujak. Papí aarma núniskektrume. Nu

papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakaníjjai áarmaiti. Kayanmasha áarchamuiti; antsu shuara enentáin, auka, áarmaiti.

⁴Kame Krístunu asar, Yus enentáimta asar, nusha tímíniatiji, taji. ⁵Ju nékaji; imia iik penké tujinkiaitiji. Antsu ii túrajnia nu Yus ni kakarmarín súramkurin túrajni.

⁶Yamaram chichaman Yus najanamia nuna, incha péñker etserkatniun suramsaitiji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakaníjjai yamaram wekasatniun súramji. Yusa kakarmaríjjai nu chicham étserji. ⁷Yaunchu chichamnaka kayanam aar Yus Muisaisan susamiayi. Susamia nui, Muisaisa yapi ti wincha ajasmiayi. Túrunamtaí Israer-shuar ni yapin ístinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiaku, nu chichamsha aya tuke jákatniunam shuáran ejemiayi. Túmayataní winchajai susamuyayi. ⁸Tura yamaram chichaman Yusa Wakaní súramna nu, nujai nankaamas shíiraiti. ⁹Kame mesertinnium ejeana nú chicham winchajai susamuyayi. Tura nujai nankaamas Yúsnum ejeana nú chichamka Yus ímmianum péñkeraiti. ¹⁰Iista; yamaram ana nu imiá shiir asa, yaunchu wincha amia núnaka mushatmamtkiui. ¹¹Núkap arur pujuschamnia nu wincha áchamkia. Kame tuke átinia nuke nujai nankaamas shíiraiti.

¹²Nu nékakur ti paant étserji. ¹³Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiaráin tusa tarachjai ni yapin Muisaiska nukumakmiayi. ¹⁴Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áusam antukar nekaatniun tujintiainiwai. Kristu enentáimtuschatin ni enentáin nukukma nu yapajíáchmaiti. Aya Krístujai nuka yapajíámniaiti. ¹⁵Yamaisha Muisaisa áarmarín áusar nékainiatsui, ni enentáimmiarij nukurkamu asa. ¹⁶Tura aencha ni enentáí yapajíá Uuntna ajasmataikia ni enentáimmiariya nukurkamu ana nu jusamuiti. ¹⁷“Uunt” tájinia nu, Yusa Wakaníiti. Uunt Yusa Wakaní pujana nuj ankant ajastiniaiti. ¹⁸Nuke asamtaí, iisha ii yapi tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

4

¹Yus in waitnentrama asa ni chichamen etserkatniun ataktamsaitiji. Tuma asamtaí yawetsuk takaaji. ²Uuka túratin ana nuyá tura natsanmai ana nuyasha kanakmiaji. Ananákatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túrajni. Wi tájana nuna Yus nékawai. ³Uwempratin Chicham ii étserjini nu páantaiti. Áyatik menkakatniunam weena nu “páantchaiti” tuíniawai. ⁴Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimpraráin tusa ukustawai. Nu Kristu Yúsán ímiatrusan nakumui. ⁵Iisha étserkur, Jesukristu ii Úuntriinti tu étserajaji. Iikia atumí úuntriinti tátsuji. Antsu, Jesus ii uuntri asamtaí, atumí yáintriinti, taji. ⁶Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijai ni shiirmarín, Jesukristu iniakmia nuna, ashí aents nekaawarat tusar Jesukristunun étserajaji.

Yusak enentáimtusar wekasatin

⁷Nu tsáapin imiá péñker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtaí, warí, kakaram ájinia nu Yúsnumiáchukait. Ii ái nuna nekaawarat tusa Yuska ni tsáapnintrin ii ayashíin ikiusuiti. ⁸Tuma asamtaí ii itiuichatri árentmaku árinij tuke jiinkimniatiji. “Itiurkatjik” taji, túrasha Yus yáinmajaji. ⁹Aents pataaturmainiakrincha Yus ikiurmatsji. Emesrataj tukamá tujintiainiwai. ¹⁰Kame Krístun máataj tusa tuke wakermia núnisan incha tuke mantamataj turamainiaji. Túrasha jákachu asar Kristu kakarmari ii ayashíin iniakmaji. ¹¹Iisha Jesusna ajasu asar

wekaajnia nu*j* tuke tsawant tsúumainium jasattuk ajaji. Túrar ii ayash*j* jakamniaitiat nu ayashnium Jesusa iwiaakmar*i* paant iniakmaji. ¹²Iisha Yus-Chicham étserkur ii ayashin*j* jasattuk ajaji, tuma a*j*n atumsha umikiu asarum nekas iwiaaku atin wáinkiar*me*.

¹³Yus-Papinium yaunchu áarmanum: “Yúsan enentáimtusmajai, tuma asan etserkam-jai” tátsuk. Iisha núnisrik Yus enentáimtusar wekaaji. Tuma asar étserji. ¹⁴Yus kakarmaiti. Uunt Jesusan jakamunmayan iniantkimiayi. Incha núnisa*n* Jesus*j*ai iniantamkittiaji. Tura atum*j*ai métek ni pujamunam juramkittiaji. Nusha paant nékaji. ¹⁵Atumsha untsur*i* aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yumi*n*sarum pujarme. Nuj*ai* Yusa naari uunt awajsamuiti. Nu nekaar wáitsatin ashamatsji. ¹⁶Tura yaweatsji. Ii ayash*i* amuiki wéakuisha ii enentáin*ki*a yamaram ajaki wéawai. ¹⁷War*i*, ukunam tuke shiir pujustajinia nu enentáimtakrikia, ju nu*n*kanam wáitajnia nu, ti itirchataitiat, aya yamaia*ya* asa tiikia itirchatchaiti, tura wárik na*n*kaamawai. Túrash*a* ii itirchatr*ij*ia*i* Yuska ti shiir ana nuna amuukachmin ana nuna núkap suramsattaji. ¹⁸Tuma asamtai wáinjinia nu ti enentáimtsatji. Antsu wáintsujnia nu nekas enentáimtsatji. Wáinjinia nusha aya yamaia*ya*iti. Antsu wáintsujnia nuka tuke amuukachminiaiti.

5

¹Wats ju nékaji. Nayaimpiniam ii shiir pujustinian amuukachmin ayashin Yus najananun ikiurtamsaitji. Aents najanachmaiti nu. Tuma asamtai ii ayash*i* emesnakuisha war*i* itirtamajia. Nuka aaka núnisa*n* amuukamniaiti. ²Ju ayashnium pujusar wáitaji, taji. Yamaram ayash nayaimpiniam pujana nu achiktai tusar wakeraji. ³Ayashtichu ajasai*j* tusar, yamaram ayashtin ajastaisar wakeraji. Push*á* núnik yamaram ayash in nukurmaktai tusar wakeraji. ⁴Tura ju*i* ayash*j*ai pujusar wáitsar pujakur shiir enentáimtsuji. Arut push*i* áiktinia núnisrik ju ayash ikiuktiaitsar tátsuji. Antsu yamaram push*i* entsartinia núnisrik yamaram ayashnium tuke pujusm*i* tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustaji. ⁵Yamaram ayashintin ajastinian iwiarturmaruitjnia nu Yúsaiti. Tura nekas túrattajai tusa ni Wakan*n* suramsaitji.

⁶⁻⁷Ju nékaji. Ju ayashnium pujajnia ju*n*ki*a* Uunt Jesus*j*ai pujatsji. Tuma asamtai, wáinjinia nu ti enentáimtsutuk Yus enentáimtusar tuke shiir enentáimsar wekaaji. ⁸Tura ju ayashniumia j*i*nkir Uunt Jesus*j*ai tuke pujustaisar wakeraji. Tura túrattajai tu nékaji. ⁹Tuma asamtai ju ayashnium pujakrish*a* tura ju ayash ikiukrish*a* Uunt Jesus tuke waramtiksat*ai* taji. ¹⁰War*i*, ju ayash*j*ai ii túramajnia nu ujakam, “pénkeraiti”, “yajauchiiti” Kristu turutit tusar, ash*i* iisha Uunt Kristui jeatniuitji. Tura ii túramujai métek akirmaktatji.

*Kristun waramtiksat*aj* taji*

¹¹Tuma asamtai ju nékaji: Uunt umirkashtin ti tsúumainti. Nu nekaar ash*i* shuar Yus-shuaran awajsat*aj* tusar ti takaaji. Tura incha Yus nékarmaji. Tura ii túramur*i* átumka atum*i* enentáin paant nékarme, taji. ¹²Ataksha, “wi pénkerait*aj*” tusar nu tátsuji. Antsu, ii túramu neká*a* asakrumin enentáiniam ana nuna enentáimtsuk aya páatkae nu*j*ai warainia nú shuar tsanumprutmainiakui yaintkiatarum tusar taji. ¹³“Wáurkaiti” turamainiajiash. Nusha war*i*, itirtamajia. Ash*i* túrajnia nu, Yus aneakur tura atumin yáin*ta*i tusar túraj*i*. ¹⁴Kame ash*i* ii túrajnia nu Kristu anenkraattair*ij*ia*i* túraj*i*. Kame ju nékaji: Kristu ash*i* shuaran jaruku asamtai, Yus ímmianum ash*i* iisha jaka núnisaitji. ¹⁵Kristu ash*i* shuaran jaruk nantarkimiayi. Tuma asamtai Kristunam iisha iwiaaku pujajnia ju*i*, iik wararmamsuk, Kristu umirkatniuitji. ¹⁶Tura yamaisha aya ni ayash*i* firsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayash*i* firsar “Kristu yajauchiiti” tu enentáimsamajia. Tura yamaikia yapaj*á*r, esetsar enentáimkiur “Kristu Yusa Uchir*ín*ti” taji.

*Kristuj*ai* yarmarmait*i**

¹⁷Tuma asamtai, Kristunu ajasúka yamaram najanamuiti. Yaunchu enentáim-tair*i* menkakayi. Antsu núnaka íkias ni enentáimtair*i* nekas yarmarmaiti yamaikia.

¹⁸Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. ¹⁹Yuska in tunaarínniutin asutiámatniun nakitiak Krístujai nawampramkamiaji. Tura incha Yus-shuartin nu ujaktinian ataktamsaitji. ²⁰Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náarijn “túratarum” tájarme. ²¹Krístuka tunaan penké túrachmiayi. Túmanak ii tunaarijn Yus Krístun makuumiayi. Nuna tura Krístunam makuuchmin awajtamsamiaji.

6

¹⁻²Ni Papiriin Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrjn pachitkajinia nu, Yusa anenkrattairi péñker achiktaram tusar seajrume. ³Tura “Papru etserkamuri ánrtraiti” tíarain tusar chíkich yajauch enentáimtiktsuk péñker wekaaji. ⁴Nekas Yusa takarniurñtji nuna paant nekaawarat tusar wáitiayatrik, atsumayatrik, itiuurchatnum pujayatrik shiir katsunteaji. ⁵Ju itiuurchat wáinkiamji: katumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiuurchat takasmiaji; kanutsuk pujumiaji; tura tsukasha ti tsukammiaji. ⁶Tunáa nakitrar wekaaji; Yus-Chicham unuimíatraitji; shiir enentáijjai katsuntrar wekaaji. Chíkich shuar péñker awajeaji; Yusa Wakanj pujurtamkurin shuar nekas aneaji; ⁷nekas chicham ana nu étseaeaji; tura Yusa kakarmarjsha nú paant iniakmaji. Tura ni nemasrjn nupettukajjn tusa suntar ni tantarjn júana núnisrik iisha ii nemasrj íwianch nupettamkajj tusar ii Yusrj tuke umirkar wekaaji. ⁸Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai” turamainiakrincha tuke nekas chichaaji. ⁹“Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniurñtiaj nu ashí nujai paant nekaamniati. ¹⁰Kúntuts pujayatrik ii enentáinkia waraaji; kufrinchiatrik chíkich shuar kufrintin awajeaji; penké takakchiatrik ashí wáinji.

¹¹Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹²Wikia atumin paant chichastajtsan wakerajrume; antsu átumka anenttsuk paant chichastin nakitrarme. ¹³Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujakatarum tusan seajrume.

Yusa jeentji

¹⁴Yus-shuar Yus-shuarchajai tsaninñtinian enentáimsashtiniaiti. Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait? ¹⁵¿Krístuka uunt iwianchjai nawamnaikiamniakait? ¿Yus-shuar Yus-shuarchajai tsanin shiir pujusminkiait? ¹⁶¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Niñki ni Papiriin juna tichamka:

Niijjai tsaninñkia pujusan, niijjai wekasartatai tura ni Yusrj átatjai; tura niisha Wí aents ajasartatui.

¹⁷Tuma asamtai junasha tímiayi:

Nii matsatainia nuyá jínkitiarum, tura niija kanaktiarum, tawai Uunt Yus; tura yajauch ana nu antinñkiarap. Túrakrumninkia awayattajrume.

¹⁸Tura atumí Apari átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

7

¹Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashj tura ii enentáisha yajauch ajasajjn tusar, ashí tunáa ana nuyá kanaktiniaitji. Túrar

“Yusak nekas ii úntrinti” takur, ii ayashisha, ii enentáisha takamtsuk tuke tsawant Yus íktustiniaitji.

Kurintiumyá shuar enentáimprarmatai Papru warasmiayi

² Ataksha nawamnaikiatai. Iikia shuar yajauch awajsachmaji; yajauch jintintrachmaji; anañkachmaji. ³ Makuutai tusan nuna tátsujai. Antsu nuik tíchamkajrum, iwiaku pujakrishá jakarsha átumka ii enentáin áchitkiarme. ⁴ Araantusuk áatjarme; shiir enentáimjai. Itiurchatnum pujayatnak, atumin enentáimtusán enentairuí kakaram enentáimsán waraajai.

⁵ Juí Masetúnianum penké ayamprachmaji. Antsu ti wáitsamji. Áentsnumiá itiuurchat wáinkiamji, tura ii enentáijíainkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai. ⁷ Tura átum nii ikiakármarmna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

⁸ Papí nuik akupkamaj nu áusarum kúntuts enentáimprarme; núnaka nékajai. Túrusha ii akupmainchu túraitjai tátsujai. Eta, nuikkia tímiyai, túrusha yamaikia tátsujai. Papí áusarum ishichik kúntuts enentáimprarmna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprakrum atumí enentáí Yusjai yapajíá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papíjái yajauch awajsachji. ¹⁰ Nekaatarum. Yus wakerana nútiksán kúntuts katsunteakka ni enentáí Yúsnum yapajíáwai. Nuínkia ni tunaariya uwempraiti. Nuka “túrumainchu túraitjai” tíchamniaiti. Antsu Yusán enentáimtusuk kúntuts pujakka ni enentáí yapajíáshtatui; yapajítsuk ni tunaariya uwemtsuk jakattawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esettsarum enentáimtusurme. Atumí túramuri ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. ¹² Kame yajauchin túramia nuna ni tunaarin iniaiat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraaji. ¹⁴ Atumin shiir enentáimtajrumna nuna Titiu ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiarjume. Núnisan atumnian Titiuin tímiay nusha nekasauyi. ¹⁵ Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatun, nii péñker tati tusarum pachischarm. Tura nii taa seatmarm nu umikiurme. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsán waraajai.

8

Yus-shuarti ii kuitri súsatin

¹ Yatsurtiram, Masetúnia núnkanmyá Yus-shuaran Yus waitnentainia nuna yamáí ujakatjarme. ² Ti itiuurchatnum nekapsamu ainiawai. Túmayatun warainiawai. Tura ti kuitrincha áiniayatun emeentutsuk kuitrinniua núnisan suiniawai. ³ Juna wi paant nekaan ujaajrume. Niisha wakeramujai súsatinuun jeainia nuna súiniawai; tura nú nankaamassha súiniawai. ⁴ Yus-shuaran kuitrinchan súsartaitsa ti wakeruiniak, nu túratniun ti seatmarmaji. ⁵ Tura ii enentáimmiay nú nankaamas túrawarmiayi. Emka Yúsnum niñki sumamawarmiayi. Tura Yusa wakeramuri túratatjai tusar incha “yáintajrume” turammiaji. ⁶ Tuma asamtai, “Masetúnia nunkanam kuit júuktin nankamamamna nu,

Kurintiu peprunmasha amukta” tusar Titiu seamiyai. ⁷ Atumsha ashí péñker túratin ti nékarme. Yus enentáimtustincha, unuiniartincha, ju nunñanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrincha ainia nu achikariat tusarum Titiu támatai núkap susatarum.

⁸ Kame atumí úuntria núnisnak akupeatsjarne, túratniuitrume tusan. Ansu chíkich shuar ni kuítrin susartasa ti wakeruinia nuna atumin ujakan, atumí anenkrattairi nekaspashi tusan nekapsatajtsa pujajai. ⁹ Li uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisan ajasmiai. Ju nunñanam kuítrincha núnis ajasmatai átum nayaimpiniam kuítriniak tusa túramiai.

¹⁰ Juna enentáimjai. Nuik uwitin, “yáñtatji” tíchamkarum. Tura nu túratin ti wakerimiarme. ¹¹ Nanñkamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Istarum. Ni kuítrin Yúsan nekas susatajtsa wakerakuñkia, nii jeana nuna susat tusa Yus wakerawai. “Jeana nú nanñkaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Ansu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitrume. Ukunam chíkich tsawantaj átum atumashtarmeash. Nuñkia niisha atumin suramsarti. Nu túratin ákuñkia ashí métek takustin átatui. ¹⁵ Yusa Papirijn yaunchu áarman núnis tátsuk:

Núkap takusmia nu ampírchamiyai; tura ishichik takusmia nu atsumachmiyai.

Titiu chíkich Yus-shuarjai Kurintianum wetin ármiai

¹⁶ Tura wi aneajrumna núnisan atumin aneatniun Yus Titium susamiyai. Tuma asamtai Yúsan yuminsan pujajai. ¹⁷ Iis, wi takui wétinian wakerimiyai. Tura nú nanñkaamas, atumin anenma asa, ni enentáijain wéawai.

¹⁸ Tura chíkich Yus-shuar Titiumjai akupkatajtsa pujaji. Nu shuar Yusa Chichamen ti peñker etserainakui, ashí Yus-shuar iruntramunam nin péñker áujmatainiawai. ¹⁹ Tura nu shuarnaka ii tsaniakmarí atí tusar ashí Yus-shuar iruntramunam nuna anaikiarmiiai. Iijjai kuítian jukiarti tusar anaikiarmiiai. Iis Yusa náarin ashí aents uunt najanawarat tusar tura ashí shuar atumí tsanjarin nekaawarat tusar nu takat túratsjik. ²⁰ Iis, ju kuit ii jukittiajnua nu, núkap asamtai, aents tsanumprutmawaraj tusar, Titiumjai tura ju shuarjaisha wéaji. ²¹ Yus ímmianumsha, aents ímmianumsha ii naka wekaajnia nuna nekaawarat tusar túrajai.

²² Nu jimiará shuarjai chíkich Yus-shuar akupeaji. Yusa takatrin takastasa ti wakerana nu nekas nékaji. Tura átum yáñtin ti wakerarmena nuna nekáa niisha atumijn jeataj tusa ti wakerawai. Nuna túmak Yusa takatrin takastinian wakerana nuna paant iniaimawai. ²³ Tura aisha chíkich shuar Titium nekaataitsar aninruiniakuisha, “Titium Papru tsaniakmarinti. Incha yáinmaktajtsa Páprujai takaawai” titiarum. Chíkich Yus-shuaran nekaataitsar aninruiniakuisha, “Yus-shuar akupkamu ániawai, tura Kristu náarin shiir awajin ániawai” titiarum. ²⁴ Tura atumí anenkrattairi ashí Yus-shuar nekaawarat tusarum, nu shuar péñker itiaatarum. Nu túrakrum, atumnia ii shiir tímiyaj nu nekasaiti tu iniaiktustatrume.

9

Yus-shuaran kuítrinchan súsarmia nu

¹⁻² Kame átum Yus-shuar kuítrincha súsatin wakerarme; nuna nékajai. Tuma asan núnaka áatrachminiaitjarne. Atumsha súsatin wakera asakrumin wi nunasha shiir enentáimnsan. “Akaya nunñanmaya shuar nuik uwitinia wakerusmatak yáñtinian wakeruiniawai” tusan Masetúnianmaya shuáran ujaajai. ³ Tura “kuítniasha súsatniun ti wakeruiniawai” tímiyaj nuna, “wáitiati” tíarain tusan nakitijajai. Tuma asan, kuit susatajtsa wakerarum nu iwaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmaya shuarjai atumijn jean, kuit súsatin tímiarmena nuna iwarachman wáinkian natsaraj tusan, tura atumsha natsarairum tusan túrajai. Warí, “súsatniun ti wakeruiniawai” tuke tu wéatsjak. ⁵ Nu tuma asamtai,

au takui súarme tu enentáimsarajin tusan ju Yus-shuaran emka akupenajai. Niisha nu kuítian iwaratniun yáinmakarti, tajai. Nuinkia wisha Masetúnianmaya shuarjai ukunam jeawakrin, nu kuit atumsha nekas atumén enentájjiaink¹ súatin wakerarmena nu nekaamnia átatui.

⁶Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súatniusha núniskete. ⁷Tura ashí shuar ni enentáin enentáimsana nunak susati. “Nakitiyatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai. ⁸Ashí péñker ana nuna suramsatniun Yus tujintiatsui. Nujají átum atsumashtatrumé. Tura chikichan yáintin núkap takustatrumé. ⁹Yus-Papinium ju aarma awai:

Kuítrinchán núkap susayi;
nuna tura, tuke túratin átatui.

¹⁰Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujají péñker túratatum tusa araakrumin ipiampartatui. ¹¹Tuma asantai núkap juukma takaku asarum, núkap súatin jeattarme. Nuinkia súarmena nuna ii uwejejan chikich Yus-shuar achikiar Yúsán yuminsartatui. ¹²Warí, ju kuit Yus-shuar kuítrinchá súakrin ni atsumamurinjcha atsumachartatui. Tura nú nankaamas Yúsán ti yuminsartatui. ¹³Nu shuar yáintai tusarum tura ashí Yus-shuar yáintai tusarum súatsrumek. Nujají Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarín uunt awajsertatui. ¹⁴Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵¡Tura ashí iisha ii Yusrí ti yuminsatniuitji! ¿In súramjinia nuna yaki jintintartinian jeá?

10

Papru nekas jintintiamniaiti

¹Wats, “Papru iijiaí pujak péechach ajawai, tura yajá pujak kakaram chichaawai” chikich shuar turutainiatsuk. Kame imia wiki Papru Kristu anenkartutairijiaí juna seatjarum tusan pujajai. ²Atumí weatkamuriya shuar chichainiak “Papru ni tsaniakmarijiaí ju nunkanam akupin ajastai túsar wakeruiniak jintintianiawai” turutainia nuna kíishtumaktajtsan enentáimjai. Wisha atumiin jean kakaram chichaschataj tusan, nu antukairap tu seajrume. ³Áentstanka nunkanmaya áentsuitji, túrasha jú áents maania aintsar máaniatsji. ⁴Ju nunkanmaya nanijiaí máaniatsji antsu ii nankirí Yusa kakarmarinti. Nujají iwianchi kakarmarí núpeteaji. ⁵Ju nunkanmaya aentsu jintfamurinkia tura waantu enentáintumamurinkia, Yus nekaatniun itit awajea nuka, nu nanijiaí núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat túsar nu nanijiaí núpeteaji. ⁶Nekas umirkatin átum jeawakrumninkia nuinkia umirkatniun tuke nakitiainia nu, Yusa kakarmarijiaí asutiáttaji, tajai.

⁷Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti. ⁸Yusa kakarmarijiaí akupeaji tuke tákuncha natsaamatsjai. Nu kakarman atumin péñker jintintiatatum tusa Kristu suramsaitji. Kame atumin emesratniun suramsachuitji. ⁹“Ni áarmarijiaí awaktamkatajtsa wakerutmaji” tátsurpash. Núchaiti. ¹⁰“Papru áarmarí ti kakaram ániawai, tura juí pujak kakarmachuiti; tura etserkatniuncha nékatsui” turutainiawai. ¹¹Wats, tuinia nuka junasha nekaawarti. Yajá pujakur kakaram áajinia núnisrik atumjai pujakrishá kakaram túratattaji.

¹²“Wiki imia péñkeraitjai” tuinia nujají méteketji tátsuji. Ní shuaraitji tátsuji. Warí, niisha imia niñki nekampmainiawai. Tura ni ai ísar “nu nankaamas péñkeraitjai” tu wéenawai. Nuna túruiniak netse túruiniawai. ¹³Antsu iikia, ii nekamatin jeajnia nú nankaamas waantu ajaschattaji. Ii takastatjinia nuí Yus Niñki jintintramji. Nu arant wéatsji. Kame atumiin takastinian Yus tsanekatramkaitji. ¹⁴Tuma asantai, tájinia nu Yus tsanekatramka nú iniankas túratsji. Warí, iisha emka Kristu chichamejai atumiin jeachmakají. “Emka jeamji” tájinia nu ántar tátsuji. Kame Yus tsanekatramakrin jeamji.

¹⁵ Chíkich takasmanum iikia waantu enentáimtumasar, “ii takatrínti” tátsuji. Antsu yamá enentáimtarmana nú nankaamas Yus enentáimtumastarum tusar wakeraji. Nu túrakrumninka atumín tuke takasminiaitji. ¹⁶Nuyasha chíkich takaana nu takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íniuiti” tíchattaji.

¹⁷ Tura péñker enentáimtumastaj tusa wakerakka, Yúsnaítjai tusa péñker enentáimtumasti. ¹⁸ Warí, níñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtuktarum tusan seajrume. ² Atumniasha Krístunak anajmamtikrajrume. Tura nuwá chíkich áishmáñkan nékatsuk ní áishrijáink¹ nuatnaiya núnisrumek átum chíkicha chichame umirtsuk aya ní chichamenk¹ umiakrumin Krístu¹ ejetaj tusan wakerajrume. Nuna túrataj tusan atumin akasmataj rume. Nu akasmaktiniana Yus surusuiti. ³ Túrasa íwianch ní nekatairijíai emka nuwá Epan anañkamia nútiksáñ atumniasha Yusa jintiyá awajimtikramar Krístu aneashthinian enentáimtikramprarmatai anañkamu airum tusan tsuutajrume. ⁴ Warí, chíkich shuar Jesusnan nusháa étserkamujáí táiniakuisha péñker ántarme. Tura nusháa wakan achikiam, nusháa chichamjáí uwempramniaiti tu etserainiakuisha, nekasapitia tárume. ⁵ Kame “Yúsnumiá akatramu asar etserkatin imiá nékaitji” tuinia nujáí nankaamas nékaitjai, tu enentáimjai. ⁶ Ti péñker chichastinian nékachiatnak winia nekaatairsha taamtusui. Núnaka ii túramurijíai tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nuí ¿tunáa túrajak? Átum ankant ajastarum tusan wikia pééjchach ajasu asan, “etserkamunam akirkata” tíchamjarme. ⁸ Antsu atumin yáíntaj tusan pujakun chíkich Yus-shuarnumia kuítian suruiniakuí achikmiajai. Nuna túran ní kuítrín emeentukmiajai. ⁹ Tura atumjáí pujusan atumaknasha atumniaka seachjarme. Masetúnianmaya Yus-shuar taar, wi atummiaina nuna surusarmiyai. Nu tuma asamtai tájarme, seachjarme tura seashtatjarme. ¹⁰ Ashí Akaya nuñkanam nuna ujaktinian suritrukchartatui. Nuna tákun Krístu nekasrijíai tajai. ¹¹ ¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasa wi túrajna nuna tuke turu wétatjai. “Papru túrana núnisrik túrají” tuinia nuna tíraqín tusan túrattajai. ¹³ Warí, niisha Yúsnumiá akatrachma ániawai. Anañkartin ániawai. “Krístu akatramuríntji” tumá átaj tusar wekainiawai. ¹⁴ Nusha urukaku túmait tíchamniaiti. Warí, imia Satanáskesha “nayaimpinmaya akatramuríntjai” tumá átaj tusa wekaatsuk. ¹⁵ Nuñkia imia ní suntarísha péñkeran túrawai tumá atai tusar wekasachartinkiait; túrasa ní amuumuríñkia tunáa túriarma nujáí métek nekappá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtumastarum. Kame “wáurkaiti” tu enentáimturiumek, chichastin tsañkatrukatarum. Ishichik waantu enentáimtumastaj tusan wakeraji. ¹⁷ Tura waantu enentáimtumastaj tájana nu, Uunta tsañkatramuríntjai tátsujai. Antsu waurka núnisnak chichaajai. ¹⁸ Untsurí ju nuñkanam uunt ajaras ti waantu enentáimtumainiakui wisha ishichik waantu enentáimtumastatjai. ¹⁹ Imiá nékayatrum waurka ainia nu shiir enentáimtusum ánturearme. ²⁰ Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awattamainiakuisha ashí nu katsuntearme. ²¹ Natsamayatnak tájarme jíikia nu túratin kakarmachuují! Wats, niisha araanainiatsna nuna wisha araanatsajai. (Waurka núnisnak chichaajai.) ²² Niisha Iprú-shuar ániakuisha wisha núnisnak Iprú-shuaraitjai. Israer-shuar ániakuisha wisha núnisnak Israer-shuaraitjai. Apraáma weeatrí ániakuisha pai, wisha núnisnak. ²³ Krístu takarniuríntji, tuiniawai. Wikia aujáí nankaamasaitjai.

Kame nuna tákun waurka núnisnak chichaajai. Kame niijiaí nankaamas takasuitjai; niijiaí nankaamas asutiámuitjai; niijiaí nankaamas sepunam enkeamuitjai; ti núkap jániñki-amjai. ²⁴Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuí awa-awatatkuwa trainta nuiwi ejeyarmiaiyi. Tura nu tímiajni senku jea achirkarmia nuísha nútiksán nujai métek awatturarmiaiyi. ²⁵Numijiaí menaintiú awatturarmai. Kayajaisha mantuatai tusar chikichkí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai. ²⁶Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wíi shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj tusar wakerarmai. ²⁷Itiurchatnasha ti wáinkiaitjai; takatnasha ti takasuitjai. Ti unturúf kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrú wáitsaitjai.

²⁸Tura nuna nankaamas, kaarka kijin júkitniua núnisnak Yus-shuar péñker wekaini-awash tusan ashí tsawant ti enentáimsan pujajai. ²⁹Chikichik Yus-shuar kakarmachu pujaku wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitiajai. ³⁰Maa, waantu chichastin ákuiníka, antsu winia kakarmachu awajtuinia nuna ujakan waantu ajasaintjai. ³¹Yus, ii Uuntrí Jesukristu Aparí ana nu (ni naari tuke shiir awajsamu atí) wi wáitratsjana nuna nékawai. ³²Tamasku péprunam pujai nu nunkanmaya akupin winia jinkia juruktiaj tusa wakerak pepru tanish téntakma wáitiríin suntaran apujsamiaiyi. Aretas uunt kapitían pujai túramiaiyi. ³³Túrasha uunt chankinnium enketawar pepru aa tanishri áan kamunam jilki itiararmiaiyi. Tu uwempramajai.

12

Papru wáinkiamia nu

¹Kame wiki shiir chicharmamsatniun nakitiajai. Túmayatnak ímjarjana nuna tura uunt Yus iniaktursamia nuna ujaktiniaitjarne. ²Kristun umirin ana nú áishman kan nékajai. Nu áishman jimiará nayaimpin nankaikin menaintiú nayaimpiniam junakniuiti. Nusha katurse uwí nankaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴Yus-shuara wakaní shiir pujutainium junakmiaiyi. Nuísha paant awajsachmin ana nuna antukmiaiyi. Nii antukmia nú chicham paant awajtsatniun suritkiamuiti. ⁵Nu áishman ka túrunamurí nankaamakuiti tajai. Tura wikia nankaamakuitjai túmamtsuk, kakarmachuitjana nuna paant ujaajai. ⁶Nankaamakuitjai túmamtiaj tusan wakeraknaka nekas tímiaitjai, ántan tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷Wi nayaimpiniam wáinkiamajna nu timia péñker asantai ántar waantu enentáimtus-maschatniun, janí mesertinia núnisan winia ayashruí najaimiatniun sunasmiajai. Nuka wi wáitsatin Satanásnumia akupkamuiti. ⁸Nuka jurutkia tusan Úuntan menaintiú seamjai. ⁹Tuma ain Uunt winia turutmiyai “Átsá. Jaa pujayatmek winia waitnenkar-tutairjai shiir pujame. Shuar kakarmachun winia kakarmarun Wi suaku ashí aents nu shuara ayashriin winia kakarmarun wáiniainiawai.” Tuma asantai, Kristu kakarmari winia ayashruí paant ati tusan kakarmachuitiatnak araantatsjai. ¹⁰Tuma asantai, wi Kristun aneaku shuar katsekruiakuisha, kajertuiniakuisha, winia kufrusha, kakarmarsha at-sajin waraajai. Kame ashí itiurchat ana nuí kakarmachuitiatnak kakaram nekapeajai.

¹¹Wi “péñkeraitjai” túmamkun waurua núnisnak chichaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraitiatnak, “ti péñker akatramuitji” tumamainia nú nunkaachichuitjai. ¹²Atumjai

pujumiaj nu, itiurchat ámanman katsuntran takasmiajai. Yuska ni kakarmarin ini-akmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. ¹³ Warí, chikich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarne. ¡Nu yajauchiitkiuinikia tsankurturatum!

Papru atak tátinrin ujakmiania nu

¹⁴ Jújainkia menaintiú iwianarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrín wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. ¹⁵ Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkákaintjai. Wi ti wakeramaitiatrum átumka ishichik wakerutarminiñ túrawaintjai.

¹⁶ Túrasha chikich shuar chichainiak “Nekasaiti; Papru niñki ii kuítrín jurutramkichmaji. Túrasha anañkartuatniun neka asa in anañkramachmiashia” turutainiatsuk. ¹⁷ ¿Nusha itiura? ¿Shuáran wi akupkamaj nujai kuítrumin achikjak? ¹⁸ Atumin firmasat tusan Titiun “wetá” tímiajai. Tura nin atamprit tusan chikich Yus-shuaran akupkamjai. ¿Titiusha kuítrumin jurutramkiamarum? ¿Wisha niisha mai metek enentáimsar métek takaschamkaj’?

¹⁹ ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájina nu atumin Yúsnum ikiakártajrum tusar taji. ²⁰ Wi atumíin jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarena núnisrumek wáinkiashtatrum, tu enentáimjai. Yajauch chicharnaikiatniuncha, yajauch enentáimtunaistinniaasha, kajernaikiatniuncha, niñki enentáimtumastinniaasha, tsanumpratniuncha, mái-tunai ajatniuncha, waantu enentáimtumastinniaasha, yajauch wekasatniuncha, ashí nuna wáinkiashtajash tusan itiurchat enentáimjai. ²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuarterim iniaisachurmena nuna nekashajash. Tura enentáim yapajitsuk tuke tura asakrumin úutchatjash taji. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú ístajrum tusan winiajai. Ashí iwiaratin ana nu, jimiara tura menaintiú shuara chichamejai iwianartatui. ² Wi atumjai pujachiatnak, atumjai pujaa núnisnak áatjarne. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarne, wi atak tana tunaarum iwareachkurminkia iniaisashatjarne. ³ Nuñkia wi Kristu kakarmaríjiaj chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksañ krúsnum máamuítai. Yusa kakarmaríjiaj iwiakuiti. Ayashniun Kristu kakarmachu nekapmia núnisrik iikia kakarmachuiti. Túrasha Yusa kakarmaríjiaj ni takatrí takaaji. Nu atumin iniakmastatji.

⁵ “Nekas Yúsan umirniushaitiaj” tusarum nekamatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. ⁶ Tura iikia ántar Yus-shuarchaitji nu nekaatarum tusan wakerajai. ⁷ Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar ániawai” túrampriniñ, átum péñker wekasatarum tusar wakeraji. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túrajai. ⁹ Tuma asamtai, átum kakarmaitkiurminkia iikia kakarmachuitiatar shiir enentáimjai. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptakuiti atumin ikiakártinian. Tuma asamtai, wi atumíin jeaknaka kakaram chicharkajjrum tusan winitsuk ju papin áatjarne.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atumjai pujurtamsattarme. ¹² Yúsnum shiir enentáimtunaisrum amikmaanisatarum. ¹³ Ashí Yus-shuar ainia nu amikmaatmarme. ¹⁴ Uunt Jesukrístu waitnenkartutairi, Yusa anenkrattairisha atumin pujurtamsati. Tura Yusa Wakanisha tuke nemartamsarti. Nu atí.

Papru
KARASEANMAYA SHUARAN
Papí aar akuptukma

Karaseamaya Yus-shuaran Papru áatramiania nu

¹Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nuní, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

²Wisha, ashí Yus-shuar wíjjai pujuinia nusha, ju papí akupeaji. Ashí Yus-shuar Karasea nuḅkanam pujarmena nu áusatarum tusan ju papin akuptajrume.

³Yus Apa tura ii Uuntri Jesukristusha waitnentramiania ásar yainmakarti imiatkinchanum tuke shiir pujustinian. ⁴Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nuḅkanam ana nuyá ankant awajtamsatai tusa in yáinmaji. ⁵Tuma asamtai tuke Yus shiir atí. Ayu.

Chíkich uwempratin chichamka atsawai

⁶Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. ⁷Wátsek, nekas chíkich chicham penké atsawai shuar umikiar uwempratin. Antsu yajaya shuar atumün taar péñkercha awajtamiawai. Tura nusháa chichaman etserkar Yusa shiir chichamen yapajilatniun wakeruinawai. ⁸Tuma asamtai Yus nin yajauchiniam yuminḅkrattawai. Wisha Yus-Chicham yapajámun etserkamtañkia Yus winia yuminḅkrurtatui. Nayaimpinmaya suntarsha nusháa chichaman wi etserkachmaj nuna étserkuñkia nunsha yuminḅkrattawai. ⁹Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuñkia Yus yuminḅkrattawai.

¹⁰Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹Antsu nekaatarum, yatsuru. Uwempratin chichaman wi étserjana nuka áentsnumi-anchuiti. ¹²Aentska ujakchamai. Unuitiutnasha unuitiurchamai. Antsu Jesukristuk winia paant jintintruamai.

¹³Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wíjjai métek uunt armia nuna nankaamas Yúsnan takasmajai. Túmaitiatan aya winia úuntron chichamen ti umirmiuyajai. ¹⁵Túrasha wikia akiintsain Yus winia achirkamiayi, tura ti anenkratmaríjjai winia anaitiukmiayi. ¹⁶Nuikia shiir enentáimiuk ni Uchirin paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. ¹⁷Uunt péprunmasha, Jerusarénumka, wéchamjai winí emkaru Yus akatramujai chichastinian. Antsu wárik Arapia nuḅkanam wémajai. Tura nuj Yúsán enentáimtasuan atak Tamasku péprunam waketkinjai. ¹⁸Tura menaintiú uwí nankaamasmatai, nuyá Pítrujai áujmattsataj tusan Jerusarénum jeamjai. Tura jimirá semanachik pujusmajai Pítrujai. ¹⁹Tura Jakupuncha, ii Uuntri Jesusa yachja nuna, wáinkiamjai. Nú arantka chichknaka Yus akatramunka wáinkiachmajai. ²⁰Yus iirui. Wi tájana nu nekasaiti, wáitchaiti.

²¹Nú ukunmasha Siria nuḅkanmasha, Sirisia nuḅkanmasha wémajai. ²²Tuma asamtai ashí Yus-shuar Jutfá nuḅkanam pujuarmia nu winia nekaracharmai. ²³Aya antukarmai.

“Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai. ²⁴Túrawar winia enentáim-tusar Yúsán shiir yumiṅsarmai.

2

Chikich Yus akatramu Paprun shiir enentáimtuiniawai

¹Tura katurse uwí nankaasmatai wisha Pírnapijjaí Jerusarénum wémaji. Titiuncha jukimjai wijjai. ²Yus akupta asamtai Jerusarénum wémaji. Tura nuí jean aya Yus-shuara úuntriijaín áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai. ³Niisha Yus-shuara úuntriintiat itiurchat enentáimpracharmai. Antsu chikich shuarka Titii Israer-shuarchaitiat wijjai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkirmai. ⁴Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwemtikrampra asamtai ti shiir iisha Yus yúpichuch umáji. Tura nuna nekaawar, atakka, aya yáunchu akupkamu itiurchat ana nujai uwemtikrampratniun wakerutmakarmaji. ⁵Túrasha penké ishichkisha umikchamji. Antsu atumjín Yus-Chicham yapajniátsuk métek jeartamat tusar ni chichame penké anturkachmaji. ⁶Nu arantcha Yus akatramu uuntriṅkia yamaram túratniunka sur-susharmai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk. ⁷Yus akatramu uuntriṅsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. ⁸Pítrun Israer-shuarnum akupkama nú Yusak winiasha akuptukmai Israer-shuarchanum. ⁹Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnapiṅsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusarí. ¹⁰Áyatik “Kuítrincha enentáimtusurum tuke yáinṅtarum” tiarmai. Wisha núnaka ti wakerakun tuke túriniaitjai.

Papru Pítrun chicharkamaj

¹¹Tura nú ukunam wi Antiúka péprunam pujain Pítiur tamai. Tura nuí yajauch túram-tai, Yus-shuara úuntriṅniak chicharkamjai. ¹²Iis, Israer-shuar tuiniawai, “Israer-shuarcha Muisais timia núnisanṅ tsupirnakcha asamtai, nu shuarjai yurumáshtiniaiti” tuiniawai. Túmaitiat Pítiur yurumámniun nékak, emka Sántiak shuar táatsainṅ Israer-shuarchajai yurumámai. Tura nuyá Sántiak shuar Jerusarénumiṅ Antiúkianam jeawarmatai Pítiur ashamak tsupirnakcha shuarnumiṅ kanakin yurumáchmai. “Tsupirnaktiinaitme” tiniu ainia nuna ashamak túramai.

¹³Tuma asamtai chikich Yus-shuar, Israer-shuar armia nu, Pítrujai métek emka yurumáwaru áiniayat jimiaí enentai takusar ukunam iniaisarmai. Pírnapiṅsha neka áyat nútiksṅnupetnakmai. ¹⁴Tura nuna ísan ashí ímiainiaín Pítrun chicharkamjai. Yus Shiir Chicham tana nujai métek wekasachu ásarumatai tímiajai “Ame Israer-shuaraitiam Israer-shuarti ikiikum tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijjai métek wekasatin ániawai” tiip” tímiajai.

Israer-shuarsha Israer-shuarchasha mai métek Yúsán enentáimtusar uwemprattatui

¹⁵Iikia nekas Israer-shuaraitji. Israer-shuarcha, tunáa ainia áaniuchuitji. ¹⁶Túmaitiatar ju nékaji. Akupkamu umámujai uwemprachminiaitji antsu Jesukrístu nekas enentáim-takum uwemprattame. Nu nekaar iisha Jesukrístu nekas enentáimtusumaji tunaajainchu atai tusar. Aya Kristu nekas enentáimtusar penker átati. Akupkamu takasar umirkarsha tuke nujai penker ajaschattaji. Akupkamunka shuar umiktaj táyat, chikichkí shuarkesha nujai penker ajaschamniai. Nu nekaar antsu Jesukrístu nekas enentáimtusumaji penker

ajastai tusar. ¹⁷ Tura Israer-shuar enentáimprashtimpiash, “Wátsek, núnisaitkiuin̄kia wisha Kristun enentáimtustaj tákunka, emka tunáa shuaraitjai tu enentáimtumastini-aitjai” tichanpiash. Nuka nekasaiti tura nuyá “Nu asantai Kristu winia tunáa shuaran najataiti” pen̄ké tu enentáimprashtiniaiti. ¹⁸ Antsu yaunchu, wi túrashtiniaitjai tímiyaj nuna awain̄kin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman pen̄ké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjaj iwiaku pujajai ni wakera nuna umiktinian. ²⁰ Wisha Krístujaj krúsnum jákaitjai. Tuma asantai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti pen̄ker asantai itiuurak “Kristu ántar jakamiayi” títiyaj. Iis, aya akupkamun umirkan pen̄ker ajasminiaitkiuin̄kia, nuikia Kristu ántar jákaayi.

3

Yus akupkamu tura Yus enentáimtustin

¹ ¿Wariñ aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschamkajrum? ² Wátsek, aniatstajarme, enentáimpratarum. ¿Wariñjain̄ Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarjijai umiktin enentáimprarmek. ⁴ Pen̄ké ánrarmek waítsamarum tura antsu ishichiksha unuimiarhamkarum? ⁵ Naka enentáimpratarum. Yus ni Wakaní súrantsuk tura aents túrachminian atumíñ ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶ Yaunchu ii uuntri Apráam enentáimpratai. Yus-Chicham nin tawai: “Apráam Yúsan enentáimtusmatai Yus “Ayu, pen̄keraitme” tímiayi” tawai. ⁷ Iis, nujaj páantchakait. Ashí shuar Yúsan enentáimtuinia nuka Apráamjaj métek enentáimpraru ásar, ni uchiríja áintsan̄ ajasaru ániawai. ⁸ Yamái páantaiti. Yus ashí Israer-shuarchancha tawai “Aya winia enentáimtursarum pen̄ker átatrume”. Israer-shuarchasha nujaj pen̄ker ajastinia nuna ti yaunchu neka asa, Apráaman ujakmiayi, “Ámijijai ashí aents ti shiir ajasartatui.”

Tu ujakmiayi. ⁹ Tuma asantai ashí shuar Yúsan enentáimtuinia nuke Apráamjaj métek pen̄ker ajasar shiir wasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium áarchamukait “Ashí shuar Yus akupkamun ashí aarma nuna takamtsuk umirkachka yajauchiniam yumiñkramu ániawai.” Tu áarmaiti.

¹¹ Nújajin̄kia páantaiti. Akupkamu umirkatniujaj pen̄ker ajaschamniaiti Yusjaj, antsu aya Yus enentáimtusam pen̄ker ajasam uwemprattame. ¹² Shuar akupkamu umirkatniun enentáimna nuka aya nujaj pen̄ker ajastinian enentáimiui; Yúsan enentáimtak pen̄ker ajastinian enentáimtsui.

¹³ Tura Kristu yamaikia uwentikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

¹⁴ Tuma asantai Jesukrístu jakamujaj ashí Israer-shuarchasha Apráamjaj métek pen̄ker shiir wasartatui. Iisha núnisrik nu shuarjaj Yusa Wakaní, Yus akupkataj timia nusha, achikatjai Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apráaman Chichaman najana anajmatuk, “Ámijijai tura amée weeá akiinkiattana nujajsha ashí aents ti shiir ajasartatui” tímiayi.

Kame ‘amée weeá akiinkiertatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuítu. Aentstisha enentáimpratai. Shuar chichaman najana tura papiníum aar nuyá ni naari apujas nuikia nekas yapajítsuk umiktiniaiti. Umítsuk iniaisachminiaiti. Patattasha patattsachminiaiti.¹⁷ Wátsek, Yus núnisan Chichaman Apraámjai najana, ukunam umítsuk iniaisachmini-aiti. Tura Chichaman najanamia nú ukunam, kuaru siangtu nuyá trainta (430) uwí nankaamasmatai, Yus ni akupkamurín Muisaisan susamiayi. Túramaitiat nujai Yusa yaunchu Chichamen yapajíachmiayi iniaisatniun.¹⁸ Tuma asamtai Yus timia nuka tuke uminkiattawai, Yus yaunchu Apraámjai Chichaman najana asamtai. Nújainkia páantaiti, péñker ajastajtar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsanjkatkamiayi Yus Apraámjai Chichaman najaneak_w.

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Krístu táatsain Yus tímía nu uminkiachminiuyayi. Tuma asamtai nii táatsain ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiayi Israer-shuaran susártí túsar.²⁰ Antsu chikichik shuar níñki takastinian enentáimkiunka chikichan atsumatsui. Tura Yus aya chikichikiiti. Níñki chikichan akatsuk ashí aentsun Apraámjai péñker awajsatniun Apraáma anajmatar níñjai Chichaman najanamiai.

Yus akupkamu itiuirkátin

²¹ “¿Tura Yus jimiará chichamjai chichaawak, tíchaintmeash. Emka Apraáman “Jujai uwemprattame” tíchamkia, nuyá Muisaisan ni akupkamurín súsachmakia?” tíchaintmeash. Tura áintsachuiti. Nekaata, akupkamu umirkatniujai Yusjai tuke péñker pujusminiaitkiunka nuyá aya akupkamujai uwempram tunaajainchu ajasaintme.²² Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprartatui.²³ Tura Krístu táatsain Nin enentáimtusachminiuyayi. Tuma asamtai Nii táatsain akupkamuka in emettama pujurtamji aya akupkamu tana nu umirkatin. Tura ukunam ju nekanayi: Krístu enentáimtusar uwempratniuitji.²⁴ Akupkamu, nuika, in waitmakmaji uchin kuírchin wainnia áintsaj. Krístu tatí tusa waitmakmaji. Tura Krístu támatai ashí nekas Nin enentáimtuinia nuka Yúsjai péñker áiniawai.²⁵ Yamái Krístu nekas enentáimtustiniaiti tuma asamtai yamaikia akupkamu kuirchia áintsaj waitmatsji.²⁶ Antsu Jesukrístu enentáimtusar, nujai Yusa uchirí uuntmaru ajasuitji.²⁷ Ashí Krístu náariin imiaimtiurmeka Krístu áintsaj ajasuitrume.²⁸ Jesukrístujai tsaniñkiu asar¹ imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukrístunuitkiunka yamaikia “niishaaiti” tu enentáimprashiniaiti. Ni shuarí mash chikichik áinijai.²⁹ Tura Krístunuitkiurmeka Apraám weeá áintsaj ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

¹ Kuírinniu uchirí ashí ni aparí takakna nuna niiniu áhattawak ukunam. Tura uchichitkiunka ni aparí takarniuriya núkete.² Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti.³ Núnisrik iisha úchichik asarkia ashí aentsu akupkamurí umirkatniuji.⁴ Tura tsawant jeamtai, Yus ni Uchirín akupkamiayi ju nuñkanam. Niisha Yúsaitiat nuwñam akiiniamiai. Tura aents ajasmiai. Tura aents ajas yaunchu akupkamuncha umirkatniuyayi.⁵ Nujai ashí aents akupkamun umirkatin armia nuna uwemtikrataj tusa támiayi. Tura iisha yamaikia nujai ni uchirí uunt ajasminiaitji.⁶ Atumsha nekas ni uchirí ajasakurmin Yus ni Uchirí Wakanín atumí enentáin akupturmakuiti. Tura nu Wakan atumí enentáiya Yúsán “Aparú” tawai.⁷ Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

Papru nu Yus-shuaran yáintinian wakerawai

⁸Yaunchu átum nekas Yus nékachkuram, ántar-yus írunna nu umirkarmarm nekascha yúsak. ⁹Tura yamaikia nekas Yus nékarme, kame Yus atumin nekarmarm. Núnis asamtai itiursuk atak aentsu akupkamuri umirkatin enentáimprm. Nujai kakaram ajaschamniaitme tura umikmesha yainmakchattawai uwempratin. ¹⁰Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. ¹¹Ashamajai, atumín ántankeash takasmaj tusan. ¹²Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nui pujakui ishichkisha yajauch awajtuschamarm. ¹³Antsu nekamarm ayashrui itiurchat pujayatan Yusa shiir chichamen emka ujakmajrume. ¹⁴Tura winia sunkur ti yajauch awajtain atum winia nakitrurum muírukchamarm, antsu Yusa suntaría áintsarmek itiaramarm. Jesukristu anturkatniua áintsarum anturtukmarm. ¹⁵Maa, wi nékajai, nuik atumí jími ukuinkiarum surusaarme, túramniaitkiurmeka. Tura shiir enentáimpramarmena nusha itiursukait yamaisha. ¹⁶Yamaikia nekas chichaman étserkun átumí nemasrí ajasjak? ¹⁷Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiya akantamkitiai tusa wakerutmainiawai, winia antsu shiir enentáimtursat tusar. ¹⁸Niisha nekas yainmaktinian wakerutmainiakka atumin shiir awajtamsatin tuke pénker ainti, wi atumjai pujajinsha tura pujatsainsha. ¹⁹Uchirú, nuwa jurertaj tana núnisnak ataksha wáitijai Kristu atumín paant atí tusan. ²⁰Atumjai pujaknaka maak aintjai. Yamái pujaknaka nekas nusháa chichasaintjarm. Itiurkatjarmetsuk nékatsjai.

Akarsha, Sarasha jimiará Chichaman nakumainiawai

²¹Ayu, “akupkamu umirkatniuiti” támena nu nekaata; akupkamuka júnisaiti. ²²⁻²³Aarma awai: Apraám jimiará uchirtiniuyayi. Emka ni takarniur jurermiayi Ismaeran. Nuyá Apraáma nuwe jurermiayi Isakan. Ismaera nukuri Apraáma takarniuriyayi. Tura Apraám Yusan enentáimtutsuk niijai kanarmatai, ni takarniur jurermiayi. Tura antsu Isaka nukurinka takarniurinchuyayi, antsu nekas ni nuwe áuyayi. Niisha ti úntchiniak, Yus “jurertatme” tmiayi. Tuma asamtai Akarsha, ashí nu timiajaj Isakan jurermiayi. ²⁴Ayu. Yamái tájana nuka Yusa Chichamen jímiaran nakumui. Ismaera nukuri Akar chikichik Chichaman nakumui. Yaunchu Senái muranam Yus ni akupkamurin áarmiayi Israer-shuar, takarniua áintsan, umirkarti tusa. ²⁵Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tuinia nuna nakumui. Yamaisha Israer-shuara uunrí Jerusarénnum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶Antsu ashí Yus-shuarti uwempra asar imiankas ankant pujaji. Nayaimpinmayá Jerusarénnumiá áentsuitji. Nuyá áentsti tuke ankant pujuinijai. Nuyá aents asakrin, nu yakija Jerusarénka ii nukurí áintsan enentáimpramniaiti. ²⁷Junis áarmaiti:

Warasta, misurma, uchi takakchiatmek;

Ti shiir warasta, uchí najawe nékachiatmek.

Nuwa ajapamu uchin jurertatui;

Nuwa áishrinniua núnaka nankaamas uchirtin átatui.

²⁸Iisha, yatsuru, Isaka áintsar^í, Yus timiajaj akiinaitji. ²⁹Yaunchu Ismaer Isakan kajerak itiurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakaníya akiinia nuna yajauch awajenawai. ³⁰Tura Yus-Papinim áarmaiti:

“Takarniusha, ni uchiríjaj, ajapam awemata. Nekas pénker nuwa uchiríjaj tsanin pujuschamniaiti. Aparí kuítrincha achikchamniaiti,” tawai Yus-Papí.

³¹Ayu, yatsuru, nekaatarum. Takarniu uchirinchuitji antsu ankant pujaji nekas pénker nuwa uchirí asar^í.

¹ Kristu uwentikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu itirchatnum waketchip.

² Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itirtamkamniait? ³ Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti. ⁴ Atum “Akupkamu umiakmin Yusa shiir enentáimturmastatui” tárumna nu, nu shuairtam Kristuiya tupañniuitrume. Yusa anenkrattairiya kanakniurme. ⁵ Ilikia, antsu, Yusa Wakaníjiaí tura Yus enentáimtakrin Yus shiir enentáimturmastatji, tu enentáimji. ⁶ Nekas Kristunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai péñker wekaimiarme. ¿Urukamtaí nekas Yus timia nu iniaisatin enentáimprum ataksha akupkamunam waketchitin? ⁸ Nú enentai Yúsaiyanchuiti. Niijiaí wekasatniunka Yus achirmakuitrume. ⁹ Ju enentáimpratarum: Karía ishichik yuminnium enketam mashí karimtiktsuk. Aneartarum atumsha. ¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkiá, yatsuru, yamaisha “tsupirnaktiniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti. ¹² Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktaram. ¹⁴ Ju chichamjai ashí akupkamu mash uminkiatstawai: Ame ayashim aneamna áintsamek chíkich shuarsha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Juna tájarne: Atumí ayashí wakerana nu umikiaj tusarum Yusa Wakaní kakarmarijiaí wekasatarum. ¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakaní jintinramkuñkia, aentsu akupkamurijiaí itit áchattame.

¹⁹ Wats, ayash túram ti paant áiniawai. Ju áiniawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa enentáimsartin, níiniunak ístin, ²¹ yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarne: Shuar nuna túrakka Yusaj pujustinian penké tujinkiattawai.

²² Ayu, yamaikia Yusa Wakaní kakarmarijiaí túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijiaí katsunratin, chíkich shuar shiir awajsatin, tsanika átin, tana nuna tímiatrusan umiktin, ²³ péjchach ajastin, iik ímiasar tunáa túrashtin. ¿Ju túratniuncha yaki surimia? ²⁴ Shuar Jesukristunu ainia nu, ni ayashí wakeramuríncha tura nunišan ni túramuríncha surimiak wekaawai. Ni ayashí krúsum maatniua áintsan túraiti.

²⁵ Yusa Wakaní kakarmarijiaí Yus-shuar ajasu asar, núnisrik Yusa Wakaní kakarmarijiaí wekasatai. ²⁶ “Wats, nekapnaisatai. Wi imía péñkeraitjai” nuámtak túnaitsuk, yajauch enentáimtunáischatniuiti.

6

Yáinniaiktaram

¹ Túrasa, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkurmeka, yátsum Yusjai iwiarat tusarum yáintárum. Tura

naṅkaamantu enentáimtumatsuk túratarum. Tura amesha nekamata. Tunaanum iniaraj̄i tusam anearam wekasata. ²Káarak kijin akui nuám̄tak yáiniaktin átsuk. Núnisrumek atumsha, itiurchatr̄i akui nuám̄tak yáiniáiktarum. Túrakrumka Kristu akupeamuri umíarme.

³Shuar tujintiayat “naṅkaamantuitjai” tákuṅka anaṅmamui. ⁴Shuar ní túramuriniak enentáimtumastiniaiti. Níiniunak enentáimtumakuin̄kia tura péṅkeraitkiuin̄kia chikicha túramuri iirtsuk, antsu níiniun péṅker iis wararsattawai. ⁵Iis, ashí ní káarkariniak júkishtinkiait.

⁶Shuar Yus-Chichaman unuimiatna nu, nu shuar nin jintíana nuna ashí takakna nujai yáinti.

⁷Anaṅmawairap. Shuar Yúsana anaṅkatniun tujintiawai. Ame araamna nuna neren̄ júk̄tatme. Chíkich neren̄ áhattawai. Atumi enentáin̄cha núniskete. ⁸Iista. Shuar ni ayash̄i wakeramunak tuke enentáimtakka, jatai neren̄ áintsan̄ araaiti. Nerekmatai jákatniun júk̄tatui. Tura Yusa Wakan̄i wakera nuna tuke enentáimtakka Yusjai tuke shiir pujustinian júk̄tatui. ⁹Nu asamtai péṅker túratin yawetkishtiniaiti. Tura pimpitsuk takasar júk̄ktin tsawant jeamtai, páchitsuk júk̄ktaji. ¹⁰Tuma asamtai yáin̄min̄ ákuin̄kia ii jeajnia nu túratniuit̄ji nekaska ii yach̄i yáin̄kiartin, Yus-shuar ainia nu. Tura ashí shuarsha yáintinaiti.

Jesukristunu ajasar yamaram akiiniatin nekas péṅkeraiti

¹¹Ímsakua, winia uwejrui urutá uuntna áatjarum. ¹²“Nekas tuke tsupirnaktiniaitme” tuinia nuka áyatik shuar shiir enentáimtusartí tusa tuiniawai. Kristu krúsnum jakamun étsereakuin̄kia itiurchat awajtsusaraj̄i tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan̄ tsupirnaktiniaiti. ¹³Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatki-akji” titiai tusar wakerutmainiawai. ¹⁴Wikia, antsu, aya ii uuntrī Jesukristu krúsnum jakamunak wararsatniun enentáimjai. Tu enentáimkiun̄ Kristu krúsnum jakamia áintsanak ju nun̄kanmayá ana nuna jaka áintsan̄ páchiatsjai; tunaanum winia útsutkatin atsawai. ¹⁵Kristunu ajasrikia tsupirnaktin̄cha tsupirnakchaitkiursha mai ántraī antsu yamaram akiiniatin nekas péṅkeraiti. ¹⁶Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷Yamaikia itiurchat najatawaraj̄i. Jesusa takatr̄i takaakui asutiuawarma paant ayashruj̄ chimikma írunui.

¹⁸Yatsuru, ii uuntrī Jesukristu atumin shiir yainmakarti. Nuke atí.

Papru IPISIUNMAYĀ SHUARAN papí akuptukma

Ipisiunmayā Yus-shuaran Papru áatramiania nu

¹ Yus nuna wakerakui Jesukristu akatramuitjai. Jesukristu nekas enentáimtusrum Yus-shuar ajasrum Ipisiunam pujarmena nuna ju papin áatjarme. ² Yus ii Aparísha tura ii Uuntri Jesukristusha waitnentrainia ásar imiatkinchanum shiir pujustinian yainmakarti.

Kristujai tsaninkiu asakrin Yus ti shiira nuna tsankatramji

³ Ii Uuntri Jesukristu Apari Yus nekas shiir awajtustiniaiti. Iisha Krístujai tsaninkiu asar ii enentáin ashí nayaimpinmaya ana nujai warasminiaiti. Túmaikui Yus nu waratain ashí suramsaitji. ⁴ Krístujai uwemprar ti shiir tunaajainchu Niijjai pujusarat tusa Yus, ju nunka atsajsha, anaitiamkamiaji. ⁵ Yámankamtaiksha incha ti anenmak Jesukristu túrunamujai ni uchiri ajasat tusa wakerutmakiaji. ⁶ Ni aneamu Uchirijjai tsaninkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchiri numpé puarmatai, nu jakamujai ii tunaarin akikmatramak uwentikrampraitji. ⁸ Tura ti anenmak ni enentáimfairin tura nekatairinha suramsamiaji. ⁹ Nujai shiir enentáimturmak in uwentikrampratniun wakerutmakmij nuna, yaunchu nekaachman, yamá paant awajturmajai. ¹⁰ Ashí jú nunkanam írúnna nunasha tura nayaimpiniam írúnna nunasha Kristu ashí akupin ati tusa Yus tsankatkattawai. Nunasha Yus yaunchu enentáimturmu asamtai tsawant jeamtai ashí uminkiaítawai.

¹¹ Iisha Krístujai tsaninkiu asakrin Yus yaunchu achirmakmij ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

¹² Iikia Israer-shuar asar Kristu emka umirkakrin in imía péñker túrutmamun nekaawar ashí shuar Yúsán ti shiir awajsamín ániawai. ¹³ Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanin akuptuktaj timia nuna akupturmakmai. Nuna tura “nekas Wíi shuaraitrume” tawai. ¹⁴ Yamái Yusa Wakaní ii enentáin pujuruk tuke uwentikramji. Tura takas umik nu tsawantaj ashí tsankatramkattaji. Tura ii enentáin pujá asamtai Yus ukunam Niijjaisha ashí tsankatramkattaj nu paant nékaji. Maa, Yus ti penker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntri Jesukristu nekas enentáimtamuncha tura ashí Yus-shuarjai shiir awajnaiyamuncha antukjai. ¹⁶ Túran shiir enentáimkiun Yúsán ájukun tuke yúmiñkijai. ¹⁷ Ii Uuntri Jesukristu Apari Yus ti shiir asamtai Nin áujeakun ni Wakaní ni nekatairín suramas ashí jintinramawarti tusan sejai. Nujai nuna nankaamas Yus nekaattarme. ¹⁸ Tura enentáimincha paant enentáimtikramprarti tusan sejai. Nujai shiir túrutmataj tusa achirmakuitrum nu nekaattarme. Nu arantcha imía shíira nu, Yus ni shuarin ashí tsankatkattana nusha nekaattarme. ¹⁹ Nu arantcha Yus umirkurin ti kakaram tujincha asa in yáimmaj nu nekaattarme. Tura nu kakaram ti kakaram asamtai ²⁰ nujai Krístun jakamunmaya iniantkimiayi. Tura nayaimpiniam jukí ni untsuuriní akupin pujutainium apujsamiai. ²¹ Tura ashí jú nunkanam akupin ainia nújajisha tura ukunam nunka átatna nu akupin áinia nújajisha tura ashí akupin ainia nújajisha tura ashí naari nékamu ainia nujajisha Yus Krístun ashí nankaamas akupin najanamiayi. ²² Tura ashí írúnna nu, Krístun umirkartin ániawai. Tura Yuska Krístunak ashí Yus-shuara Akupniuri awajsamiai. Túramtai Kristu ni shuari muuké áintsankete. ²³ Tura ashí nunkanam Yus-shuar ainia nu Kristu ayashí najanainiawai. Tura Kristu ashí ni ayashin pimiutkaiti tura nu arantcha ashí írúnna nunasha pimiutkaiti.

2

Yus anenma asa uwentikramji

¹ Átum yajauch túrakrum tunaanum tuke wekaakrum Yúsnumiá kanakin asarum jákau-yarme. ² Nu tunaanum jú nuñkanam pujuinia nujai métek tuke wekainiuyarme. Túrarum uunt iwianchi wakeramurj umirniuyarme. Uunt iwianch ashí Yúsán umirainiatsna nuna akatenawai. ³ Ashí iisha núnisrik yaunchu nu shuarjai métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmijai. ⁴ Antsu Yus ti waitnenkartin asa in ti anenmamiyai. ⁵ Tuma asa ii tunaanum tuke jaka pujarnin Krístujai métek iwiaaku awajtamsamiyai. Aya ti anenkartin asa uwentikrampramiyai. ⁶ Tura Krístujai métek iniantamkimiyai. Nuyá Jesukrístujai métek, akupin pujutainium yamaisha apujtamas tuke nupetkatniun tsankatramkaitji. ⁷ Nujai ni ti anenkratmarincha tura Kristu túrunamujai waitnentrampramuncha tuke iniaktusmin átatui. ⁸ Jesukrístu nekas enentáimta asakrumin Yus waitnentramar uwentikrampraiti. Juka átumkeka túrunachuitrume. Antsu Yuska Nínki kúftchajai suramsaitrume. ⁹ Shuar ni takatríjia uwempratniuitkiunka nankaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme. ¹⁰ Yus najanamuitji. Kame Jesukrístujai tsanifakrin yamaram iwiaakman suramas tuke penker túratniun najatmamji. Yáunchuk nuna enentáimturmasmijai.

Krístujai tsanin'kiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, penké Yúsachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuik Krísturtincha uyarme. Israer-shuarcha asarum ashí ni túrutairísha tura ashí Yus nin tsankatkarmasha nekaachuyarme. Tura jú nuñkanmayá asarum nekas Yusa nu enentáimtichuyarme tura shiir pujustin nánkamsarum enentáimpramarme. ¹³ Antsu yamaikia Krístujai tsanin'kiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujai tántaitrume. ¹⁴ Israer-shuarjai Israer-shuarchajai nemasmanaikiar ajapén péenkramu ámiyai. Tura Kristu nuna sáaki nawamnaimtikramkamiyai. Tura chikichik shuar najatmamiyai. ¹⁵ Nuik aya Israer-shuar Muisais akupkamu untsurí armia nuna umirkatin ániak nujai chíkich shuarjai nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiyai. ¹⁶ Núnisan ámiyai. Kristu krúsnum jaka nemasjai mai apattamak chikichik awajtamas Yusjaísha nawamnaimtikramkamiyai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamanak atumin Yus nékachuyarmena nunasha ujaktinian akupkamiayi. ¹⁸ Yamaikia Israer-shuartaisha tura Israer-shuarchasha mai metek Kristu túrunamujai tura Yusa Wakani takaku asar Yusai jeatniuitji. ¹⁹ Tuma asantai yamaikia chíkich shuarchaitrume, antsu ashí Yus-shuarjai métek ajasuitrume. Nekas Yusa shuarintrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniati jea ti wewe atí tusa. Núnisan yaunchu Yúsnan etserniusha tura Kristu akatramurísha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujai nankaamas Jesukrístu enentáimtustiniati. ²¹ Jea apujtukarí Kristu asantai Níi ti penker ekeniar jea jeamnaki wéawai. Tura ii Uuntri Krístujai Yusa Jee ti shiir átatui. ²² Núnisrumek atumsha Krístujai tsanin'kiu asarum átum ashí Yus-shuarjai Yusa Jee ya áintsan ajasuitrume. Tura Yusa Wakani ashí Yus-shuara enentáin pujú asantai nekas Yusa Jee.

3

¹ Nu asamtai atumin Israer-shuarchatirmin yáintaj tusan Jesukrístunu étserkun sepunam pujajai. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. ⁴ Nu áujsarum Krístunu yaunchu nekaachman yamaikia paant nékajna nu nekaattarme. ⁵ Nú chichaman yáunchusha chikichinkesha ujankachmiayi. Túrashá yamaikia Yusa Wakaní Krístu akatramuríncha etserniuríncha nu chichaman paant awajtusarai. ⁶ Nu chicham juiti: Uwempratin chichaman umirkar Israer-shuarcha Israer-shuarjai métek Krístujai tsanínkiaru ásar chikichik shuar ajasartatui. Tura nu arantcha Yus ni shuarín ashí shíran tsankatkatniun anajmatrama nuj métek pachinikiartatui. ⁷ Yus ni kakarmarijiai winia yáintiuk tura ti anentu asa nu uwempratin chichaman etserkat tusa akatturmiayi. ⁸ Ashí Yus-shuarjai nankaamas wi péñkercha aín Israer-shuarchanum shiir chichaman etserkat tusa Yus tsankatrukmiayi. Krístujainkia kuitjai nankaamas péñker, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuarín túrunamun íisar Yuska imiá neka asa ashí enentáimniua nuna paant nékainiawai. ¹¹ Yus júnis túratniun yáunchuk enentáimpramiayi. Tura ii Uuntri Jesukrístujai mash uminkiamiayi. ¹² Tura Krístujai Yusai yúpichuch jeaji. Tura Nin nekas enentáimtusar sapijmiatsuk Niín tantamniaitji. ¹³ Tuma asamtai tájarne, atumin yáintaj tusan sepunam pujakui kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntri Jesukrístu Aparín tikishmatran áujtajrume. ¹⁵ Ashí nayaimpin-masha tura nunkaasha Yus-shuar ájiniá nu nekas ni shuarí áiniáji. ¹⁶ Yus ti kakaram asa ni Wakaníjiai atumí enentáin pujureak ashí ni kakarmariyan atumin suramsarat tusan áujtajrume. ¹⁷ Yus nekas enentáimtakrumin Krístu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume. ¹⁸ Túrakrum ashí Yus-shuarjai Krístu anenkrattairj nekaattarme. Imiá uunt asa nankansuk tuke amuukachminiati. ¹⁹ Nu anenkrattai ashí takamtsuk nekaachmin aín nekaatarum tusan áujtajrume. Nujai Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nankaamas tura enentáimprachminia nunasha nankaamas iin pujurtamuk ashí túramniaiti. ²¹ Ashí Yus-shuarjaisha tura Krístujajsha Yusa péñkeri tuke paant wantinin atí. Yus tuke iniaitsuk shiir awajnasti. Núnisan atí.

4

Yusa Wakaníjiai tsanínkiar pujakur túratin

¹ Atumsha ni shuarí ajastin Yus achikma asarum péñker wekasatarum tájarne. Ii Úuntriñiun étserkun sepunam pujakun seajrume. ² Nekasmiancha ajasrum aneniakrum katsunnairatarum. ³ Yusa Wakaní chikichik shuar awajtamkurmin shiir awajnaisarum pujustarum. ⁴ Yusa Wakanínkia chikichikiiti. Tura ashí métek Yus achikma asar métek Niijjai shiir pujustin enentáimji. Iisha Krístu ayashí ayashímkia asar chikichik ayashkiitji. ⁵ Ii Uuntri chikichikiiti. Niñki nekas enentáimtusar métek imiantiniatji. ⁶ Chikichikiiti Yus, ashí Yus-shuarti ii Aparínti. Ashí akuptamniitji. Ashí ni shuarín pujak ii enentáin pujurtamji. Ti nekas ashí mash, Israer-shuartaisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Krístu wakerimia núnisan suramsaji. ⁸ Nu asamtai Yus-Papiniumsha tawai: “Achikman jukí nayaimpiniam wakamiayi. Tura shuáran shíran susamiayi.” Tu áarmaiti.

⁹ Tura “wakamiayi” tana nu ¿warintuia? Krístu nayaimpiniam pujá asa yakí wákanka emka tárashtinkiait. Nekas nunká taramiayi. ¹⁰ Niñki ataksha nekas nayaimpiniam

wakamiayi. Nuna tura asa ashí ni shuarin pimiutkarimiayi. ¹¹ Tura nujai chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. ¹² Túramtai ashí Yus-shuar ni takatrijjai yáiniaikiar ti penker shuar ajainiakui Kristu ayashi takamtsuk katsuarartatui. ¹³ Nujai Yus nekas enentáimtamunam Yusa Uchirí ashí métekrak péñker nekaattaji. Nu túrakur katsukir Krístujai métek péñker ajastatji. ¹⁴ Tura uchía áintsar áchattaji. Úchikia ashí yamaram chichaman antukar wari yapajjiniawai. Tura anankartinia chichamen antukar waaku ániawai. Kame nu anankartin shuar ti paant chichayatan ni shiir chichamejai anankatniun pujurenawai. ¹⁵ Antsu nekas aneniakur nekas chicham ujanaiktiniatji. Túrar Krístujai tsaninikar tuke tsakakar ashí péñker túratniujai Nijjajai métek ajastatji. Krístuka ashí ni shuarí muuké áintsapketete. ¹⁶ Tuma asa ni ayashin wáinkui ashí nuna muchitmarí péñker yáiniaikiar ashí ni túratniurin shiir takasartatui. Nujai nu ayashnium muchitmarí chikich chikich péñker takainiak métekrak shiir tsakartatui. Tura anenainiakui nu ayashsha péñker úntmartatui.

Krístujai tsaninkiu asar yamaram iwiaakmanum wekaaji

¹⁷ Ii Uuntri Kristu ímmianum juna akatjarne: Chikich aents Yúsan nékachu ásar ántar ni enentáimmiyajai wekainia núnisrum wekasairap. ¹⁸ Ni enentáin kusuru ániak Yusa nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. ¹⁹ Nu arantcha, ni túramurijjai natsamtichu ásar ti yajauchiniam surumakar ashí tunaan wararainiak túrin ániawai. ²⁰ Antsu átumka núnisrum enentáimtustin unuimiarchamarme. ²¹ Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme. ²² Yaunchu enentáimtaimeka ayash wakeramu anankramin ainia nujai piaku asa imiá yajauchiiti. Nu enentáimtaimesha yaunchu túrutairmesha ajapa iniaisatarum. ²³ Túrarum péñker enentáimsarum wakannium yapajjatarum. ²⁴ Tura yamaram enentáimtairam emetatarum. Nuka Yusjai métek najanamu asa nekas péñker tura shiira nuna tuke túriniaiti.

²⁵ Nu asamtai chikichik ayashi muchitmarí asarum wáitruitsuk nekas chicham chichar-naisatarum.

²⁶ Kajeakrum tunáa túrawairap. Tura nu kajejmasha tsawant takamtsuk áchatniuiti. ²⁷ Uunt iwianch yajauch awajtamsatin tsankatkaip.

²⁸ Kasasha kasamtsuk kakaram takakmasti. Tura ni uwejjajai péñker takaak atsumainia nú shuarnasha susati.

²⁹ Mujiimiai chicham chichasairap. Antsu chichastin akui péñker chicham, chikich shuar péñker awajsamnia nu chichastarum. Anturtuinia nuna yáintaj tusarum nu chicham ujaktarum. ³⁰ Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwentikramprattaji.

³¹ Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

³² Antsu shiir awajkartin ajasrum waitnennairarum, Kristu jakamujai Yus atumí tunaarin tsankurtampra nútiksarmek tsankurnairatarum.

5

Yus-shuar túratin

¹ Nekas Yusa Uchirí aneamu asarum Nii tura núnis túratin wakeruktarum. ² Kristu in anenmaj núnisrum anenaitiarum. Kame ii tunaarin akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nunkanmayan ikiaunkatniusha ishichkisha enentáimtuschatniuitrume. ⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. ⁵ Shuar chikich nuwajai tsanirmakka tura ashí yajauchin wakerakka tura jú nunkanmayan iki-aunkatniun wakerakka Yusai Kristu akupea nuj penké pachiinkiaichminiaiti. Kame ju

nuṅkanmayan̄ ikiaun̄katin̄ ántar-yus tikishmatratniua nujaī méteketete. ⁶ Nu túramniaiti tusar̄ ántar chichamjaī anaṅkramacharti. Warí, nuna túruiniakui Yúsan umirainiachun Yus ti asutiáwartatui. ⁷ Tuma asamtai nu shuar pen̄ke pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaī tsaniṅkiu asarum pen̄ker tsáapninium wekaarme. Shuar tsáapninium wekainia nujaī métek wekasatarum. ⁹ Tsáapninium wekainiaka shiir awajkartincha tura nekas chichamtincha tura pen̄ker túrin̄ ániawai. ¹⁰ Ii Uuntrī Krístu wakeramu nekaatin wakeruktarum. ¹¹ Kiritniunam wekainia nu túramu pachisairap. Antsu nu shuar tsáapninium en̄keatarum. ¹² Nī uuk̄ túruinia nu áujmatsatin̄ natsanmajniaiti. ¹³ Tura ashí tsáapninium itiamu ashí paant̄ ajawai. Tsáapnikia ashí paant̄ awajeatsuk. ¹⁴ Nu asamtai Yus-Papinium tawai: “Kanaruitme nu shintiártá. Jakamunmayá nantáktiá. Tura Krístu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu pen̄ker enentáimprarum wekasatarum. ¹⁶ Pen̄ker túratin̄ tsawant wasúrkáip. Tunáa ti pampaatsuk. ¹⁷ Enentáincha áirap. Ii Uuntrī Krístu warinia wakera nu enentáimtustarum. ¹⁸ Nampekairap. Nampeakmeka aya yajauch ajame. Antsu Yusa Wakan̄ winia enentáirūi takamsuk pujurtusti, tu enentáimsatarum. ¹⁹ Túrarum Yus shiir enentáimtakrum Yuskanta kantamkirum shiir áujnaisatarum. ²⁰ Ii Uuntrī Jesukrístu náarijijaī ashí irunna nu Yus Apa tuke yuminsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Krístu shiir awajsattarme.

²² Núwaka Krístun umirna núnisan̄ nī áishrin̄cha umirkatniuiti. ²³ Krístu ni shuarin̄ akupeana núnisan̄ áishman̄sha ni nuwen̄ akupkatniuiti. Krístu ni shuarin̄ ayashimiak ni muuké áintsan̄kete. Tura nin̄ uwentikiartiniaiti. ²⁴ Nu asamtai Yus-shuar Krístun umirin̄ ániawai. Núnisan̄ ashí ana nujaī nuwá nī áishrin̄ umirkatniuiti.

²⁵ Krístu ni shuarin̄ ti aneak nin̄ yáintaj tusa jákatniun̄ surumakmiayi. Núnisrumek áishman̄tirmesha atumi nuwé aneatniuitrume. ²⁶ Krístu ashí ni shuarin̄ ni Chichamejaī tura entsajaī nijjar ní shuar pen̄ker árat tusa jakamiayi. ²⁷ Nujaī ashí ni shuarin̄ tunaarinniuchu tura yajauch máatrachu antsu ti pen̄ker shiir awajas Niinī ejetaj tusa túramiayi. ²⁸ Núnisan̄ áishman̄ ni ayashin̄ anea núnisan̄ ni nuwen̄ aneatniuiti. Shuar ni nuwen̄ aneak nujaī ni ayashin̄cha aneawai. ²⁹ ¿Yaki ni ayashin̄ nakitniuit? Antsu pen̄ker wáiniuk áyureatsuk. Krístu núnisan̄ ni shuarin̄ wainiui ³⁰ ni ayashí asamtai. Kame ni ayashí muchitmarintji. ³¹ “Tuma asamtai áishman̄ ni aparin̄cha nukurfin̄cha ikiukin ni nuwejaī tsaniṅkiar chikichik ayashtin̄ ajainiawai.” Tu áarmaiti. ³² Nusha Krístu ni shuarijijaī tsaniṅmán̄ tawai. Nuka yaunchu nekaachma yamaikia nekanaiti, tura ti enentáimturtniuiti. ³³ Tura núnisan̄ ashí áishman̄tiram atumí nuwé atumí ayashía nútiksarmek aneatniuitrume. Nuwasha ni áishrin̄ umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti pen̄keraiti.

² Emka akupkamu “umirkam nekas shiir átatme” tana nu júiti:

“Apasha nukusha umirkata.

³ Túrakmeka shiir átatme tura jú nuṅkanam untsurí tsawant pujustatme” tawai.

⁴ Atumsha, uchirtintirmesha, atumí uchirí ántrarum akajkairap. Antsu Yúsan shiir enentáimtusarat tusarum ti pen̄ker jintinkirum tsakatmartarum.

⁵ Takakmautirmesha, atumí uuntrī ju nuṅkanam pujuinia nu ti pen̄ker umirkatarum. Krístu umirkatniua áintsarum wishiktsuk ashamakrum tuke enentáijijaī takarsatarum.

⁶ Aya wáitmakui shiir enentáimtursat tusarum pen̄ker takarsairap. Antsu Krístu takarniur̄ia núnisrum ashí ame enentáimjaī Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntrī Krístu takarsatniua nútiksarmek ásump enentáijijaī takastarum. ⁸ Kame chíkich chíkich ni takasmajaī métek akinkiertatui. Ii Uuntrī Krístu nu shuar pen̄ker túramujaī métek akiktatui.

⁹Tura atumsha, iniamniutirmesha, atumí takartamu wakaní mántutsuk shiir enentájjíají iníartarum. Nekas enentáimpratarum. Ii Uuntri nayaimpiniam pujana nuna niisha atumjají métek umirainiawai. Tura Yuska ashí shuaran akantsuk métek iyawai.

Yusa kakarmaríjjíají íwianch taritatarum

¹⁰Wátsek, yatsuru, ii Uuntri Yusjají tsaniñkiu asarum ni ti kakarmaríjjíají iwianchjají máanaiktin kakaram ajastarum. ¹¹Apach máanainiak jiru entsarua núnisrum Yus susamujají entsartarum. Nujají íwianch nupettamkui tariartatme. ¹²Kame Yusna takáa asar penké áentsjají máaniatsji antsu yajauch wakan kakaram írúnna nujají máaniaji. Niisha ju nunkanam, kiritniunma áintsan, tunaanum wekainia nuna akupin áiniawai. ¹³Jiru entsartinia áintsarum Yus súramna nu entsartarum. Nu entsarmajají itirchat tsawant taritra nupetkarum tuke tariarum wajastarume. ¹⁴Wats, nekas tariartin nekas chicham emenmatarum. Tura penker túratniujají jatairum ajaktarum. ¹⁵Suntar iwiarnak sapatan aweá áintsarum Yusa shiir chichameḡ etserkatin iwiarnartarum. ¹⁶Nuyasha ashí nankaamas, tantar takustinia áintsan, Yus tuke nekas enentáimtustarum. Nujají íwianch eketrámkamusha uwemturtatme. ¹⁷Múukem ajaktincha Kristu uwemtikrampramu múukmiin etsenkrutarum. Tura Yus-Chicham puniáa áintsan achiktarum. Nuka nekas Yusa Wakaní puniarjinti. ¹⁸Yusa Wakaníjjíají Yus áujeakrum tuke seatniuitrume. Tura tuke aneara pujastarum wake mesetsuk, tura ashí Yus-shuar ainia nusha Yus áujtustarum. ¹⁹Núnisanḡ winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti. ²²Tuma asamtai ii jují pujamun ujatmak ikiantamprarat tusan akuptajrume.

²³Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

²⁴Ashí ii Uuntri Jesukrístun tuke enentájjíají aneana nuna Yus shiir yáintí.

Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéjají Jesukrístu takarín asarí ashí Yus-shuar Jiripius péprunam pujarmena nu jú papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukrístujají tsaniñkiu asakrumin jú papí áateajrume. ² Yus ii Aparísha Jesukrístu ii Úuntrijsa atumin waitnen-tramiania ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúmiñkijají. ⁴ Yúsan áujeak-nasha ti warasan seatjarme. ⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji. ⁶ Yus atumiñ ti péñker awajsatniun nanakama asa núnisañ Jesukrístu táatsañ tuke shiir awájtámki nekas péñker najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakuí átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti penkeraiti. ⁸ Jesukrístu aneñkrattairijjají wi atumin aneamun Yussa paant nékarui. ⁹ Yúsan áujeakun anearmena nú nankaamas aneak tusan seatjarme. Tura nújajsha ti neka ajasrum ¹⁰ ashí péñkera nu achikiuk tusan Yúsan áujtajrume. Atumin nu túrunamtainkia yamaisha tunáajainchu pujustatrume tura Kristu támatai sumamashtatrume. ¹¹ Núnisañ Jesukrístu kakarmarijají ashí péñker túrin átatrume. Tura nújají ashí shuar Yúsan ti shiir enentáimturartatui.

Wi jú nunkanam aya Krístunak enentáimtakun pujajai

¹² Winin túrunamu itiurchat aijn nujají uwempratin chicham nekas pampaawai. Nu nekaatarum tusan wakerajrume, yatsuru. ¹³ Iis, uunt akupniú suntarísha tura ashí shuarsha wi Krístunun etseru asan sepunam pujamun paant nékainiawai. ¹⁴ Ti untsurí Yus-shuar wi sepunam enketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nankaamantu enentáimtumainiak Krístun páchiniawai. Antsu chikich shuarka nekas enentáijjají Krístun etserainiawai. ¹⁶ Yajauch shuarka Krístun shiir enentáimtusuk antsu ashí shuar ní chichamenak anturkar wí shuar ajasarat tusar etserainiawai. Túruiniak wisha sepunam pujakuí nu arant itit awajtustinian wakerutainiawai. ¹⁷ Antsu péñker shuar Krístun nekas aneek etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai. ¹⁸ Wats, mai metek chikich yajauch enentáijjají tura chikich shiir enentáijjají Krístun etserainiakui shiir enentáimjai.

Tura nuna nankaamas shiir enentáimprattajai. ¹⁹ Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittijají. ²⁰ Nekas juna wakerajají: Natsamtsuk uunt akupniun Jesukrístun paant ujakartinian wakerajají. Nujají winí Kristu kakarmarijají pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarín winí nankaamas nekaawarat tusan wakerajají. ²¹ Wíjjainkia jú nunkanam iwiaaku pujakun aya Krístunak enentáimtakun pujajai. Tura jákatniusha jú pujajnia nuna nankaamas péñkeraiti. ²² Jú nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. ²³ Wíjjainkia itiurchataiti mai achiktin. Jákatniuncha wakerajají Krístujají tsaniñkian pujustaj tusan. Wíjjainkia nu imiá péñkeraiti. ²⁴ Túrasa atumin yáintaj tusan tuke jú nunkanam iwiaaku pujusminiaitjai. ²⁵ Kame tuke pujustajjai nékajai. Núnisnak atumjají pujakun Yus nekas

enentáimtakrum nan̄kaamas waraakrum tuke katsuaruk tusan yáin̄tatjarme. ²⁶Nu asamtai wi atumjaj̄ pujakui Jesukristu yum̄nsarum shiir warastatrum.

²⁷Kristu chichamē ti pen̄ker asamtai atumsha aya pen̄kera nuke túratarum. Wi atumjaj̄ pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawat umirkarat tusarum chikichik enentáijaj̄ kakaram ajastarum. ²⁸Atumí nemasr̄sha ishichkisha sapijmiamtikramkar̄aj̄n. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan̄ atí tusa Yus túraití. ²⁹Kristunu asarum Nii nekas enentáim-tustinniasha tura Niiniu asarum wáitsatniusha Yus anenma asa tsan̄katramkaitrum. ³⁰Yus-Chicham pamparat tusar maimetek ti takáa asar wáitaiji. Wi nuik ti takasmaj nu nekarmame. Tura yamái tuke takaaj nusha ántarme.

2

Kristu péejchach ajasmatai Yus ti uunt awajsamiayi

¹Kristu ikiantamkuisha, ni anen̄krattair̄i atsantamkuisha, ni Wakani atumjaj̄ pujakuisha, anen̄kratniuitkiurmasha, waitnen̄kratniuitkiurmasha ²waramtikrustarum. Métekrak takastarum. Mai metek anenaitiarum. Yusa Wakani atumí enentáin̄ pujá asamtai chikichik enentáik enentáimsatarum. ³Átum wakeramuk túrawairap. Nan̄kaamantu ajastaj̄ tírap. Antsu péejchach ajasrum chikich shuar atumjaj̄ nan̄kaamas pen̄ker enentáimtusta. ⁴Aya níniak pen̄ker átatna nunak shuar túrashti. Antsu chikich shuar yáin̄minia nuna túrati.

⁵Kristu Jesus enentáimpramia núnisrum enentáimpratarum. ⁶Niisha Yúsaitiat̄ ju nun̄kanam winiak tuke Yusjaj̄ métek átinian emettsuk ⁷⁻⁸antsu nuna ikiuak aents ajas péejchach asa ashí aentsu takar̄in̄ ajasmiayi. Tura aentsu ayash̄in̄ ayashimiak tura Yúsan̄ umireak jákatniuncha surimiakchamiayi. Maa, imiá tunaarinnia áintsan̄ krúsum natsanmainium jakamiayi. ⁹Túramtai Yus nekas nan̄kaamantu awajsamiayi. Ni náarin̄cha ashí paant awajsamiayi. ¹⁰Tuma asamtai ashí nayaimpiniam írunna nusha, nun̄ká írunna nusha, tura iwiarsamusha Jesusa náarin̄ antukar tikishmatrartatui. ¹¹Tura ashí shuar Jesukristu ashí akupin̄ ajasman paant nekaawartatui. Nújaj̄n̄kia Yus Apá kakarmar̄sha paant nekanattawai.

Yus-shuar kiritniunam keeák tsáapin̄ awajeana áintsan̄ áiniawai

¹²⁻¹³Nu asamtai, aneamu yatsuru, wi atumjaj̄ pujakui umirtukmarmena nuna nan̄kaamas yamaikia arant pujakuisha umirtuktarum. Iis, Yus atumí enentáin̄ takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti pen̄ker awajtamsatniun wakera nu túrunati tusarum. Tura péejchach enentáimprarum awajirminiaitjai tusarum aneara wekasatarum.

¹⁴Ashí yajauch tunaitsuk tura jianaitsuk wekasatarum. ¹⁵Túrakrum makuumsatsuk tunaajaj̄in̄chu átatrum. Antsu Yusa uchiir̄í átatrum. Ju nun̄kanmasha shuar imiá tunaan̄ túrin̄jais̄ha máatrachu asarum kiritniunam ji keeá áintsan̄ketrum ¹⁶iwiaaku pujustin chicham paant awajeakrum. Nújaj̄i Kristu támatái atum̄in̄ antran takascha asan ti shiir wararsattajrume. ¹⁷Winia takatrujaj̄i Yus-shuar ajasakrumin wi jákatniuitkiuncha nújaj̄is̄ha warasaintjai. Atumsha wi waraajna jūi núnisrumek warastarum tusan wakerajrume. ¹⁸Atumsha waraakrumin métek wararnaisatai.

Timiutéuncha Epaprutíiuncha Papru ujatkamiania nu

¹⁹Ii Uuntrī Jesus wakerakun̄kia Timiutéun̄ írmainiarat tusan ti warik akuptuktatjarme. Tura átum shiir pujamu ujateakui warastatjai. ²⁰Kame Timiutéu wíjaj̄ métek enentáimna áinis chikich shuar atsawai. Niisha átum shiir pujusuk tusa ti nekas enentáimtur-marme. ²¹Chikichka Kristu wakeramun̄ iniaisar ní wakeramunak páchiniaawai. ²²Túrasha átumka Timiutéu tuke pen̄ker túramu nékarme. Uchi ni apar̄j̄jaj̄i takaana áinis Yusa shiir chichamē etserkatniun̄ yáintkiaiti. ²³Winia itiurtukar̄in̄ nuna nekaan Timiutéu írmainiarat tusan akuptuktatjarme. ²⁴Kame Kristu yáintkiui wíkisha wárik ímniaitjarme.

²⁵ Wi atsumaj nuna firsati tusarum Epaprutftiu akupturkamarme. Wijiaí métek tsanin takasuiti. Tura métek wáitsaitji. Áunkesha akupkamnia enentáimjai. ²⁶ Nii jaawai taman átum antukman nekáa, írmaitniun ti wakerutmarme. ²⁷ Maa, nekas ti janin̄kiamai. Túrasha Yus nin waitnentramai. Kame winiasha wi juí wáitiakun nii jakamtai nu arant ti kuntuts pujuschatniun waitnentrurmai. ²⁸ Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme. ²⁹ Kristu yumin̄sarum ti shiir warasrum wáinkiatarum. Chíkich shuar niijiaí métek péñker Yus-shuar ainia nusha shiir enentáimtustarum. ³⁰ Kristu takatr̄n takaak ti janin̄kiamai. Átum yáintkiachminia nuna winia yáintkiataj tusa pujus janin̄kiamai.

3

Kristu nekaatin ashí nan̄kaamas péñkeraiti

¹ Ayu. Warastarum, yatsurtiram, ii Uuntr̄i Kristu ti péñker asamtai nuik áatramajrum nuna ataksha títiatjarme. Ataksha ujam yainmakminiatkiuñkia wíjiaíñkia itiuurchatchaiti atak enentáimtikratin. ² Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrum tuiniawai. ³ Antsu iikia ayash tsupirnakmajai péñker átiniaitji tu enentáimtatsji. Iikia antsu ii wakan̄jiaí Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji. ⁴ Ju nuñkanam írunna nujai waantu enentáimpramniatkiuñkia ashí shuarjai nan̄kaamas wikia waantu enentáimtumaraintjai. ⁵⁻⁶ Israer-shuar asan Muisais timia núnisan̄ wi akiiniamtai uchu (8) tsawant nan̄kaasmatai tsupirtukarmiayi. Israer-shuarnum Pinjamín weeaitjai. Winia aparsha nukursha mai Israer-shuar áiniakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áinramjai. ⁷ Ashí nujain̄kia waantu enentáimtumauyajai. Antsu yamaikia Kristujain̄kia penké ántar áiniawai tajai. ⁸ Ashí enentáimpramnia ákuisha winia Úuntur Jesukristu shiir enentáimtustin nekas péñkeraiti. Nu asamtai Kristunu ajakun wi takusmaj nu muijmái ajasmatai núnaka iniaisamjai. ⁹ Nuna túran Niijiaí tsanin̄kian pujajai. Tura akupkamu umirkatniujai péñker ajaschaitjai antsu Kristun enentáimtakui Yus “péñkeraitme” túrutui. ¹⁰ Tuma asamtai ashí nan̄kaamas wakeraj nu júiti: Kristun péñker nekaan nekas enentáimtustinniasha tura ni iniantkimiú kakarman takustinniasha wakerajai. Tura Niijiaí métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajai. ¹¹ Túraknaka Kristujai métek jakamunmaya nantaktij tusan wakerajai.

Papru kakaram ajasmiai Kristu wakeramun umiktinian

¹² Kame wakerukuitjia nuna mash umirkachuitjai. Kristujai métek nekas péñker shuar ajaschaitjai. Túrasha Kristu Jesus “nuí ejetajam” emka túrutkui, wisha nuí jeataj tusan kakaram ajasan pimpitsuk takaajai. ¹³ Yatsuru, wisha nuí jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukristujai tsanin̄kian shiir pujustinian Yus surustatui.

¹⁵ Ashí shuar Yusjai katsuaru ájina nu wi tájana núnis “jeachuitjai” tu enentáimpratnuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujai métek umirkatin pimpitsuk takastinaitji. ¹⁷ Yatsuru, wisha tura chikichcha wijiaí métek péñker túrajnia nu wáinkiarum atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun mujjiainiawai. ¹⁹ Tuma ásar emesratniunam akupnakartatui. Ni ayashí wakeramun, ni yusr̄ia áintsan̄, tuke umirainiawai. Natsanmainian túruiniayat wararainiawai. Tura ju nuñkanmayanak enentáimtuiniawai. ²⁰ Antsu iikia nayaimpinmaya shuar asar ii Uuntr̄i Jesukristu in uwentikrampra asamtai nayaimpinmaya tatí tusar nákaji. ²¹ Nii taa, ii yajauch ayash̄n yapajá ni ayash̄jiaí métek ti shiir awajsattawai. Ashí uunt akupin ajas nu kakarmajai túrutmattaji.

4

Krístujaj tsaniñkia wekáa asarum warastarum

¹Nu asamtai, aneamu yatsuru, ii Uuntri Krístujaj tsaniñkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

²Ewautiancha tura Séntikinchá, ii Uuntri Krístu shuari ásar, mai metek enentáimsarat tusan seajai. ³Amincha, winia ajrú, nu nuwá yáinkta tusan seajme. Niisha wi iwiaku chichaman étsereakui wijjai métek takasarmai. Tura Krimintisha tura chikichcha wijjai métek takasarmai. Nuna náarín iwaaku átinnium Yus áatraití.

⁴Nu asamtai Uunt Jesusjai tsaniñkia pujá asarum warastarum. Ataksha “warastarum” tájarne. ⁵Uunt Jesus tátin ishichik ajasai. Tuma asamtai tsanika enentái takakrum nu paant nekanati.

⁶Itiurchat enentáimsatin atumjai penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yumínsata. ⁷Nuñkia atumí enentái ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawáin tusa shiir waitmaktarume Jesukrístujaj tsaniñkiu asakrumin.

Ashí penker ana nu enentáimsatarum

⁸Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chikich shuarnasha penker enentáimtusminia nusha, kame ashí penker ana nu enentáimsatarum. Nuyásha chikich shiir anturkamnia ana nusha enentáimsatarum.

⁹Wi unuiniarmajrumna nu umiktarum. Tura wi túramur ísurmena nu tura anturkumena nusha umiktarum. Túrakrumniñkia Yuska ankant átinian amastaj tusa pujurtamsattarme.

Jiripiusnumia Yus-shuar Páprun kuítian akuptukarmiania nu

¹⁰Ii Uuntri Krístu anea asarum winiasha ataksha enentáimturu asakrumin ti waraajai. Kame kajinmatrukmiarme tátsujai antsu kuítrum atsakui yáintkiatin tujiniamarme. ¹¹Tura kuítian atsumakun tátsujai. Antsu wi takakjana nujáin warastinian unuimáruitjai. ¹²Kuítrinchati pujustinia nuna nékajai tura ti nukap takustinia nunasha nékajai. Tsukamknasha jéemarnasha, itiarar takustinniasha tura penké takutsuk pujustinniasha unuimáruitjai. ¹³Krístu ni kakarmarín surakui ashí túramniatjai. ¹⁴Tuma áin atumsha wi atsumam akupturkarum ti penker túramarme.

¹⁵Jiripiusnumia shuartiram, jú ti penker nékarme. Masetunia nuñkanam Yus-Chichaman etserumtai aya atumek kuit akupturkamiarme. Wi etserkamujai atumí wakanín yáinma asamtai yumínsarum akupturkamiarme. ¹⁶Atumek wi Tisarúnikia nuñkanam atsumakun pujáisha kuit akupturkamiarme. ¹⁷Aya kuit akupturkakrumin tu enentáimtsujai. Antsu nu kuit Yusaj kawentramkaku tusan wakerajrume. ¹⁸Epaprutítujaj akupturkamarum nujáisha atsumamaj nuna nankaamas tiaruncha wáinkijai. Akupturkamarum nusha ti kuñkuin Yus susamua áinis ti shiir auyí. ¹⁹Winia Yúsrusha ti penkeran núkap takakui. Atumsha Jesukrístunu ajasu asarum Yus seamniaitrum. Tura Yuska ti takakna nujai ashí atsumarmena nuna suramsattarme. ²⁰Ii Aparí Yus tuke shiir atí. Nuke atí.

Amikmaamu

²¹Winia náarujsa tura Jesukrístu náaríncha ashí Yus-shuar ainia nu chícham ujatruktrum. Niisha shiir pujusarti. Wi írutramusha núnisañ shiir pujusarti tusa akupturmainiawai. ²²Tura ashí akupin Sésaraj pujuinia nuyá Yusna ajasaruka tura chikich Yus-shuarsha shiir pujusarti tusa chichaman akupturmainiawai.

²³Ii Uuntri Jesukrístu atumniasha ti shiir yainmakarti. Nuke atí.

Papru KURUSENMAYĀ SHUARAN papí akuptukma

Kurusenmayq Yus-shuaran Papru áatramiania nu

¹ Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachi Timiutéujai ²ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsán áujtushmanis nu

³ Iisha atumin Yus áujtakur ii Uuntrí Jesukrístu Aparí Yus ashí tsawant yúminíkiaji. ⁴Atumsha Jesukrístu ti shiir enentáimtamusha tura ashí Yus-shuar aneamusha antukji. ⁵Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatatai tusarum nákarne. ⁶Nu chicham ashí nunkanam pampaakui shuara enentáin nerea áinis nusháa ajarar yamaikia péñker túrin áiniawai. Núnisan atumíncha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiayi. ⁷Nu chichaman Épapras ujatmakmarme. Niisha iijjai métek takasu asamtai ti aneamuiti. Atumniasha Kristu takatrin ti shiir takartamsaiti. ⁸Niisha átum Yus-shuar asarum mai anenai ajamun ujatmakmaji.

⁹Iisha nu antukar Yus ashí tsawant áujtajrume. Yus ni wakeramun ti paant nekaprut-mawarat tusar seaji. Ashí Yúsnan ni enentáimtaijijai ashí Níniun paant nekaatniun Yus jintintramat tusar seaji. ¹⁰Atumsha Kírstunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerekinia áintsarmek, túratarme. Núnis túrarum Yus unuimiatki wéakrum Nin ti péñker nekaak tusar seaji. ¹¹Yus ti kakaram asa ikiantamprat tusar seaji. Nujai ashí itirchat ákuisha páchitsuk ti shiir warasrum katsuntrattarme. ¹²Yus ni shuarin tsáapninia nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yumisamniaitrum. ¹³Yus iwianchin nupetak íwianch akupeana nú kiritniunmaya uwentikramar ni aneamu Uchirí akupeana nuí wearmakmaji. ¹⁴Ni Uchirí krúsnum jaka ii tunaarín nijjar tsankurtamar uwentikrampramaji.

Kristu jakamujai Yusjai nawamnaikiar shiir pujustin

¹⁵Yus wáinkiachminiaitiat ni Uchirí akiiniamai tura ayashimkiamiayi. Túmaitiat ashí najanamua nuna yaunchu pujú asa ashí akupniuiti. ¹⁶Nijjai Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashi najanamiayi. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Nijjai najanamua áiniak Nin umirkarti tusa najanamua áiniawai. ¹⁷Ashí najanamua nuna yaunchu, Kírstuka tuke pjuwiti. Ashí najanamua írunna nuna emestsuk wáinniuiti. ¹⁸Ashí Yus-shuar métekrak chikichik ayashinia áinis enentáimkiumka nuna muuke Kírstuiti. Tura nu ayashín ni iwiaakmarjijai iwiaaku átinian súsaiti. Niisha ashí jakamunmaya nantakniujai imía nankaamantuiti. Nújainkia ashí enentáimpramnia írunna nunasha akupniuiti. ¹⁹Yus ashí takamsuk Kristu shiir pujumiayi. ²⁰Núnisan Yus Kristu krúsnum jakamujai ashí nayaimpinmasha tura ju nunkanmasha írunna nuna Nijjai nawamnaikiar shiir pujusarat tusa wakerukmiayi.

²¹⁻²²Atumsha nuik tunáa túrin asarum atumí enentáin Yusa nemasrí ámarne. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamtatji.

²³Tuma asamtai Jesukrístu shiir enentáimtusum kakaram ajarum katsuartiniaitrum.

Tura uwempratin chicham antukuitrum nuyá kanakchatniuitrume. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuĵ pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashruĵai wáitiakun shiir enentáimjai. ²⁵ Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai. ²⁶ Yámankamtaiknumiá nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuĵi. ²⁷ Nu chichamsha júiti: Kristu atumí enentáin pujak Niiĵĵai métek ti shíiram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuari nekaawarat tusa wakerimiayi.

²⁸ Iisha Kristu étsereajĵi. Túrar ashí enentáimtikrar péñker nekaawarat tusar jintinti-ainiaĵi. Nujai Krístujai tsaniñkiar ashí péñker tsakarartatui. ²⁹ Tuma asamtai Kristu ni kakarmarin tí suraku nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai. ² Ashí shiir enentáimtikratniun ti takaajai. Núnisan aneniaram chikichik enentáijĵai métekrak wekasatarum tusan wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujai Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuĵi. Tura Nii nekaatin nekas shíiraiti. ³ Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴ Atumin chíkich shuar niisháa chichamĵai shiir chichartamas anankramawarain tusan nuna tájarne. ⁵ Wi nuĵ atumĵai pujachkuncha nuĵ pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai. ⁶⁻⁷ Nu asamtai átum ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niiĵĵai tsaniñkrum ashí túraratum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusĵai kanakchattarme. Yus-Chicham núnisan etsernakmatai nekarmarme. Tuma asarum Yus tuke yuminsarum, núnisan péñker wekasatarum.

Krístujai yamaram iwiaakma takajĵi

⁸ Aneartarum atumsha. Shuar aentsti enentáimmiájain ashí ju nunkanmayan enentáimprar tura Krístun enentáimtutsuk niisháa chichaman áujtamainiak nekaschajai anankramataĵ tusa wakerutmainiawai.

⁹ Krístunam Yus ashí takamtsuk pujuwiti. ¹⁰ Túmakui atumsha Krístujai tsaniñkiu asarum ni iwiaakmarĵ takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. ¹¹ Nu arant átum ayashniun tsupirnatskesha Kristu shuari ajasakrumin ashí ayash wakeramun, tsupirkatniua áintsan, Kristu ajapamiayi. ¹² Tura atumsha Yus ni kakarmariĵĵai Kristu jakan iniantkimia nu enentáimtusrum imianmiarme. Túrarum Krístujai métek iwianasmarme. Tura núnisrumek Krístujai métek nantakmiarme. ¹³ Nuikkia átumsha tsupirnatsuk atumí tunaari tuke akui atumí wakanin jákauyarme. Tura yamaikia Jesukrístujai tsaniñkiu asakrumin Yuska atumí tunaari tsanĵkur yamaram iwiaakman suramsaitrume. ¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtai ashí akupkamujai sumamtikramamun tsanĵkurtampramiĵi. ¹⁵ Núnisan Krístu krúsnum jaka, iwianchnium ashí akupin ainia nuna nupetak ashí ímiainain iniatsararmiayi.

Nayaimpiniam írunna nu enentáimtusarum

¹⁶ Akupkamunmaya Yus ankant awajtamsantai chikich shuar ame túramujai yajauch enentáimturmarajin. Yúamna nujai, úmamna nujai, uwitinha, nantutinha, tura tsawantinha nampermam nujai chikich shuar yajauch ájumatramkuisha ¿warí urukatiñ? ¹⁷ Nu nampernum Israer-shuar Kristu túrattana nuna nakumainiak túrin ármiai. Tura Kristu taa imia Niñki pujá asantai nakumkamuka ántrai. ¹⁸ Tura shuar “Péejchach ajasam Yus ájutsuk aya Yusa santari shiir awajsatniuiti” túramkuingka anturkairap. Nu shuar mesekranam wáinkiamun ájumatnenak ántar nankaamantu enentáimtumainiawai. Aya aentsti enentáimian chichainiawai. ¹⁹ Tuma ásar Krístujai tsaniñkiar wekainiatsui. Kristu ashí akupin asa ni shuarin Yúsnan jintintiá shiir tsakarar tusa penker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujai jaka asarum aya aentsti enentáimtai ikiukniuitrume. Nuikia ¿urukamtai ju nuñkanmaya ana nu tuke páchiarum? Nii tuinia nu umirkashiniaiti. ²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai. ²² Nusha ¿warí, takasam amuukashatuak? Kame áyatik aents akupkamu áiniawai. ²³ Shuar nu akupkamu uminiak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujai nantakin asarum nayaimpinmaya írunka nu wakeruktarum. Nuí Kristu pujawai Yusa untsuuríni. ² Ju nuñkanam ana nu enentáimtsuk aya nayaimpinmaya ana nu enentáimtustarum. ³ Atumsha Krístujai tsaniñkrum jakamarne. Tuma asarum Krístujai tsaniñkrum Yusjai iwiaku pujarme. ⁴ Krístukete ii iwiakmari. Nii nayaimpinmaya wantinkiuisha atumsha Nijjai métek wantinkiatarrume. Tura Nijjai métek ti penker átarume.

Yaunchu iwiakmasha tura yamaram iwiakmasha

⁵ Tuma asantai ju nuñkanmaya ana nu ajakratniua áintsarum iniaisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asantai iniaisatarum. ⁶ Shuar Yúsan umirtsuk aya nuna túrin ásarmatai Yus nin kajerak ti asutiáttawai. ⁷ Atumsha núnisrumek túrinuiyarme. ⁸ Tura yamaikia júsha iniaisatarum: jakektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹ Yus-shuar ajasrum yaunchu enentáimtairam iniaisamarne. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruuairap. ¹⁰ Yaunchu enentái, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijjai métek shiir atí tusa. Túramtai Yus ti penker nekaki wéaji. ¹¹ Krístuka ashí írunka nujai nankaamas ashiyaiti. Niiniun pujurui. Tuma asantai ashí ni shuari enentáin pujá asantai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakuí nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asantai jujai shiir iwiarmampratniua áintsarum tuke túrin atarum: waitneñkartin, shiir awajkartin, péejchach átin, émtin áchatin, tura katsuntin átin. ¹³ Kristu atumí tunaarin tsanukuramia núnisrumek nuamtak tsanukurnáiratarum. Chikich yajauch awajtamkuisha shiir katsuntram yapajniaitsuk tsanukurnáiratarum. ¹⁴ Tura ashí nankaamas anenaitiarum. Túrakrumka chikichik ajasrum mash penker túrattarme. ¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asantai Yusa shiir atumí enentáin pujurtamsati. Nujai Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamarum tuke enentáijjai Yus yuminsarum

shiiir awajsatarum. ¹⁷ Tura takaakmesha, chichaakmesha, kame ashí túramna nuka Jesukrístu shiiir awajsataj tusam ni kakarmaríjiain túrata. Túrakum Krístujai Yus Apayumínsata.

Yus-shuar túratniua nu

¹⁸ Nuwatiram, atumí aishri umirkatarum Uunt Yus nuna wakerakui. ¹⁹ Áishmantiram, atumí nuwé aneatarum. Atumí nuwejai kajernaikairap. ²⁰ Uchitiram, ame apa nukusha tuke umirkatarum. Nu túrakrum Yus shiiir enentáimtiksaattarme. ²¹ Uchirtintiram, atumí uchiri ti kakantrairap. Ti kakanteamka uchisha ti kuntuts pujus péñker wekasatniun nakitchanpiash. Nu túrunawaiin tusarum ántararum atumí uchiri kakantrairap. ²² Takarniutiram, atumí uuntri shiiir umirkatarum. Ju nunkanmaya uuntri ain aya nii iimkiui shiiir enentáimturati tusarum takaschatniuitrume. Antsu Yus enentáimtakrum tuke péñker takastiniaitrume. ²³ Ashí túramna nu asump enentáijiai takakmasta. Aya aentsuk yaíntinia áintsachu antsu nayaimpinmaya Úuntrum yayá áitkiasrum takastarum. ²⁴ Ame Úuntrum Krístu asa nayaimpiniam ashí shiiir takustinian tsañkatramkattawai. ²⁵ Antsu tunáa túrin ni yajauch túramujai métek akinkiaítawai. Yus ashí áentsun métek iyawai.

4

¹ Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yaínma jiatsuk péñker iniartiniaitrume.

² Yus áujkuram Nii yumíqsarum asummiarum iniaitsuk áujsatarum. ³ Incha Yus áujtustarum. Krístu-chicham yaunchu nekaachman yamá étserkun sepunam pujajai. Tuma asamtai nuna shiiir aŋkant etserkat tusarum áujtursatarum. ⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarchajai shiiir túrataram Yus-Chichaman yajauch enentáimturaraiin. Kakaram ajasrum tsawant ántarum iniaŋkasairap. ⁶ Ti shiiir chichamtin átiniaitrume tura anturújamín átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktatrume. Niisha wijiai métek Yúsnan pimpitsuk ti péñker takasuiti. ⁸ Nu asamtai ii juí pujajnia nuna ujatmak ikiantamprarat tusan akuptajrume. ⁹ Núnisan ii aneamu yachi Unisemu niijiai winiawai. Niisha atum weéaiti, tura Yusjai shiiir wekaawai. Nu shuar ashí juí túrunamun ujatmaktatrume.

¹⁰ Aristarku wi sepunam tsaniŋkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nuí jeantai antukmarum núnisrum péñker wáinkiataram. ¹¹ Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiiir ayamtikruiniawai. ¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsna áujeak Yusjai kakaarum tuke shiiir Yus wakera nu túrak tusa seatramprume. ¹³ Wisha Épapas atumin ti enentáimturman nékajai. Núnisan Rautiséanmaya shuarnasha tura Iarapurisnumiá shuarnasha ti páchiniaawai. ¹⁴ Rukas, aneamu tsuákratin, núnisan Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum. ¹⁶ Átum ju papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisan Rautiséanmaya papí támatai atumsha áujsatarum. ¹⁷ Tura ju Arkipiu titiarum: “Ii Uuntri Jesus ni takatrin suramsa nu péñker umikta” tawai, titiarum.

¹⁸ Wi, Papru, winia uwejruijái júchiniak áatkun amikmaajrume. Sepunam pujajna ju enentáimturatarum. Yus shiiir yainmakarti.

Nuke atí.

Papru TISARÚNIKIANMAYĀ SHUARAN Emka papín aar akuptukma

Papru ni tsaniakmarijjai Yus-shuaran áatramiania nu

¹Wikia Pápruitjai. Wisha Serpanujai tura Timiutéujai Tisarúnikianmayā Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukristunuitrome. Ii Apari Yus, tura ii Uuntri Jesukristu waitnentrama áarmatai, ti shiir imiatkinchanum pujustarum, tu wakerajrume.

Tisarúnikianmayā shuar Yus nekas enentáimtusar umirkatniun jintintiarmaniania nu

²Iisha Yus áujkurkia atumniasha tuke enentáimtusar Yus shiir yuminsaji. ³Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukristu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴Yatsurú, Yus anenmarme. Anenma asa Winia arti tusa achirmakurmena nusha nékaji. ⁵Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶Atumsha yamaikia íksarmek ii túramiaj nu, tura ii Uuntri Jesukristu túramia nu túrarme. Itiurchat ain Yus-Chicham umikiurme. Tura wáitiayatrumek Yusa Wakaní shiir enentáimtikramkui warasrum pujarme. ⁷Nu túrakrum ashí Masetúnia tura Akaya nunkanmayā Yus-shuarsha shiir wekasatin jintintiarne. ⁸Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmayā shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atumainiatsui. ⁹Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰Tura nuyasha Yusa Uchiri Jesus jakamunmayan Yus iniantkimia nu, nayaimpinimayā tatí tusarum átum nákamuncha ujatmainiaji. Iis, Jesus Nínkíti Yusa kajetáiri tsawantri jeattana nuyá uwemtikrampratin.

2

Yus-chichaman paant ujakarmiania nu

¹Atumsha nékarne, yatsurú, iisha ántrar atumín jeachmaji. ²Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekrakarmiaji. Tura nú arant, ti itiurchat wáinkiamiajai. Túmaiti-atan Yus yáintkiui Yusa chichamen ujakmajrume. Nuka atumsha ti péñker nékarne. ³Warí, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarme. ⁴Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étsereaji. Túrash aya aents waramtiksatai tusar étsertsuji. Antsu Nínki Yúsak ii enentáin nekartamin asamtai, shiir enentáimtiksatitsar túraji. ⁵Átumka nékarne, péñkesha shíírmach chichasan anankachjarme. Nuyasha, kuit achiktai tusar ántrar chichaschamji. Núnaka Yus nékawai. ⁶Iisha Kristu akatramuríntji. Tuma asar ni kakarmarijjai akupkatín takakuji. Páchitsuk túramniauji. Túrash waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷Antsu uchi kuírchin ni nukurí péñker iis tsakatmana áintsarik iikia atumniaka shiir ísmajrume. ⁸Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asar. ⁹Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarne.

Iis, Yus-Chicham étserkur, tsawajsha káshisha takasmiaji. Nusha, akirkata, tiiy tusar takakmasmiaji.

¹⁰Yatsurú, atumjai pujumiaj nuí iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumiaji. Nuka atumsha nékarme tura nú arant Yus nékawai. ¹¹Tura atumniasha ankant ankant Yúsnum ikiakármajrumna nu nékarme. Tura uchin ni aparí átsankeana nútiksarik shiir enentáimtikramajrumna nusha nékarme. ¹²Tura Yúsjai shiir wekasatarum tímiajrum. Yus nankaamas uunt asa ashí akupeawai. Tura Yus-shuaraitrumna nuna, Winin pachin-karat tusa, Yus untsurmarme. Yus untsurma asantai Níniuitrum. Niiniu asarum Yusa uchirja núnisrumek wekasatniuitrum.

¹³Yus-Chicham ii étserma antukrum, aya áentsnumianchaiti tímiarme. Yúsnumiaiti tímiarme. Nu tiniu asarum umirkarmarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentáin kakaram ajastinia amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkiaji. ¹⁴Yatsurú, ju nekaatarum. Aya atumek wáitiatsrum. Ashí Jutía nunkanam Israer-shuar, ni shuarin-ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásmatai wáitkiasarmiaji. Yamaikia atumniasha atumí shuarin wáitkiarmainiawai. Nujai Jutía nunkanmaya Yus-shuarjai métekrak ajasurme. ¹⁵Niisha Israer-shuaraitatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aa jiki akuptamkarmiaji. Maaj, niisha Yúsán shiir enentáimtikiainiatsui. Tura núnisan ashí áentsun kajerainiawai. ¹⁶Warí, Israer-shuarcha Uwempratin Chicham ujektaj tákurinisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairii imia tsumaj ana nuí pujusarai.

Papru ataksha Tisarúnikianam irautajtsa wakerimiania nu

¹⁷Iisha, yatsuru, ishichik tsawant atumijya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iista tusar ti wakerimji. ¹⁸Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammijai. ¹⁹⁻²⁰Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákaaji. Nii támatai imia warastatji. Atumin Yus-shuar awajsa asar, Nii támatai atumsha iijjai Jesus shiir inkiuntatji. Tuma asantai nu enentáimsar tawasap achiktinia áintsar waraaji.

3

¹²Iisha ataksha atumin ístaitsar ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristui Uwempratin Chicham etsermiaj nuí, Timiutéuka iijjai métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji. ³Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asantai atumsha ti nekas itiurchatnum pujarme, Yus-Chicham umirka asarum. ⁴Imiatarum, atumjai nuik tuke pujumjinia nuí “iisha wáitsartatji” tíchamkajrum. Iis, túrunachaik. Nuka nékarme. ⁵Tura atumin íwianch tunaanum ajummarchariash tusan, wisha kúntuts enentáimsamiajai. Tura ántarar takaschajish tu enentáimsamiajai. Tuma asantai nekaataj tusan ti wakerakun, wisha ti nukap tsawant nákaschamiajai. Antsu wárik Timiutéu akupkamiajai. Yúsjai péñkerash wekainia tusan, “nu inintrusam ikiuuta” timiajai.

⁶Tura yamaikia Timiutéu Tisarúnikianmaya wakетки tayi. Niisha taa, átum Yus anekrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. ⁷Tuma asantai, yatsuru, ashí

itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsjaí tariara weká asakrumin, shuar jaa péñker ajas enentáí chinkiana áintsarik enentáimji. ⁹ Yus péñker umirka asakrumin, iisha shiir waraaji. Warasu asar ii Yusri ti yúminkiaji. ¹⁰ Incha Yus akuptamkurniñkia atumiin tímiajaik jeartiai tusar wakeraji. Túrar Yusna nekaatin mash nékatsrum nu jintintiatiai tusar tuke ti seaji.

¹¹ Atumiin weri íistinian ii Apari Yussha tura ii Uuntri Jesukrístusha in yáinmaktai tusar wakeraji. ¹² Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikramprartí. Tura nú nukap aneñkrattain Yus amasartí tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Apari Yus seaji. Ii Uuntri Jesus Níniurijiaí winiak péñker wekaarmin tati tusar taji.

4

Péñker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajaí atumniasha ju túratarum tusan akupeajrume. Atumsha iwiaaku pujarmena nuí Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurijiaí tura nu kakarmajaí atumniasha nuik unuiniarmajrumna nu átumka nékarme. ³ Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. ⁴⁻⁵ Yus-shuarcha ainia nu, Yúsan nékainiachú ásar, aya niñki enentáimtumasar aya ni ayashí wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuari péñker enentáimtusum shiir aneasrum ayasatarum. ⁶ Nú arant, amesha ame yatsum anan kam ni nuari yajauch awajtusaip. Nu túrakrumniñkia ii tímiajrumna nútiksau Uunt Yus ti kakaram asutiámawartatui. ⁷ Warí, Yus incha péñkercha yajauch túratarum turamchaitji. Antsu aya péñkerak túratarum turamji. ⁸ Tuma asamtai shuar ju chichaman nakitiakka áentsun nakitiatsui, antsu Yúsan nakitraitai. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtajarme. Warí, imia Niñki Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniatsrumek ashí Masetúnianam matsatainia nujai. Túrusha, yatsuru, atumí aneñkrattairí nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nuí wekatsuk, chikich shuarna pachittsuk, atumí takatrin shiir an kant pujusum atumí uwejejaín takakmá pujutarum. ¹² Átum táasajrum tusan tájarme. Túrakrumniñkia atumniasha chikich shuar péñker enentáimturmasartatui.

Kristu tátintri

¹³ Yatsuru, Yus-shuarcha ni shuari jakamtaí “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsajrum tusan juna tájarme. Jákaru ainia nu urukawartinkit paant nekaatarum. ¹⁴ Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵ Tuma asamtai Yus-Chicham nekaprutamnia nuna atumniasha jintintiajrum. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. ¹⁶ Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukrístu untsumuk Yus pujamunmaya tarattawai. Nuñkia Krístunu ajasar jákaru áiniana nu iwarsumunmaya nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Krístujai yurañminiam ajapén inñkiunaikiartatji. Nuní ashí nayaimpiniam ii Uuntri Jesukrístujai tuke iwiaaku pujusartatji. ¹⁸ Tuma asamtai ju shiir chicham atumin ujakjana jujai mai ikiakánaí ajatarum.

5

¹ Túrusha, yatsuru, ni tátintri waritin tura warí tsawantai, nuka áatratin atsumatsrum. ² Ni tátintri júnis átin nékarme. Kiritniunam kasá shuar kasamkataj tusa tátatna nu

nekaachminiaiti. Núnisañ nákatsuk pujuiniaj Uunt Kristu tsawantrij jeattawai. ³Ashí shuar “Pai, yamaikia ti nekas shiir péñker pujuiniaj” tu matsataniaj, aya aneachma nuñka mesertin tsawant jeattawai. Nuwá ajamtin aya aneachma jatema áintsañ, nékachmanum átatui. Túmakui pisartin peñké atsuttawai. ⁴Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui. ⁵Enta, átumka tsáapninium wekáa asarum Yus-shuarmekka nékairtrume. Ilikia kiritniumianchuitji. ⁶Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi. ⁷Iis, kashi kanarchatniukait. Tura nampeena nu kashi nampeenawai. ⁸Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anan̄kruawaj̄n tusa anear wekasatniuiti. Tura iisha núnisrik íwianch yajauch awajtamsaj̄j tusar anearmi. Yus enentáimtusar aneetnuiitji. Tura núnisrik iisha, ju nuñkanmaya uwemprar Yúsaj̄ tuke pujustaj̄j, tu enentáimprar wetái. ⁹Páantchakait. “Jinium wéchatniuitrume” Yus incha túramji. Antsu ii Uuntri Jesukristuj̄j uwempratniun tsan̄katramkaitji. ¹⁰Niijjaj̄ métekrak iwiaaku ami tusa Jesukristu in jarutramkamiaji. Nu tuma asamtai iisha ii ayashij̄jaj̄ iwiaaku pujakrishha Niijjaj̄ iwiaakji, tura ii ayashij̄jaj̄ jáakrishha Niijjaj̄ tuke iwiaakji. ¹¹Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹²Yatsurú, juna seajrume. Atumjaj̄ pujuinia nú shuar Yúsnan takakmainiakui shiir enentáimtustarum. Jintinramuk chichartamainiakui umirkatarum. ¹³Yúsnan takainia áarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum iki-akárтарum. Kakarmachu ana nusha yáin̄tarum. Tura ashí shuarjaj̄ kajetsuk katsuntrarum wekasatarum.

¹⁵Aneartarum, yatsuru. Chíkich yajauch túrutmamtai amesha nútiksamek yapajki-aip. Antsu nuka túrutsuk átumka mai péñker awajnai ajatarum. Tura nú arant, ashí nuñkanmasha ashí shuarsha nútiksarmek túratarum. ¹⁶Tuke shiir warasrum pujustarum. ¹⁷Tuke tsawant iniaitsuk Yus áuj̄satarum. ¹⁸Péñker pujakmesha, itiurchat pujakmesha ashí warí wáiniam nuñsha Yus shiir yumiñsatarum. Kristu Jesusaj̄ Yus-shuar ajasutiram nu túratniun Yus wakerawai.

¹⁹Ji ikiajniaktinia núnisañ Yusa Wakaní enentáimin keana nuka tunaajaj̄ téen-mantikiarum ikiajniakairap.

²⁰Yus jintintrar akupkamu asa péñker chichaman etserainia nu nakitirairap.

²¹Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. ²²Ashí yajauch ana nuyaj̄nka kanaktiarum.

²³Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukristu táatsaj̄n, atumí wakaní atumí enentaj̄ tura atumí ayashishha mash métek tunaajaj̄nchu awajtamsati. ²⁴Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵Ashí yatsurtiram winiasha Yus áuj̄tursatarum. ²⁶Ashí Yus-shuar árum nu, amik-maaniatarum. ²⁷Winia Uuntru Jesukristu chichamejaj̄ juna tájarne. Ju papí ashí Yus-shuar antukarti tusarum ashí iruntramunam áuj̄satarum. ²⁸Ii Uuntri Jesukristu atumin yáinmakartí. Nu atí.

Papru TISARÚNIKIANMAYA SHUARAN Ataksha papin aar akuptukma

Papru ni tsaniakmarijiai Yus-shuaran áatramiania nu

¹Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukristunu ajasuitrume. ²Tuma asakrumin ii Apari Yus tura ii Uuntri Jesukristusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³Yatsurú, átum péñker matsatu asakrumin iisha Yus tuke yúminñkijai. Átumka Yus nekas enentáimustin nú núkap nekaakrum wéarme. Tura nuamtak aneniastincha nú núkap nékarme. Nu tuma asantai Yus yuminsatniuitji. ⁴Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma aju átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainijai. ⁵“Yusa akupeamuriñ pachiinkiamni-aitrume” Yus túramprume. Nuñ pachiinkiatá tau asarum ju nuñkanam wáitiarme. Tura wáitiakrumsha nuna nañkaamas iwiarnaruitrume nuñ pachiinkiatin. Kame nújainkia Yus atumin achirmak péñker túraití, nuka páantaití. ⁶Núnisanñ atumin wáitkiarmainia nunasha Yus tímiatrusañ wáitkiasartincha nekas péñkeraití. ⁷Tura wáitiarmena nusha Yus íijjajsha ayantikramprartin péñkeraití. Ii Uuntri Jesukristu ji keana ímianisanñ kakaram suntarijiai nayaimpinmaya tara wantinkiamtai, nu tsawantai Yus ayampratniun suramsartatji. ⁸Tura nú tsawantajsha Yúsán nékainiatsna núnaka ii Uuntri Jesukristu ti asutiájtátsa tátatui. ⁹Taa, nincha meñkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuñ akupeajrume, átum winia umirtukcha asakrumin” nin tiartatui. ¹⁰Kame Uunt Jesukristu tátin tsawantri jeamtai, ni shuari, ni enentái péñker awajсарu áinia nu, ni náarin shiir pachisartatui. Tura Yúsán umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nuñ pachiinkiatarme. ¹¹Nu tuma asantai ii Yusrin atumin tuke áujtajrume. Yus atumin achirmakuitrume. Nuñkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusurum péñker túratin wakerarme. Tura wakerarmena nu umiktin Yuska ni kakarmarijiai yáinñtí, tu áujtaji. ¹²Átum péñker wekasa asakrumin chíkich shuarsha ii Uuntri Jesukristu náarin nañkaamantu enentáimtusartatui. Nusha auka ii Yusrí tura ii Uuntri Jesukristu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹Tura, yatsuru, ii Uuntri Jesukristu tátatna nuna tura Niiijai inñkiunaiktatjinia nunasha ujaktinian wakerajrume. ²Chíkich shuar anañkramawar “Uunt Jesukristu tsawantri jeayi” tu ujatmaktaj tusar wakeruniawai. “Imiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. ³Peñké anañnawairap. Nekaatarum. Nu tsawant jeatsañ Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴Niisha aya wíniak enentáimtusarata tusa wakerak, ántar-yusnasha tura nekas Yúsusha shuar tikishmatrarain tusa ti nakitrattawai. Niñki ti nañkaamantu enentáimtusar, Yusa nuke ajas, Uunt Yusa Jeeñ wayáa pujustatui. “Júiti Yus” shuar turutiarat tusa mash túrittawai. ⁵Yatsurtiram, wi atumjai pujakun nuna ashí ujakmajrume. ¿Nuka

kajinmakniurmek? ⁶ Yámaikikia, ni tsawanrı jeatsajın, Tuke Tunaarintin wantinkiaın tusa surimia nu nékarme. ⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. ⁸ Nuıńkia nu Tuke Tunaarintin wantinkiattawai. Tura Uunt Jesus ni wenejajı umpuı aun máattawai. Tara ni wincharıjıjı nuna amuktatui. ⁹ Nu Tuke Tunaarintin, iwianchi uunrı Satanás akupkam tátatui. Ni kakarmarı iniakmastaj tusa, aentsti túrachminian túrak anańkawartatui. ¹⁰ Jınıum wémin ainia nú shuaran ashı tunáa ana nujajı anańkawartatui. Nu shuar Yus-Chichaman nekas ana núnaka nakitraru ásar uwemprachmin ániawai. ¹¹ Iis, nekas ana nuna nakitia ásarmatai, ti anańmamawar wait-chichaman umirkarat tusa Yuska tsanńkattawai. ¹² Warı, niisha ni tunaarın wararainiak, nekas ana nuna nakitraru ásarmatai, Yuska “jınıum wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusrı yumınsaji. Átum nekas ana nuka umikiurme. Tuma asakrumin Yusa Wakanı atumı enentáın penker awajıtamsaitrume. Nu tuma asamtai yámankamtaikniumıa Yuska “átum uwempramniaitrume” túramprume. ¹⁴ Nu túrunat tusa Yus wakerutmarme. Krıstujajı Uwempratin Chicham ii ujakjınia nujajı Yus untsurmakmarme. II Uunrı Jesukrıstu ti penker pujana nuı pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjajı katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ II Uunrı Jesukrıstusha tura ii Aparı Yussaha ti penker ásar incha anenmatsjik. Tura waitnentrama ásar incha shiir enentáimtikramji. Tura nú nańkaamas ii tuke penker pujustinian ikiurtamsaitji. ¹⁷ Nu tuma asamtai, penker chichastarum tusa, tura penker takastarum tusa Jesukrıstuka shiir enentáimtikramar ikiakátmararti.

3

Papru “ájıursatarum” tímiania nu

¹ Nuyá, yatsurú, Yusa chichame shiir pampartı tusarum Yus ájıursatarum. Átum Yus-Chicham wakerukmarmena áıntsań ashı nuńkanam wakerukartı tusarum Yus seatarum. ² Tura yajauch shuar, penker ana nuna ti nakitiainia nu, incha yajauch awajıtamsachartı tusarum Yus ájıkartustarum. Kame chıkich aents Yúsan umirkacharu ániawai. ³ Túrasha Uunt Jesusak atumin iniaıtısuk wáıtmaktatrume. Tura atumin ikiakátmartatrume. Tura íwianch anańkramataj takui kısıhturmaktatrume. ⁴ Kame Yus atumin yainmaktatrume, taji. II tájınia nu yamáı umıfarme. Tura tuke umirkattarme. Nusha nekaar shiir enentáımjı. ⁵ Uunt Yus yainmakartı ni aneńkrattairın nekaatniun. Krıstu itıurchatan katsuntramia núnisań atumnıasha katsuntratniun Yus yainmaktı.

Takastiniatji

⁶ Yatsurtiram, antukturum. II Uunrı Jesukrıstu chichamejajı ju taji: “Nuyá Yus-shuar wi jintintramun nakitiak aya wékana nu ikiuktıarum.” ⁷⁻⁸ II túrajınia núnisrumek túratın nékarme. Júiti: atumjajı pujusmaj nuı tuke takakmasmiaji. Atumı yurumkarı iisha akımkakar yurummiaji. Atumjajı itıurchat áchatı tusar tsawajısha káshisha tuke takakmasmiaji. ⁹ Kame iisha, Krıstu akatramu asar “yáıntkiatarum” tímınıujı; túrasha nu tútsuk, ii túrajınia núnisrumek túratın nekaatarum tusar, iisha tuke tsawant takaamiaji. ¹⁰ Warı, atumjajı pujumıajı nuı “Takastinian nakitiana nuka yurumashti” tíchamkajı. ¹¹ Iis, atumıınıa weeá, nánkamas enentáımiainiak tura nánkamas túruiniak penké takatsuk pujuiniawai, túramainiaji. ¹² Nú shuáran ii Uunrı Jesukrıstu chichamejajı “Tákamtak shiir takakmasartı” taji.

¹³ Yatsurtiram, yawetsuk shiir túratarum. ¹⁴ Ju papınıum ii tájınia nuna, shuar umik-tinian nakitiakuıńkia “umichuitı” tákuram, ni natsarat tusarum ikiuktıarum. ¹⁵ Túrasha “Yus-shuara nemasrıntı” tiip. Áyatık jintintrata, tura Yúsaı enentáimtikrata, ame nekas yatsumeá áitkiasmek.

Papru aujsua ikiuamı

¹⁶Uunt Yuska, imiatkichu enentái susamniaiti. Jǘ Yus, itiurchatnum pujarminiḡ atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷Jui wi Papru juna aajai. Wi papin akupeaj nu júnisnak winia náarun áaran apujeajai, wíniaiti tusan. ¹⁸Í Uuntri Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikkiartin Yussha tura ii Uuntri Jesukristusha winia akuptuku ániawai. Jesukristujai métek ti shiir ajastai tusar nákJai. ² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nuñkanam wéakun “Ipisiu péprunam pujuuta” timiaj núnisnak tájame. Shuar nuñ wait-chichaman jintin ainia nu suritkiarta. ⁴ Niisha Israer-shuara weatrin áujmatsamunak tura ni weatrin naarí ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túrumuka Yus enentáim-tusar Nin shiir umirkatniun yáinmatsji. Tuma asamtai nusha suritkiatá.

⁵ Yus-shuar tuke enentáijijai Yúsán shiir enentáimtusar tura tunáa túrutsuk aya péñkera nuna wakerukar aneñkartin ajastin ániawai. Núnisan péñker ajasat tusar Yus-Chicham étsereaji. ⁶ Chíkich shuar juna iniaisar ántar chichaman áujmatainiawai. ⁷ Yúsán nekáchiat “jintinniuítjai” tuiniawai. Tura unuiniainia nuna nekáinaiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékJai. ⁹ Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsáncha nakitiainia nunasha, aparín máinniaha, nukurín máinniaha, kame mankartinniaha, ¹⁰ nuwancha tura áishmanasha tsanirma áinia nunasha, shuaran kasamak juu ainia nunasha, wáitrinniaha, tsanumniuncha, ashí nuna itit awajsatniun akupenawai. Kame ashí péñkercha nuna iwiartatniun akupenawai. ¹¹ Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

Yus waitnenkartin asamtai Papru yumisamiayi

¹² Ii Uuntri Jesukristu shiir enentáimturu asa Níniun etserturkat tusa kakarman surusuiti. Túruta asamtai yúmiñkijai. ¹³ Wi Yúsán imiá yajauch chicharniuayajai. Yus-shuarnasha áintrarmiajai. Yúsnasha katseknuiyajai. Túrin aijn Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai. ¹⁴ Tura ii Uuntri Jesukristu ti nekas waitnentrurmiayi. Tura Jesukristujai tsaniñkia pujakui Yus nekas enentáimtustinniaha tura aneñkartin ajastinniaha surusuiti.

¹⁵ Ju chicham ti nekasaiti. Tunáa shuáran uwemtikratay tusa Jesukristu ju nuñkanam taramiayi. Nunasha ashí shuar nekaatin ániawai. Tura wikia ashí shuarjai nankaamas tunáan túriniaitjai. ¹⁶ Ti tunáa aijn Jesukristu ti aneñkartin ana nu paant nekanati tusa Yus winia waitnentrurmiayi Tuma asamtai chíkich shuar, wijjai métek, Yúsán nekas enentáimtusar Nijijai tuke iwiaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata. ¹⁹ Chíkich shuar tunaajai anearcharu ásar Yúsán ikiukiarmai. ²⁰ Iminúsha tura Arejántrusha núnisan Yúsán ikiukiarmatai uunt iwianchnium surukarmajai. Nujai Yúsán ti yajauch chicharsacharat tusan túraitjai.

2

Yus áujsatin

¹ Wátsek, emka seajrume Yus áujeakum Yus yuminsam ashí shuar yainkiat tusam áujtusarta. ² Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péñker akupkarat tusar Yus áujtustiniaitji. ³ Áitkiasar seatin péñker asamtai, uwemtikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chikichik Yus awai. Tura Jesukristu aents ajas Yusjaj áentsun nawamnaimtikiartiniaiti. ⁶ Ashí shuara tunaarin akikmatkataj tusa jákatniunam Jesukristu surumakmiayi. Tura tsawant jeamtai nu chicham ashí shuarnum etsernaktiniuyi. ⁷ Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Kristunu asan wáitrusuk nekas tajai.

⁸ Nu asamtai áishmanikka kajetsuk yajauch tunaitsuk antsu péñker enentáijjai uweje takuiniar Yúsán áujsarti. ⁹⁻¹⁰ Núnisan nuwaka iwiamamuk nekasmiancha péñker enentáijjai entsararti. Chikich shuar nu nuwan iis temashmarmarincha, sháukrincha, kurimki-amuncha, iwiamampramurincha núnaka enentáimtutsuk antsu ni péñker túrunamun enentáimtusarti. Núnisan áchatniukait nuwá Yús-shuar ainia nujai. Ni péñker túramujai nekas shiir awajmamsashtinkiait. ¹¹ Nuwaka takamtak pujusar umiiniak unuimiararti. ¹² Nuwanika ashí iruntramunam unuiniartinniasha tura ni áishrin akupkatniuncha suritiajai. Antsu takamtak pujustiniaiti. ¹³ Yus emka áishmankach Atankan najanamiayi. Nuyá nuwan Épan najanamiayi. ¹⁴ Tura Yus timian umirkach Atanka ananachmiayi. Antsu Épa ananna asa tunaan túramiayi. ¹⁵ Túmaitiat jurertin asa, emesnartinniumia uwempraiti. Tura Yúsán nekas enentáimtak anenkartiniaitiuk tura esetar enentáimiuk péñker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka péñker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chikich shuar nin yajauch áujmattsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti. ³ Nampechusha tura suuir enentáimtichusha átiniaiti. Aya kuftian ikiaunkatniun enentáimtuschatniuiti. Antsu tsangka átiniaiti. Kajechusha átiniaiti. Chikichnancha wakerutkashtiniaiti. ⁴ Ni shuarin shiir akupeakui ni uchirísha umin tura shiir awajkartin ártiniaiti. ⁵ Kame ni shuarin akupkachminiaitkiunka jitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatniuiti. Túmaitkiunka ti nankaamantu enentáimtumak iwianchjai métek tunaan túrak sumamattawai. ⁷ Yus-shuarchasha nin shiir enentáimtustin ániawai. Núnischaitkiunkia nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna tímatrusan umin átiniaiti. Nampechu átiniaiti. Aya kuftian ikiaunkatniun enentáimtuschatniuiti. ⁹ Yúsán ti péñker nekaatniuiti. Tura esetar enentáimsatniuiti. ¹⁰ Emka péñker íistiniaiti nuyá péñker wekaakka Yus-shuaran yain átiniaiti. ¹¹ Nuwasha péñker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímatrusan umin átiniaiti. ¹² Yus-shuaran yainka nuwan apatkachu átiniaiti. Tura ni uchiríncha ni shuaríncha ashí shiir akupin átiniaiti. ¹³ Yus-shuaran yayak nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

Yusna ana nu imía nankaamas péñkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuarjaj takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá nekasaiti, Yus iwiainturmakma ashí nanjkaamas ti penkeraiti. Tura júiti:

Yuska aents ajas jú nuñkanam paant wantinkiamiyai.

Yus Wakancha “ti shiiraiti” Nin tímiyai.

Yusa suntarjsha Nin wáinkiarimiayi.

Ashí nuñkanam nu etsernakmiayi.

Túramtai ashí nuñkanmayá shuar umirkarmiayi.

Tura nayaimpiniam waketskimiayi.

4

Amuukatin tsawantin

¹ Yusa Wakanj ti paant tawai, amuukatin tsawant jeaakui untsurj aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

² Yajauch shuaran anturkartatui. Nu shuar ni enentáí narúa áinin ásar ni tunáa túramun penké enentáimtichu áiniawai. Tuma asa shiir chichainiyatan wáitrin áiniawai. ³ Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asantai Yus-shuar nekas chichaman nékainia ásar Yúsán yumiñsar páchitsuk yuámin áiniawai. ⁴ Ashí Yus najanamu péñker asantai nakittsuk antsu Yusan yumiñsar yúatniuiti. ⁵ Yus-Chicham tana nújajsha tura yuiniak Yúsán yumiñkias áujsamujaj ashí péñker ajasuiti.

Jesukrístu péñker takarín

⁶ Wi tájamna nu chíkich Yus-shuar jintintiakmeka Jesukrístu péñker takarín átatme. Tura ashí Yus-Chicham péñker jintíamu unuimiaru asam nujaj kakaram ajastatme. ⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta. ⁸ Kame ayash kakaram awajatsniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nuñkanmasha yáinmaji tura ukunmasha Yusjaj pujustin asakrin nanjkaamas péñkeraiti. ⁹ Nu imiá nekas asantai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwentikramniaiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintíakum akupkatniuitme. ¹² Ti úuntchaitkiumnisha nakitramprarañ. Antsu péñker túrakum Yus-shuar unuiniarta. Chichammijajsha, túramurmijajsha, anekratmarmijajsha, nekas Yus enentáimtamujajsha, tura esetra enentáimsam Yusna péñker túramujajsha niisha túrawarat tusam iniaktusarta. ¹³ Wi jeatsañ Yus-Chicham áujeakum shuar jintintiata. Túram Yus-shuar ikiakárarta. ¹⁴ Yus-shuara uuntri Yúsnan takastin anaitiamak uwején awantramsarmai. Nuna túramainiak “Ju shuar kakarman Yúsnumiñ takustatui” túramarmia nu, kakaram ajasam tímiatrusam túratá.

¹⁵ Tuke enentáimjaj wi tájamna nu enentáimtakmin ame péñker túruki wéamun nekaawartatui. ¹⁶ Túramna nusha tura unuiniamna nusha péñker wáinmankata. Nu túratin pimpikiip. Nu túrakmeka uwemprattame amesha tura ujainiam nusha uwentikrattame.

5

Yus-shuarjaj itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajarsarta. ² Nuwá úuntchisha nekas ame núkua nútiksamek shiir awajarsarta. Nuwá nátsasha nekas ame umaimia nútiksam shiir enentáimjaj péñker awajarsarta.

³ Waje nekas atsumin ainia nusha yáinjiarta. ⁴ Tura waje uchirtiniatkiuinjia tura tiranrinniuitkiuinjia, nu shuar wajen wáinkiariti. Emka ni shuarin péñker wáinkiatniun

unuimiararti. Ni aparí anemia núnis awantuiniak shiir wáinkarti. Núnaka Yus ti shiir enentáimtai. ⁵Nekas waje nínki pujana nu Yúsán enentáimtak tsawaisha káshisha iniaitsuk Yúsán áujeawai. ⁶Antsu aya wárastiniak wakera nuka iwiaakiat jaka áintsan̄kete. ⁷Tura wajenka ni shuarí wáinkarti. Yus-shuaran yajauch chicharnaktin atsutí tusam wi tájamma nu ashí Yus-shuar ujakarta. ⁸Shuar ni jēen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuṅka Yus tana nuna umiátsui, tura Yus-shuarcha nujai nan̄kaamas yajauchiiti.

⁹Yusa kuítrijiai yáinniaiktiniaitkiuṅka waje sesenta (60) uwí nan̄kaamas takustiniaiti. Tura chikichik aishriniak takusu átiniaiti. ¹⁰Ti paant péñker túrin átiniaiti. Ni uchrín péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitainia nuna waitnenniushit, tura chikichnasha péñker túriniaitkiuṅka maak.

¹¹Tura sesenta (60) uwí takakchaka chíkich wajejai iruraip. Ni ayashí wakeramurí Krístuiya kanamtikiainiawai tura ataksha nuatnaikiatniun wakeruiniawai. ¹²Tura emka enentáimtiarmia nuna iniaisar sumamainiawai. ¹³Nu arantcha nakimiainiak ántar irauwear chikicha itirchatrín áujmatsachminia nunasha áujmatin áiniawai. ¹⁴Nu asantai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijiai in kajertamainiaj nú shuar yajauch enentáim-turmarcharti. ¹⁵Kame nuik chíkich chíkich waje Krístuiya kanakiar iwianchin nemarsaru áarmatai nuna tájai.

¹⁶Áishman̄sha nuwasha Yus-shuar ainia nu ni shuarijn waje ákuṅkia Yusa kuítrjn seatsuk nii yaiṅtí. Nujai chíkich wajén nekas atsumainia nuna Yusa kuitrj yáintatui.

¹⁷Yus-shuara uuntrj Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuinartimniasha tuke takaaka imiá shiir enentáimtustinaiti. ¹⁸Yus-Papiniumsha núnisan̄ áarmaiti:

Jiñkiaia saepen pakartaj tusa turu takaak nájakui ni nují jin̄kiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹Chikichik shuarak Yus-shuara uuntrj tunaarjn etsertukmataṅkia anturkaip. Antsu jímiarsha menaintiusha tsanumtsuk métek tuiniakui anturkata. ²⁰Chíkich shuarsha ni tunaarjn ikiuktinian nakitiainia nu, ashí iruntramunam chicharkarta. Chikichcha, nuna íisar, ashamkarti. ²¹Yussha ii Uuntrj Jesukrístusha tura nayaimpinmaya suntarsha ímiainiamunam “túrata” tájame. Ashí shuarjai niisháa enentáimtutsuk métekrak túrata.

²²Yus-shuara uuntrj atí tusam wárik anaikiaip. Wárik túramka chikicha tunaarjn sumamattame. Ashí tunaanum penké pachiinkiaip.

²³Wakemjai jau asam aya éntsak úmutsuk karía ishichik pachimpram umarta.

²⁴Chíkich shuara tunaarj wáitsatin imiá paant áiniawai wáitsatin tsawant jeatsajin. Tura chíkich shuara tunaarjṅkia paantcha áiniawai antsu ukunam paant nekanawartatui.

²⁵Núnisan̄ péñker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

6

¹Takarniutirmesha, atumí uuntrj ti shiir umirkatarum. Túrachkumṅkia chíkich shuar Yusnasha ii unuinamuncha yajauch áujmattsartatui. ²Atumí uuntrj Yus-shuar ániakka aya Yusjai yatsum asamtai nakiarchatniuitrume. Antsu nuna nan̄kaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³Shuar ti shiir naka chichaman ii Uuntrj Jesukrístunu ana nuna nakitiak antsu niisháa chichaman étserkuṅka ⁴nu shuar nan̄kaamantu enentáimtumayat ántrai. Ni enentáimmianak chichaak aya ántar chichaman antumtiknaikiatniun chichaawai. Tura

nu chichamjaj nupetmaktaj tusar nan̄kaamas áujmatainiak kajernaikiar tura katsek-naikiar péñker enentáimtunaisuk ⁵ tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin áiniawai. “Yusna ana nujaj kuítrintin ajasminiaiti” tuiniawai. Nu shuar pachisaip. ⁶ Shuar takakna nujaj waraakka Yusna ana nujajsha waraak ju nuñkanmasha tura nayaimpinmasha nekas kuítrinniuiti. ⁷ Iis, ju nuñkanam misuk támaji; núnisar misuk jiinkittiaji. ⁸ Tuma asamtai yurumkasha tura entsataisha takakkurkia nujaj warasa pujustiniaitji. ⁹ Antsu kuítrintin ajastaj tuinia nu, tunaanum awan̄kemkar iniainiawai. Tura antra nuna wakerukar itiurchatan wáiniainiawai. Nujaj emesratniunmasha jeainiawai. ¹⁰ Kame kuit aneatniuka ashí tunáanum útsutnakminiaitji. Chíkich shuar nuna wakerukar Yus enentáimtustinian iniaisar ti itiurchatjaj yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimsuk Yus péñker umirkata. Aneakum katsuntrata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamú untsurí shuar iruntramunam etserkaitme. ¹³ Yuska ashí iwiaaku átinia súwiti. Jesukrístusha Punsu Piratuj nekasa nuna ti paant ujakmiayi. Tuma asamtai Yussha Jesukrístusha írainiamunam nuna támame. ¹⁴ Ii Uuntrj Jesukrístu táatsaj wi támama nu yapajítsuk tura yajauch chicharnakchamnia péñker umiktá, támame. ¹⁵ Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjaj nan̄kaamas Úntaiti. ¹⁶ Iwiaaku átinia nérenniurj Nínkiti. Ti tsáapninnium pujakui nuntuntuachminiaiti. Wáinchatai asamtai shuar péñké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisar ati.

¹⁷ Jú nuñkanam kuítrintin ainia nusha nan̄kaamantu enentáimtumascharti. Kuitcha yúpichuch men̄kakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. ¹⁸ “Péñker túratatum” tiarta. Tákumin niisha shiir enentáijaj ni takakman ajamsarti. Nuyá nú péñker túramujaj Yusaj ikiáunkartí. ¹⁹ Nuna túruiniak kuítriniawartatui. Núnisar tuke iwiaaku átinian wáinkartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nuñkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaniñkíaru “Nekas iwiaaku átinian susattajai” tñiuiiti Yus. Tuma asa nuna etserkat tusa akuptukui. ² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

Krístunu takastiniatjinya nu

³ Tsawajsha káshisha Yúsán áujeakun ámin tuke enentáimtusan ti shiir Yúsán yúmiñkíajai. Winia weatur túrawarmia nútiksanak Yúsán enentáimtakun ti shiir awajeajai. ⁴ Kanakmíaj nuñ éantramiám nuna tuke enentáimtajme. Ataksha wararnaisatai tusan ítniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruftiasha tura ame nuku Eunisiasha emka Yúsán nekas enentáimtin ármíayi. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. ⁷ Yus sápij enentáin suramsachuitji. Antsu kakaram ajastiniasha anenaitniuncha péñker wekasatniuncha suramsaitji. ⁸ Ii Uuntri Jesukrístunu etserkatin natsantraip. Niíniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujai shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu áriníñ Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramíayi. Yaunchu ju nunka atsaísha in tuke waitnentrampramíaji. ¹⁰ Turá yamá in Uwemtikiartin Jesukrístu támatai nu anenmamú paant ajasuiti. Niisha jákatniun nupetak emesramíayi. Tura uwempratin chichamjai jáchatai iwiaakman paant awajturmají.

¹¹ Nuna etserkat tusa Yus anaitiukmíayi. Tura akattur Israer-shuarchanum akuptukmíayi. ¹² Túruta asamtai ti wáitíajai. Túrusha Yúsán nekas enentáimta asan natsamatsjai. Imiá kakaram asa amuukatin tsawant jeatsáin ashí wínián susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtají tura nujai anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmaríjjai túrata.

¹⁵ Asia nunkanmaya shuar mash iniaitiusarmái. Nu nekaachmaashum. Nu shuarnumiá Píjirusha Ermujenessha armái. ¹⁶ Antsu Unisépuru niisháa shuar amái. Ti nukap shiir enentáimtikurmai. Tura wi sepunam pujamuncha natsantruchamai. Ii Uuntri Krístu ni shuarincha waitnentrarti. ¹⁷ Rúmanam taasha natsantrutsuk eatak wáittsuk iniaitíuschamiayi. ¹⁸ Ipiisu péprunam pujarin ti yainmakmíaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukrístujai tsaniñkiu asam nu kakarmajai kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintíawarat tusam akupkarta.

³ Ame ti péñker Jesukrístu suntuari asam wáitsatin katsuntrata. ⁴ Suntarka ni uuntri tana nunak umiktin asa chíkich takatan pachintiukchatniuiti. ⁵ Núnisanj nakurincha nakurustinia nujai métek nakurachkunka nekas péñkeran awakmakun súsatniua nuna

achikchamniaiti. ⁶ Ataksha núnisan shuar ajan takaana nu, ashí shuara nankaamas nuyan yúashtinkiait. ⁷ Wats, ju menaintiu métek-taku chicham ániawai. Pénker enentáimtak-min ii Uuntri Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatri asantai Jessussha uunt akupin átiniaiti. Núiti wi uwempratin chichaman étsereaj nu. ⁹ Nuna étsereakun sepunam jirujai jinwiamu pujakun wáitajai. Túrasha Yus-Chicham jinchiachminiaiti. ¹⁰ Ashí shuar ni shuari arti tusa Yus achikiarua nuna yáintajtsan ashí itirchatan katsunteajai. Nujai Jesukristujai tsaninikiaru ásar uwemprar tuke shiir pujusartatui Yusjai.

¹¹ Ju imiá nekasaiti:

Jesukristujai jákaitkiurkia Níjijajsha tuke iwiaaku pujustatji.

¹² Wáitakrishá Níjjaj akupkattaji.

Natsantakrinkia Niisha natsantramprattaji.

¹³ Umichuitkiurniisha Ninjia tuke uminiaiti. Warí, Yuska ni enentáimmiyajin yapajniátsuk tuke umiktiniaiti.

Yusaj natsarajj tusam ashi túrata

¹⁴ Shuar jintintiakum ju enentáimtikrata. Ii Uuntri Yus ímmianum chichamjai yajauch tunaiyarain tusam chicharkarta. Nu tunaitin penké áantrai antsu ántuiniana nuna yajauch awajenawai. ¹⁵ Yus-Chicham tuke enentáimjai pénker unuimiátram shiir jintintiwarta. Túrakum Yus pénker írsat tusam pénker takarin atá. Túramka Yusaj natsararchattame. ¹⁶ Jú nunkanmayanak ántar áujmatin ainia nujai kanaktia. Shuar nuna áujmatainiak tunaanum nuna nankaamas wáiniawai. ¹⁷ Ni jintiniamusha sunkurjai métek pampaawai. Iminúsha tura Piritiusha nu shuar ániawai. ¹⁸ Niisha nekas chichaman iniaisar tura ashí Yus-shuar nantaktincha nankaamasai tuániaku chíkich chíkich shuar Yúsan naka enentáimtuiniatsui yamaikia. ¹⁹ Túrasha Yus ashí nankaamas enentáimtus-tinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

²⁰ Kuitrinniu jeen kurijjai najanamusha kuitjai najanamusha írunui. Nújainkia ti shiira nu takastin ániawai. Tura numijjai najanamusha nuwejai najanamusha írunui. Antsu nújainkia nekasmiancha ainia nu takastin ániawai. ²¹ Núniskete Yusa takatrijjai. Ashí tunaanumiá kanakir pénker wekasar shiira nu takasmin átaji. Kame ashí pénkera nu takasmin asakrin ii Uuntri Jesukrístu wakerak pénker takata nuí apujtasmniaitji.

²² Natsá wakerutai iniaisam esetram pénker wekasata. Amesha ashí shuar shiir enentáijjai Yúsan áujena nujai Yus nekas enentáimtakum aneniakum ti shiir pujustá.

²³ Enentáimtsuk chichainiait aya ántar tunaitinian chichainia nu pachisáirap. Nusha aya némasmanainiawai. ²⁴ Ii uuntri Jesukrístu takarniuka chíkich shuarjai nemasman-aikiashtiniaiti, antsu ashí shuarjai pénker nawamnaikiatniuiti. Tura waitnentáimturar pénker jintintiatniuiti. ²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa pénker enentáijjai jintintiatniuiti. ²⁶ Nujai íwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itirchat átatui. ² Shuar aya ninji enentáimtusartatui. Kuitian ti wakeriartatui. Nankaamantu enentáimtumaratatui. Yúsnasha yajauch chicharsartatui. Aparincha umirkachartatui. Yuminisatniuncha nékachu ártatui. Ashí Yúsnanacha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí pénker túrinia nuna nemasri ártatui. ⁴ Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitir aya ni wakeramunak enentáimtusartatui. ⁵ Yusa kakarmari “ántrai” tuániak pénker umirkachartatui. Túrasha Yúsan umirua núnisar túrawartatui.

Nu shuar péṅké pachisáip. ⁶ Nu shuarsha shiir chichayataṅ anaṅkawar jeá wáini-
awai. Tura nuwá esetar enentáimchan nekas tunaarinnium anaṅkainiawai. Nu nuwá
ashí yajauch wakeramujaí anaṅnainiawai. ⁷ Tuma ásar ashí shuara chichamen tuke
ántuiniayataṅ nekas-chichaman nekaatniun tujintiainiawai. ⁸ Yaunchu Ejiptu nuṅkanam
Muisais uunt akupniujaí chichaakuí jimiará iwishin, Jánissha Jámprissha, Muisaisan
kajerainiak “ántar tawai” tiarmiayi. Núnisaṅ ju shuar nekas-chichaman nakitiainiawai.
Naka enentáimiaiachu ásar Yúsnan naka jintíatniun péṅké tujintiainiawai. ⁹ Túrasha
nuna ṅankaamas kuakchartatui. Shuar ti paant ni netse túruiniamurín nekarawartatui.
Núnisaṅ nu jimiará iwishniujaí túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímiaj nu umireame. Wi Yusjaí shiir wekaamusha métek túriniaitme.
Wi enentáimmiasha nékaitme. Ántruiniakuí wáitsamaj nu nékame. Tura Yúsan
enentáimtakun tura aneṅkratkun shiir enentáijjaí katsuṅtramjai. Antiukía péprunmasha,
Ikiuniu péprunmasha, Ristra péprunmasha ashí yajauch túrutawarmatai wáitsamaj nu
paant nékame. Túrasha ii Uuntrj uwemtikrurmiayi. ¹² Nekasaiti, shuar Jesukristujaí shiir
túrataj tákuṅka ni nemasrj áintiam ti wáitsatniuiti. ¹³ Tura ashí anaṅkartin ainia nusha
kame ashí yajauch shuarsha nú yajauch túrukiar wétatui. Iwianchjaí anaṅkamu ásar
chikichnasha anaṅkiar weartatui.

¹⁴ Antsu ámeke unuimiam nu imiá nekasaiti tu enentáimtakum tuke emetata. Jintintra-
mawarmia nú shuarsha wáitrichua nu nékame. ¹⁵ Úchichinmayan Yus-Chicham nékame.
Yus-Chichamka uwempratniun jintintramamniaiti. Nusha “Jesukristu nekas enentáim-
takum uwemprattame” tawai. ¹⁶⁻¹⁷ Ni Papirín áarat tusa Yus ni shuarín áamtikramiayi.
Ashí shuar ni Chichamen nekaawar péṅker túrawarat tusa túramiayi. Tuma asamtai
Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjaí
nekamatniuitji. Tura awajiakrincha Yus-Papí núnaka paant jintintramji. Nuyá naka
wekasatniun jintintramji.

4

¹ Ii Uuntrj Jesukristu amuukatin tsawantaí Uunt Akupin ajas iwiaakuncha tura jákarun-
cha ashí péṅker túramuncha tura yajauch túramuncha nekaattawai. Tuma asamtai
Niisha tura Yus Apasha ímianiamunam juna akateajme. ² Uwempratni chicham et-
serkata. Yúpichuchia nuísha tura itirchata nuísha tuke etserkata. Yus-Chicham nekas
enentáimtikrarta. Tura shiir enentáimtusam chicharkam yáintaj tusam unuinararta.
³ Ukonmanka péṅker chichaman nakitrar ii wakeraj núchik nekaatai tusar, shuar teremak
péṅker pujuschamnia nekaapea áintsan, ṅankaamas unuimiaru atai tusar, ṅankamas
unuikiartinian ti untsurj éakartatui. ⁴ Nekas shiir chichaman iniaisar ikiuniak ántar
ájumatsamun enentáimtusartatui. ⁵ Antsu ámeke tuke péṅker túratin wakerakum ashí
itirchat katsuṅtrata. Uwempratni chicham étserkum takatrum péṅker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin
jeatimiai. ⁷ Shuar kakaram maanainia núnisnak tuke kakaram takasmajai. Tséken péṅker
tsekea áintsanak yawetsuk takasmajai. Tura Yus-Chichaman nekas akasmatkun péṅker
wáinkiaitjai. ⁸ Tuma asamtai tawasap nukajai najanamu tsékena susamua áintsan wisha
péṅker túramunam akinkiaitjai. Tura aya wíniak akirkashtatui. Antsu ashí ni tátinian
shiir enentáijjaí nákania nunasha nekas péṅkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nuṅkanmayanak wakerak ajapa ikiuruk
Tisarúnika péprunam weyi. Tura Kresentisha Karasea nuṅkanam weyi. Núnisaṅ Títiusha
Tarmasia nuṅkanam weyi. ¹¹ Túrawarmatai aya Rúkas wijjaí pujawai. Márkus éaka
wáinkiam ame itiertitia. Juí ti péṅker yainkiamniaiti. ¹² Tura Tikikiunka Ipisiu péprunam
akupkamjai. ¹³ Tura winiakum nuparam pushí Trúas péprunam Karpu jeen ikiukmiaj nu
takurtuktia. Núnisaṅ nuparam papísha tura nekaska péṅké papí takurtuktia.

¹⁴ Arejánruka jirujai takawa nu ti yajauch awajtusuiti. Túrutaitkiuisha ni túramujai métek Yus akiktí. ¹⁵ Nu amesha péñker wáinkiatá. Ii étseamun péñké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

¹⁷ Tura ii Uuntri Jesukrístu ni kakarmarín surus yaintkiamiayi. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwentikrurmiayi. ¹⁸ Tura núnisan ashí yajauchia nuyá uwentikrurmatai Nii akupeana nuñ nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

¹⁹ Piriskancha ni áishri Akiranca amikmainiajai. Núnisnak Unisépuru shuarincha amikmainiajai. ²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹ Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntri Jesukrístu ámijjai tsanin pujustí. Tura Yus ashí péñker waitmakarti.

Nuke atí.

Papru TITIUN papi áatramu

Papru Titiun áatramiania nu

¹Wikia Pápruitjai Yusa takarniuri. Tura Jesukrístu akatramuríntjai. Yus achikma ainia nú shuar niisha antukar Yúsán umirkarat tusan akatramuitjai. Shuar nuna nekaawar péñker wekasartatui. ²Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwentikrattajai” Yus tímiayi. Tura Niisha wáitruatniun tujintiawai. ³Tura yamaikia, tsawant jeamtai, nuna nekaawarat tusa ii Yusrí uwentikkiartinia nu, winia chichamur ujakarta tusa, winia akatturmiayi.

⁴Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparí Yussha, ii Uuntrí Jesukrístusha, Uwentikkiartin ana nu, enentáimin imiatkincha awajtamsati, tajai.

⁵Wats, wi iwarachmajna nu ame iwiarata tusan Kreta nunñanam ikiukchamkajam. Tura “ashí péprunam Yus-shuar frunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti. ⁷Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti. ⁸Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñanmaya akupeamuncha, núnisañ Yús akupeamuncha umirkatniuiti. Tura níñki ímiastiniaiti. ⁹Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimíatramiania nuyá kanakchatniuiti. ¹⁰Nekaata. Umichu ti irunui. Niisha ántar chichau ásar anañmau ániawai. Israer-shuar weeanam ti irunui nú shuar. ¹¹Niisha kuítian achiktaj túsar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni frútkamuríjjai yajauch enentáimtikiainiawai. Tuma asamtai auka, ni wené epetkatniuiti, ántar chichainiakui. ¹²Warí, imia Krétanmaya chichaman etserin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisañ ániawai.” Nuna tíchamka. ¹³⁻¹⁴Maa, niisha nékasan tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsán nekas umirkarat tusam, umichu shuar kakaram chicharkarta.

¹⁵Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtai. Tura chíkich shuar, Yúsán umirkachu asa, ni enentái wapik asa, péñker ana nuna enentáimustinian tujintiawai. Achapai enentáimuiuk, péñkercha ana nuna “péñkeraiti” tawai. ¹⁶Tura niisha “Yus-shuaraitjai” tuíniayatan, Yúsán umirtsuk niisháa túruiniawai. Tuma ásar muíjmiaí ániawai niisha. Umichu ásar péñkeran túratniun péñké tujintiainiawai.

2

Péñker jintintiatin

¹Tura amesha, Titiu, péñker chicham etserkata. Yus-Chicham tátsuna nu etserkaip. ²Antsu áishman katsunt Yusna ainia nu, ju jintintrata. Nampechu, náñkamas enentáimcha, esetas enentáimin arti. Yus tana nuna umirin tura anenain arti. Ni itiuhratrín

Yúsan enentámtusar katsuntin arti. ³Tura núnismek nuwá katsunt Yusna ainia nusha ju jintintrata. Niisha núnisarañ Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. ⁴Niisha yama nuatnakua nuna ni áshrin ni uchiríncha nekas aneetniun unuiniarartí. ⁵Junasha jintintrartí. Esetas enentámin, péñker wekain ártiniati. Ni takatrin péñker takastin ániawai. Ni áshrin umirin ártiniati. Tura waitnentin ártiniati. Yus-shuarcha Yus-Chichaman yajauch chicharkarain tusar túrawartiniati. “Tu jintintrarta” titiá.

⁶Nuyá, Titiu, natsa ánia nu “nánkamsar enentámsarum wekasairap” titiá. ⁷⁻⁸Tura amesha, Titiu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tiin tusam, esetsam enentámsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Titiu nánkamas chichaawai” títiáj tukamá, natsaamak tujintramkattawai.

⁹Takarín ainia nu, ni takartairin umirkarat tusam jintintrarta. “Shiir enentámsarum, yajauch ámtsuk shiir umirkatarum” titiá. ¹⁰“Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwentikramin Yusri chichamen shíiraiti, tu enentámtikrattarme” titiá.

¹¹Yus in waitnentrama asa ashí áentstin uwentikramprataj tusa wakerutmaji. ¹²Kame Yus waitnentrama asamtai, tunáa ana nu iniaisatniuitji, nu nékaji. Tura ju nuñkanmaya yajauch ana nu wakerukchatniuitji. Tura antsu ju nuñkanam pujayatrik esetsar enentámsar anañma wekatsuk tuke tsawant Yus anear wekasatniuitji. ¹³Túrar ii Yusri Jesukrístu, uwentikramajnia nu, imiá shiir iwiarnar tatí tusar nákastiniati. ¹⁴Jesukrístuka in jarutramkamajia, ii tunaariniá uwentikrampratajtsa. Tura, Winia ajasar tuke enentáijijai péñker túrawarat tusa, ii tunaarin japirtampramajia.

¹⁵Titiu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

3

Yus-shuarti túratin

¹Titiu, shuar enentámtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Péñkeran túratin ana nuna páchitsuk túrattajai” tífiniaitrumé” titiá. ²“Tsanumpirairap, kajernaikairap, antsu shiir enentámtunaistarum” titiá. Nankaaamantu enentámtumatsuk ashí shuar péñker awajsataram tusam tu jintintrarta. ³Warí, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴Túrasha Yus in uwentikkiartin ana nu, anenkratin asa, ni anenkrattairin ashí áentsun iniaktus in uwentikrampramajia. ⁵Yus in waitnentrama asa, iikia júkesha péñker túrachma ain uwentikrampramajia. ¿Itiurak uwentikrampramajia? Ii tunaarin asakárampramajia, niijiaktinia áintsan. Tura Yusa Wakaní pujurtamkurin, ii iwiaakmarin yamarman amasmaji. ⁶Jesukrístu jakamujai Yus in emeenturmatsuk ni Wakanin suramsamajia. ⁷In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimij nu íniuiti. ⁸Nuka ti nekasaiti. Tuma asamtai Yúsan umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. ⁹Shuar netse áujmataniakui ameja pachisaip. Tura “aya winia úuntruk péñker ániawai” tu chichasaip. Tura Israer-shuara akupkamuri iturkit tusa shuar ti áujmataniakui nusha pachisaip. Ántraiti nuka. Péñker wekasatniun yayatsui.

¹⁰Shuar tsanumprur yajauch enentámtunaimtikiana nu chicharkata. Ántachkuinikia ataksha chicharkata. Tura péñke tujinkiamka jiki akupkata. ¹¹Nujai juna nekaamniaitme: nuna tura asa awajiruiti. Tura ni tunaariniñ jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tikikiun akuptuktatjame. Nii jeantai amesha wari winitritia Nekapuris péprunam. Juí Nekapurisnum yumí nantu asantai seturan pujuttajai. ¹³ Senas, chichaman ti unuimiaru pujana nu, amikiur Apurusjái jeantai, nii atsumtsuk shiir weartí tusam, ame túratin jeamna nu yaiñta. ¹⁴ Iní Yus-shuar ainia nusha péñker túratniun tura atsumainia nunasha yáñtinian nekaawartí. Ántar pujusaráin tusan nuna tajai.

¹⁵ Ashí wíjjái pujuinia nu amikmaatmainiawai. Tura ii amikrij Yus-shuar ainia nu amikmaatrúata. Atumniasha Yus shiir yainmakat tusan wakerajrume. Nuke atí.

Papru JIRIMIÚŃKAN papí áatramu

Papru JirimiúŃkan papin áatramiania nu

¹Wi Papru ju papin áaran akuptajme ámin, Jirimiunká. Ii yachi Timiutéusha juna akup-turmawai. Wi Jesukrístu takaru asan sepunam pujajai. Ame ijjiaí tsaniŃkia takáa asakmin ju papin akuptajme. ²Núnisan̄ ame jeemijn Yus-shuar irunainia nunasha tura ii umaj Apiancha tura Arkipiuncha ijjiaí ti kakaram takasu asamtai ju papin akuptajrume. ³Yus ii Aparí tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiún̄ péŃker Yus-shuar ámiayi

^{4,5}Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmin̄kijajai. ⁶Áujeakun chíkich shuarsha ámijiaí métek Yúsan nekas enentáimtuiniak ashí péŃker ana nuna ti paant nekaawarat tusan seajai. Ashí péŃker ana nuka Jesukrístu shiir awajsamujai takakji. ⁷Wisha ame aneŃkratmajai ti shiir enentáimtakun waraajai. Yatsurú, ámijiaí ashí Yus-shuarsha shiir enentáimiainiawai.

Papru Unisemun waitnentratiun JirimiúŃkan seamiani nu

⁸Nu asamtai kakaram tátsujme. Kame wakeraknaka Kristu akatramu asan “Ju túrata” tíminiaitjame. ⁹Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰Unisemu waitnentrati tusan seajme. Niisha wi ujakmajai Yus-shuar ajasu asa winia uchirua áintsan̄kete. Sepunam pujayatan ni aparíya áintsanak ajasjai.

¹¹Nuikkia Unisemu ántrauyi antsu yamaikia aminiisha winiisha yáimniuiti. ¹²Ataksha awantajme. Wi ti peŃker aneamu asamtai péŃker itiaata. ¹³Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wijiaí pujus yáintkiat tusan wakerinjai. ¹⁴Túrasha ámin ujatsuk túrachmin enentáimpramjai. Kame ame wakerakum útsukchamujai “pujusti” tákumniŃkia maak. ¹⁵Júnissha enentáimpramniaiti. Unisemu ishichik tsawant men̄kakamai tura yamaikia waketki ámijiaí tuke pujustatui. ¹⁶Kame yamaikia emetachma antsu ame aneamu yátsumeá áinis átatui. Nuka ti péŃkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷Wisha ti peŃker amikrumchakaitaj. Tuma asam winia itiaarua nútksam shiir awayáta. ¹⁸Yajauch awajtamkaitkiuŃkia tura ámijiaí tumashitkiuisha wi akiktatjai. ¹⁹Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkun. ²⁰Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

²¹Ti peŃker uminiaitme nuna nékakun júnisan áatjame. Tura wi seajmena nuna nan̄kaamas túrattamna nuna nékajai. ²²Ayu. Átum Yus áujturkurmin Yus winia tsan̄katruktatui atumijn̄ iraitniun. Tuma asamtai wi nuí jean pujustin iwiarturata.

Amikmaamiania nu

²³Épaprassha niisha Jesukrístunu étseruk sepunam wijiaí pujus amikmaatmarme. ²⁴Núnisan̄ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵Ii Uuntri Jesukrístu atumniasha ti shiir yainmakarti.

Nuke atí.

ISRAER-SHUARAN papí akuptukma

Yus ni Uchiríjaj ni chichamen ujatmakji

¹ Yáunchuka Yúsnan etserniujaj chichas Yus ni enentáimmian ii úuntrín ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi. ² Antsu ju amúamu tsawantáikia ni Uchirí Jesukristujain ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti. ³ Níyaiti Yúsán imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarín nijiatramak akupin pujutainium, Yusa untsuuriní, pujusmiayi.

Nayaimpinmaya suntarjaj Kristu nankaamantuiti

⁴ Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai. ⁵ Wátsek, nayaimpinmaya suntaran chikichinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wí ni aparí átatjai, tura Nii winia uchir átatui.”

⁶ Tura jú nunkanam ni Iwíairín akupeak tímiayi:

“Ashí Yusa suntarj tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea ántsan awajsaiti. Ni suntarín chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti. ⁹ Péñkera nu ane-naitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiam. Túram ame uwejmíjjaj nayaimpisha najanaítme. ¹¹ Nusha mai amuukarmataisha Ame tuke pujuttame. Tarachjaj métek mamurartatui. ¹² Tura ipijram ikiustatme. Pushiya ántsam yapajíttame. Túrashha Ámeká núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruiní, pujusam náksaratá. Ame nemasrumin nupetkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi. ¹⁴ Antsu Yusa suntarí wakan áiniak ashí shuar uwemprartatna nuna yáinkíarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáim-tustiniaitji. ² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³ Antsu ii Uuntrí Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitrikria nuna nankaamas uwemtsuk asutniáttaji. ⁴ Kame nu arantcha, Uwempratin Chicham ujat-mainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakaní ni wakerana núnisan niisháa niisháa kakermajaj takamtikeawai. Nujaj Yus-Chichama nu paant nekanamniaiti.

Jesukrístu aents ajasmania nu

⁵ Ayu. Nuik áujmatkur “jú nuńka amuukattawai” taji. Tura yamaram nuńkanam nayaimpinmaya suntar akupkachartatui. ⁶ Antsu ii akupkattajnia nu, Yus-Papinium áarmaiti:

“¿Shuarti warimpiaitaj ame imiá enentáimtitniusha? Kame, ¿shuar warí asantai pujur-sataj tamea? ⁷ Ishichik tsawant nayaimpinmaya suntarjaj péjchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuiti. Niisha aents ajas ishichik tsawant nayaimpinmaya suntarjaj péjchach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írúnna nu Yus najanamun ásar ni wakeramun umiktin ainiawai. Tura ashí ni uchirjsha ni shíirmarin pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikkiartin awajsamiayi. ¹¹ Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asantai Yusa Uchirj nu shuaran “yatsur” títinian natsantatsui. ¹² Yus-Papinium núnisan tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijaj métek enentáimtamun tawai:

“Yúsan ti shiir enentáimtustajai.”

Tura ataksha:

“Yus surusmia nú uchirjaj Yúsan umirkun pujajai” tawai.

¹⁴ Tura nu uchi aents áarmatai núnisan Jesussha aents ajasmiayi. Tura aents ajas jaka, iwianchin, jatai nérenniurin, ashí emesramiayi. ¹⁵ Tura ti untsurj shuaran uwentikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai. ¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáin-tajtsa támiayi. ¹⁷ Túratin asa penké métek ni yachja áinis ajasmiayi. Nujaj in tuke waitnentrampromniaitji. Tuma asa Yúsnan pujurniu uuntri ajas Yúsan tuke péńker chichartamsamniaitji. Núnisan murikiun maa Yus súsatniua áintsan ni jakamujaj ashí shuara tunaarj tsankurniuiti. ¹⁸ Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

3

Jesus Muisaisjajsha nankaamantuiti

¹ Tuma asantai, péńker yatsuru, atumniasha Niiniu atí tusa Yus achirmakuitrume. Tuma asarum Kristu Jesus péńker enentáimtustarum. Niisha Yus nekas Akatramuyayi. Tura ashí Yus-shuar ajararua nujaj Yúsnan pujurniu uuntri núnisaiti. ² Nu atí tusa Yus anaikiamiayi. Túramtai Kristu nuna ti péńker takasuiti. Núnisan Muisais ashí Yusa aentsrin, Israer-shuar armia nuna ti shiir wainkiamiayi. ³ Túrasha Muisaisjaj nankaamas Kristu ti shiir awajnasuiti. Jējajaj nankaamas jēj jeamniuka nekas péńkerchakait. Núnisan Kristu Muisaisjaj nankaamas péńkeraiti. ⁴ Kame ashí jēan shuar jeamtsuk. Tura Yus ashí írúnna nuna najanaiti. ⁵ Wats. Muisais Israer-shuaran wániuk Yusa Jēen takastinia áintsan péńker takarniuyayi. Tura ni takaak ukunam Yus títiatna nuna etserkatniuyayi. ⁶ Túrasha Kristu Yusa Jēen takarniuchu asa antsu Yusa Uchirj asa nuj ashí akupeawai. Nu jēasha iitji. Tura tuke iniaitsuk kakaram ajarar Yus suramsattaj nu wararsar nákastiniaitji.

Yusa shuarj shiir pujustin

⁷ Nu asantai, Yusa Shiir Wakanj Yus-Papinium tawai:

“Yamaikia, Yus tana nu ántakrumka ⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsan nekapsar akajkarmiayi.

⁹ Túramtai Yus tímiayi “Nuj atumí uuntri nekapsar akajtukarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma áarmatai nu

shuaran kakerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tíaiajai. ¹¹Tura kakerkaran nekas tákun “Wijíai shiir pujustinian penké tsankatkachartatjai” tíaiajai” tíaiajai Yús.”

Tu áarmaiti.

¹²Anearta, yatsuru. Yajauch enentáimsarum tuke iwiaaku Yus enentáimtutsuk kanakirap. ¹³Kame kashinkia tunaajai ananmam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum. ¹⁴Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujai shiir tsaninkiar pujustatjai.

¹⁵Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶Muisais Ejiptu nunkanmaya jiiikmia nú shuar Yusa chichamen anturkariat nakitarmiayi.

¹⁷Tura umiiniachkui kuarenta uwí kakerkarmiayi. Tunaan túrawaru ásar untsurí shuar aents atsamunam kajinkarmiayi. ¹⁸Kame umirkacharunka Yus “Wijíai shiir pujustinian penké tsankatkachartatjai” tíaiajai. ¹⁹Iis, Yúsán enentáimtachu ásar Niijíai shiir pujustinium wayátniun tujinkarmiayi.

4

¹Nu asamtai, ii wayátn tsankatkamu áyatar Yusjai shiir pujustinnium páchtikiachu aij tusar aneartiniaitji. ²Yaunchu nu shuaran ujakarmia núnisan incha Uwempratin Chichaman ujatmakuítji. Nu shuar Yúsán enentáimtutsuk antukaru ásarmatai nu chicham yáincharmiayi. ³Antsu iikia ni chichame enentáimta asar Yusjai shiir pujustinium nekas wayaji. Tura chikichan Yus tíaiajai:

“Nu asamtai kakerkan nekas takun “Wijíai shiir pujustinian penké tsankatkachartatjai” tíaiajai” tíaiajai. Kame Yus jú nunkan najana umik nuyá shiir pujus ayampramiayi. ⁴Yus-Chichamnum ayampramun júnis tawai.

“Yus sais tsawant takakmas nuyá tsawantai ayampramiayi.”

⁵Tura ataksha tawai:

“Wijíai shiir pujustinnium wayá ayamprashtatui.”

⁶Shuar nuí wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷Nu asamtai ataksha Yus wayátn tsawantan áanturmaitji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujatmaj:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tíaiajai.

⁸Kame ni kapitántri Jusué Israer-shuaran ni nunkeen awayá ayamtikraitkiuñkia Yus ukunam ataksha tsawantan áanturmachaaji. ⁹Nujai páantaiti, ashí Yus-shuar Yusjai shiir pujusar ayampratin tuke awai. ¹⁰Yusjai ayampra nu, ni kakarmaríjii takastinian ayampraiti Yus ni takatríjii ayampramia núnisan. ¹¹Nu asamtai iisha Yusjai shiir pujustinnium pachiinkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹²Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin inít wayá ashí ni enentáimman tura wakeramurin ti paant awajtawai. ¹³Yus najanamuka penké Nin umprukchamniaiti. Ashí írunga nu Yus ímmianum misúa áintsan paant áiniawai. Tura ii túramu ashí paant ujakartatjai.

Jesus nekas Yúsán pujurniu úntrinti

¹⁴Jesus Yusa Uchirí nekas Yúsán pujurniu uuntri ajas Yusai wayá iiniun chichartamji. Nu asamtai iniaitsuk tuke nekas enentáimtustiniaitji. ¹⁵Niisha iijíai métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentramniuitji. Tura Yúsán pujurniu uuntri asamtai ¹⁶Yús-akuptainium shiir enentáijíai sapijmiatsuk jeamniaitji. Tura Yus in anenma asa waitnentramak itiurchat pujajnia nuí yainmaktatji.

5

¹Tura Yúsnan pujurniu úuntri¹kia shuar anaikiamu¹iti tura ni takatrí¹ jímiaraiti. Yusaí shuárnan chicharsatni¹u¹iti. Nuyasha Yus su¹ni¹amun súsatni¹u¹iti tura nú¹nisa¹n¹ nama¹nken maa Yúsán súsatni¹u¹iti shuara tunaarín¹ asakátratni¹un. ²Tura Yúsnan pujurniu uuntri¹ ni-isha shuar asa ni tujintiamun nék¹ak shuar nék¹achuncha tura waak yujainia nunasha wait-entramnia¹aiti. ³Tura niisha tujintia asa ni tunaarín¹cha chí¹kichnajaí¹ méte¹k tsan¹kurnarat nama¹nken maa Yúsán súsatni¹u¹iti.

⁴Shuar ni enentáí¹jiaí¹n¹ka Yúsnan pujurniu uuntri¹ ajaschamnia¹aiti. Antsu Yus nu shuaran anaikiatni¹u¹iti. Nú¹nisa¹n¹ Aru¹nkan anaikiami¹yi. ⁵Núniskete Krístujaí¹. Niisha ni enentáí¹jiaí¹ enentáí¹jiaí¹ Yúsnan pujurniu uuntri¹ ajaschami¹yi. Antsu Yus Nin anak nujáí¹ shiir awajsami¹yi. Tura t¹mi¹yi:

“Ame winia Uchiruitme. Tú¹maitkui yamaikia winia kakarmarun á¹takeajme.”

⁶Tura ataksha Yus-Papini¹um jú¹nis tawai:

“Mirkiseté¹kka Yúsnan pujurín¹ amia nú¹nismek Amesha tuke Yúsnan pujurín¹ á¹tatme.”

⁷Kristu jú¹ nu¹nkanam pujak kakantar ú¹tuk Yúsán ti seami¹yi. Nin já¹katni¹unmaya uwentikramnia asamtai seami¹yi. Tura Yusa wakeramurín¹ tuke enentáí¹jiaí¹ enentáí¹mtakui Yus anturak ti yáí¹nmi¹yi. ⁸Nujáí¹ Kristu Yusa Uchirín¹tai ni wáí¹tsatni¹ujaí¹ umirkatni¹un unuimiarmi¹yi. ⁹Nujáí¹ ti nekas Uwemtikín¹ ajasmi¹yi. Tura shuar umirainia nuna tuke uwem ataksha Yus-Papini¹um jú¹nis tawai:

“Mirkiseté¹kka Yús¹nantikrarmi¹ni¹aiti. ¹⁰Tú¹ramtai Yus Nin Yúsnan pujurniu uuntri¹ Mirkiseté¹kjaí¹ méte¹k awajsami¹yi.

Anearta. Yusjaí¹ kanakchatni¹u¹iti.

¹¹Ju ti nukap á¹ujmatsatin awai. Tú¹rasha á¹ntichu asakrumin mashi ujakchamnia¹itjarme.

¹²Á¹tunka yaunchu mash nekaamaintrume. Tú¹maitiatrum ataksha ya¹itias Yúsnan jintin-truat tusarum atsumarme. Warí¹, kuirchia nú¹nini¹aitrume. Ká¹tsuram yú¹tsuk muntsu muntsú¹atni¹uitrume. ¹³Kuí¹rchia Uwempratin Chichaman á¹ujenak pé¹nker unuimiainiat-sui. Tí¹nki¹ammuní¹á¹ á¹sar tujintia¹iniawai. ¹⁴Apatuk ká¹tsurman aya uunt yuá¹nni¹aiti. Uunt ainia nuka pé¹n¹kernasha tura yajauchincha apatkar paant né¹kainiawai.

6

¹Uunt ajastai. Krístunu ana nuyá¹ aya yú¹pichuchia nuke enentáí¹mtutsuk nu arantcha unuimiartai. Kame emka unuimiartinia nu ju á¹niawai: shuar ni tunaarín¹ já¹katni¹unam jú¹ana nuna kú¹ntuts enentáí¹mtur Yúsán shiir enentáí¹mtustincha, ²imiantinnium nekaat-niuswai:

“Mirkiseté¹kka Yús¹nanha, Yus-shuar yaí¹nmanum uweje¹ awantsatni¹usha, jakamunmaya nantaktincha, tura sumantikiatin tsawanta nu nekaatni¹usha. ³Tura Yus yaí¹n-makrin nuna nan¹kaamas nekaattaji.

⁴Shuar Yusna nuna neka¹nka tura Yus susamun takakkun¹ka tura Yusa Shiir Wakaní¹ kakarmarín¹ nekapsaitkiun¹ka ⁵tura Yusa chichamencha pé¹nkeraiti neka¹nka tura Yusa kakarmarí¹ ukunam nun¹ka yamarmanum takastatna nuna yamá¹ nekapeakka, ⁶nu shuar nuna nakitiak kanakniaka atak ni tunaarín¹ enentáí¹mtak ikiuktinian wakerachuk tujinkiattawai. Warí¹, ní¹ enentáí¹jiaí¹ Yusa Uchirín¹ krúsnum má¹ni¹aiti tú¹rak ashí¹ í¹mi¹ainiaí¹ natsanmain awajeawai. ⁷Nu shuar yajauch nun¹ka á¹intsan á¹niawai. Yumi yú¹takui pé¹nker nun¹ka arakan pé¹nker tsapatmakka arakmaun yayawai. Tú¹ramtai Yus shiir enentáí¹miui. ⁸Antsu jan¹ki nupan tsapatmakka nu nun¹ka yajauchiiti. Yus á¹eseak emesrattawai.

Yus tsan¹katramkattajnia nu enentáí¹mtakur kakaram ajaji

⁹Aneamu yatsurú¹, tu chicharkursha, nú¹ shuarchaitrum nu né¹kaji. Antsu uwempra asarum nú¹ pé¹nker tú¹rattarme. ¹⁰Yus ti pé¹nker asa á¹tum takasmancha tura ni aneakrum Yus-shuar yaí¹nmancha kajinmatkishtatui. Tura yamaisha tuke tú¹rarme. ¹¹Tura nuik tú¹armena nú¹nismek tuke iniaitsuk kakaram takasum ashí¹ Yus tsan¹katramkatta nu wá¹inkiattarme. Nú¹nisa¹n¹ atí¹ tusar wakeraji. ¹²Nakimtsuk kakaram ajastarum. Ni¹niua nuna Yus ni shuarín¹ susattawai. Tura shuar Yúsán enentáí¹mtak shiir enentáí¹jiaí¹ ná¹kakka nuna wainkiattawai. Tu takastarum tusar wakeraji.

¹³⁻¹⁴ Yus yaunchu Apraámjaj chichaak “Ti nekas shiir awajsattajme tura ti nukap pamptikrattajme” tímiayi. Nuna taku imiá nekas tajai tusa tura chíkich Nijijaj nankaamas uunt atsakui imia Niñki pachiimias tumammiayi. ¹⁵ Tutai Apraám yáitmataik nákas Yus timia nuna wáinkiamiayi. ¹⁶ Shuar “nekas tajai Yus íruu” tákuñka chíkich nijijaj nankaamas úntan páchiawai. Tura tu chichasmatañkia nuyánka imiá nekas tana nu nekaamniati. ¹⁷ Tuma asantai Yuska “ti nekasan yapájtsuk túrattajai” tusa imia Niñki pachiimias tumammiayi. Nujaj ni tsan̄katkamun júkiartatna nu shuar Yus ti nekas umiktatna nuna nékainiawai. ¹⁸ Yus pen̄ké wáitruachmin asa áyatik ni tamajaj nekasaite. Nuna arant nuikia imia Niñki pachiimias ti ikiakátmaji in. Nujaj iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákJaji. ¹⁹ Nu enentáimsar kakaram ajaji. Yusaíya in umuchtiámkamnia pen̄ké atsawai. Yusaj áchitkia asakrin ti kakaram emettamji. ²⁰ Jesussha emka Yusaj wayá mash iwarturmaji. Tura Mirkiseték amia núnisan̄ Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisan̄ Jesussha Yúsnan pujurniu uuntri ajasuiti

¹ Nu Mirkisetéksha Sarem nun̄kanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetjaj awakak támatai Mirkiseték jiintiuki in̄kiuñ ti shiir awájsámiayi. ² Túramtai Apraám nupetmakar kuit jukimiuñ tias (10) akantuk susamiayi. Mirkisetéka naarj tana júka “ti pen̄ker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniurj asa “ti shiir imiatkinchanum akupin” tawai. ³ Nukurisha aparisha Yus-Chichamnum atsawai. Núnisan̄ ni uuntrijsa atsawai. Ni akiiniamuríncha ni jakamuríncha ujaatsui. Tuma asantai Yusa Uchirjá áintsan̄ tuke iniann̄akchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiuñ tias akantuk susamiayi. ⁵ Tuma asantai Apraám nan̄kaamas úntaitai. Muisais akupkamujaj Riwí weeáka Yúsnan pujurin ániawai. Niisha ashí Israer-shuarjaj métek Apraám weeá ániawai. Túmaitiat pen̄ké Israer-shuar ni warirjñ tias akantuk Riwí shuaran suu ármiai. Muisais tu akupkamiayi. ⁶ Túrasha Mirkiseték Riwí weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan nijijaj uunt asantai susamiayi. Túram Mirkiseték Apraáman shiir awajsamiayi. ⁷ Imiá nekas Mirkiseték Apraáma nan̄kaamas páantín asa Apraáman shiir awajsamiayi. ⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham pen̄ké ujaatsui. ⁹ Yamá Riwí weeá shuar kuit akankamun achiktin ániawai. Túrasha Apraám Mirkisetékan súaku Riwí weeá nujaj susa ániawai. ¹⁰ Apraám weeá ániak ni ayashjá áinis enentáimtusmin ániawai.

¹¹ Muisais akupkamunam Riwí-shuarnumiá aya Aruñ weeá shuar Yúsnan pujurin ármiai. Niisha Muisais akupkamu timia nujaj métek pen̄ké shuarjaj takasarmiai. Tura Riwí-shuarnumiá Yúsnan pujurniu takatrijijaj tunáa nekas asakarmiaitkiuñkia Yúsnan pujurin yamarmak, Aruñ weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniu anaikiati. Nusha Aruñ weeachu. ¹² Tura Yúsnan pujurin yapajniámtai Muisais akupkamusha yapajniátniuiti. ¹³⁻¹⁴ Nu arantcha, ii Uuntri Jesukristu Riwí-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrin̄ pen̄ké túrashtiniuyi. Tuma asantai nujajsha Muisais akupkamu yapajniátniuiti.

¹⁵ Nú páantcha awajsamniati. Wats, Yúsnan pujurin yamarma nuka Mirkisetékjaj méteketi. ¹⁶ Niñkia Riwí shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiayi. ¹⁷ Tuma asantai júna Yus Jesusan áujmatui: “Mirkisetékka Yúsnan pujurin amia núnismek Amesha iniann̄atsuk Yúsnan tuke pujurin átatme.”

¹⁸ Nujaj yaunchu akupkamu pënkercha ajasmatai japirmaiti. ¹⁹ Muisais akupkamuka shuáran pënker awajtsachminiuyayi. Antsu Yus in ti shiir awajtsamsattajnia nu nákaji. Nujaj Yusaj ti shiir jeeáitji.

²⁰ Nunasha Yus “nekas tajai” tusa Niñki pachiimias tumammiayi. ²¹ Riwi-shuarnumiá Yúsnan pujurin Yusa naari pachitsuk anaikiamu ármiayi. Antsu jú Yúsnan pujurniunka Yus imia Niñki pachiimias anaikiamiyi. Tura Nin júnis tímiayi:

“Uuntka imia Niñki pachiimias tiniu asa peñké yapajáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asantai Jesuska nekas uwentikrattajai tusa yaunchu amia nujaj nankaamas pënker Chichaman iwiarturuiti. ²³ Yaunchu Yúsnan pujurin untsurí ármiayi. Chíkich jakamtaí chíkich tuke takaarmiayi. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsna áujtusminiaiti. Tuma asa shuar Nin enentáimtusar Yusaj weankarun tuke uwentikramniaiti.

²⁶ Tuma asa Jesus Yúsnan pënker pujurin asa ii atsumajnia núkete niisha. Niisha ti shiir asa peñké tunaarinchaiti. Ashí tunaariniunmaya kanakniuiti. Tura Yusaj métek Uunt ajasuiti. ²⁷ Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsna suu ármiayi. Nujaj emka ni tunaarín nuyá ashí shuara tunaarín asakátin ármiayi. Tura Jesuska jákatniunam chikichki surumak ashí shuara tunaarín asakátiamiyi. ²⁸ Muisais akupkamuka peñké shuarnak tuke pënkercha aijn Yúsnan pujurniu úntrin anaikiaiti. Tura nu ukunmanka Yus, nekas niñki pachiimias, ni Uchirín, tuke pënker nuna, Yúsnan pujurniu úntrin anaikiaiti.

8

Nankaamas pënker Chichaman Jesus takartamji

¹ Nekas juna tájame: Yúsnan pujurniu untri Jesus in ti shiir yainma asa akupin pujutainium Yusa untsurín nayaimpiniam pujusuiti. ² Nekas Yusa Jee nayaimpinma nu aents najanachma antsu Yus najanamuiti. Nuí Jesus Yúsnan pujurui. ³ Ashí Yúsnan pujurniu untri ainia nu, shuar Yúsnan susamuncha tura namañ maar Yus sútaincha Yúsna ashí súsatin áiniawai. Núnisan Jesukristusha Yúsna súsatniuiti. ⁴ Juyá Yúsnan pujurin Muisais timia nuna Yúsna yamaisha susamin akui Jesus ju nunkanam pujakka Yúsna pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam írunka nuna iniaktus tímiayi “Ame wáinkiamna nujaj métek ashí najanata.” Túramu asantai ashí yaunchu Yúsna pujurin Muisais najanamujaj takainia nu aya nayaimpiniam ana nuna nakumkamujaj takainiawai. ⁶ Antsu Jesus ti nekasa nujaj nayaimpiniam takaawai. Muisais akupkamuka shuáran pënker awajtsachminiaiti. Antsu Yus in ti pënker awajtsattajai. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti pënker ániawai. Tuma asantai nankaamas pënker Chichaman Jesus takartamji.

⁷ Kame Emka Chicham, Yus Muisaisaj yaunchu najanamia nu, nekas pënkeraitkiuinika Yamaram Chichaman najanachaayi. ⁸ Antsu pënkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarajaj Yamaram Chichaman najanattajaj. ⁹ Yaunchu ju shuara untrin Ejiptunmaya yaruakmij nuí Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaismajaj.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarajaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrattajaj. Nuyá ni Yusrí ártatjai tura niisha Wí shuar ártatui. ¹¹ Nuísha Yúsna nekaat tusa jintinnaiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui. ¹² Tura ashí ni tunaaríncha tsankuraran ni yajachirín atak peñké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujai métek túratniuyayi. Tura ju nunkanmaya Yusa Jeeⁿ weriar Yús shiir awajsatniuyayi. ² Nu Jeasha júnis tesakmauyayi. Nékatka Shiir Tesaamu tutainti. Nui asutin ekeemakar tsápin awajtaisha tura misasha Yus iniaktusma tantajai pujuyayi. ³ Nuyá-tesaamuka Imiá Shiir Tesaamu tutainti. ⁴ Nui kun^{kuin} ekeemataisha kurijiai kuerma tura Chícham Aarma Chumpitiasha pujuyayi. Nusha ashí kurijiai kuérmauyayi. Tura init kurijiai najanamu ichin^{kian} maná yurumak enkemniuyayi. Nuyá Yús^{nan} pujurniu uuntri Arun^{ka} ushukrutairi yaunchu tsapaak jan^{kukmia} nusha enkemniuyayi. Nuyá Yus najanamu Chícham Muisais kayanam aarmasha enkemniuyayi. ⁵ Nuna úkurin Kirupín, nayaimpinmayaⁿ suntara nu, kurijiai nakumkamu wajarmiayi. Nusha Yusa shí^{rmarin} nakumkarmiayi. Tura ni nanapé^{jai} shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asantai Shiir Tesaamunam ashí Yús^{nan} pujurin tuke wáiniak Yús^{nan} takasarmiayi. ⁷ Tura Imiá Shiir Tesaamunman^{ka} aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaar^{isha} tura ashí shuara tunaarⁱ tsan^{kurnarat} tusa Yus súsatni^u naman^{ké} numpen juu ámiayi. ⁸ Yusa Wakanⁱ núnis atí tusa nuna mash iwiamiyayi. Tura asa juna paant awajturmajai. Jú nunkanmaya Yusa Jeeⁿ pujakui tura aya nuⁱ Yus shiir awajsamniatkiu^{inkia} nekas Imiá Shiira nuⁱ Yus pujamunam wayatin tuke itirchat ainti. ⁹ Nusha yamá pujuin^{ia} nuna enentáimtikramprati^{itji}. Shuar Yus shiir enentáimtikratniun naman^{ken} maa sú^{niak}-sha nu shuar ni tunaar^{ijiai} tuke itit enentáimtumainiawai. ¹⁰ Warí, aya yurumátniusha umartincha nijartincha tura ashí núnisaⁿ túratniujai aya pá^{atek} asantai enentáiniam ana nuna iwiarachmin á^{niawai}. Antsu Yus nú túratniunka yapajá^{tniuyayi}. Tuma asantai yapajniátsain túratin á^{niawai}.

¹¹ Tura yamaikia Kristu táwiti tura Yús^{nan} pujurniu uuntri ajas Yamaram Chicham-nun Yus ti pen^{keran} túrutmatniua nuna pujurturmaji. Niisha ti shiir Yus Jeeⁿ aents najanachmanum takaawai. Nu Jeeⁿ ju nunkanmayanch^uiti. ¹² Tura Kristu Imiá Shiir Tesaamunam naman^{ke} numpé^{jai} wayach^uiti antsu ni numpejain^k wayaiti. Tura aya chikichikí wayá ii tunaarⁱⁿ asakturmar tuke uwentikrampram^{ia}ji. ¹³ Nekas naman^{ké} numpesha tura áisamu yun^{kunmirisha} tunáa shuarnum pá^{atek} ukat^{kamu} aya pá^{atek} shiir awajsamniuyi. ¹⁴ Túrasha Kristu numpéⁿ ii tunaarⁱⁿ pen^{ké} asakarúiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu pen^{ké} tunaarⁱⁿcha asa tuke jákashtin Wakanⁱ kakarmar^{ijiai} jákatniunam Yusaj surumakmiayi.

¹⁵ Nu asantai Jesukristu Yamaram Chichaman shiir takarniuiti. Yaunchu Chichamjai tunáa nekas tsan^{kurachka} asantai Kristu jaka nu tunaan^{cha} tsan^{kurarmiyai}. Nujai ashí Yus-shuarti Yus achikma asar Yus tsan^{katramajnia} nu wáinkiar tuke wararsattaji. ¹⁶⁻¹⁷ Shuar ni kuifrin akantrattak chichaman najanatniuiti. Tura jáatsain nu kuit akantrash-tiniaiti. Aya nii jakamtai nu chicham najanamu uminkiatniuiti. ¹⁸ Nu asantai Emka Chicham Muisaisjai najanamusha maamu numpé ukatramujai akupkamuyayi. Nujaiⁿsha namⁿ máatniuyayi. ¹⁹ Muisais nu akupkamun ashí shuáran ujakarmiayi. Nuyá ure kapaakujai tura nupajaiⁿsha naman^{ké} numpé entsajai pachimpramujai ayak akupkamu papin^{cha} ashí shuarnasha ukat^{karmiayi}. ²⁰ Tura tiarmiayi “Ju numpajai “Chícham Yus akup^{turmarmena} nu nekas umiktiniaiti” tawai.” ²¹ Nuyá nu numpajai Yusa Jeeⁿcha ashí nuⁱ takastin irunmia nunasha ukat^{karmiayi}. ²² Nu akupkamujai pen^{ké} ishichik numpa^{jain}chu shiir awajsamniaiti. Túrasha numpajain^{chu} tunáa pen^{ké} asakar^{chamniaiti}.

Kristu jakamujai tunáa asakarminiaiti

²³ Tuma asantai Muisais najanamu nayaimpiniam ana nuna aya nakumkamu ásar naman^{ké} numpejai shiir awajsam^u á^{rmiayi}. Antsu nayampiniam nekas írunna nu, nan^{ka}mas kakaram numpajai shiir awajsatin á^{niawai}. ²⁴ Kristuka yaunchu Yusa Jeeⁿ aents

najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmají. ²⁵ Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Krístuka untsurí wayachuiti. ²⁶ Kame untsurí wayatniuitkiunkia ni numpejainkⁱ wayá asa yamañkamtaiknumiá untsurí jákaayi. Antsu yamaikia ju nuñka amúamunam Kristu chikichkí jákatniunam surumak tunaan ashí asakáruiti. ²⁷ Ashí shuar chikichkí jakar nuyá ni túramun Yusaí nekamatniun nantaktin ániawai. ²⁸ Núnisan Kristu chikichkí jákatniunam surumak shuara tunaarin asakáruiti. Tura atakka tunaan asakártinian wantinkiashtatui. Antsu ni tátintriñ nákaínia nuna uwemtikkratts wantinkiatwai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin namañ maar Yus sútaijiaísha shuara tunaarin asakátrachminiaiti. ² Kame asakátraka shuar nekas shiir awajsamniaitkiunkia Yus namañ maar súsatniun atsumachuk iniaisarayai. Iis, mash tsankuramuitkiunka ni tunaarijiaí itit enentáimtu-mascharainti. Túrawar namañ maar Yus súsatniun iniaisarainti. ³ Antsu namañken maar ashí uwitin tuke suíniak nujai ni tunaarin tuke enentáimtuiniawai. ⁴ Warí, namañké numpejai ii tunaari penké asakárchamniaiti.

⁵ Nu asantai Kristu jú nuñkanam taa Yúsán chicharuk tímiayi:

“Namañ maar sútaiasha penké nakitráme. Antsu ayash iwíaram surusuitme. ⁶ Namañ áesamusha tura tunaan asakártin namañ susamusha wakeratsme. ⁷ Tuma asantai “Yusrú, tímiajai. Winia áaturma núnisnak ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu aijn, namañ susamuncha, tunaan asakarat tusa namañ maar susamuncha, namañ áesamuncha Yus ashí nakitraitit tawai Kristu. ⁹ Nuyá “Yusrú, ame wakeramurmin umiktajtsan táwitjai” tawai. Nuna taku namañ maar sútain “Asakáiniaiti” tawai. Tura chikichan ikuawai. ¹⁰ Jesukrístu Yúsán umiruk jákatniun chikichkí surumak-matai Yus in tunaarincha shiir awajtamsaitji.

¹¹ Tura Israer-shuarnumiá Yúsán pujurin ashí tsawantaj nú namañnak máawar tunaan asakáchunak Yúsán ti suu ániawai. ¹² Antsu Jesukrístuka jákatniunam chikichkí surumak ashí shuara tunaarin asakár atakka penké jákashtiniaiti. Nuna tura Yusa untsuurini nekas akupin pujutainium pujusuiti. ¹³ Tura Yus ni nemasrin nupetak nin umirkarti tusa súsartatna nuna nákawai. ¹⁴ Chikichkí jakamujai ni shuarin tuke tunaarincha awajsaruiti. ¹⁵ Yusa Wakanísha núnisan tawai. Emka tímiayi:

¹⁶ “Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrattajai.” ¹⁷ Nuyásha tawai: “Ni yajauch tunáa túramurin penké enentáimtushattajai.”

¹⁸ Tuma asantai, ii tunaari tsankuramu asantai atak in jarutramkatin atsumatsji.

Yus tuke shiir enentáimtusar Yusaí jeartai

¹⁹ Tuma asantai, yatsurú, Jesukrístu numpejai penker awajsamu asar sapijmiatsuk shiir enentáijai Imiá Shiira nuñ, nekas Yus pujamunam wayamniaitji. ²⁰ Nuñ wayatniuka Kristu jaka Yusa Jeen tesaamun júsatniua áintsan ánturmamijai. Yamaisha tura tuke wayamnia átatui. ²¹ Jesus Yúsán pujurniu uuntri asa ashí Yus-shuartin wáitmak pujurtamji. ²² Tuma asantai, tuke enentáijai Yus imiá nekas enentáimtusar Yusaí jeartai. Ii enentáin Kristu numpejai nijiarma asantai nekas enentáimtakur ii tunaarijai itit enentáimtusaschat-niuitji. Tura ii ayashísha penker entsajai imianniuitji. ²³ Yus tsankatramkattajnia nu shiir enentáimtamú iniaitsuk kakaram ajasar tuke emetatniuitji. Yus tsankatramkaitji nuna umiktatui. ²⁴ Penker anenain tura penker túrin ajasartai tusar mai yainiakiartiniaitji. ²⁵ Yusa Jeen Yus-shuarjai tuke iruntratini iniaisashtiniaitji. Chíkich iniainiakuisha iikia tuke iruntratniuitji. Nuñ irunkurkia ikiakánartiniaitji. Tura Kristu tátin tsawantri ishichik ajasu asantai nú nukap túratniuitji.

Anearta. Ti tsúumainti iwiaaku Yusa kakarmarijai asutniátin.

²⁶Túrasha shuar nekas chichaman nékayat wakeramurijjain tunaanum wekaakka Kristu jakamun nakitia asamtai chíkich atsawai ni tunaarín asakátratniun. ²⁷Áyatik ashamak ti tsumai sumamatin tsawantan náksminiati. Nu tsawantaj Yus ni nemasrín ti kajerak asutiak mash emesrattawai. ²⁸Shuar Muisais akupkamun umikchamtai tura jímíar shuar menaintiusha etserkarmatai waitnentsuk máatniuyayi. ²⁹Núnisaitkiuinkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakaníncha katsekainiakka nuna nankaamas asutniáchartatuak. Warí, nii nakitiana nu numpajaj Yamaram Chicham nekas umirkatin awajsamuyayi. Tura nújajsha nii ti péñker awajnastiniuyayi. ³⁰Ii Uuntrí Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarín ti paant nekarattajai.” ³¹Ti tsúumainti iwiaaku Yusa kakarmarjijaj asutniátin.

³²Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme. ³³Chíkichtirmeka katseknakmarme tura ashí ímiainiamunam yajauch awajnasmarme. Chíkichcha nu shuarnum pachitkia asarum itit awajnasmarme. ³⁴Atumsha sepunam pujuinia nusha waitnentrarmarme. Tura shiir warasrum kuítrumín atantramainiakusha katsuntramarme. Nayaimpiniam tuke amuukashtin kuít pachiktin asarum túramarme. ³⁵Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiatarmarme. ³⁶Atumsha esetra enentáimsarum Yus wakera nu túrakrum Yus atumin amastinia nu wainkiattarmarme. ³⁷Kame Yus-Chichamnum áarmaiti:

“Tátinia nu ishichik ajasai. Wárik tátatui. ³⁸Shuar Yúsán nekas enentáimtak péñker wekaak uwemprattawai. Tura iniaiyakuinkia nin wararsashtatjai.”

³⁹Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹Yus nekas enentáimtakur “nákañnia nuna, Yus nekas suramsattajai” taji. Tura wáin-chaitiatar “nekas wainkiattajai” taji. ²Yaunchu ii uuntrí Yúsán nekas enentáimtuiniakuu Yus “péñkeraitme” tiarmiayi.

³Aya Yus enentáimtakur ju nékaji: Yus aya ni chichamejain ashí nuñkan najanamiayi. Túramtai ashí wáiniainiaj nu wáinchataijijaj najanamu áiniawai.

⁴Apir Yúsán nekas enentáimtak Kaññaj nankaamas péñkera nuna Yúsán susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaiatit tuke enentáimtikramji.

⁵Eruksha Yúsán nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnatsuk Yúsán ti shiir enentáimtikniuyayi” tawai. ⁶Tura Yus nekas enentáimtachkumka žitiurak Nii shiir enentáimtiksatam? Nekas enentáimjaj Yúsán weantuktaj tusam wakerakmeka, emka, Yus iwiaaku pujawai, tu enentáimpratniuitme. Nuyásha, Wi Yúsán eakuinkia Yuska winia yáintkiattawai, tu enentáimsatniuitme.

⁷Yus, “amaarkatniun akupkattajai” tiniu asamtai, Nuaisha Yúsán nekas enentáimtak, amaarun wáinchaitiat, “túrunattawai” tímiayi. Túrak Yus timiajaj métek uunt kanun najana ni shuaríncha uwemtikramiayi. Tura Yúsán nekas enentáimta asamtai Yus “péñkeraitme” tímiayi. Tura ni umirkamujaj chíkich shuar Yúsán enentáimtachun súmamtekiawarmiayi.

⁸Tura Apraámsha Yúsán nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nuñkanam wémiayi. Turasha ni nuñken ikiuak ni jeatniun nékatsuk jínkimiayi. ⁹Yúsán shiir enentáimtak nú nuñkanam Yus nin tsankatkamuitiat írara áinis pujusmiayi. Nuap jeanam pujuuyayi. Núnisañ ni uchirí Isaksha tura ni tirankí Jakupsha nuñ tsankatkamuitiatan írara núnisar pujuarmiayi. ¹⁰Kame Apraámka nayaimpinmayá ashirchamin péprunam pujustinian náksamiayi. Yus nu pepru péñker iwiar jeamka asamtai umuchkiachminiati.

¹¹ Apráama nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. ¹² Tura nujaj Apraám ti úuntchitiat ti pampañmiayi. Nii chikichkítat ni pampañmarí ti untsurí ajasar yaajaj métek tura náikmijjaj métek nekapmarchamnia ajasarmiayi.

¹³ Ashí nu shuar Yus tsan̄katkamun wáintsuk jákarmiayi. Túrasha Yúsan nekas enentáimtuiniak arantja wáinkiar warasar shiir enentáimtiarmiayi. Túravar “ju nun̄kanam nekas aya íraraitji” tiarmiayi. ¹⁴ “Íraraitji” tu chichainiak ch̄kích nun̄ka eamun páant awajainiawai. ¹⁵ Niisha matsatu winíarmia nuj atak waketkitniun wakeruiniakka páchitsuk waketkíaraayí. ¹⁶ Tura antsu niisha nuna nan̄kaamas péñker nun̄kan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantatsui.

¹⁷ Ataksha Apraám Yúsan nekas enentáimtak “chikichik uchi amasmaj nu, namañkea áitkiasmek maam surusta” takui Apraám Isakan ni uchirín Yus susatniun péñké suritki-achmiayi. ¹⁸ Kame Yus “Isakjaj ti pampañtatme” tau asamtai ¹⁹ Apraám “máamtaisha Yus iniantkittiwai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan̄ wáinkiamiayi.

²⁰ Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. ²¹ Núnisan̄ Jakup Yúsan nekas enentáimtak jatsuk ni tiran̄kin, Jusé uchirín, shiir túrunattana nuna ujakarmiayi. Tura ti uuntach asa máshtun̄krin ushukruma Yúsan shiir awajsamiayi. ²² Tura Jusesha jákatniurí ishichik ajatesmatai Yúsan nekas enentáimtak Yus ukunam Israer-shuaran Ejiptu nun̄kanmaya júkiartatna nuna ujakarmiayi. Tura jíiniainiak ni ukunchin̄ júkiar Yus tsan̄katkamu nun̄kanam iwiarsarat tusa akupkamiayi.

²³ Muisaisa aparísha nukurísha Yúsan nekas enentáimtuiniak Muisais ti shírmach asamtai suntar máawarain̄ tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmaya uunt akupniun nawantrí uchirí ajastinian nakitramiayi. ²⁵ Antsu Ejiptu nun̄kanam ishichkisha tunaan waratsuk Yusa shuaríjjaj métek wáitsatniun nan̄kaamas wakerukmiayi. ²⁶ Nujaj Kρίstun yajach awajsarmia núnisan̄ niisha wáitsatniuyu. Túrasha ashí Ejiptu nun̄kanam péñker irunmia nuna nan̄kaamas Yus nin ukunam tsan̄katkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu ain̄ ashamsuk Ejiptu nun̄kanmaya jíinki wémiayi. Yúsan wáinchiat shiir enentáimtamujaj wainiua áinis kakaram ajas ashí katsuntramiai.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaj ni wáitirín kuérat tusa akupkarmiayi. Nujaj Yus timia núnisan̄ nayaimpinmaya suntar nuna iis nu jeañnam iwiain̄rin̄ máatsuk nan̄kaikit tusa tmiayi.

²⁹ Israer-shuarsha Yúsan shiir enentáimtuinia ásar Kapañntin̄ Entsa nakaakamtai ajapén ti péñker kukarnum katiñkiarmiayi. Ejiptunmaya suntarsha núnisan̄ katiñtai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sáanákmiai. Nujaj ti yúpchuch nupetkarmiayi.

³¹ Raapsha nu péprunam pujak, Yúsan nekas enentáimtak tsanirmataj áyat Israera suntarín mamíkmak wekaan ti péñker itíaa asa ch̄kích shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin̄ ti írunui. Jeteúnsha, Paraksha, Samsun̄sha, Jiptísha, Tawitcha, Samuersha, Yúsan etserniusha nu shuar ármiayi. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarin̄ niisháa niisháa iniaktusarmiayi. Nuna túruiniak ch̄kích ch̄kích nun̄kanmaya aentsun nupetkarmiayi, nuísha péñker akupkarmiayi, tura Yussaha ni timia núnisan̄ yaínkiarmiayi. Uunt yawancha kajechu awajsarmiayi, ³⁴ uunt jiniasha ikiajniakarmiayi, puniajjaj mantamnatniuncha uwemprarmiayi. Kakarmachusha kakaram ajasar mesetnumsha ni nemasrin̄cha nupetkarmiayi. ³⁵ Nuwasha ni uchirí jakan iniantkimiun wáinkiararmiayi.

Chikichcha wáitias mantamnawarmiayi. Ti shiir pujustinnium nantaktiai tusar nú tsawantaj uwempratnium nakitrarmiayi. ³⁶Chikichcha katseknakarmiayi, asutniáwarmiayi, jirujaj jinkiwari sepunam enkenawarmiayi. ³⁷Kayajaj tukú mantamnawarmiayi, jímapietek tsupinkiararmiayi, Yúsan iniaisar tusa nekapnasarmiayi, puniajaj mantamnawarmiayi. Aya wékainiararmiayi, kuítríncha ásar nuapen entsararmiayi, shuar nincha áintrar wáitnenmai awajiararmiayi. ³⁸Atsamunmasha, naincha, waanmasha, ashí nuñkanam wekain ármiai. Nu shuarjajnkia ju nuñkanmayá shuar imiá yajauch ásar niijaj pujumainchu ániawai. ³⁹Nu shuar Yúsan shiir enentáimtuiniakui Yus “pénkeraitrume” tiarmiayi. Túmaitiat ni tsankatkamun wáinkicharmiayi. ⁴⁰Yuska nuna nankaamas péñkeran iwiarturaru asa tura in yamá pujajnia juna enentáimturma asa niisha iisha mai metek tsaniñkiar ti penker ajasarti tu enentáimsamiayi.

12

Jesus tuke enentáimtusar tsékentiai

¹Ashí ju nuñkanam túrajnia nuka shuar nakuruiniak tsékena nujaj nakumkamniaiti. Ashí shuar yaunchu Yúsan shiir enentáimtusaruka téntakar firmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékenkir jeatai. ²Túmakur Jesus tuke enentáimtusar tsékentiai. Ashí shuarjaj nankaamas Jesus Yúsan ti nekas enentáimtak aya péñkernak túramiayi. Tuke nekas awakmakmiayi. Imiá tunáa shuáran krusnum máatin aju núnisañ natsanmainium jákatnium surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurinj akupin pujutanium pujusuti.

³Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum. ⁴Átum tunaajaj máaniakrum Jesus túramia áintsarum numpensha puárchaitrume tura jákachuitrume. Nuísha katsuntrarum jeatniuitrume. ⁵⁻⁶Yus nekas ni uchrin chicharkatniua ánis túramprum nu kajinmatkíchmarshuram. Júnis tawai: “Uchrí, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiwai. Tura ni uchrí ajasat tusa achiana nuna asutiawai.”

⁷Tuma asamtai Yus ni uchrí ánis asutiámkuisha katsuntratarum. Warí, ashí apa ni uchrin chicharkashtatuak. ⁸Tura ashí uchrin chicharkatniua núnis Yus atumin chichartamchakrumniñkia nekas ni uchrin chuitrume. Antsu chichchnaitrume. ⁹Nu arantcha ii aparí uchich árinin chichartamkurin umirmiuyaji. Nu arant nuikia nekas ii aparí nayaimpiniam pujana nu shiir umirkar tuke shiir pujustin wakerishtatjik. ¹⁰Ii aparí ishichik ni enentáijaj wakeramu chichartamniuyaji. Antsu Yuska ti penker awajtamsataj tusa nekas atsumajnia nujaj métek chichartamji. ¹¹Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimaj nuka péñker túratnium tura shiir pujustinian yáinmaj.

Anearta. Yus tana nu nekas antuktiniaiti.

¹²Nujaj pimpirarusha tura kakarmachu ainia nusha ikiakáratarum. ¹³Túrarum péñker esettsa enentáimsarum wekasatarum. Túrarum tujintiania nusha shiir wekasatin yainatarum.

¹⁴Ashí péñker túrakrum ashí shuarjaj nawamnaikiarum péñker wekasatarum. Tunaan túrinkia Yusaj péñké jeashtatui. ¹⁵Aneartarum. Shuar nakitiakuñkia Yus nu shuáran shiir yáintinian tujinkiattawai. Nu shuar yajauch enentáimiuk chikich shuárnasha itit awajas tunaanum útsukartatui.

¹⁶Tsanimawairap.

Yusna nusha nakitrairap. Isaka uchrí Esau péñkera nuna nakitrarmiayi. Yus “iwiairin núkap súsatniuiti” timia nuna enentáimtuschamiayi. Tura asa aya ishichik yurumkajaj yapajíamiayi. ¹⁷Tura nuyá ni aparí ukunam túrunattana nuna takui Esau ti péñkeran wakerimiayi. Tura ti útkuisha ni aparí nin nakitrarmiayi tura ni chichasman yapajíatnium tujinkiamiayi.

¹⁸ Atumjainkia Yusna enentáimtusminia nuka yaunchu Israer-shuarjai ashammain amia núnischaiti. Yáunchuka Yus ni akupkamurjn Israer-shuaran súakui Senai muranam jeeármiai. Muranam uunt jisha kiritnusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. ²⁰ Kame Yus chichaak “Shuarsha taŋkusha ishichkisha nú muranam najarmatai nuka kayajaj tukurar tura nanŋkijajisha máatniuiti” tmiayi. Nu akupkamu ti ashammai asamtai “chichaschati” tiarmiayi. ²¹ Wáinkiarminia nu ti tsuumai asamtai imia Muisaissha “Ashamakun kuraajaj” tmiayi.

²² Antsu atumjainkia Yusna enentáimtustin nujaj nanŋkaamas péŋkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrupe. Nuisha ti untsurj nayaimpinmaya suntarsha ²³ ashí Yus-shuarsha shiir irunraru ániawai. Yus-shuarsha ashí nayaimpiniam ni naarj anujtukma ásar ni uchirj ániawai. Nuisha Yus, ashí shuaran ti nékana nu, pujawai. Niisha shuaran ti péŋker awajsamtaí nu shuar jákar ni wakanj nu j shiir pujuiniawai. ²⁴ Nuisha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj nanŋkaamas péŋkeraiti. Kame Apir ántar máamu asamtai yapajmiatrucka titinia áintsan enentáimtaji. Antsu Jesus tunáa shuaran péŋker awajsartaj tusa jakamiayi.

²⁵ Nuka ti péŋker asamtai Yus chichartamprumna nu nekas anturkatniuitrupe. Yaunchu Yus jú nunŋkanam murá chichaamun anturkachar asutniátiniunam uwem-pracharmiayi. Nuŋkia Yus nayaimpinmaya chichartamkurin ántachkurkia ishichkisha uwemprashtatji. ²⁶ Yaunchu Yus chichamejaj nunŋkan úrmamtikiararmiayi. Tura yamaisha tawai “Ataksha aya núŋkankechu antsu nayaimpinmasha úrmamtikijaj.” ²⁷ “Ataksha” tana nujaj “ashí muchitrámnia nu amuukartatui” tawai. Tura muchitrachminia nu juakartatui. ²⁸ Yus in akupkatniun tsanŋkatramaj nuka umuchnakchattawai. Tuma asamtai Yus yumiŋsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. ²⁹ Maa, ii Yúsriŋkia kajerkanŋka uunt jía nuke áesaa mash emesramniaiti.

13

Yus shiir enentáimtiksatin

¹ Nuamtak yachja núnisrum tuke mai anenai ajatarum. ² Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

³ Sepunam pujuinia nusha atumsha nijijaj pujáa núnisrumek waitnentrarta. Wáitki-asarma nusha wisha núnisnak wáitsamniapitjia tusarum waitnentratarum.

⁴ Nuatnaikiatin péŋkeraiti. Shuar ni nuwejaj tsaniŋ pujustin péŋkeraiti. Tura nuatkamu ainia nusha chikichan eakchatniuiti. Tsanirmania núnaka Yus asutiáttawai.

⁵ Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujaj shiir enentáimsam “maakete” titiá.

⁶ Tiniu asamtai arantutsuk ju tminiaitji: “Winia yainnia nuka Uunt Yúsaiti. Nu asamtai shuar túrutammia nuna ashamkashtatjai.”

⁷ Atumin Yus-Chichaman jintinramawarmia nu enentáimtustarum. Yúsan shiir enentáimtuiniak péŋker wekasarmia núnisrumek atumsha túratarum.

⁸ Jesukristuka tuke yapajtsuk nuikiya núnisan yamaisha tura ukunmasha tuke núnisan átatui. ⁹ Chíkich chicham niisháa íranna nu anturkairap. Yus in anenma asakrin kakaram ajasartai. Shuar niisháa yurumkajaj enentáiru j kakaram ajastaj táyat penké yáinŋchaiti. Yurumeaj nújainchu antsu Yusa anenkrattairrijaj ii enentáin kakaram ajasminiaitji.

¹⁰ Yáunchu Yúsnan pujurin naman maar Yus susamunmayan yuu ármiai. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nu j pachiŋkiachmin ániawai. ¹¹ Israer-shuarumia Yúsnan pujurniu uuntri tunaan asakártaj tusa namanŋké numpen júkiar Imiá Shiir Tesaamunam wajin ármiai. Tura nu naman arant áesatniuyayi. ¹² Núnisan Jesussha péprunam arant wáitkianas mantamnamiai. Nujaj ashí shuara tunaarjn ni numpejaj nijiatkaiti. ¹³ Núnisrik iisha

péprunmaya arant wétinia núnisrik Jesusaj weri Nijjaj métek wishikmain katsuntutai. ¹⁴Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. ¹⁵Tuma asar namañ maar Yus sútsuk antsu shiir chicham súakur tuke Yus shiir yúmiñkijaji. Tuke núnisar túratái. ¹⁶Pénker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷Yus-shuaran akupin ainia nu umirkarum shiir enentáimtkratarum. Ni takatrin Yúsan ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka ¿itiurak yainmakarat?

¹⁸Incha Yus áujstarum. Iisha ashí péñker túratin wakeraji. Túraji enentáimji. ¹⁹Tura Yus áujkuram Yus ataksha atumjaj wainniaikiatniun wari tsankatrukak tusarum seatritiarum.

Amúak shiir chichaawai

²⁰⁻²¹Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarijjaj ashí péñker ana nuna suramsarti. Nujaj ni wakeramu túrattarme. Tura Jesukrístu kakarmarijjaj ashí ni wakeramun in pujurtamas takasti. Ii Uuntri Jesukrístu ashí Yus-shuaran ti penker Wáinniuiti. Tura ni numpejaj Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisan atí.

²²Yatsurú, kakaram chicharkajrumna ju shiir enentáimjaj anturkatarum. Kame ti wárik áatrajrume. ²³Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatañkia atumin ítiyaj tusan winiakun niijjaj winittijaj.

²⁴Atumí úntrjsha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵Ashí Yus ti shiir yainmakarti. Nuke atí.

SÁNTIAK papin áarar akuptukma

Sántiak aarmiania nu

¹ Wi Sántiak Uunt Yúsan tura núnsan ii Uuntri Jesukrístun umirin asan ju papin aajai. Ashí Yus-shuirtirmin ashí nuñkanam tsakinmakarum matsatrumna nuna amik-maajrume.

Nekatañkia Yúsnumigiti

² Yatsuru, ashí itiurchat wáinkiumesha tuke warastarum. ³ Iis, itiurchatnum pu-jakrum nekas Yus enentáimtaitkiurmeka katsuntratin unuimiartatrum. ⁴ Tura tuke páchiachkuram, tuke katsunteakrum, nuikia Yúsjaí ti penker katsuartatrum. Penké atsumashtatrum.

⁵ Átum náñkamsarmek nekaatin tujintiakrumka Yusa nekatairí seata. Shuar seakuí Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasa Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturí juní taa, atúu wakетки ajatsuk. Amesha áintsamek túmame. ⁷ Enentáimijín núnsiketkuñkia, seamna nuna Yus penké suramsashtatui. ⁸ Shuar jimiará enentáimna nuka shiir wekasatniun tujintiawai.

⁹ Yus-shuar, ju nuñkanam kuñtríncha ainia nu, Yus shiir awajsamu nujai warasti. ¹⁰⁻¹¹ Tura Yus-shuar kuñtrínuiitkuisha péejchach enentáimtikramsha warasti. Iis, nupa kuñkam tura nantu ti sukuam kaar miniatsuk. Kuñtrínuiuka ántska ántram seame. Nayaantsa tsukaturí juní taa, atúu wakетки ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatrj ana nu

¹² Shíiraiti shuar ni itiurchatrjín nekas katsunteana nuka. Nekapsam jñinkiuñka akinkiatniun wáinkiatstawai. Iwiaaku átinian, tawasap achiktinia núnsan, wáinkiatstawai Yus ni aneam tsañkatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashiniaiti. Yuska yajauch túramnia enentáimtsui túrasa Niisha penké chikichinkesha tunaanum útsuchuiti. ¹⁴ Antsu ni wakeramurijiaín aents tunaan niñki ikiatmamkaiti yajauch túratniun. Nujaiñkia tunaanum útsukmaiti. ¹⁵ Nu yajauch wakeramunmaya tunáa akiiniui. Tura nu tunáa mash amuukamtaí jákatin akiiniui.

¹⁶ Yatsuru, aneakun tájarne, anañmamawairap. ¹⁷ Ashí penker ana nu, ashí shiir ana nusha nayaimpinmaya Yusak amasuíti. Yus ashí tsáapninia nuna najanaiti. Tura Niin kiritin atsain yapajítsuk tuke tsáapniiti. ¹⁸ Nii wakera asa ni nekas chichamea nujai ni uchirí najatmamji. Tura ashí ukunam átatna nujai ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnsan wárik kajekaip. ²⁰ Kajena nuka Yus penker wakeramun túratsui. ²¹ Nu asamtai, ashí penkercha nu tura ashí yajauch írúnna nusha iniaisata. Tura tuke enentáijiaí Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

²² Yus-Chicham umikta. Aya ántukaip. Aya ántakmeka amek anañmamattame. ²³⁻²⁴ Shuar íspikia ímiak ni yapín wapikian wáiniak tura nuyá jáupmitsuk we, ni urukuit nuna wárik kajinmatkishtimpish. Shuar Yus-Chicham umitsuk aya ántana nuka nujai méteketete. ²⁵ Yus tana nujai ankan ajasminiaiti. Shuar íspikia iimia áintsan nekas Yus penker táman tuke iniaitsuk enentáimtus, nu shuar kajinmattsuk aya antukhattawai antsu tuke umiktatui. Tura ti shiir waras pujustatui.

²⁶ “Nekas Yúsan shiir umirjai” tana nu tura eseer chichaachkuñka imia niñki anañmamui tura “Yúsan shiir umirjai” tana nuna ántar tawai. ²⁷ Nekas Yus Apa awajítsuk shiir

umirkatin júiti: mitiaikiasha wajesha itiurchatnum pujuiniakuisha yáin̄tiniaiti tura ju nuḡkanam ashí tunáa ana nújaj̄sha máatrashtiniaiti.

2

Shuar antra akantrashtin

¹Yatsuru, ii Uuntri Jesukrístu ti shiir naḡkaamantua nu enentaimtatirmeka shuar akantratin enentáimsairap. Shuara enentáí enentáimtsuk antsu aya pátatke wáinmena nujaj̄ aents akantram niisháa enentáimturairap. ²Iis, iruntrumna nuí shuar kuḡrintin kurí aniyu aweera tura péḡker iwiarmampra wayashtimpiash. Tura núnisan̄ chíkich kuḡrincha aruta entsaru wayashtimpiash. ³Tura kuḡrinniua nu “Péḡkera juí pujusta” tíchatameash. Tura kuḡrinchaka “Atu wajauta, túrachkumsha juí nuḡkaḡsha pujusta” tíchatameash. ⁴Nu tákumka yajauch enentáimpram jimiará enentáíjjaj̄ aents enentáim-tame.

⁵Aneamu yatsuru, antuktarum. Ju nuḡkanam kuḡrincha ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam írunka nunasha Yus nin tsan̄katkattawai. Ashí shuar Yúsán aneena nuna anajmatra asa nin tsan̄katkattawai. ⁶Átum antsu kuḡrincha natsant awajearme. Iista, kuḡrinniua nuka tímíá itiurchat awajtamainiatsuk. ¿Nuikia níchuk ainia achirmak kapitáinnium japiki júramprumna nu? ⁷¿Níḡkichuk ainia Kristu naarí shiira nuna ántar pachikiar penké yajauch áujmataania nu? Tura átumka nuna naarí tuke shiir awajkurmin, ashí shuar “Kristu shuari” túramainiawai.

⁸Yus-Chichamnum ju akupeamu nekas péḡkeraiti: “Ame ayashim aneamna núnismek ame írutramuram aneeta.” Nu nekas umirniuitkiurmeka maak. ⁹Nú enentáíjjaj̄ kuḡrinniujaj̄ chichasminiaiti. Tura nuyá kuḡrinchajaj̄ shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamuríjjaj̄ amek sumamame. ¹⁰Chíkich akupkamu írunka nu ashí umikiam tura aya chikichik akupkamu umikchamka nuikia ashí akupkamu umircha ajasume. ¹¹Iis, Niḡki Yúsak chichaak tíchamka “tsanir-mawaip.” Tura chikichnasha “maḡkartuawaip” tímíayi. Nu asantai, shuar tsanirmatsuk túrasha maḡkartakka ni wakeramun umirtsui. ¹²Kristu an̄kant awajtamantai ii yamáí ni akupeamurí yúpichuch umirkamniaitji. Nu asantai nu akupkamujaj̄ métek wekaurni-ḡkia Yus “péḡker túraitme” turamatatji. Tura umikchakriḡkia “péḡker umikchaitme” tu-ramtatji. Tura nu enentáimsar péḡker chichasar takasar wekasatniuitji. ¹³Chikichan wait-mentachkuḡka waitnennatsuk asutniáttawai. Tura waitnen̄kratniuitkiurniḡkia tsawant jeamtai Yus in waitnentrampattaji.

Yus enentáimtustin tura umirkatniusha

¹⁴Yatsuru, shuar “Yusan shiir enentáimtajai” táyat tura péḡker túrachkuḡkia péḡk-erashit. Nujaj̄ uwemprattawak. ¹⁵Wátskea, Yus-shuar, áishmaḡsha nuwasha, entsátáir̄in tura yurumken atsumashtimpiash. ¹⁶Tura ame nékayatmek ayashí atsumana nu sútsuk tíchatapash “Péḡker wetá, entsatai entsaram túram péḡker yurumáta.” ¿Nu sútsuk tákum péḡkerkai? ¹⁷Núnisan̄ takatsuk Yus enentáimtustin ántraiti.

¹⁸Tura shuar tíchanpiash, “Chíkich takaawai tura chikichcha Yúsán shiir enentáimtai. Mai péḡkerchakait” tichanpiash. Wats, ame Yus enentáimtamú takatsuk paant inaktusminishitiam. Tura wi antsu péḡker takatrujjaj̄ Yus enentáimtamun paant inaktustatjai. ¹⁹Nekas Yus chikichkiiti tu enentáimtame. Nuka péḡker túrame. Túrasha iwianchcha nunasha nékainiawai. Tura umircha ásar ashamainiawai. ²⁰Netse enentáim-praip. Ashí Yus wakera nu takaachkumka, Yus enentáimtustin ántraiti. ¿Nu nekaatin wak-eramek? Iista. ²¹Aprááman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péḡkeraitme” tímíayi Aprááman. ²²Páantchakait. Apráám Yusa shiir enentáimtak umirkamiayi. Umirtsuk Yúsán enentáimtakka nuikia ántar enentáimtiaayi. Tura umirak Yus enentáimtamun umikmiayi. ²³Nujaj̄ Yus-Chicham aarma nu uminkiamiayi. Júiti:

Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke péñker túraitme Wijíai” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yúsan shiir enentáimtamujainchuk tura péñker takasma-jajsha Yus nin shiir enentáimtawai. ²⁵ Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úukar chíkich jínťianam akupak uwemtikarmiayi. Nuna túramtai Yus “péñkeraitme” tímiayi nincha. ²⁶ Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraitji.

3

Ii iniaí

¹ Atum untsurí jintinťiartin ajastin wakerukairap. Yus in, jintinťiartin ájinia núnaka, nańkaamas neka asar, awajiakrin nańkaamas Yus asutiámattaji. ² Iis, ashí mash ti awajiatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashísha tuke péñker ana nuna túriniaiti. ³ Kawaisha enentáimpratai. Jiru wenuchiniam ikiursam ni ayashí ashí ayantaatsuk. ⁴ Kanusha ti úuntaitiat tura kakaram weýat ishitiapach wíantaijiaí shuar wakera nuí ayantarminiaiti. ⁵ Núniskete ii iniaí. Timiá ishitiapchitiat awakmaktinia tímianu chichaatsuk. Ji ishichik kapaajai ashí numi tsaruaku ekeemakchamniakait. ⁶ Ii iniajsha jijiaí méteketete. Ashí tunáa piákuíti. Tura ii ayashín tunáa túratniun útsutmaji. Túńkuranmaya jijiaí ikiapármaiti tura ashí ii wekajnia nuí émesewai. ⁷ Shuar ashí yajasman nawamkamin ániawai. Ashí kajen írúnna nunasha, nanamťincha, napincha, tura entsayanča ashí nawamkaruíti. ⁸ Tura iniaikia peńké nawamkachminiaiti. Ti yajauch asa peńké nupetkachminiaiti. Iniaikia ti taráa tseasaiti. ⁹ Nu iniaijiaí Yus Apa shiir awajeaji tura nu iniaijiaín aentsti yajauch chichárnaiyaji. Áentsun Yus Niijiaí métek-taku najanamaitiatar yajauch chichárnaiyaji. ¹⁰ Nu iniaijiaín péñkersha tura yajauchisha chichaaji. Yatsuru, nuka peńké atsutniuiti. ¹¹ ¿Púkuninmaya entsa sáawijiaí kusuku jínkimniakait? ¹² Yatsuru, ¿Kushinťiap shuinian nereawak. Munchisha kushinťiapen nerektatuak? Núnisan púkuninmaya entsa sáawijiaí kusuku jínkichminiaiti. Ii iniaijiaí núnisan aya péñkera nu chichastiniaitji.

Yusa nekatairi

¹³ Shuar ti neka enentái takakna nu, péñker túrattawai. Nekas nékaitkiunka péechachia núnis tuke péñker ana nuna túrattawai. ¹⁴ Antsu atumí enentáijiaí peńké yajauch enentáimtunairum tura atumek péñker pujustin enentáimtumarum, nékaitiatam péñker túrachiatam “péñkeraitjai” tiip. Nuka wáitrame. Nekaska núchaiti. ¹⁵ Nú enentaikia Yúsaiyanchuiti. Antsu ju nuńkanmayaiti, shuara enentáiyaiti, núnisan iwianchnumiaiti nú enentaikia. ¹⁶ Shuarsha yajauch enentáimtunairar tura nińki enentáimtumainiakui, nujaí ashí meseawai tura ashí yajauch ti awai. ¹⁷ Antsu Yusaiya enentái takakua nu júnisaiti: ashí nańkaamas emka eseeratin, nuyá nawamkartin, shiir ajá, péñker anturnain, wait-neńkratin, ashí péñker takáa tura anańtsuk naka chichamťin. ¹⁸ Eseera enentáimsatniusha shiir takawai ashí shuar péñker ana nuna túrawarti tusa.

4

Ju nuńkanam írúnna nu aneashtin

¹ ¿Urukamťaitsuk tuke kajernaikiarum ti máanaisrum pujarum. Mesetnumsha urukam-tai wéarum? Júnisaiti: Atumin yajauch enentái katsunťrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkura-ram nérentin maarme jurukťiaj tusam. Chíkich takakna nujaí itit enentáimťniarme tura ataťtin tujinkiam máanaitrum. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí péñkerijiaí warastin enentáimiu asarum searmena nusha wáintsurme. ⁴ Jú nuńkanmaya wakerakum Yusa nemasrijiaí tsanirma

áintsan̄ketrume. Nékatsumek atumsha. Ju nun̄kanmayaan̄ wakerakrikia Yusa nemasr̄in-tji. Shuar ju nun̄kanmayaan̄ wakerakka Yusa nemasr̄i ajawai. ⁵Yus-Chicham juna tawai: Yus ni Wakan̄ íi enentáin̄ apujturmasuitji. Nu Wakan in anenma asa ti akasmatramaji, táwai.

Tura nuna jántran̄keash ta? ⁶Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura pééjchachin Yus nin aneak ti shiir yáintatui, tawai.

⁷Yusaj̄ ikiumastarum, tura íwianch taritratarum. Túrakrumin íwianch ikiurmaktiatui. ⁸Yúsaj̄in̄i weamkata tura Nii atumin wearmaktatrume. Tunáa shuairam Kristu numpejai nijiamartarum. Tura átum, Yussha tura ju nun̄kanmayasha mai métek wakerarmena nu, atumí enentáí naka eseeratarum. ⁹Atumí tunaari enentáimsarum kúntuts enentáimpratarum. Nu kúntutsjaj̄ ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum. ¹⁰Yusjaj̄ pééjchach ajasta, túrakmin shiir awajtamsattawai.

“Yajauchiitme” tunaichatin

¹¹Yatsuru, yajauch áujmatnaisairap. Yus-shuar ni yach̄in yajauch áujmatas tura yach̄í tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashtiniaiti” tawai nu shuar. Nujaj̄ nu shuar umirtsuk Yus akupkamu nan̄kaamas enentáimtumawai. ¹²Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwentikratniun tura emesratniunam akupkatin jea nu. Amesha yáitiam chikicha tunaari íistincha.

Kashin átatna nuna Yusak nékawai

¹³Watsek, átum áujmateakrum “Arumsha kashincha nu péprunam weri nuí chikichik uwí takasar kuit achiktatji” tíchattarpash. ¹⁴Ishichiksha penké nékatsrume kashin átatna nu. Ju nun̄kanam ii iwiaakmarí wárik amúatsuk. Yuran̄kim utsanar tura nantu sukuam mash wárik menkaatsuk. Núnisketj̄i. ¹⁵Antsu júnis t̄miniaitrume: “Yus wakerakuin̄kia iwiaaku pujakrikia nusha túrattaji” titiarum. ¹⁶Túrachkurmeka átumka Yusjaj̄ nan̄kaamantu enentáimprume. Tura ashí nu enentáikia yajauchiiti. ¹⁷Shuar péñker túratniun nékayat, túrachkuin̄kia, nuka tunaiti.

5

Kuítrintin enentáimpratniua nu

¹Kuítrinnitiram ju antuktarum. Ti úttiarum. Ti wáitsatin asarum ti kakantra úttiarum. ²Kuítrum mash mamukarai tura iwiamamprarmesha mash tin̄kishap yúkayi. ³Kurirmesha tura kuítrumsha ashí jjiakmamkarai. Ijiakmampramur̄isha ame péñkercha túram nuna paant iniakmawai. Tura jinium áesamua áintsan̄ ame kuítrum yajauch awajtamsattawai ayashmiin̄. Amuukatin tsawant jeamunam anearchamame antsu ame kuítrum ikiaun̄kamame. ⁴Ame takat iniararam ementushim akirarmamna nu “akirkati” turainiawai. Anearta. Yakiyá Yus, nayaimpinmayá suntara uuntri, nu takartamni chichamen antukai. ⁵Ashí ju nun̄kanam írunna nu wararsaruitrume. Tuma asarum kapuñka nuke macharame tura yamaikia máatin tsawant jeayi. ⁶“Nu shuar tunaiti” tírum tunaachu tsanumprurum máamarme, tura niñkia surimiakcharmai.

Yawetsuk takastin tura Yus áujsatin

⁷Nu asamtai, yatsuru, nu páchitsuk ii Uuntrī Kristu tatin nákastarum. Arakmausha ni arakrī péñker tsapaiti tusa yumi yutuktinian shiir enentaijaj̄ nákatsuk. Yútasua umirmatai esaturmatai júktatjai tusa nákatsuk. Tura júurmaksha ti waraatsuk. ⁸Núnisan̄ atumsha katsuntsatarum tura yawek̄iirap. Kristu tatin yuntumtemayi. ⁹Yatsuru, nuámtak “ju yajauch túrutui” tunainirap. Tákurminkia Yus íirmastatrume. Niñkichukait nuna íistin tura anearta nu Yúsak tíjiuch wajatramui. ¹⁰Yatsuru, yaunchu Yúsnaen etserin enentáimpratarum. Tuke ii Uuntrī Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum. ¹¹Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi,

ni naari Jup. Tura ni itirchatrj nan̄kaasmatai Yus ti núkap kufr̄in susamiayi. Nu nekatsrumek. Ii Uuntri Yus ti waitnenkratchakait.

¹²Ju ashí nan̄kaamas enentáimustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniñkia Yus írmastatui. Nu asantai nayaimsha nun̄kasha ashí írunna nusha páchitsuk, aya támena nu tuke nekas atí.

¹³Wáitakmeka Yus áujsata. Waraakmeka, warasam kantamám Yus shiir awajsata. ¹⁴Yus-shuairam, shuar jáakka, Yus-shuara úuntriñ untsukti. Tura niisha taarti. Tura Jesusa naari pachikiar asuitijjai jaa shuaran ishichik kuerarti. Túrawar Yúsan áujtusarti nu shuaran. ¹⁵Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsan̄kurattawai. ¹⁶Nu asantai, atumí tunaari paant etsertunaiktaram. Túrarum Yus áujtunaistarum atumí tunaari tsan̄kurnarat tusarum. Péñker shuar Yúsan tuke enentáijjai áujeamuriñkia ti kakarmaiti. ¹⁷Yaunchu Yus-Chichaman etserin ámiayi, ni naari Erías. Niisha iijjai méteketiat yumi yutukaj tusa Yusa áujsantai menaintiu uwí nuyá nan̄kaamas yutukchamiayi. ¹⁸Ataksha yutukti tu áujsantai ataksha yutukmiayi tura araksha ataksha tsapainiarmiayi.

¹⁹Yatsuru, shuar eseera wekatinmaya kanaakuñkia chíkich nin waketkitniun yainti. ²⁰Shuar tunáa shuaran yajauch wekaan awakeakka jákatniunmaya uwemtikrattawai tura ti untsurí tunaari tsan̄kurnartatui.

PÍTIUR Emka papin aar akupkamu

Pítíur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarne. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarne. ² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniatijnia nu arutramji. ⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiati. Tura nusha yajauchichuiti. ⁵ Yus nekas enentáimta asakrumin ni kakarmarijjai wearmarne. Tura tuke uwemtikrampratniun, nunka amuamunam paant iniakmastatna nu achikmintrum tusa tuke tsawant ni kakarmarijjai wáitmarne.

⁶ Nu enentáimsarum wararme. Kame ju nunkanam pujakrum ititurchat wáinkiashtarmeash. Tura ju nunkanam pujustin ishichkichukait. Ukunam péñker pujustaj tu enentáimsarum wararme. ⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarne. Aents kurin jinium áesainiawai, aya kurik juakat tuser. Kurin ti wakeruinia ásar, amuukamnia ajn túruiniawai. Atumsha, ititurchat wáinkiarmenta nujai, Yusan nekas enentáimtusartimpiash tusa nekapsamuitrume. Nu enentáimtamú kurijjai nankaamas péñkeraiti. Ukunam, Jesukrístu támatat, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajrsarat” tusa túrutmattarme. Nu tuma asamtai ju nunkanam nekapsamuitrume, ititurchat wáintrumna nujai.

⁸ Jesukrístu wáinchaitiatrum anearme. Tura yamá wáinchiatrumek nekas enentáimtarne. Tuma asarum ti wararme. Nu warastin nayaimpiniam warastatjinja núniskete; nuka paant titin jeatsji. ⁹ Iimiatarum. Uwentikrurat tuserum Yus umirkachurmek. Nu uwempratrin wainiu asarum waraarme.

Kristujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakani ni enentáin pujuriarmia nu, túruntsajin Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutai, tura urutiák túrunat” tuser nu etserin émamkesar anintrusarmiayi. ¹² Tura nii pujuiniainkia túrunashtinian, antsu ti ukunam, ii pujajnia juú túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutmarne. Nú shuar Yusa Wakani, nayaimpinmaya akupkamu ana nuna nekatairijjai ujatmakurme. Maa, nu uwempratniun tájana nuna, nayaimpinmaya santar nekaatai tuser wakeruiniawai, túrasha tujintiainiawai.

Péñker wekasatin

¹³ Tuma asamtai, péñker enentáimsarum tura péñker íimiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjai timiá péñker wekasatarum. Yus, untsurmakuana nu, péñker

asamtai, átumka ni shuari asarum péñker wekasatarum. ¹⁶“Wi péñker asamtai atumsha péñker wekasatarum” Yus tana nu ni Papiriin áarchamukai.

¹⁷“Yus winia Aparuiti” tárumna nu aneartarum. Ashí aentsu túrutairin métek Yus nekaattawai. Nu neka asarum, ju nuñkanam pujarmena juí Yus ashamkatarum.

¹⁸Warí, ánta wekasatniun atumí uuntri jintinramarrena nuyá Yus uwentikramprarme. Túrasha kurisha kuitcha amuukamnia ainia nujai uwentikrachmaitrume. ¹⁹Antsu Kristu numpé ti shiira nujai uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajai” tniuyayi. Núnisan Kristu in jarutramka asa ii tunaaríniá uwentikrampraitji. ²⁰Nuñkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi.

²¹Niijjai átumka Yus umiirume. Yuska Krístun jakamunmayan iniantki nankaamantu awajsamiai. Yus nekas enentáimtakrum, aya péñkernak túrawai titiarum tusa túraiti.

²²Yus nekas tana nuna, Yusa Wakanj yainmakui, umirka asarum atumí wakanjin péñker ajasuitrume. Yus-shuarjai yajauch enentáimtunaisrum mai anenai ajatai tusarum tura asarum, nekas shiir enentáimtunaisrum mai anenai ajatarum. ²³Nekaatarum. Yusa chichame umirka asarum atak akiiniaitrum nuka ju nuñkanmayanchuiti. Antsu Yusa chichame iwiaaku tuke amuukachmin ana nú chichamjai tuke iwiaaku átiniaitrume.

²⁴Ju ayash tuke pujuschamniati. Yusa Papiriin junis áarmaiti:

Ashí aentsti nupáa áaniuitji. Ii péñkerisha kukuja áaniuiti. Nupa wárik kaawai. Kukujsa núnisanj wárik iniaawai. ²⁵Tura Yusa chichame sha tuke amuukachminiaiti.

Nu Chichamjai uwemprannia asamtai atumin etsernakuiti.

2

¹Tuma asamtai, ashí yajauch ana nu iniaisatarum. Anankatin, ántar-chichamtin átin, chikichna wakeruktin, ashí tsanumpratniusha iniaisatarum. ²⁻³Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruina áintsarmek, Yusa chichame aya penkerkea nu ti wakeruktarum. Yusa chichamejai tuke tsawant tsakakrum tuke uwemprami tusarum túratatum.

Iwiaaku kaya

⁴Ii Uuntri Kristu kayáa áantsankete. Tura shuar kayan yajauchin nakitiainia núnisan Jesukristun nakitrarmiayi. Tura kayan ti penkeran wakeruina núnisan, Yuska, “winia Uchir ti penkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti. ⁵Atumsha iwiaaku kaya áantsanketrum. Tuma asarum Yus wijjai ni jeen jeamti tusarum tsankamaktarum. Tura nútiksarmek Jesukristui atumí iwiaakmari tsankamaktarum, Yus wakera nuna túrutati tusarum. Jesukristujai tura asarum Yus shiir enentáimtikrume. ⁶Jesukristunun Yusa Papiriin junis áarmaiti:

“Iistarum. Kayan ti penkeran achikjai” Yus tímiayi. Jeen emka apujtuamuri atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukristun tawai. ⁷Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujai métek ániawai. Ju áarmaiti:

Jeen jeamin nakitrarmia nú kaya jeen emka apujtuamuri atí tusa apujamuiti.

⁸Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiur péñker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkaitrume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túraiti. Kame kiritniummaya

jíinkirum ni tsáapnintrin wekasatniun achirmakurme. ¹⁰Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniñ, ¿ya waitnentrampramia? Antsu yamaikia Yus waitnentramuitrume.

“Yúsnaitjai” tu enentáimsatin

¹¹Yatsurtirmin tájarme, Yusna ajasrum, ju nuñkanam írar matsatu asarum, atumí ayashí wakerana nu tsañkatkairap. Ayashim wakerana nu túrakmiñkia ame enentáim nujai yajauch ajastatui. ¹²Yus-shuarchanum péñker wekasatarum. Túrakrumniñkia niisha yamáí “Yus-shuar yajauch túruiniawai” ántar tuíniyatan, ukunmañka, Yusjai inkiunaiktin tsawant jeamtai, péñker wekarmena nuna enentáimturmasar, nú shuarsha Yúsan shiir awajstartatui.

¹³Kristu atumí Uuntri asamtai, ju nuñkanam akupin áiniana nusha umirkatniuitrume. Uunt akupin ashí akupin asamtai umirkatarum. ¹⁴Tura ni akupeamuri ainia nusha tunaan túruinia núnaka asutiáti tura péñkeran túruinia núnaka shiir awajsatit tusa uunt akupin akupkama ásarumatai umirkatarum. ¹⁵Nekas péñker wekaamurmijjai enentáimcha ainia nu netse chichaamuri itiatmamtiatarum tusa Yus wakerawai.

¹⁶Tunaanumia ankant ajasu asarum péñker wekasatarum. Túra sha wi ankant ajaschajak tusarum náñkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. ¹⁷Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

Yus-shuarti katsuntratin

¹⁸Takarniutirmesha ame úuntrum péñker shiir enentáimturmakui sha tura yajauchi-itkuisha umirkatarum. ¹⁹Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti péñkeraiti. ²⁰Yajauch túrawakmin asutiámamtai katsunteakmeka nuísha warin ati. Antsu péñker túrawakmin asutiámamtai katsunteakmeka juika ti péñker túrame Yusaj. ²¹Núnisan túrunatin achikmaitrume. Kristu waitrutmasmiarme nuí, Wi túraj núnisan túrawarmi tusar wáitsamiayi. ²²Kristuka tunaan penké túrachmiayi. Tura chikichkinkesha penké anañkachmiayi. ²³Kátsekeamsha Niñkia katsekachmiayi. Wáitkiamsa “yapajmiaktaj” tíchamiayi. Antsu “winia Apar Yus iisti’ tímiayi, Yus péñker túrin asamtai. ²⁴Kristu Niñki ni ayashjin ii tunaarjin entsaki krúnsum jarutramkamiayi. Tunáa enentáimtusajrum tusa, antsu Yusaj péñker wekasamniuram tusa jarutramkamiayi. Atumí enentáin tsuártaj tusa Kristu asutniámiayi. ²⁵Murik ni pujutairjin waketkitniun nekatsna ántsarmek atumsha menkaka wekaimiarme. Tura yamaikia atumí wáitmaurjin waketkintrume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

^{1,2}Tuma asamtai, nuwatiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminiñ, niisha Yus-shuar ajastinian wakerittiawai. ³Nu asamtai aya pátatek iwiarmampratniusha ti enentáimtusairap. Intiash ti péñker iwiaratniusha, kurijjai iwiarmampratniusha, pushí ti kuitjai entsartincha ti enentáimtusairap. ⁴Antsu, “nekas shírmach ajastaj” tákumka, enentáimin “shiir kajecheu átajai” tu enentáimsatarum. Nuka sakarchattawai. Tura nuka Yúsnumka ti péñkeraiti. ⁵Yaunchu núnisanu nuwá Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shírmach ajasar pujuarmiayi. ⁶Atumí weatri Sara ni áishrin Apráaman umirmiayi. Umirin asa, “winia uuntru” tíniuyayi nin. Atumsha péñker túrakrumka tura sapijmiatsuk wekaakrumka, Sarajai métek átarume.

⁷Tura áishmantirmesha Yus wakerana nu nekaarum atumí nuwe shiir enentáimtusrum tsanintarum. Nuwemsha, nuwá asa, áishmanjai métek katsuntrachminiiai. Tura niisha, ámjijai métek Yusa waitnenkartutairijjai tuke iwiaku átinian takusminiiai. Tu

enentáimta asam ame núwem shiir enentáimtustá. Yus áujkuram itiurchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartistirmin tájarme, aya chikichík enentaik atí. Waitnen-nairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáingtaj tu enentáimsatarum. ⁹ Yajauch turamainiakuisa “yapajkiataj” tiirap. Katsekramainiakuisa “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum. ¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuŋka tura tuke tsawant warastinian wakerana nu, péñker ímiastí, yajauch chichakajj tusa tura wáitru-awajj tusa. Tunaanumiá kanaki péñkeran túratí. Tuke enentáijjajj shiir átinian eakti.

Tu áarmaiti.

Itiurchat ajñ péñker túratin

¹³ ¿Yaki yajauch túrutmat péñker turamnisha? ¹⁴ Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu winia Úntruuti” tu enentáimtustarum. Tura “¿urukantia Yus-shuar ajasuitiam?” turamainiakuisa, péñker áimkiamnium iwiarnarum pujustarum. Waantu enentáimtumsuk, nin péñker enentáimtikrataj tusam túrata. ¹⁶ “Yúsajj péñker wekasataj” tu enentáimsarum wekasatarum. Yus-shuar asakrumin chikich shuar ántar áujmatramainia nu ni ántar áujmatramsamun nekaawar natsaararat tusarum Yusajj péñker wekasatarum. ¹⁷ Yajauch túrakur wáitsatniujjainkia nankaamas, Yus wakerakuinkia péñker túrakur wáitsatniuka ti penkeraiti.

¹⁸ Kristu ii tunaarjñ asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuiatit, ii tunáa asakrin wáitrutmasmiaji, Yúsnum etejamtai tusa. Ayashjñinkia jakayat ni wakanjñajj ni ayashj ataksha iwiaaku ajasmiayi. ¹⁹ Ni wakanjñajj jakáa wakanjñ emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk siantu painti (120) uwi pujurmia nuñ Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijjajj uwentikrarmiayi. ²¹ Nu yumi Yus-shuarti imiantinian nakumui. Ii ayashj chamir awajsatai tusar imiantsuji. Antsu ii enentáijj péñker atí tusar Yus sear imianji. Nujajj iisha uwemji. Jesukristu nantakin asamtai, nuñjajj uwempraitji. ²² Tura Niisha nayaimpiniam we akupin pujutajñium Yusa untsuurjñi apujsamuiti. Túramtai nayaimpinmayá suntarsha, tura ashí kakaram akupin áiniana nusha Jesukristun umirainiawai.

4

Ju nunkanam wáitsatin

¹ Kristu ni ayashjñ wáitsa asamtai atumsha núnisrumek wáitsatin ákuisha, katsuntrat-jajj titiarum. Ni ayashjñ wáitiana nú shuar yajauchin páchiatsui. ² Antsu “iwiakjana nuñkia Yusa wakeramurjñ tuke umirkatjai” tu enentáimui. Ni ayashj wakerana nuna yamaikia páchiatsui. ³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajasrum charaatum ajatniusha, ántar-yusa namperjñ yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimiarmena nu iniaisa asakrumin, yaunchu atumjajj nuna túrin armia nu, “urukamtai iniaisara?” tusar yajauch áujmatramprume. ⁵ Túrasha ukunam nu aents ni túramurjñ etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumantikiawartatui. ⁶ Túrasha jaka armia nu Yusa shiir

chichame ujankarmiayi. Ni ayashiin ashí shuarjai métek jakamniaitatan Yus iwiaaku pujana núnisan ni wakaní iwiaaku pujusarat tusa ujankarmiayi.

Shuar yáintiniatji

⁷Ashí amuukatin jeatemayi. Tuma asamtai péñker enentáimsatarum; túrarum anearum Yus aju pujutarum. ⁸Aneniamujai untsurj tunaasha tsankuratin awai. Tuma asamtai ashí nankaamas nuamtak anenaistarum. ⁹Kajé-kajejainchu atumí jeen itiaaniátarum. ¹⁰In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajtsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaintá. ¹¹Etserkatniun Yus amasuitkiuinkia ame tamena nu, Yus tana nujai métek atí. Chíkich shuar yáintiniaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarjijai túrata. Jesukrístun ashí aents shiir enentáimtusartí. Tura ashí áentsnum ni kakarmarj tuke atí. Nuna tajai.

Yus-shuarti wáitsatin

¹²Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti. ¹³Tuma ain shiir enentáimsatarum. “Kristu wáitsamurín métek-taku wáitiakun péñkeraiti” tu enentáimsatarum. Ukunam Kristu wincharí wáinkiarum timiá warasmi tusarum túrarum. ¹⁴Kristunu asakrumin katsekkramkachartimpiash. Túmaitkiusha Yusa Wakaní shiir ana nu atumíjn pujurtamkui shiir awajsamuitrume. Katsekkramainia nú shuar imia Yusa Wakanín yajauch áujmatainiawai. Tura átumka Yusa Wakaní shiir awajearme. ¹⁵Túra atumsha yajauch túrawajirum aneartarum. Mankartana nu, kasamkana nu, tunáa túrana nu, tura chíkichna páchiana nusha ni wáitsatniurínkete. Atumjainkia nu wáitsatniuka atsutí. ¹⁶Tura antsu Kristunuiti tusar wishikramuk wáitkiar-mainiakui natsaárrairap. Kristunu asam wáitiayatmek, natsámtsuk Kristu naari shiir awajzata.

¹⁷Yuska ni shuarín nekapsatajtsa nanamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartín. Ti asutniáwartatui. ¹⁸Imia Yus umirjinia nu uwempratniurí itiruchataitkiusha tunaan túruiniana nusha urukawartín. ¹⁹Tuma asamtai Yus wakeramujai wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

¹Yamaikia Yus-shuara úuntritiram, jintintjiarme. Wisha núnisnak Yus-shuara úuntrin-tjai. Kristu wáitsamurín wáinkiaitjai wisha. Tura ukunam ti shiir átatna nuí chíkich Yus-shuara uuntriá núnisnak wisha pachiinkiaitjai. ²Yus-shuar ame ústiniaitmena nu, péñker iistá, murikiu wáinin ni murikrín wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túratatai” tútsuk tura nujai kuítrintin ajastin enentáimtsuk nekas wakeritia, Yusa takatrá asamtai. ³Turasha, “Yús-shuara uuntri ájanan, Yus-shuaran akuptiaj” tu enentáimsaip. Antsu shiir túramurmijai Yusa murikrí jintintiata. ⁴Nuinkia murikiu wainniu Uuntri taa wantiniak iwiamamntai tawasap ti shífirmachia núninian suramsattawai. Aents súana nú shífirmach wari mamurtiniaiti. Tura Úuntrum ámin suramsattana nuka peñké mamurchattawai.

Yus-shuarti umirnaikiatin

⁵Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nankaamantu enentáimtumatsuk umirnaikiatarum. Waantu enentáimtuma núnaka Yus nakittiwai. Antsu nankaamantuchu enentáimtuma nuna Yus waitnentak yayawai. Tu aarmaiti.

⁶Wats, Yus timiá kakaram asamtai, amek nekamam, péejchach enentáijijai enentáimtumasta. Nuinkia tsawant jeamtai ni wakerak Yus ámin peñkerí awajtamsattawai. ⁷Yus ámin ti enentáimturmakui ame itiruchatrú ainia nu Yus ashí iiktusta.

⁸ Aneartarum tura ímiastarum. Íwianch atumí nemasrĭ ana nu, uunt yawáa nuke, yanak emesraintiaj tusa eak tentaa wekaawai. ⁹ Tura tuke Yus nekas enentáimtusrum surim-iaktarum. Ashí nunĭkanam Yusnum atumí yachĭ ainia nu átum wáitarmena núnisaraĭ wáitainiawai. Nusha kajinmakchatniutrume. ¹⁰ Wats, ishichik tsawant wáitsarmena nu nanĭkaasmatai Yus ataksha péĭker awajtamsattarme. Tura numi wewe wajana núnisaĭ ikiakátmartatrume. Tura Yus ikiakárma asarum ni jintiĭn tuke péĭker wekasattarme. Ju Yus tuke in waitnentramtsujik. Tura iisha Jesukrĭstunu asakrin Niiĭjiaĭ métek Yus ni shiir pujutainium tuke shiir pujusmintrum tusa achirmakuitji. ¹¹ Nú Yúsnasha ashí aents shiir enentáimtusartí. Tura ashí áentsnum ni kakarmarĭ tuke atí. Nuke ati.

Amiak áujmamsamu

¹² Serpanujĭ ju papin ishichik áarmaj nuna akupeajai. Serpanu Yusjĭ péĭker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijĭjĭ. Tura tuke ni waitnenkartutairĭn wekasatarum tájarme.

¹³ Papirúnianmaya atumjĭ métek Yus achikma áinia nu amikmaatmarme. Winia uchir Markus núnisaĭ amikmaatmawai.

¹⁴ Yusaĭ yachĭ ajasu asarum anenaisrum shiir awajnisatarum. Jesukrĭstunu ajasuit-rumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹Wikia ju papin aajna ju Semuñ Pítruitjai. Jesukrístu akatramu asan ni takarniurintjai. Ii Yusri tura in Uwentikramin Jesukrístu umirumna nuna atumniasha juna áatjarne. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti. ²Yus, tura ii Uuntri Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisañ atí tusan wakerajrume.

Yusaí páchitkia atin

³Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴Niisha uunt asa tura tujinkiachu asa ni chichamēn suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusaí páchitkia átinian suramsaitrume. ⁵Yus umirkarme. Yamaikia juna túrataj tusarum kakartiniaitrume. Ti penker wekasatniuitrume. Nuyá Yusna nekaatniuitrume. ⁶Nuyá yayauch túrashtin ímiastiniaitrume. Nuyá katsuntratniuitrume. Nuyá Yus shiir enentáimtusurum wekasatniuitrume. ⁷Tura nuyá ashí shuar shiir enentáimtustiniaitrume. Tura nu nankaamas ashí shuar aneatniuitrume.

⁸Ashí nu túrakrumka, tura tuke túrukum wéakrumka, nakiarchattarme. Túrarum ni takatri émakkesrum takastatrum. Tura ii Uuntri Jesukrístu nekas nekaattarme. ⁹Tura nuna túruiniatsna nuka, kusurua áanin ániawai. Jesukrístu wakeramuriñ enentáimtuiniatsui. Ni tunaariya uwemprarmia nuna kajinmatainiawai. ¹⁰Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. ¹¹Tura ii Uuntri Jesukrístu uwentikramprajnia nu, Nii tuke akupeana nuí, nakittsuk shiir awaintiamattarme.

¹²Tuma asamtai nékarminin tura Yusna nekas ana nuyá kanaatsumnin tuke enentáimtikratjarne. ¹³⁻¹⁴Nekaatarum. Winia jákatniurun jeatema nuna ii Uuntri Jesukrístu ujatkeyi. Tuma asamtai iwiaaku pujajna juik atumin tuke enentáimpratarum tusan jintintratniuitjarne, tu enentáimsajai. ¹⁵Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiarminia nu

¹⁶Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchaui. Antsu imia ii jijjai Uunt Jesukrístu waantu ajasu wáinkia asar ujakmajrume. ¹⁷Tura Apa Yus Jesukrístun shiir waantu awajsamia nuí, ni imiá shiir pujutairiya chichaak tímiayi, “Ju ka winia ti aneamur Uchiruiti. Nin ti wararjai.” ¹⁸Iisha naint “Yusna” tájinia nuí Nijjai pujá asar nu nayaimpinmaya chichaamu paant antukmaji.

¹⁹Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsápin awajeana áintsan asamtai, penker enentáimta asarum penker túrarme. Tura Kristu taa, yanquam etsantea núnisañ atumí enentáin ashí paant awajsattawai. Tura nu tsawant jeatsain nu étserma tuke penker enentáimtustarum. ²⁰Tura ju emka nekaatarum. Shuar aya ni enentáimmiar-jijain, Yusa Wakanjiainchu, Yus-Chicham urukamtai tu chicháa nuna nekaatniun jeatsui. ²¹Warí, Yúsnan etserin yaunchu etserkarmia nu, aya ni wakeramurijiañ tícharmiayi. Nu áishmankan enentáin Yus pujursarmiayi. Tuma asa ni tiarmia nuna Yusa Wakanj tintiam tiarmiayi.

*Wait chichaman unuiniainia nu
(Jútas 4-13)*

¹ Tura Israer-shuarnum wait chichaman etserniusha páchitkiarmiayi. Atumiincha wait chichaman unuiniiau páchitkia ártatui. Niisha awajimtikrampratniun wakeruiniak wáitian ti yajauchin uúkar unuiniarartatui. Tura “Uunt Jesus uwentikrurmia nusha ántraiti” tiartatui. Nuna takui ni amuukatniurisha wárik jeartiatui. ² Tura untsurí shuar ni yajauch túruiniamurín úrsar métek túrawartatui. Iis, “Yus-Chichaman unuiniaitjai” tuiniayatan imiá yajauch túruiniakui untsurí aents “Yus-Chicham ántraiti” tiartatui. ³ Kuítian ti wakeruiniá ásar, wait chichaman unuítiamprar akíam kuítriniawartatui. Tura nú shuar yaunchu Yus jákatniunam sumantikiawarma ásar, ni amuukatin tsawantrí jeatemayi. ⁴ ¿Warí? Yuska ni suntarí nayaimpiniam pujuarmia nunasha penké tsanukurachmiayi. Antsu nayaimpinmayá jinium akupkarmiayi. Tura nekapsatin tsawant jeatsajín kiritniunam jinkiamu emetamu pujuiniawai. ⁵ Yáunchuyá shuarnasha Yus tsanukurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjái wekasatniun etserin asamtai ni shuarí siati armia nujái uwentikramiayi. ⁶ Enentáimpratarum. Sutuma pépruncha tura Kumura pépruncha nayaimpinmayá jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi. ⁷ Tura Yus Ráutan uwentikramiayi. Péñker shuar asa, Sutumanmayá shuar imiá yajauch ásar tunáa túruiniakui, Raut kúntuts enentáimsamiayi. ⁸ Péñker áishman asa, nuyá shuara yajauchirín wáitianiak, ni enentái péñker asamtai tuke tsawant kúntuts enentáimiuk wáitmiayi. ⁹ Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrashá yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurín túruinia nunasha Yuska nekas asutiáttawai. Enentáimcha áiniawai. Tura ni wakeramuríniak wakeruiniawai. Nijíai nankaamas akupin ainia nuna yajauch áujmatainiawai. ¹¹ Warí, imia Yusa suntarí Yusaj matsatainia nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

¹² Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisan jákartatui. ¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjái irunar yurumáiniayatan atamin ananókramawar warainiawai. Nuka natsantaiti.

¹⁴ Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinnisha ti nékainiawai. Jákatniunam sumamawaru áiniawai. ¹⁵ Yúsnumaaní naka wétsuk awajirarai. Peura uchirí Paraam Yúsnan etserniúitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. ¹⁶ Tura niisha tunáa túratajtsa weái Yuska umpuurun chichahun aents chichaana nujái métek chichamtikiamiayi. Nuínkia umpuuru timia nujái Yúsnan etserin ni netse túratniurín enentáimiar iniaisiayi.

¹⁷ Nu áishmansha yumirmat kuyá núnis áiniawai. Tura núnisan yurámisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjái áentsun yainiainiatsui. Niisha imiá kirit ámanum tuke pujustin áiniawai. ¹⁸ Niisha ti chichainiayat ántar chichainiawai. Yajauch túratniujái tura ayash wakera nujáisha páchím túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakrumka ankant átrume” tu wénawai. Túrashá imia níñki ni tunaarín emetamu áiniawai. Páantchakait. Shuar warí tunaajaim nupetnaka, nuna emetamurínti. ²⁰ Kame shuar, uunt Jesukrístu uwentikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak

yajauchiniam iniainiakka, nuik pujumia nújainkia nankaamas yamá imiá yajauch pujuiniawai. ²¹ Yusa akupkamurín imiá péñkera nuna Yus nú shuarnasha súsarmaiya. Túrasha nékainiyat tunaanum waketkiaru ásar ti asutniáwartatui. Tuma asantai, nekas jintia nekaachuitkiunka maak árainti. ²² Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimiui.” Nu áishmansha núnisan yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiará áatjarne. Mai papiniam winia jintintiamurjai atumí chamir enentáin enentáimtikratjarum tusan wakerajrume. ² Yúsnan etserin, péñker wekain armia nuna etserkamurj enentáimturjarum. Tura ii Uuntri akupkamurín ni akatramurijjai ujatmakarmia nusha enentáimpratarum. Jesukrístu uwentikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurín túrusar wekasartatui. ⁴ Tura júna tiartatui. “¿Kóstuka “wi atak tátatjai” timia nusha urukuit? Warí, ii uuntri yaunchu kajinikarmia nuyá yapajíáchmaiti. Yus yaunchu ju nunkan najanamia nuyá yamaisha tuke núniskete” tiartatui. ⁵ Túrasha nunkan nayaimpincha Yus yaunchu najanamia nuna nekaatniun nakitiainiawai. Yusa chichamejai nunka entsaya jinkimiya tura nunkasha entsá nanatrawai, Yus timia nujai métek. ⁶ Tura ukunam nu nunkan amaarkamujai Yus emesarmia. Ashí nuna nekaatniun nakitiainiawai. ⁷ Tura Yus tiniu asantai nayaimpisha nunkasha yamáya nuka jijjai emesarat tusa ikusma áiniawai. Yus áentsun nekapsattana nu tsawantai yajauch aents emesartatui; tura jisha nu tsawantai nunkan nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Kóstujainkia chikichik tsawant mir uwiya núniskete; mir uwisha chikichik tsawanta núniskete. ⁹ Uunt Kristu, “atak tátatjai” tana nuna umitsuk menkakashatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichikísha menkakain tusa nakitiawai. Antsu ashí shuar enentáin yapajíáwarat tusa wakerawai. ¹⁰ Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuj ashí írrunna núurtiuk esaawartatui. Tura nunkasha tura ashí írrunna nusha esaawartatui.

¹¹ Ashí nu emesartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume. ¹² Yusa tsawantri wárik tati tusar, jintiá ímprusar nákastiniatji. Nu tsawantai nayaimpisha esáa emesartatui, tura ashí írrunna núurtiuk ti tsuer ajas entsamnattawai. ¹³ Tura iikia yamaram nayaimpisha, yamaram nunkasha ati tusar nákaji. Nu átatui, tímiaiy Yus. Tura nujsha aya péñkerak átatui.

¹⁴ Nu tuma asantai, aneamu yatsurtiram, ju túrunati tusarum nákarmena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum. ¹⁵ Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan Yus ni nekatairín susamia tímiatrusan áatramprarmar. ¹⁶ Ashí papí aarmia nuj Pápruka wi tajana nuna chichaawai. Kame ni áarmari chikichika ishichik nekaachminiusha áiniawai. Nékachu ainia nú shuarsha, tura Yúsnan tariarcha ainia nusha Papru árman yapajíáwar nusháa jintintiniawai. Tura chikich chichamsha Yus-Chichamnumiá ana nuna núnisan túruiniawai. Túmainiakka niniki emesmainiawai.

¹⁷ Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsa wakerutmainiai awajimtikrurain tusarum, tura Yusai tariarumena nuyá iniaraj tusarum anearum wekasatarum. ¹⁸ Tura ii Uuntri Jesukrístu in Uwentikkiartin ana nu, yamá nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntri Jesukrístu náarin uunt awájsartí. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchirī tuke pujuuyayi. Nusha iisha anturkaitji. Nekas ii jijījai wáinkiaitji. Wáinkiarsha ii uwejējaisha antin̄kiuitji. Niisha Yúsan ti paant awajeak̄, Chícham t́iniiaiti. Tura tuke iwiaaku átinia nérennuiti. Nuna áateajrume. ² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniurī asa tuke Yus Apajāi pujuuyayi. Tura yamaikia īini paant ajatramsakrin atumniasha ujaajrume. ³ Ii Yus Apajāisha ni Uchirī Jesukristujāisha tsanin̄kiar nekas chikichík ajaji. Tura atumsha núnisrumek iijjaī chikichík ajasuk tusar wáinkiamajnia nuna anturkamajnia nunasha ujaajrume. ⁴ Ti shiir warastarum tusan juna áatjarne.

Yus tsáapniniaiti

⁵ Yus imiá tsáapnin asantai kiritin Nīn̄kia pen̄ké atsawai. Nu chichaman Jesukristu in unuitiamprakrin nuna atumniasha ujaajrume. ⁶ “Niījaī tsanin̄kia pujaji” táyatar kiritniunam pujustinia áintsar tunaanum pujakrikia wáitraji tura nekas pen̄ker ana nu túratsji. ⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchirī Jesukristu numpéjaī ashí ii tunaarī japirtamji.

⁸ “Wi tunaan túrichuitjai” tákurkia ímia iik anan̄mamaji. Nekas ana nu nékatsji. ⁹ Antsu ii tunáarī Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna t́imiatrusan̄ umikmin asa túrattawai. ¹⁰ Kame “Tunaan túrichuitjai” tákurkia nujaī “Yus wáitriiniaiti” taji. Ni chichamesha ii enentáin̄ pujurtamtsuji.

2

Jesukristu in Yúsan áujturmaidji

¹ Yus-shuartiram, tunaanum iniaar̄airum tusan jū papí áateajrume. Túrasha Yus-shuar tunáa túramtáin̄kia Apa Yusan ii áujturmau awai. Nuka Jesukristuiti. Niisha ti pen̄keraiti. Niisha Yúsan áujturmakui Yusjaī ataksha iwiaaar̄ar pujustatji. ² Jesukristu ii tunaar̄in asakártaj tusa jarutramkamiaji. Túrasha aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkia nuikia Yus nekas nékaitji. ⁴ Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin̄ atsawai. ⁵ Antsu shuar Yus tana nuna umireakka Yúsan ti shiir aneawai. Túrakur Niījaī tsanin̄kiar pujamu nékaji. ⁶ “Yusjaī tsanin̄kia wekaajai” tana nú shuar Jesukristu wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumiá antuk-miarum nunak tájarne. Ashí atumin jintintiamu yaunchu akupkamuiti. ⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumīin̄cha na akupkamu nekas paant awajsamuiti. Nujaī kiritin men̄kaatemka asamtai tura nekas tsapn̄in̄kia paant tsapnirtasa pujakui nu akupkamun ataksháa aateajrume.

⁹ Shuar “tsáapninium pujajai” táyat chikich Yus-shuaran nakitiakka tuke kiritniunam wekaawai. ¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti. ¹¹ Tura shuar chikich Yus-shuaran nakitiakka kiritniunam tuke wekaawai. Tura kiritniunam iimiú asa itiuraani wea nuna nékatsui.

¹² Uchitirmíncha, Jesukrístu jakamujaj atumí tunaari tsankurnaru asakrumin juna áateajrume. ¹³ Úntirmíncha yámankamtaiknumiá tuke pujuuya nu nekáa asakrumin juna áateajrume. Únmarutirmíncha uunt iwianch nupetka asakrumin juna áateajrume.

Uchitirmíncha, Yus Apa nekáa asakrumin áateajrume. ¹⁴ Úntirmíncha yámankamtaiknumiá tuke pujuuya nu nekáa asakrumin juna áatjarne. Únmarutirmíncha atumí enentájjaj Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya ániawai. Shuar aya nunak wakerak Yúsnaa aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurín umíana nu tuke iwiaaku pujustatui Yusjaj. Nu asantai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirí, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkarmatai amuukatin tsawant jeatemayi. ¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke ijijaj irunar pujuarajayi. Tura jíinkarmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsantai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchiríncha nakitia asa Kristu nemasrinti. ²³ Yusa Uchirín nakitiainia nu Yus Apajajisha tsanin pujatsui. Tura Yusa Uchirín shiir awajea nu, Yus Apajajisha tsanin pujawai.

²⁴ Yámankamtaiknumiá antukmiarum nu atumí enentájin pujurtamsati. Nu túrakrum atumsha Yusa Uchirijajisha Yus Apajajisha tuke tsaninkrum pujustatrume. ²⁵ Jesukrístusha Nijijaj tuke iwiaaku pujustinian tsankatramkaitji.

²⁶ Anankartin írunkui juna áatjarne. ²⁷ Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatín atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asantai Nii jintintramna áintsarum Krístujaj tuke tsaninkrum pujustarum.

²⁸ Yamaikia, uchiru, Krístujaj tuke tsaninkrum wekasatarum. Nu túrakrikia Nii támatai natsamtsuk ti shiir inkiunaikatjaj. ²⁹ Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchirí ániawai. Nusha nekaatarum.

3

Yusa uchirí áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuarcha nekarmainiatsji. Kame Yunsasha nékainiatsui. ² Aneamu yatsurtirmea, juna tájarne: nekas Yusa uchirí ajasuitji. Kame ukunam urukuk átaj¹ nusha nékatsji. Túrasha ju paant nékaji: Jesukrístu támatai imia Nii paant wáinkar Nijijaj métek ajastatji. ³ Tura shuar shiir enentájjaj nuna náakka imia niní shiir awajmamui Jesukrístujaj métek shiir atajaj tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaari asakártaj tusa ju nunkanam támia nu nékarme. Tura Niníka tunaan túrichuyayi. ⁶ Tuma asantai shuar Nijijaj tsanin wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti. ⁷ Uchiru, shuar anankramawairap. Penker túrinkia Kristu ti penker asantai niisha penkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asantai. Yusa Uchirí ju nunkanam táwiti ashí íwianch túramun emesrataj tusa.

⁹ Shuar nekas Yusjaj akiinia nu tunaanum wekaatsui. Yusa uchirij asa Yusa iwiaakmar-ijjaj wekaawai. Tuma asa tunaanum tuke wekaatsui. ¹⁰ Shuar penker túratsna nuka tura Yus-shuaran kajera nuka Yus-shuarchaiti. Nujaj Yusa uchirij ainia nusha tura iwianchi uchirij ainia nusha paant nekaamniaiti.

Mai anenai ajatin

¹¹ Atumsha yámankamtaikniumia chicham antukmiarum nu júiti: mai anenai ajartin. ¹² Iisha Kaínkia áanin áchatniuitji. Íwianch-shuar asa ni yachin máamiayi. Tura çurukam-tai maamia? Enentaimprata. Nii yajauch asa tura ni yachi penker asantai máamiayi.

¹³ Yatsurtiram, ju nunkanmaya shuar nakitramainiakui ti enentáimsairap. ¹⁴ Iikia jákatniummaya uwempra asarⁱ nekas iwiaaku pujaji. Túmakur Yus-shuar ainia nu aneaji. Nujaj yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai. ¹⁵ Shuar Yus-shuaran nakitiakka mankartinia núnisaiti. Tura mankartinkia tuke amuicha iwiaakmanum pujuiniatsui. Nuka nékaji. ¹⁶ Jesukrístu in jarutramka asakrin nujaj nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji. ¹⁷ Túrasha shuar chikich Yus-shuar atsumana nuna takakiat waitnentachkunka nekas ni enentájjaj Yúsán aneawash. ¹⁸ Uchiru, aya chíchamjain anenain áchatniuitji antsu nekas aneniakur penker túrar yáiniaiktiniaitji.

Yusaj natsamtsuk jeamniaitji

¹⁹ Jujaj ii Yúsaj sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. ²⁰ Ii enentáj yajauch túramun enentáimtikramkurnisha Yus ijijaj nankaamas ashí mash nékatsuk. ²¹ Tura, aneamu yatsurtiram, ii enentáj yajauch túramun enentáimtikramchakrinkia Yúsaj sapijmiatsuk jeamniaitji. ²² Tura ni wakeramu túrakrikia tura ni chichamegha umiru asakrin ashí ii seaj nuna suramsattaji. ²³ Júiti Yus akupkamu: ni Uchirij Jesukrístu nekas enentáimtustin tura Kristu timia áintsarik shuurtisha mai anenai ajartin. ²⁴ Shuar ni chichamen umía nuka Yusjaj tsanin wekaawai tura Yus nijijaj tsanin wekaawai. Mai chikichik ajasu ániawai. Tura Yusa Wakanj ii enentáin pujá asantai nujaj Yus ijijaj tsanin wekaana nu nékaji.

4

Yusa Wakanisha tura Kristu nemasri wakancha

¹ Aneamu yatsuru, untsurj shuar wáitruiniak “wi Yúsán etserniuitjai” tuiniawai. Tuma asantai ashí shuar “wi Yusa Wakanin takakkun chichaajai” tuinia nu penker nekapsuk enentáimtusairap. Antsu ísrum nekas Yusa Wakanimpiahit tura chikich wakaniashit nu nekaatarum. ² Jujaj nekapsarum ya nekas Yusa Wakanin takaka nu nekaattarme: Shuar “Jesus Yusa Uchirij Kírstuítat nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentáimtsatsna nuka Yusa Wakanin takaktsui antsu Kristu nemasri wakanin takakui. Kame Kristu nemasri wakan tátin tama ántichukaitrum. Nu wakan yamaikia ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka nijijaj nankaamas kakaram asantai wáitrin ainia nu nupetkaitrume. ⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. ⁶ Antsu iikia Yúsnaitji. Tuma asakrin Yúsán nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitrin wakanin takakusha nekaamniaiti.

Yus tuke anenkratniuiti

⁷ Aneamu yatsuru, anenaitin Yúsnumia asantai mai anenai ajartai. Shuar anenkratniua nuka Yusa uchirij asa Yúsáncha nékawai. ⁸ Shuar anenkratcha nuka Yúsánka nékatsui. Kame Yuska tuke anenkratniuiti. ⁹ Tuma asa ni Uchirij chikichkiniak ju nunkanam akupturmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni anenkrattain paant iniakturmasmiaji. ¹⁰ Jujaj nekas anenkrattainkia paant nekanamniaiti:

ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmij nujai nekas nekanamnaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Nijijai métek anekratin ajaji. ¹³ Yus ni Wakanin suramsa asakrin Yus iijjai tsanin wekaana nusha tura ii Nijijai tsaninkia wekaajnia nusha, nujai nékaji. ¹⁴ Yus Apa ni Uchirin ashí shuaran uwentikrarat tusa ju nunkanam akupkama nu wáinkia asar' étsereaji. ¹⁵ "Jesus Yusa Uchirinti" tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anekratinuuti. Tuma asamtai shuar anekartakka Yusjai tsanin wekaawai tura Yussha nijijai tsanin wekaawai. Mai chikichik ajasu ániawai. ¹⁷ Núnisar ti peker anekartin ajaji. Túrar' súmantikiatin tsawantaj natsamtsuk wajastatji. Kame ju nunkanam pujayatrik Jesukristujai méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anekratchaiti.

¹⁹ Yus emka in anenma asakrin iisha Nii aneaji. ²⁰ Tura shuar "wi Yúsan aneajai" táyat chikich Yus-shuaran nakitiakka nuka wáitriniati. Kame Yus-shuaran tuke wainnia nuna aneachkunka ¿itirak Yusan wáinchasha aneat? ²¹ Yus incha juna turammiaji: Yúsan anea nu shuar chikich Yus-shuarnasha aneatniuiti.

5

Ju nunkanmaya írunna nu núpeteaji

¹ Ashí "Jesus Yusa Uchiri Kristuiti" tu enentáimtana nú shuar Yusa uchirinti. Tura aparí anekrikia ni uchirísha aneattaji. ² Yus Apa aneakur tura Nii wakera nu umirkur Yusa uchirísha ashí aneattaji. ³⁻⁴ Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nunkanmaya írunna nuna núpeteawai. Nu asamtai Yus tana nu umirkatin itiurchatchaiti. ⁵ Aya "Jesus Yusa Uchirinti" tu enentáimtana nú shuar ju nunkanmaya ana nuna awakkamniati.

Jesukristu "Yusa Uchirinti" tu etserainia nu

⁶ Jesukristu jú nunkanam taa entsajai imiankui Yus nayaimpinmaya chichaak "Juka winia aneamu Uchiruiti" tímiayi. Tura nuyá Jesus jakamtai ni numpé puarmiayi. Entsajai imianin ni takatrin nankamamiayi túrasha in jarutramak ni takatrin amukmiayi ju nunkanam. Chikichkinkia túrutsuk mai metek túra asamtai Yusa Uchiríya nu paant nekanamniati. Yusa Wakanísha tuke nekas tiniua nu métek tawai. ⁷⁻⁸ Nu asamtai menaint "Yusa Uchirinti" Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. ⁹ Aents étsereiniaakui ántureaji. Nuna nankaamas Yus ni Uchirin tana nu nekas anturkatniuitji. ¹⁰ Yusa Uchirin enentáimtana nú shuar ni enentáincha nékawai. Antsu Yus ni Uchirin timian enentáimtatsna nú shuar Yúsan enentáimtachu asa Yúsan "wáitriniati" tawai. ¹¹ Yus ni Uchirin timia júiti: Tuke iwiaaku pujutai nérenniuiti tura nu iwiaakmancha in suramsaitji. ¹² Yusa Uchirijjai tsanin wekaana nú shuar, nu iwiaakmajai iwiaaku pujuiniawai. Tura Yusa Uchirijjai tsanin wekaatsna nú shuar, nu iwiaaku átinnum pujatsui.

Amuak Yus nekas enentáimtustinian áarmiania nu

¹³ Yusa Uchiri nekas enentáimtakrum tuke amuicha iwiaakmajai iwiaaku pujarme. Nu nekaatarum tusan juna áatjarme.

¹⁴⁻¹⁵ Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniatji. Nu neka asar Yus ti shiir enentáimtaji.

¹⁶ Tunáa awai jákatniunam júana nu. Shuar nu tunaan túramtaingka Yus áujtustin ántrait. Tura shuar chikich tunaan túrakuingka nuka nekas Yus áujtustiniati. Nekas jákatniunam júatsna nú tunaan túraitkiuingka iwiaaku átinian Yus susattawai. ¹⁷ Ashí yajauch' ana nuka tunaiti. Tura jákatniunam júatsna nú tunaasha awai.

¹⁸ Nekas Yusjaj akiinia nú shuar tunaanum tuke wekaatsui. Antsu Yusa Uchirj nin ti penker wainkiui íwianch antinchiachminiaiti.

¹⁹ Iikia nekas Yúsnaítj tura ashí ju nunkanmaya shuar iwianchnia áiniawai. ²⁰ Yusa Uchirj ju nunkanam taa nekas-Yus aa nuna paant jintinramji. Yusa Uchirj Jesukrístujaj tsaninkia wekaakur nekas-Yusa nujajsha tsaninkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nuí pachiinkiairap. Antsu nujaj aneartarum.

Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asantai aneajrume. ³ Yus ii Aparísha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaitiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáim-prajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yámañkamtaik antukmiaj nunak tájame. ⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámañkamtaiknumia antukuitrume.

Anankartincha írunui

⁷ Ju nuñkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai. ⁸ Nu shuarjai aneatarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajaisha tura ni Uchirijaisha mai tsanin pujawai.

¹⁰ Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” tákumka nu shuar yajauch jintíamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtat-jarme. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme. ³ Ame nekas chicham umirman shuar jui taar ujatkmayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniyajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti. ⁶ Nu shuar ame nekas anenamun jui taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame. ⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumátniun nakitrarmatai ⁸ ii Yus-shuarkia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniati

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. ¹⁰ Nu asamtai nuí jean ni yajauch túramun etsertuktajai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayániatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniati

¹² Imiá nekas penker shuar asamtai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

Umíamu chicham

¹³ Wi ti nukap títinian wakerajme. Túrasha ju papinium mashi áatrashtatjame ¹⁴ wárik íitin asan. Nuí jean chichasmi.

¹⁵ Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninǵiaru ásarmatai Yus nin wainiainiawai niijjai kanakchatniun. ² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítiur 2.1-17)

^{3,4} Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar ananǵkramawar atumín pachiinkiarmai. Niisha “Yus ti anenkartin asamtaí páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntrí Jesukrístuncha nakitin áiniawai. Nu asamtaí nu shuaran “yaunchu sumamawaruiti” tímiayi Yus. Tuma asamtaí tájarme “Tuke Yus-Chicham yapajjáshstinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunǵkanmaya júkiar Nin umirkacharua nuna máawarmiayi. ⁶ Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jinǵkiá sepunam apujas pujurainiawai. Tura Uunt Tsawant jeamtaí súmamtekiawartatui. ⁷ Núnisan Sutuma péprusha Kumura péprusha tura tíjiuch péprusha áishmanjajisha nuwajajisha ti yajauch nuamtak tsanirmanainiakui ti tunaan penǵké túrachmin ana nunasha túrin ármiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmmainiawai, Yushasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya sutara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuarka nékainiatsna nuna nanǵkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajisha imia ninǵki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruiniak imia ninǵki tunaanum tsanǵkamakaru áiniawai. Tura Kurea áinis ashí akupniun nakitin áiniak kajinǵkiartatui. ¹² Átum nuamtak anenaitiai-jisat nájankurmin nu shuar chikichan enentáimtsuk Yusnasha ashamsuk imia ninǵki enentáimtumainiawai. Penǵké ántar áiniak yumi kiar tee ajasua núnin áiniawai. Tura nase umpuim yútsuk nanǵkamainiawai. Árak nerektin nantutin nerechua ánin áiniawai. Tuma ásar uwemu penǵké jaka ánin áiniawai. ¹³ Entsa nujanǵkrak saurín ajekeawai. Nu shuarsha núnisar ni natsantrín natsamtsuk ajekenawai. Tura yaa waakua ánin áiniawai. Tuma ásar nekas kiritniunam tuke menǵkatin áiniawai.

¹⁴ Atańka tiranǵkiyayi Eruk. Ti penǵker Yúsnan etserin asa juna tímiayi “Uunt Yus ti untsurí ni shuarijjai winittiwai. ¹⁵ Nuyá ashí shuar túrawarman nekaattawai. Tura ashí yajauch shuarasha ti tunáa túrawarua nujai tura Yúsan yajauch áujmatsarua nújajisha súmamtekiawartatui” tímiayi Eruk. ¹⁶ Nu shuarka penǵkera nujai waratsuk “yajauchiiti” tuiniawai. Aya ni ayashí wakeramunak wakeruiniawai. Nanǵkaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa penǵker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntri Jesukrístu akatramuri yáunchu “an-eartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramuriniak umí pujuartatui” tiarmiayi. ¹⁹ Nu yajauch shuar atumín akantamenawai. Ju nuñkanmayanak páchiniaak Yusa Wakanin takakainiatsui.

²⁰ Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakaní kakarmarjijai ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntri Jesukrístu in waitnentrana asa tuke shiir Nijjai pujustinian amastatji. Nu tsawant naká pujutarum.

²² Mai yapaji ajá ainia nu naka enentáimtikratarum. ²³ Chíkich shuarsha jiniumia júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushirjsha ni tunaarjijai maatra asantai mujkiatniuiti.

Yúsan shiir awajeawai

²⁴⁻²⁵ Yus chikichkiiti. Ti nekaiti. In uwemtikiartin asa ni kakarmarjijai yainmakminiaiti tunaanum iniarchatniun. Tuma asa tunaajai máatrachu awajtamas ni ti shífirmarjín ejetamtatume. Túrutma ti waramtikramsattarme. Ii Uuntri Jesukrístu túrunamujai Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS Jesukrístu Juánkan paant iniaktusma

Jesukristu paant awajqsamu

¹Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asantai Jesukrístu ni suntarin akupak ashí winia paant awajtursamai. Wisha Juánkaitjai. ²Yus timia nunasha tura Jesukrístu ujatkamia nunasha tura wi ísmaj nunasha ti paant aya nekasa nuna tájai. Penké wáitratsjai.

³Jú papin áujea nu shuarsha tura núnisan juna ántana nusha nekas enentámtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakaní siati naka pujurainia nusha shiir yainmakarti. ⁵Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. ⁶Túrutma akupin awajtamsaitji. Tura ni Aparí Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷Wats, Krístuka yuranmijai winittiwai. Tura íjuuarmia nusha tura ashí shuarsha nuna wáinkíartatui. Túrawar ashí sapijmiainiak úutiartatui. Maa, nekas nunis átatui.

⁸Krístuka “yámankamtaiknumiá amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha qjasun Juan wainkiamiania nu

⁹Wi Juan atumjai métek waitia asan atumí yachintjai. Núnisan nayaimpiniam, Yus akupeana nu, métek jeattaji. Tura katsuntrar nákastinian Jesukrístu mái métek súrampi. Yus-Chichamnasha tura Jesukrístu timiancha étsereakun nayaantsa ajapén atentrámunam Pátmus nunkanam sepunam apujisama núnisan pujumjai. ¹⁰Tumai tumin tsawantaj Yusa Wakaní pujurtakui winia úkuruiní kakantar untsumman antukmajai. Kachu umpúamua núnis ti kakarmauyayi.

¹¹Tura turutmiái “Wíitjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asantai wáinmena ju, papinium áaram Asia nunkanam siati péprunam Yus-shuar írunna nu akuptukarta. Ju peprunam akupkarta: Ipiisusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiái.

¹²Túrutkui yaki túruta tusan apajasan íkman siati shirikip ikiutain kurijai najanamun wainkiamjai. ¹³Tura nu ajapén Aents Ajasua núninan wajan wáinkiamjai. Tura pushirísha nawa timiai nuntuaru entsaruyi. Emenmamkesha kúrinia netsepnum emenmamaui.

¹⁴Tura ni muuke intiashísha murikui uré nijiamua núnisan tura micha núnisan ti puju chírauyi. Tura ni jíisha jiya núniskeyi. ¹⁵Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi.

¹⁶Ni untsuurinjí siati yaan takakuyi. Tura ni weneniasha puniá áinis tsakatskat mái ere awajqsamu jíinmiái. Ni yapísha etsa ti etsantuk íischamnia núnisauyi.

¹⁷Nuna wáinkian jaka áintsanak naween iniaarmajai. Túrasa ni untsuurí uwejen awaantrus turutmiayi, “Ashamkaip. Wíitjai. Yámankamtaiknumiá amúamunmasha tuke pujuwitjai, timiai. ¹⁸Wikia tuke iwiaakuitjai. Jakamijai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, timiai. ¹⁹Tuma asantai wáinkiamna jusha, yamá wáinmena nusha, tura ukunam átatna

nusha aartá, timiai. ²⁰Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruñi siati yaa wainkiam nu, siati péprunmayá Yus-shuaran wáinniun nakumenawai, turutmiai.

2

Ipisiunam chícham áatramu

¹Nuyá turutmiai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisañ siati shirikip-ikiutai kúrinman ajapén atenta wekáa nu, tawai: ²“Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. ³Ti wáitiayatmek katsuntram yawetsuk Winia ti takartusuitme. ⁴Túrin áminiñ juna títiatjame. Yus aneakum yámankamtaik ti penker wekainiuyam núnisam túratsme. ⁵Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustajame. ⁶Tura ju penker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitijai. ⁷Kuíshtinia nu shuar Yusa Wakaní ashí Yus-shuaran timian antukti: Nupetmakunka tuke iwiaaku pujutai numi neren yúatniun tsankatkattajai. Nu numi Yus pujana nuí wajaawai.” Tu áartá’ turutmiai.

Ismirnanam chícham áatramu

⁸Nuyá turutmiai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisañ jaka nantakmia nu, tawai: ⁹“Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusañkia ti kuítrinniuitme. Tura shuar uunt iwianch Satanása shuarí ániayat “Israer-shuaraitjai” tuíniak yajauch áujmatramena nuna nékajai. ¹⁰Ti wáitsattamna nu ashamkaip. Íwianch ashí nekapramsataj tusa atumiñiñ sepunam enkeattawai. Nuí tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútíksanak nekas iwiaakman tuke shiir pujustinian amastajai. ¹¹Kuíshtinia nu shuar Yusa Wakaní ashí Yus-shuaran timian antukti: Nupetmakuka jimiara jákatniuka waiatsashatui.” Tu aartá’ turutmiai.

Pírkamunam chícham áatramu

¹²Nuyá turutmiai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³“Ashí ame túram nuna nékajai. Uunt iwianch Satanás akupea nuí pujayatmek tuke shiir enentáimturmena nuna nékajai. Winia shiir umirtinían Ántipasan máawarmataisha Winia enentáimtursatin ishichkisha ini-aitiuschamame. Nusha íwianch pujutainium pujakrumin túrunamai. ¹⁴Túrin áminiñ juna títiatjame. Atumiñiñ shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitíán Parakan unuiniarmiayi. Nuyá Parak Yus-sutai namañken maar yúatniun Israer-shuaran jintintiamiayi. Núnisañ ti tsanirmatniun jintintiamiayi. ¹⁵Atumiñiñ shuarsha Nikiurás jintíamuncha, Wi nakitij nuna, iniaisatniun nakitaiñiawai. ¹⁶Wats, enentáimpram iniaisata. Túrachakminkia Wi wari winin winia wenuriyá puniá jiinia nujaí máaniaktajai. ¹⁷Kuíshtinia nu shuar Yusa Wakaní ashí Yus-shuaran timian antukti: Nupetmakunka maná yurumkan uuqma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsañ aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijjái métek keena nu tura núnisañ nawé jiru yanikutaku jiamua núnis newar ajawa nu, tawai: ¹⁹“Ashí ame túram nuna nékajai. Yus shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia. ²⁰Túrin áminiñ juna títiatjame. Nu nuwá Jesapír awematsme. “Yúsnan

unuiniajai” tinia Wíi shuaran ti anan̄kenawai. Tura ti tsanirmatniuncha tura ántar-yus-sutai naman̄ken maar yúatniun jintintiainiawai. ²¹ Niisha ni tunaar̄in enentáimiar iniaisat tusan nákasuitjai. Tura nakitiawai. ²² Wátsek, sun̄kurmatkiakan peaknum áepsattajai. Tura chíkichcha niijjai tsanirma ainia nunasha niijjai métek ti wáitkiastatjai. Ni tunaar̄in enentáimiar iniaisacharmatain̄kia túrattajai. ²³ Ni uchirin̄cha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. ²⁴ Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútajya nu nékachu asakrumin atakka túratniun patatkashtatjarme. ²⁵ Tura Wi jeatsain̄ takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsur̄i nun̄kanam akupkatniun tsan̄katkattajai. ²⁷ Winia Apar tsan̄katrukmiá núnisnak akupkatniun tsan̄katkattajai. Tura nuw̄e najanamu jirujai awati ijíakratniua áinis ti kakarmajai akupkattawai. ²⁸ Yánkuam káshik jiinia nuna susattajai. ²⁹ Kuíshtinia nu shuar Yusa Wakani ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai ‘Sártisnumiá Yus-shuaran wáinin ju áatratá: Siatí Yusa Wakani takakna nu tura núnisan̄ siati yaan takakna nu, tawai: “Ashí ame túram nuna nékajai. Iwiaakua áintsan̄ wekyatmek Wijjaiin̄kia jákaitme. ² Shintiarta. Kajinia nu umpuúm ekeemakta. Kame Yusjai físam pen̄ker túrichuitme. ³ Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumniñkia kasa núnisnak nékatsmin jeartiatjame. ⁴ Tura Sártisnum shuar ishichik pushir̄i wapik máacharu pujuiniawai. Nusha ti pen̄ker áiniak pushí pújun entsarar Wijjai wekasartatui. ⁵ Nupetmakuka pushí pújun entsartatui. Tura iwiaaku átinia nu papiniumiá ni naar̄i áarman japirashtatjai. Antsu winia Apar tura ashí nayaimpinmaya suntar íimmiánun shiir áujmattsattajai. ⁶ Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawir̄i takaku asa uraimtai chíkich pen̄ké epenchamniaiti. Tura epenmiatai chíkich pen̄ké uraichminiaiti. Juna tawai: ⁸ “Ashí ame túram nuna nékajai. Kakarmachuitatmek winia chichamur shiir enentáimtakum Winia initiuschaitme. Tuma asakmin wáitin uratjame. Nuna chíkich pen̄ké epenchamniaiti. ⁹ Wátsek. Shuar wáitruiniak ‘Israer-shuaritjai” tuñniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amijini tikishmatkiarar-tatjai. ¹⁰ Katsuntrata tímiaj nu, shiir umirka asakmin Wisha ti wáitsatin ashí nun̄kanam átatna nuyá uwentikrattajme. Nu wáitsatniujai ashí nun̄kanmaya shuar nekapnasartatui. ¹¹ Wárik winittajai. Takakmena nu emetata. Akinkiatniuitmena nuna chíkich shuar atantramkiarain̄. ¹² Nupetmakunka winia Yusrú jēe tan̄kirin̄ awasattajai. Tura nuyá pen̄ké jíin̄kichartatui. Tura niin̄ winia Yusrú náar̄in áatrattajai. Tura winia Yusrú péprur̄i náar̄incha áatrattajai. Nu pépruka nayaimpinmaya yamaram Jerusarénka Yúsumiá tára núiti. Núnisan̄ winia yamaram náarun̄ niin̄ áatrattajai. ¹³ Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanmaya Yus-shuaran wáinin ju áatratá: Wáitrusuk nekasa nunak tinia nu tura núnisan̄ ashí Yus najanamun Úuntriya nu, tawai: ¹⁵ “Ashí ame túram nuna nékajai. Tura michaash míchachuitme. Núnisan̄ tsuérsha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuércha antsu aya tsuéttsuétak asakmin imiutkattajme. ¹⁷ Iis, “Kuíttrinuitjai, ti irumpraitjai, warinkisha atsumatsjai” tame. Túrashá ashí yajauch, wáitnenmai, kuíttrincha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam

misú ajasma shiir entsarta. Péñker ímpratay tusam jjiinium enketai enkeeta. ¹⁹ Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰ Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuttajme. Tura wayan ámjijai yurumáttajai. Tura amesha Wijjai yurumáttame. ²¹ Nupetmakuka akupin pujutainium Wijjai pujustatui. Wisha núnisnak nupetmaku asan winia Aparjai akupin pujutainium pujusuitjai. ²² Kuíshntinia nu shuar Yusa Wakaní ashí Yus-shuaran timian antukti.” Tu áartá,” turutmiai.

4

Nayaimpiniam Yúsan shiir awajenawai

¹ Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustajme” turutmiai.

² Nu chichamaik Yusa Wakaní akantukmiai. Túrutamtai nayaimpiniam akupin pujutainium pujan wainkiamjai. ³ Niisha jaspi kayasha tura kurnarńnia kayasha nujai métek ti wínchauyi. Akupin pujutain tuntiak téntakuyi. Nusha ismirarta kayajai métekeyi. ⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nuí pujuinian wainkiamjai. ⁵ Akuptainiumia peemsha ipiamtasha untsummasha jfiniarmai. Tura nu pujutainium naka siati shirikip kearmai. Nusha siati Yusa Wakanínti. ⁶ Núnisanu nu pujutainium naka nayaantsa áanin ti saar amai.

Nu pujutainium wakenamanjšha niisháa tanqu kuaru téntakar ármiai. Ukurinjšha tura eemsha jji irunmiai. ⁷ Emka tanqu úunt yawaa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi. ⁸ Nusha sais nanamtin ármiai. Tura jjišha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisanu yamaisha pujawai. Tura ataksha juke winittiawai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúminkiak pujuriarmai. ¹⁰ Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepuiniak tuiniawai:

¹¹ “Úuntá, ii Yúsrinme. Tuke shiir awajmainme. Ashí nankaamas kakarmaitme. Amek ashí írúnna nu najanaitme. Tura aya wakerakum najanamame. Ame wakerakmin irunainiawai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuurin papí penuarma áanniun wainkiamjai. Nu papisha initiaanjšha tura pátatkesha áarmauyi. Tura urakchamnia atf tusa siati anujtukmajai kaki peekmauyi. ² Tura nayaimpinmaya suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anjukamun jaak urakminiait?” ³ Tura nayaimpinmayasha nunkanmayasha tura jakamunmayasha chikichkisha nu papin urakmin atsumiayi. Áujtsuk íistinniasha tujinkiarmai. Tímianu akupin atsumai. ⁴ Nu papin uraktincha tura áujsatniusha, kame íistincha atsakui ti úutmiajai. ⁵ Nuyá chikichik uunt turutmiai “Ti úutfp. Israer-shuarnumia Úunt-yawa, Jutá weea awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nuí tura kuaru tanqunam ajapén tura úuntnum ajapén Murik wajan wainkiamjai. Maamua áintsanketiat iwiaakuyi. Kachurjšha siátiiyi. Ni jjišha siátiiyi. Nusha Yusa Wakaní siati ashí nunkanam akupramua nuuyi. ⁷ Nu Murik we nekas uunt Akupniun untsuurinian nu papin achikmiayi. ⁸ Tura papin achikmatai kuaru

taṅkusha tura paintikuatru uunt arma nusha Murikiun tikishmatrarmiayi. Ashí uunt arpa tuntuítaiin takaku armai. Tura ashí kuṅkuin enketain kuri najanamun takaku armai. Nu kuṅkuin Yus-shuar áusamuiti. ⁹Jú yamaram kantancha kantampriarmai:

“Amek imiá naṅkaamas akupniuitme. Amek papí achikiam anujtukmarí jáakminiaitme. Yus-sutai namaṅkea áinis mantamna asam túramniaitme. Ashí nuṅkanmaya shuarnumiasha Yusna árat tusam ame numpemjái in sumakmiame.

¹⁰Turam akupin awajkartusuitme tura núnisaṅ ii Yúsríniun pujurin awajkartusuitme. Tuma asakmin akupin ajaras jú nuṅkanam akupkattaji.” Tu kantamainiawai.

¹¹Tura untsurí nayaimpinmaya suntar uunt pujutaincha taṅkuncha tura úuntnasha éṅkekawarun wainkiamjai. Nusha nekapmarchammnia ti untsurí armia nu ¹²kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Niṅki achikminiaiti. Tura nupetmaku asamtai yumínsar Nin ti shiir awajsatin áiniawai.” Tu tiarmai.

¹³Núnisaṅ ashí Yus najanamu, nayaimpiniam írunka nusha, nuṅkanam írunka nusha, nuṅká inít írunka nusha, nayaantsanam írunka nusha, tuńnian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴Tura kuaru taṅkusha “Tuke núnisaṅ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jáakmai

¹Wi iyakui Murikkia chikichík anujtukman jáakmai. Túramtai chikichík taṅku ipiamta-jái métek kakantar untsunum antukmajai. “Winim iitiá” turutmiái. ²Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³Nuyá Murik anujtukma jímiran jáakmatai taṅku jímiara nu “Winim iitiá” turutmiái.

⁴Túrutkui chíkich kawai kapaakun wainkiamjai. Nuí ekeemia nuna puniá úuntan susamuyi. Nusha shiir pujuscharat tusa ashí jú nuṅkanmaya shuaran máanaimtikiatniun akupkamuyi.

⁵Nuyá Murik anujtukma menaintiun jáakmatai taṅku menaintiua nu “Winim iitiá” turutmiái. Túrutkui kaway mukusan wainkiamjai. Nuí ekeemia nusha kijin nekapmatain takakuyi. ⁶Tura kuaru taṅku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisaṅ machasha nijiamchisha amuukacharat tusam penker wáinkiaata.” Tu timiai.

⁷Nuyá Murik anujtukma kuátrun jáakmatai taṅku kuatrua nu “Winim iitiá” turutmiái. ⁸Túrutkui kaway yaṅkun wainkiamjai. Nuí ekeemia nusha Jákatín náartiniuyi. Tura nuna úkurjín Jatai nemark winimiai. Nusha ashí nuṅkanmaya shuar kuaru akankamunmaya chikichkin máatniun akupkarmauyi. Nusha mesetjáiasha tsukajáiasha sunkurjáiasha tura yajasmajái máawarmai.

⁹Nuyá Murik anujtukma séṅkun jáakmatai Yus-sutai kuṅkuin ekemtai wakenmaani íismajai. Túran Yus-Chichaman etserainiakui máawarma wakanjín wainkiamjai.

¹⁰Nusha kakantar untsumainiak tiarmai “Uuntá, ti penker asam támena nu umátsmek. ¿Urutiak nuṅká pujuinia nú shuar ii mantamnamunam yapajmiátruktam?” tiarmai.

¹¹Tuiniakui pushí pújun susar tiarmai “Chikichcha Kristunun etserainiakui mantam-natin áiniawai. Nu náakrum ishichik ayampratarum” tiarmai.

¹²Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchar ajasua áintsan mukusa ajasmai. Kashí-nantusha numpá áintsan ajasmai. ¹³Tura yaasha wampú nere nase umpuim ti majywa áintsan kákekarmai. ¹⁴Nayaimpisha papí penuara júamua áintsan menkakamai. Tura naintcha yajá apujnasarmai. Tura nuṅkasha nayaantsanam ajapén atentrainia nusha yajá apujnasarmai. ¹⁵Tura jú nuṅkanam akupin inia nusha náinnium wear kayá wáṅnam uumkarmai. Nijijáiasha ashí shuar, uuntcha,

kufriniusha, suntara kapitiántrisha, ashí kakaram ainia nusha, tura takarniusha ankant ainia nujai náinnium wearmai. ¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asantai saanakim in yutukratata. Túrarum Murik ti asutiámatay nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nankaamasmatai kuaru nayaimpinmaya santar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajiarmai. ² Kame kukarsha tura nayaantsanmasha yajauch awajsatniun akupkamu armai. Tura chikich suntarnasha nantu tátainmaaniá winian wainkiamjai. Tuke iwiaaku Yusa anujutairin takakaui. Nusha kuaru suntaran kakantar untsuak tímiai, ³ “Ii Yusri takarin ainia nu nijiajnium árar anujtatsriniñ kukarsha, nayaantsasha, tura kampunniusha nasejai yajauch awajsairap” timiai.

⁴ Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuaru mir (144.000) armai. ⁵ Jutá weeanmaya tuse mir (12.000) anujtukma armai. Rupiñ weeanmayasha tuse mir anujtukma armai. Kat weeanmayasha tuse mir anujtukma armai. ⁶ Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. ⁷ Semeuñ weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai. ⁸ Sapurúñ weeanmayasha tuse mir anujtukma armai. Jusé weeanmayasha tuse mir anujtukma armai. Piñjamín weeanmayasha tuse mir anujtukma armai.

Ti untsurí shuar pújun entsararu

⁹ Nuyá ti untsurí shuaran wainkiamjai. Ashí nunkanmaya nusháa shuaraim iruntrarú ásar nekamarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai.

¹⁰ Ashí kakantar untsumainiak tiarmai:

“Ii Yusri uunt akupin pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmaya suntarsha uunt akupin pujutaincha, kuaru tanuncha, tura úuntnasha téntatkar armia nu piniakum nunká tepersar Yúsan shiir awajsar ¹² tiarmai “Nekasaiti. Tuke iniaitsuk ii Yusri ti shiir awajsatniuiti. Niñki ti neka, ti kakaram, ti akupin, tura ti penker asantai tuke yuminsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushiri nijiamawar puju awajсарu áiniawai. ¹⁵ Nuna túrawaru ásar yamaikia Yusai naka pujasar tsawaisha káshisha Yúsnan ni Jeen takainiawai. Tura akupin pujutainium eketna au tuke wainkiartatui. ¹⁶ Yamaikia tsukajaisha kitiakjaisha waítsachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukuñtiurartatui.” Tu túrutmiai.

8

Anujtukma siatia nu jaakma tura kunquin ekeemataijai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati santar Yusai naka wajainia nuna wainkiamjai. Nusha siati kachun susamu armai. ³ Nuyá chikich santar kunquin enketain kurijjai najanamun itiamai. Tura Yus-sútainium ayamas wajasmatai núkap kunquin sunasmai. Nu kunquin ashí Yus-shuar áujsamujai métek kunquin ekeematainiam ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. ⁴ Tura santar ekeematai

kuṅkuinia mukuintiuri Yus-shuar áujsamujai métek Yúsan amainkiamai. ⁵ Nuyá nu kuṅkuin enketain suntar achik ekeematainmaya ji kapaan káirin áimiak ju nuṅkanam ukaamai. Túramtai ipiamtasha untsummasha, peemsha, tura uṣsha armai.

Kachu umpuarma

⁶ Nuyá siati suntar kachun takakainia nu umpuartaí tusar iwiarnararmai.

⁷ Emka suntar kachun umpuarmataí micha kákekamai. Nunasha ji numpajai pachim-pramuncha nuṅkanam ajapawarmai. Túmakui menaintiu nakakma jeeán numincha tura ashí írunna nuṅ ekeemakmai. Tura ashí nuṅkanam chírichrin takamtsuk ekeemakmai.

⁸ Nuyá suntar jímiara nu kachun umpuarmataí uunt naintia ánin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmataí ti uunt yaa nayaimpinmaya kapaa kákekamai. Tura entsasha tura púkuninmasha menaint nakakam jeeánum kákekamai.

¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

¹² Nuyá suntar kuatrua nu kachun umpuarmataí menaintiu nakakam jeeá tsawaí-nantusha kashí-nantusha tura yaasha emesnarar ajapén tee ajasarmai. Túrunawar tsawaísha káshisha menaintiu nakakam jeeánnum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsumuk timiaí “Maa, chíkich menaintiu suntar umpuiniakuí nuṅkanam pujuinia nu ti wáitsarta-tui.” Tu timiaí.

9

¹ Nuyá suntar seṅkua nu, kachun umpuarmataí yaan nayaimpinmaya nuṅká kákeran wainkiamjai. Tura nu yaan tunáa shuar jákaru matsamtaí yawirín susamuyi. ² Tura uraimtai nu náṅkatkachu wáanmaya ti mukuint jiniimiaí uunt jiniumiaí áintsan. Tura etsancha tee awajsamai, yuraṅmincha tee awajsamai. ³ Nuyá nu mukuintiummaya manchi jíintrar nuṅká ti yujaarmai. Tura ju nuṅkanmaya titinṅkia áinis najamin ajastinian susamu armai. ⁴ Chírichrincha ashí arakmancha ashí numincha yajauch awajatin suritkumuyi. Antsu áyatik shuar nijaiñium Yusa naari áarar anujtukchamunak yajauch awajastin armai. ⁵ Túrasa ajaktsuk seṅku (5) nántutin wáitkiastin susamu armai. Kame titinṅ, shuaran ijiú, najawea núnis najaweatin susamu armai. ⁶ Nuṅ shuar wari jakataj tuíniayatan jákachartatui. Ti wakeruiniayatan jákatniun tujinkiertatui.

⁷ Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai. ⁸ Intiashísha nuwánu núnis armai. Najsha únt yawá naiya núnis armai. ⁹ Netsepén namaka saepea áinis jiru péeram armai. Tura nanamenaksha kaway karu japiiniak mesetnum tsékeena núnisan téter ajarmai. ¹⁰ Ujukésha titinṅki ujukeá áinis asa janṅki ajakin armai. Nujai tuke seṅku nantu yujarsar shuaran ijuar wáitkiastin armai. ¹¹ Ni uuntriṅsha náṅkatkachu waa uraimia nuyai. Nusha Israer-chichamjai Apatún tutainti. Tura Kriaku-chichamjainṅkia Apuriún tutainti. Nuka Yajauch Awajkartin tawai.

¹² Jujai emka wáitsatin naṅkaamasai. Túrasa tuke jímiar taasai.

¹³ Nuyá suntar saisa nu kachun umpuarmataí chichaman antukmajai. Yusai naka kuṅkuin ekeemaka Yus-sutai kurimpramu amai. Tura ni kuatru yantame kachu jiniimiaí. Tura nuyá chichaak ¹⁴ suntar kachu takakun saisa nuna timiaí “Kuatru suntar Eupratis kanusá pujuinia nu atiram akupkarta.” ¹⁵ Túramtai nu kuatru suntar wear menaintiu nakakam untsurí shuaran maataí tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atáfin ikiusma armai. ¹⁶ Tura suntarnasha kawainium eketainian wainkiamjai. Tura timiaí untsurí nekapmarchamnia asamtaí aya númerurín antukmajai. Nusha jimiaí siantu miyún (200.000.000) armai.

¹⁷ Tura íimiamunam suntarnasha kawaincha júnisan wainkiamjai: Eketainiaka netseppum jirun entsaru armai. Nusha kapaaku wínkia tura yanjú armai. Tura kawaisha úunt yawáa muuke áinin armai. Tura ni wenyasha jisha, mukuintiusha, asuprisha ti tsuer keá nu jíiniarmai. ¹⁸ Nu menaintiu ti yajauch wáitsamujai menaintiu nakakam shuar untsurí jákarmai. Jíjiaisha, mukuintiujaisha, asuprijaisha jákarmai. ¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin áрмаi. Nújaisha shuaran wáitkiasarmai.

²⁰ Tura nujaiisha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijaiisha, kuítjaisha, jiru yanikutakujaisha, kayajaiisha, numijaiisha najanamú ásar wainmaktinniasha, antuktinniasha, tura wekasatniuncha tujintiainiawai. ²¹ Núnisañ mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chikich kakaram suntar nayaimpinmayá táarun wainkiamjai. Nusha yurankim amúámu tura múuknum tuntíak téntakmauyi. Yapisha etsajai métek wínchauyi. Tura kujapésa ji keá áintsankeyi. ² Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menaaríní kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmayá chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uwejí untsuurín nayaimpinmaaní takuimiai. ⁶⁻⁷ Tura timiai “Penké ishichik ajasai. Suntar siatia nu umpúakuínkia Yus ashí yaunchu enentáimpramia nu uminkiatstawai. Emka ujatsuk ukunam ni shuarín Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaku pujawai. Tura imiá kakaram asa nayaimpincha, nunkancha, nayaantsancha, tura ashí nuí íronna nunasha najanaiti” timiai.

⁸ Nayaimpinmayá “áaráip” túrutmiai nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuuríní papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakemínkia yapamprattame” túrutmiai. ¹⁰ Nuyá papichin suntar numiá jukin yuamjai. Tura nii turutmia núnisañ wenuruínkia ti yumin nekapramjai. Tura antsu yuan wakeruínkia yapampramjai.

¹¹ Tura nuyá turutiarmai “Waketkim ataksha ashí nunkanmayá shuaran tura ni kapiántrincha Yus tana nu ujakartiniaitme.” Tu túrutmiai.

11

Jimiará shuar Yusaiya akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nuí Yúsan shiir awajeena nusha nekapmartá. ² Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaréñkan kuarentitús (42) nantu nuí akupeenak mash yajauch awajsartatui. ³ Túruiniakui Wikia Wii-shuaran jímiaran akatran akupkattajai. Nusha chikichik mir jimiará sianú sesenta (1.260) tsawant pujasar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímiar shuarsha nayaimpiniam nakumkamu ániawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nunká Uuntri Yusai wajainiak, jímiar akatramua nú shuaran nakumainiawai. ⁵ Shuar nin yajauch awajsataj tutaí ni wenenia jinia jíiki nemasri ashí áesatniuiti. Núnisañ nin yajauch awajsatniun

wakera nuka jákartatui. ⁶ Nu aentska Yúsnan áujmatainiak yumi yutukaip títinian kakarman takakainiawai. Núnisan entsancha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nuí páchitsuk túramin áiniawai. ⁷ Tura ni takatrín umikiarmatai Ti Kajen Yajasma nánkatkachu waanmaya jínia nu mesetan najata nupetak máawartatui. ⁸ Tura iwiarnatsuk ni ayashí uunt pepru jintiín ajapén tepeartatui. Nu péprunmasha ii Uuntrí Jesukrístuncha máawarmiayi. Nu péprunmaya shuar tuke tunaan túrin ásarmatai Ejiptu tuíniak tura núnisan Sutuma tuíniak nu péprun páchiiniawai. ⁹ Tura menaintiu tsawant nuyá nankaamas ashí nunkanmaya shuar jaka tepan ísar iwiarnascharti tiártatui. ¹⁰ Nu jákarmatai ashí nunkanam pujuinia nú shuar ni jakamun ti wararainiak má sunai ajartatui. Kame nu jimiará aents Yúsnan áujmatenak ashí shuaran wáitkiastur áarmatai ti warasarmai. ¹¹ Nuyá menaintiu tsawant nuyá nankaamas jaka tepesarmatai Yus ataksha iwiaaku awajсарmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsunnan antukarmai: “Juí yakí wakatarum.” Tu untsunmiai. Tutai ashí ni nemasrí íimiaiiniain yurañkim amuam nayaimpiniam wáarmai. ¹³ Túmainiaí ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajсарmai.

¹⁴ Jímiar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntrí Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusaí naka pujuarmia nu piniakum tepersar Yúsán shiir awajсарmai:

¹⁷ “Uunt Yusaí, ti kakaram asam Ámijiaí tujinkiatin atsawai. Yáunchusha, yamaisha, tura tuke amutsuk iwiaaku pujuwitme. Ame ti kakarmarmijiaí nekas akupkatin juarme yamaikia. Tuma asakmin yumínsajme, tiarmai. ¹⁸ Ashí shuar kajertamkaru aín yamaikia amesha kajerkatín tsawant jeayi. Jákarusha iniantkim ni túramurí íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Amin shiir awajtamsarua nusha ashí mash ti shiira nuna súakum akikattatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaaní Chícham Aarma Chumpitai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimprannia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wáitiak ti kakantar uutmiai.

³ Tumaí ataksha ti enentáimprannia nayaimpiniam wantinkiamai. Ti Kajen Yajasma kapaaku wantinkiamai. Muukésha siati asa siati akuptai tawaspan etsenkraku ármái. Tura kachurísha tíasauyi. ⁴ Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwá jatema nuí wajasmai. Júreremataik yuruataj tusa wajattsamai. ⁵ Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuí junakmiai. ⁶ Tura núwaka atsamunam pisarmai. Nuí pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwi nankaamasaiti.

⁷ Nuyá nayaimpiniam meset amai. Nayaimpinmaya suntara kapitiántrī Mikiar ni suntarjijai Ti Kajen Yajasmajai máanaikiarmai. Ti Kajen Yajasmasha ni suntarjijai ti máanaikiarsha ⁸nupetmakcharmai. Túramtai nayaimpinmaya jiiiki akupkamuyi. ⁹Núnisañ Ti Kajen Yajasma ashí ni suntarjijai nunká akupnakmai. Nu Yajasmasha iwianchi kapitiántrī Satanás tutainti. Yáunchuya-napiiti niisha. Ashí nunkanmaya shuáran anañniuiti.

¹⁰Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiiiki akupkamu asamtai yamaikia ii Yusri uwentikratniusha tura ni kakarmarin iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawai sha káshisha iniaitsuk Yusai yajauch áujmatniua nuna ¹¹fiksañ ii yachī nupetmakarai. Yus-susamu murikiu numpea áinis Jesukristu numpejai nupetmakarai. Niisha jákatniuitkiusha surimiatsuk nekas-chichaman páchitsuk et-serkarmai. Nujajsha uunt iwianchin nupetkarmai. ¹²Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantrī ishichik ajatesman nekáa ti kajekuiti.” Tu timiai.

¹³Nuyá Ti Kajen Yajasma nunká ajapna nuwá áishmankan jurerma nuna áinframai.

¹⁴Turakuí nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai. ¹⁵Nuyá nu napi ni weneya entsá jiiiki nujanrumamai nuwan ajekrataj tusa. ¹⁶Túrasha nunka nuwan yayak nakaak nu entsan mash ukuyámai. ¹⁷⁻¹⁸Túramtai nuwan ti kakerak ni weea chikich írúnna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijiai máaniaktaj tawai.

13

Nuyá Yajasma jimiara nu

¹Nuyá nayaantsa káanmatkarin wajasan nayaantsanmaya Yajasmañ jiiiniun wainkiamjai. Muukésha siátitiat kachurī tias tura akuptai tawaspasha tias armai. Ashí muukēn Yúsan yajauch chicharin tu áarmauyi. ²Nuī wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenēsha nekas kajen yawáa áinniuyi. Tura Ti Kajen Yajasma Entsaya Yajasmañ ni kakarmarincha tura ni akupkatniurincha susamai nujai ti kakaram akupkati tusa. ³Entsaya Yajasma muuké chikichin jakamnia awatmian wainkiamjai. Túrasha péñker awajnsmai. Túramtai ashí nunkanmaya shuar nuna íisar ti enentáimturar nemarsarmai. ⁴Túrawar nin tikishmatrar shiir awajsar “¿Yaki jujaisha jeá. Imiá kakaram asamtai yaki niijiai máanaikminiait?” tiarmai. Tura Ti Kajen Yajasma ni kakarmarin Entsaya Yajasmañ susa asamtai ashí shuar nincha tikishmatrarmai.

⁵Núnisañ nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶Núnisañ túrak Yúsan yajauch áujmatuk ni náarincha ni Jeeñcha tura ashí ni shuari nayaimpiniam pujuinia nunasha katsekkarmai. ⁷Tura Yusna ainia nujai mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai. ⁸Túramtai ashí shuar tuke iwiaaku átinia nu papinium ni naari yámankamtaiknumia anujkamu atsuarma nuka nu Yajasmañ tikishmatrarmai. Nu papincha Murik jaka nantakmia nu takakui.

⁹Shuar juna ántakka enentáimpratí:

¹⁰“Shuaran emeté juinia nusha emetnattawai.

Núnisañ shuaran nan kijijai mainia nusha nan kijijai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

¹¹Nuyá chikich Yajasmañ kukaria wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. ¹²Niisha Entsaya Yajasma kakarmarin súam akupniuyi. Tura ashí nunkanmaya shuaran “Entsaya Yajasma

penkē jaa tsuarma nu, shiir awajnasti” tímiai. ¹³Núnisan shuarti túrachminian ti turin asa ashí shuar íimíainain̄ nayaimpinmaya jiniá nuṅká ajuarmai. ¹⁴Tura Entsaya Yajasma súam aents túrachminian ti turak ashí nuṅkanmaya shuaran anan̄kawarmai. Túrak Entsaya Yajasma nakumkamur̄in najanawarat tusa akupkamai. Túramtai puniajaī penkē jakamnia awatmia penker ajasma nuna nakumkamur̄in najanawarmai. ¹⁵Kukariá Yajasma kakaram sunasmai. Nujaī Entsaya Yajasma najanamun̄ iwiaaku awajsatniua áintsan̄ ichachkiamai. Túram ashí níniak shiir awajeacham máatniun̄ susamai. ¹⁶Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha an̄kantcha an̄kantchasha ashí ni nijaīincha tura wakerakka untsuur̄incha anujtuktiniuyi. ¹⁷Entsaya Yajasma náarin̄ tura wakerakka ni náarī númerur̄in anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸Wats, wi tájana jū nekaatniuka ti nekas enentáimtustiniiaīti: Entsaya Yajasma númerur̄i áishmaṅka númerur̄i asa sais siantū sesentísáisaiti (666). Ashí ti neka ainia nú shuar Entsaya Yajasma númerur̄in nekapmar nin nekaati.

14

144.000 shuar Yúsán kantampruawarma

¹Nuyá Murikiun̄ Seun̄ náinnium wajan wainkiamjai. Níjijaīsha siantū kuaréntikuátru mir (144.000) shuar wajaarmai. Nusha níjiaī Murikiu náarin̄cha tura ni Aparí náarin̄cha anujtukma aarmai. ²Ti untsur̄i árpan nayaimpiniam túntuiniak teer awajenak kanusa uuntrī nujan̄krak téter ajá núnisan̄ antukmajai. Ti kakaram ipiamta núnis̄ amai. ³Nu tuntuuyamujaī siantū kuaréntikuátru mir shuar akupin̄ pujutainium naka wajasar yamar̄am kántan̄ kantamáwarmai. Niisha kuaru taṅkunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin̄ armai. Aya nu siantū kuaréntikuátru mir shuarka jū nuṅkanmaya shuarnumiá uwempraru ásar nu kántan̄ kantamiarmai. ⁴Nu shuarsha nuwajaī yajauch̄ ajascharu ásar ti shiir áiniawai. Túrawar Murik weana nūj nemarainiawai. Jū nuṅkanmaya shuarnumiá uwempraru ásarmatai Yussa tura Muriksha ti shiir enentáimtiarmai. Niisha emka juukma ti shiira núnisan̄ armai. ⁵Nu shuar penkē wáitruachu ásar Yúsaīsha ti shiir tunáa máatrachu armai.

Menaintiu suntar chichaman etserainiawai

⁶Nuyá nayaimpiniam suntar nanamun̄ wainkiamjai. Nusha uwempratin̄ chicham tuke amuukashtinia nuna ashí nuṅkanam pujuinia nú shuaran ujakartiniuyi. ⁷Nusha ti kakantar untsumuk timiai: “Yus ashamakatarum. Niṅki shiir awajsataram. Yamaikia ashí shuaran súmamtikiawartin̄ tsawant̄ jeayi. Nayaimpincha nuṅkancha nayaantsancha ashí entsancha najana asamtai shiir awajsataram.”

⁸Nuyá chíkich suntar, jímiara nu, taa timiai: “Pai, Unut Papirúnia pépruka penkē meserai. Niisha tuke tsanirmaua núnisan̄ ashí shuaran anampratniua núnisan̄ utsuurmai. Tuma asa niisha nú shuarjaī nupetnak tuke emesnarai.”

⁹Nuyá chíkich suntar, menaintiua nu, taa timiai: “Shuar Entsaya Yajasma tura ni nakumkamur̄incha shiir awajeakuṅkia tura níjiāinnumsha uwejunmsha ni naarī anujtukmaitkuṅkia ¹⁰Yus nin kajerak ti asutiáttawai. Yapá pachimprachman áartinia áintsan̄ ti kajerkattawai. Túramtai asupri ti tsúer keá nujaī jiniun̄ wáitsartatui. Yusa suntarī tura Murik íimmianun̄ apenáwar jiniun̄ wáitsartatui. ¹¹Ni wáitsatniur̄ ji esaak kajintsuk tuke mukuintia nuniskete. Entsaya yajasma tura ni nakumkamur̄in shiir awajenak ni naarī anujmamainia nuka tsawajsha káshisha ayamtsuk wáitsartatui. ¹²Nu asamtai ni chichamen̄ umirainiak Yusna ainia nuka Krístun̄ ti shiir nemarainia ásar nu tsawantaī itirchatnum pujuiniak katsuntrat̄in̄ áiniawai.”

¹³Nuyá nayaimpinmayā chichaman antukmajai. Nusha turutmiai “Jū áatratá: “Uunt Jesusan̄ umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan̄ Yusa Wakan̄i tawai. “Eta, ti takasaru ásar jakar yawerman̄ ayamprartatui. Tura ti penker túrawar akinkiertatui” tawai” turutmiai.

Jú nuñkanam arakma juukma

¹⁴Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijjai najanamu etsenkrakuyi. Tura machitian éren takakuyi.

¹⁵Tura chíkich suntar Yusa Uunt Jeenia jiinki yurañminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.” ¹⁶Tutai yurañminiam eketu ni machitrijjai nuñká arakman tsupir juukmai.

¹⁷Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. ¹⁸Tura chíkich suntar naman maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujai uwa nuñká arakma nu tsupiram juuktá. Mash tsamakarai.” ¹⁹Tutai suntar ni machitrijjai ashí nuñkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiáta nuna nakumeawai. ²⁰Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres siantu (300) kirumitrua nuí pajamar kawayu nujijiai métek ajasmai.

15

Nayaimpinmaya suntar amúamunam wáitkiastinia nuna piniñnumiñ ukainiawai

¹Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nuñkanam yajauch shuáran ti wáitkiasar Yus kajeamun umirtatui.

²Nuyá antumianka áiv 20 Tura uunt péprunmaya aranntsai ti saar jijiai pachimpramun wainkiamjai. Ni káanmatkarincha Entsayá Yajasma nuna ni nakumkamurincha nupetkarma nu nuí wajaarmai. Tura nin arpa tuntutitaiin Yus súsarmai. ³Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha pénkera nu túriniaitme. ⁴Uuntá, ¿yaki ashampromkachat? Tura yaki ti shiir awajtamsachat? Aya Amek ti shiir tunaarinchaitme. Ashí nuñkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵Nuyá atak Yusa Uunt Jeeñ ísan, Ti Shiir Tesaamun uranniun wainkiamjai. ⁶Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armái. Netsepnumsha kurin emenmama armái. ⁷Nuyá kuaru tanñunmaya chikichik kurí piniñkian súsarmai. Nu piniñ tuke iwiaaku Yusa kajetairijjai piaku armái. ⁸Tura Yusa kakarmari ti ashammai Ti Shiir Tesaamunam mukuñtiua núnis piakmai. Túramtai nu siati suntar wáitkiastinian ukarar amuiniatsaiñ Yusa Jeeñ wayachminiuyi.

16

Wáitkiastin piniñ ukararma

¹Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nuñká werum Yusa kajetairi siati piniñnum ana nu ashí ukartarum.”

²Tutai emka suntar we, piniñnumiñ kukar ukarmai. Túramtai ashí shuar Entsayá Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³Nuyá chíkich suntar jíimiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuí pujuinia nu kajinñkiarmai.

⁴Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai. ⁵Nuyá suntar entsá wáinnia nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme. ⁶Iis, nu shuar amée shuárunincha tura ame chichammin etserniuncha máawar ni numpen

ukatraru ásarumatai Amesha núnismek numpa áarume. Maa, páchitsuk áitkianatin áiniawai.”

⁷Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸Nuyá suntar kuatrua nu, tsawai nantunam ukarmai. Túramtai jijjiai shuáran esaamujai wáitkiastin kakaram sunasmai. ⁹Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimtsuk Nin shiir awajsatniuncha penké nakitrarmai.

¹⁰Nuyá suntar senkua nu, Entsaya Yajasma akupin pujutairin ukarmai. Túramtai ni nuñken ashí kashi ajasmai. Tura shuar ti najaimiainiak iniaincha esamiarmai.

¹¹Tura nújajisha yajauch túratniuncha iniaisacharmai. Antsu kuchaprijjajisha tura ti najaimiainiak wáitaiainiak nayaimpinmaya Yúsan ti yajauch chicharkarmai.

¹²Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaania akupin taarti tusa jintiamnamai.

¹³Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukaria Yajasma ántar yúsan etsermia nuna weneyasha puachia núnin yajauch wakan menaint jíniarmai. ¹⁴Íwianch ániak aents tujintiamun túruiniak ashí nuñkanmaya akupniun irurarmai. Ti Tujincha-Yusai ni uunt tsawantrij jeamtai mesetan najanatai tusar weriarmai. ¹⁵(Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.) ¹⁶Tura yajauch wakan uunt akupin áinian Armajetún nuñkanam irurarmai. Israer-chichamnum nu nuñka tu anaikiamuiti.

¹⁷Nuyá suntar siatia nu, nasenam ukarmai. Túramtai nayaimpinmaya Yusa Uunt Jeenia ti kakaram chicham Yus akupin pujutainmaya chichaak “Mash uminkiai” timiai.

¹⁸Tura nuyanka peemsha, chárpisha, ipiamtasha ajamai. Tura nuñkasha ti kakaram úrkamai. Maa, aents jú nuñkanam yámankamtaik pujuarmia nuyá júnis úrkamuka atsuwiti. ¹⁹Ti Uunt Péprusha menaint nakantramai. Ashí nuñkanmaya péprusha saanakiarmai. Nuñsha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai. ²⁰Entsá ajapén atentrasha tura murasha menkaramai. ²¹Núnisan nayaimpinmaya uunt kaya núnisan micha kákeramai. Ti uunt ániak kintiarjai métek kijin armai. Shuarsha nujai ti wáitaiinaiyatan áyatik Yúsan yajauch chicharkarmai.

17

Tsanirmatai nuwá asutiámu

¹Nuyá siati suntarumia chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. ²Ashí ju nuñkanmaya akupin nijjiai tsanirmawaru áiniawai. Núnisan ashí ju nuñkanmaya shuar, nu nuwá tsanirmatniun tsankateam, nijiamanch umartinia áintsar nijjiai ti yajauch túrawar nampekarmai.” Nuna taku Yusnumia kanaktinian nakumkamai. ³Nuyá mesekranam kampuntin atsamanun jurukmiai. Tura nuj Yajasma kapaakunam nuwá eketun wainkiamjai. Nu Yajamanmasha ashí Yúsan yajauch chichareamu átramuyi. Muuke siátitiat kachurj tiásauyi. ⁴Nu nuwasha tarachin yamakai kapaakujajisha ti shiir iwiarmamar entsaruyi. Kurijjajisha, shírmach kayajajisha, ti shiir sháukjajisha iwiarmamprauyi. Kurí piniñkian muñjmiainnisha tura ashí ni tsanirmatairj imiá yajauch armia nunasha piakun ajaamak takakauyi. ⁵Nijjainiumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nuñkanam Muñjmiainian Túrinia Nunasha Nukurinti. ⁶Nu nuwasha Yus-shuar Kristunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷Túrunamtai nayaimpinmaya suntar túrutmiai “¿Urukamtaí imiá enentáimtam? Wats, ashí nuwanun paant ujaktatjame. Núnisan

yajasma ekenak júana nunasha paant ujaktatjame. Muukésha siátichukait tura kachurisha tiáschak áinia. ⁸Nu yajasma wáinkiam nuka yaunchu pujuwiti tura yamaikia juí pujachiat amúamunam tuke játsuk nánkatkachu wágnmaya jíinkittiwai. Shuar nuna wáinkiar ni naarí tuke iwiaaku pujutai papinium yámankamtaiknumiá anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiattawai' turutmiai.

⁹"Nekas neka ainia nu juna enentáimturarti: Siatí muukenka siatí náintian nakumui. Nu nuwá nuj eketuí. ¹⁰Núnisan ni siatí muuke siatí akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashatui. ¹¹Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siatí akupniujai iruram métek enentáimpramniaiti. Tura nu yajasma yamaikia atsayat wantiniak akupak umik tuke emesnartinnium wétatui' turutmiai.

¹²"Tias kachurí wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajastatui. ¹³Ju tias akupniusha métekrak enentáimianiak ni kakarmarín yajasma sústartatui nújaisha akupkat tusar. ¹⁴Murikjaisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Nijjai írutraa nu, Yus Winia atí tusa achikma ásar tura Nin tuke umirin ásar Nijjai nupetmakartatui.'

¹⁵Suntar tuke chichartak turutmiai "Tsanirmatai nuwá nayaantsanam uku eketu wáinkia-achumek. Nu nayaantsaka ashí nunkanmaya shuáran nakumeawai. ¹⁶Tura tias káchuka yajamanum wáinkiam nu, tsanirmatai nuwá nakitrar ajapawar misú ikiukiartatui. Ni ayashíncha yuawartatui tura áesawartatui. ¹⁷Nu akupniun enentáin Yuska ni wakeramurín apujsaiti. Nii timia nu umintsain akupniusha métekrak enentáimprar ni kakarmarín takamsuk yajasma súsatniun enentáimtikramai. ¹⁸Nuwá wáinkiam nuka ashí nunkanmaya akupniun akupeana nu pépruiti."

18

Papirúnia emesramuiti

¹Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. ²Tura ti kakantar chichaak timiai "Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairísha ajasai. Mujimiai nanamtincha tura ashí yajauch nanamtin ainia nusha nuí pasunmainiwai. ³Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsán iniaisar nijjai tsanirmawarua áinis áiniawai. Tura shuarsha ni yajauch waramajai ti kufrintin ajasaruiti." Tu timiai.

⁴Nuyá nayaimpinmaya ti kakantar chichaman antukmajai. "Wíi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniuríncha pachiinkiatarme. ⁵Ni tunaarísha ti piak nayaimpiniam jeastatuk ajasai. Tuma asantai Yus ni tunaarín kajinmatkichuiti. ⁶Ni tunáa túramujai métek akíkiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. ⁷Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias "Uunt Akupniuitjai. Wajechu asan penké wáitsashtiniaitjai" tu enentáimtumawai. ⁸Tuma asantai ti wárik chikichik tsawantai ni wáitsatniurí tarittiwai. Jákatniusha ti wáitsatniusha tura tsukasha tarí ashí jijjai keemankattawai. Uunt Yus ashí Tújincha nu kajer kamu asa nujai asutniáttawai." Tu timiai.

⁹Ashí nunkanmaya akupin nijjai tsanirmawaru ainia nu ashí yajauchin nijjai wararsaru ásar nu pepru esaak múkuint ajakui eáramai. ¹⁰Ti esaak wáitiakui nuí pachiinkiar wáitsatniun ashamainiak arant wajasar tiartatui "Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniurí tarini."

¹¹ Núnisañ ashí nuñkanam súrín ainia nusha nu péprun ti kuntuts enentáimturar eágartatui. Ni surutain itiamun ¿yaki sumarkat? ¹² Kame juna itiaru áiniawai: kurincha, kuftniasha, kaya shífirmachincha, ti shiir sháuknasha, ti péñker tarachniasha, akupin entsatai shíirmachin yamakaincha kapañniuncha, sétancha, itiaru áiniawai. Núnisañ ashí kuñkuin numincha, ti shiir awara najanamuncha, ti shííram numincha, yanjú jiruncha, péñké jiruncha, mármur kayancha itiaru áiniawai. ¹³ Núnisañ ishpiñnasha, nusháa kuñkuinniasha, mira kuñkuinniasha, umutaincha, asuitincha, trikiu nerenchá, tura trikiu ti péñker nekenmancha itiaru áiniawai. Núnisañ áintstai tañkuncha, murikniasha, kawaincha ni kárurijiaí, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí neren ti wakeruk súmauya nu yamaikia nuí atsawai. Ashí ni kuítrisha tura ashí ni péñkerisha tuke péñké amukayi.” Tu tiarmai.

¹⁵ Ashí nuna súrín armia nu, nuna surukar kuítrintin ajasaru ásar, ti wáitsamun ashamkar arant wajasar eágartatui. ¹⁶ Túrawar tiartatui “Maa, uunt pépruítat ti wáitnenmai ajakai. Nuwa ti péñker iwíarmampra áinis nuyá shuar akuptai tarachin yamakajiaí kapañaku entsarmai. Kurijiaísha kaya ti shíirmachijiaísha tura ti péñker sháukjiaísha ti shiir iwíarmampraruyi. ¹⁷ Ti wárik ashí ju kuit amukaiti.” Tu tiarmai.

Ashí uunt kanú kapitáintriñsha, ashí nayaantsanam katiinia nusha, ashí kanú wáin-niusha, tura ashí kanú nérennurjisha árantak wajasarmai. ¹⁸ Tura pepru esaak múkuint ajan wáinkiar ti kakantar útainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatnamar kakantar útainiak tiarmai “Maa, ti uunt pépruítat ti wáitnenmai ajakai. Ashí uunt kanu nérentin nayaantsanam niijiaí takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniu-tirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan júki nayaantsanam ajun timiai “Júnisañ uunt pepru Papirúnia emesnar atakka wainniakchatin tuke meñkakatatawai. ²² Tura atakka jantsema piñkiuisha tampursha shapaksha antunkashtatui. Nu arantcha nuñkia shuar péñké takakmaschartatui. Túramtai nekeamusha antunkashtatui. Ashí mitia átatui. ²³ Shiripkincha ekeemakchartatui. Nuatma nampersha antunkashtatui. Nuiklia ni shuari súrín arma nu ashí nuñkanam nañkaamantu armai. Tura ashí nuñkanmaya shuaran waweatniua áintsañ níiya núnis ajasarat tusa anañkawarmai. Túrashá núnisañ ti kakarmaitiat ju mash túrunayi.” Tu timiai.

²⁴ Kame ni akupkamujai péñker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nuñkanam maamu ainia nuna numpesha nu paant wáinkiamniaiti.

19

¹ Nuyá nayaimpinmaya ti untsurí aents kakantar unsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nañkaamaku átinniasha, tura ashí kakarmancha nekas nérenniuiti. ² Niisha aya nekas péñker túratniua nuna túrin asa ti nukap tsanirmaun ashí shuaran tsanirijiaí utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

³ Ataksha kakantar unsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuñiakui paintikuatru uunta nu tura kuaru tañkusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitáinikiurmesha péejchachitkiurmesha, ii Yusri tuke shiir awajatarum.” Tu timiai.

⁶Nuyá ti untsurí aents chichainiak kanusa uuntrí nujan̄krak téter ajá núnisan̄ antukmajai. Ti kakaram ipiamta núnis amai.

“Tí shíraití, tiarmái. Ii Uuntrí Yus ashí tujincha asa ashí akupkatniun nan̄kaamayi.

⁷Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantrí jeayi. Tuma asamtai ti shiir warasar nincha shiir awajsatai. ⁸Murikiu anajmarmarīnkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmái.

Nu pushí Yus-shuar péñker túramun nakumeawai.

⁹Nuyá nayaimpinmaya suntar turutmiái “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiái. Jūka Yus timia asa imiá nekasaiti.”

¹⁰Takui nu suntaran shiir awajsataj tusan tikishmatramjai. Túramtai turutmiái “Peñke áinkiaip. Wisha Yusa yáintrin̄tjai ámijijai métek tura yatsumjai métek Kristu nekas chichamen̄ tuke umirin ainia nu. Yúsak shiir awajsatniuiti.” Tu turutmiái.

Kame Kristu imiá nekas timia nuna ashí Yúsnan etserainia nú shuar paant awajkartin ániawai.

Kaway pújunam eketna nu

¹¹Nuyá nayaimp uranniun wainkiamjai. Nuí kaway puju wantinkiamai. Nu kawayniun ekeema nuna naarī Ti Peñker Umin tutaiyi. Núnisan̄ Ti Nekas Turin tutaiyi. Ti peñker Akupin asa aya nekas péñker túrak mesetan najanaiti. ¹²⁻¹³Ni jiīsha jiījai métek keeármái. Múuknumsha akuptai tawaspan untsurí etsen̄krakuyi. Nuí ni naarī Yus Chicham áarmauyi. Túrasha tana nuna Niñki takamtsuk nekaamái. Numpajai en̄kerman entsaruyi. ¹⁴Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmái. ¹⁵Nu suntara Uuntrí weneeya, ashí nun̄kanmaya yajauch shuaran máatin, puniá mai ere tsakatskatin jjin̄miai. Tura jirujai asutiátniua áintsan̄ ti kakaram akupkattawai. Túrak Ashí Tujincha Yusa kajetairí ti kakarma nujai shuáran asutiáttawai. Uwa neken̄kar ijiuratniua áitkiasan̄ wáitkiasartatui. ¹⁶Ni pushirin̄cha makuin̄cha ni naarī áarmauyi: Ashí Akupniun Akupin tura Ashí Uunta Uuntrí.

¹⁷Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin̄ yurumáitiarum.

¹⁸Akupniu namañkés̄sha yuítiarum. Suntara kapitántrí namañkés̄sha, kakaram suntara namañkés̄sha, kaway namañkés̄sha tura eketainia nuna namañkés̄sha, kame ashí shuara namañkés̄sha nan̄kaamantu ainia núnasha tura peñké shuar ainia núnasha yuítiarum.” Tu untsukmai.

¹⁹Tura nuyá Entsayā Yajasmancha tura jú nun̄kanam akupin ainia nunasha ashí ni suntarijjaī wainkiamjai. Niisha kawainium eketka nujaī tura nuna suntarijjaī mesetan najanatai tusar iruntrarmái. ²⁰Tura nu mesetnum Yajasmasha tura Kukariá̄ Yajasmasha, peñké ántar yúsnan etserniua nu, mai achinkiarmai. Nuik̄kia Entsayā Yajasma ni kakarmar̄in̄ sám nu Kukariá̄ Yajasmaka aents tujintiamun ti turak shuáran anan̄kawarmái. Túramtai nu shuar Entsayā Yajasma náarin̄ apujmamsar ni nakumkamur̄in̄ shiir awajsarmái. Tuma asamtai Entsayā Yajasmacha tura Kukariá̄ Yajasmacha íwiakuk asuprijjaī ti kea nu ji-antumian̄num apeáwarmái. ²¹Chíkichka kawainium eketkanumiá̄ puniá tsakatskatin weneyā jjin̄mia nujaī mantamnawarmái. Túramtai nanamtin ni ayash̄in̄ yuawar ejemakarmái.

20

Kristu mir uwí jú nun̄kanam akupkattawai

¹Nuyá nayaimpinmaya suntar táarun wainkiamjai. Nusha náñkatkachu wáa yawirin̄ tura jin̄kiatai jirun̄ kampurman takakuyi. ²Nu suntarsha Ti Kajen Yajasma jiru kam-purmajai jin̄kiamai. Nu Yajasma iwianchi kapitántrí Satanas tutainti. Yáunchuya-napiti niisha. Tura nu iwianchin̄ jin̄kiá mir uwí pujusat tusa ³náñkatkachu wáanam epen̄miai.

Tura waiti uraichminian anujtukmai. Mir uwí nan̄kaamatsaj̄in ashí nun̄kanmaya shuaran an̄ankawaraj̄in tusa túramai. Antsu mir uwí nan̄kaamasmatai ishichik tsawant an̄kant akupnaktiniaiti.

⁴⁵Nuyá akupin pujutainium pujuinian wainkiamjai. Tura shuara túramur̄in firsarat tusa kakaram sunasarmai. Tura núnisañ muuke tsupirka maamu wakan̄incha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumkamur̄incha tikishmatracharu armai. Núnisañ náar̄incha nijiañinumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Kristujai métek mir uwí akupeamun wainkiamjai. Antsu chíkich jákaruka mir uwí nan̄kaamatsaj̄in nantakcharmai. ⁶Antsu emka nantaktin tsawantnum pachiinkiarua nú shuar, ti pen̄ker áimak, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisañ Kristunu tuke takarin ártatui. Tura Kristujai métek mir uwí akupkartatui.

⁷Tura mir uwí nan̄kaamasmatai uunt iwianch urani akupnaktatui. ⁸Túram ashí nun̄kanmaya shuáran an̄ankawartaj tusa jíinkittiawai. Kuk nun̄kanmasha tura Makuk nun̄kanmasha ashí pujuinia nuna an̄ankawartatui. Tura mesetan najanataj tusa ni suntar̄in nekapmarchamnia ti untsur̄i irurtatui. ⁹Tura ashí nun̄kan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimp̄inmaya jinia akuptuk mash áesawarmai. ¹⁰Tura iwianchi kapitíántr̄i, nin an̄ankawarmia nu, asuprijjai keá ji-antumiannum apenámai. Nu yaunchusha Entsaya Yajasmasha tura Kukaria Yajasmasha, pen̄ké ántar yusnan etserniua nu, nuí apenáwarmai. Nuísha tsawaísha káshisha iniañnatsuk ti wáitsartatui.

Ashí amúamunam súmamtikiatin tsawant

¹¹Nuyá akupin pujutain úuntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nun̄kasha nayaimp̄isha aya men̄karar tuke atsúarmai. ¹²⁻¹³Tura túrunatsaj̄in nayaantsanam jákarua nusha jíinkiarmai. Núnisañ iwiarsamunam jaka pujuinia nusha jíinkiarmai. Tura jákaruncha, nan̄kaamantu arma nunasha tura pen̄ké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamur̄i paant nékaneakuí súmamtiknawarmai. Tura chíkich papisha tuke iwiaaku pujustin papí urankamai. ¹⁴Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. ¹⁵Tura ashí shuar ni naar̄i tuke iwiaaku pujustin papinium atsúarma nusha nuí apenáwarmai.

21

Nayaim yamaram tura yamá nun̄ka

¹Nuyá nayaimp̄isha tura nun̄kasha men̄karamtai nayaim yamarman tura yamá nun̄kancha wainkiamjai. Tura nayaantsasha atsumai. ²Wi, Juan, ti shiir péprun, Yusnumia yamaram Jerusar̄enkan nayaimpinmaya táarun, wainkiamjai. Anajmarra ni áishr̄in in̄kiuntaj tusa ti shiir iwiarmampra áintsañ ti pen̄ker iwiaramuyi. ³Nayaimpinmaya ti kakantar chichaamun antukmajai. “Iisía, Yus yamaikia aentsjaj̄i pujawai. Tuke nijjaj̄i pujakuí ashí ni shuar̄i ártatui. Tura nijjaj̄i tuke pujak nekas tuke ni Yusr̄i ártatui. ⁴Yus ni neajkin ujujturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

⁵Tura akupin pujutainium ekema nu “Iistá, Wi ashí pen̄ké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” ⁶Ataksha turutmiai “Yamaikia mash uminkiyi. Wiitjai. Yámankamtaiknumia amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan pen̄ké kuítchajaj̄i áartatjai. ⁷Nupetmakunka ashí yamarra juna mash susattajai. Wisha ni Yusr̄i ártatjai. Núnisañ niisha winia uchr̄i ártatui.

⁸Antsu sápijkiá, Yúsán enentáimtichusha, yajauchin máatrasha, mankartincha, tsanir-matan pujurniusha, wawekratniusha, ántar-yusan tikishmatniusha, tura ashí wáitrincha asuprijíai keá ji-antumiannum apenáwartatui. Nuka jimiará jákatin tútainti.”

Yamaram Jerusaréñ

⁹Nuyá siati suntar piniñ amúamunam wáitkiastinjai piakun takakua nuyá chikichik taruti túrutmiai “Winitíá. Murikiu anajmarmarín iniaktustatjame.” ¹⁰Taku mesekranam naint yakí jurukí Yusnumiá ti shiir Jerusaréñ pepru nayaimpinmaya táarun iniaktursamai. ¹¹Nu péprusha Yusa wincharíjijai tsáapniniuyi. Nu tsáapnincha kaya ti shífirmachia núnis jaspi kaya nuní saar asa ti tsáapniniuyi. ¹²Pepru yantamesha ti yakí péñkramuyi tura wáitiri tuse amai. Tura nu wáitiniun suntar wajatiarmai. Nu wáitinmasha Israer-shuara uuntiri tuse armia nuna naarí áarmauyi. ¹³Nantu tátainmaaní menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai. ¹⁴Ti uunt kaya tuse apujsamu armái. Tura nuí ekenir péñkramuyi. Nu tuse kayanam Murikiu akatramuri tuse armia nuna naarí áarmauyi.

¹⁵Suntar wijíai chichaua nu, nekapmatain kurin takakuyi. Nujai pépruncha, wáitirincha, tura péñkramurincha nekapmartiniuyi. ¹⁶Pepru esantísha wan Kantísha yakirísha mash métekrak armái. Suntarsha péprun nekapmataijíai nekapmaram esantísha wan Kantísha tura núnisan jeamkamu yakirísha jimiará mir jimiará siantu (2.200) kirúmitru amai. ¹⁷Nuyá péñkrincha nekapmarmái. Suntar aents nekapmataijíai nekapmaram sesentiku-atru (64) mitru amai. ¹⁸Nu péñkramusha jaspi kayajai najanamuyi. Péprusha aya kúrikiyi. Nu kuri ti penker sáarauyi. ¹⁹Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jimiara nusha sapiru káyauyi. Menaintiua nusha ákata káyauyi. Kwatrua nusha ismirártauyi. ²⁰Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shífirmachiui. ²¹Pepru wáitiri tuse ainia nu, ti shiir nayaantsanmaya shaukjai chikichik najanamu armái. Pepru jintísha aya kúrikiyi. Nu kuri ti penker sáarauyi.

²²Yusa Uunt Jeecha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi. ²³Nu péprun-masha tsawai-nantusha kashí-nantusha atumchamai. Antsu Yusa wincharí tsáapin awajmiai. Núnisan Muriksha tsáapin awajmiai. ²⁴Nu tsáapnijíai sha ashí nunkanmaya shuar wekasartatui. Tura ashí nunkanam akupin ainia nusha nuí yujainiak ni péñkerijíai nuna shiir awajtuiniawai. ²⁵Tura kashi atsá asamtai tuke tsawaiti. Tuma asamtai wáitiri tuke epenchamu ártatui. ²⁶Tura ashí nunkanam péñker ana nuna nuí itiaartatui. ²⁷Tura yajauchikia penké wayashatatui. Muíjmiainian túrincha tura anankartincha penké wayachartatui. Antsu áyatik shuar tuke iwiaaku pujutai papinium naarí aarma ainia nuke wayawartatui. Nu papincha Murik takakui.

22

¹Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiiinmiai. Nu pujutaisha Yusna tura Muriknauyi. ²Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésha ashí nunkanmaya shuar tsuámatainti. ³⁻⁴Ashí yajauchia nuka atsuttawai. Uunt akupin pujutai, Yúsnasha Murikniasha, nuí aa asamtai ni shuari ti paant wainiainiak tikishmatrartatui. Tura nijiaíncha ni naarí anujmamkartatui. ⁵Tura káshisha atsuttawai. Nuí pujuinia nuka shiripkincha etsanacha atumchartatui. Uunt Yúsak tuke tsáapin awajtiatui. Tura ni shuari tuke iniañnatsuk akupkartatui.

Jesukrístu tátintri penké nuntumsai

⁶Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichamen enentáimtikramia núnisan yamaikia ni suntarín akuptuk wárik túrunatta nuna ashí ni shuarín ujakuíti.”

⁷“Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸Wi, Juan, juna mash ísan mash antukmajai. Tura mash ísan antukan nayaimpinmaya suntar iniaktursama nuna shiir awajsataj tusan tikishmatramjai. ⁹Túram turutmiai “Peñke áinkiaip. Wisha Yusa yáintriñtjai ámijiaí métek tura yatsumijiaí métek. Yúsnañ etserin ásar tura ju papinium áarma nuna umirainiak Yusa yáintri áiniawai niisha. Yúsak shiir awajstniuiti.”

¹⁰Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹Nu jeatsainkia yajauch shuarka tuke yajauch túruki wetí. Núnisañ mujmiainian túraka tuke túruki wetí. Antsu péñkeran túraka péñkeran túruki wetí. Núnisañ esetar enentáimniusha tuke esetar Yusjai wekasati.”

¹²Muriksha tawai “Eta, ti wárik winittiajai. Túran ti shírmachin ashí péñker túramujai métek súsatniua nuna takukin winittiajai. ¹³Wiitjai. Yámankamtaiknumia amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴Ni pushiri péñker nijiamatniua núnisañ péñker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti. ¹⁵Tura antsu Yúsnañ enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aa matsatainiak peñké wayachmin áiniawai.

¹⁶“Wi, Jesus, ashí Yus-shuaran ujakarát tusan winia suntarun akupkajai. Wikia Tawit Weeitjai. Túrasha Tawitia Úuntriñtjai. Wikia ti tsáapin yaa, yáñkuamia áintsañketjai.” Tu tawai.

¹⁷Yusa Shiir Wakanjsha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan peñké kuítchajai umartí.

¹⁸Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsattawai. ¹⁹Núnisañ shuar juí áarman emeneakuñkia Yus ni naarin iwiaaku pujutai papiniumia japirattawai. Tura ti shiir péprunam wayatniun suritkiattawai. Nu péprusha tura nu papisha juí paant ujakma áiniawai.

²⁰Jú papí áantratniun ujakua nu tawai “Eta, ti wari winittiajai.” Pai, núnisañ atí. Wari winitia, Uunt Jesúsá.

²¹Ii Uuntri Jesukristu atumniasha shiir yainmakarti.

Nuke atí.